

近代中國史料叢刊第十五輯

沈雲龍主編

靳文襄公（輔）奏疏

靳治豫編

文海出版社印行

從來言水利者惟在疏泄  
得宜節宣利導俾水無失  
其性而我

朝定鼎以來歲漕東南四百餘  
萬石以寔

天庾轉輸之力全資水利治河

即以治漕是非熟審乎黃  
運湖河之勢權衡在手高  
下在心者未易膺斯寄也  
文襄靳公以經濟名臣由皖  
撫擢授河督

聖祖仁皇帝知人善任畀以全河

重寄

聖謨廣運指授方畧而公亦寔能  
以河務自任仰遵

廟筭悉心籌畫其間沿革異制古  
今異宜蓄洩異勢緩急異  
形以及經費之所出群材



之委任莫不寔全局於胸  
中運機宜於指掌數年之  
間兩河循軌奏績安瀾運  
道無梗而民生利賴焉其  
功不可謂不偉矣方公之  
甫任事也正值河患孔棘

黃水倒灌高堰潰決黃淮  
合併東下淮揚大困州縣  
所在告災公一蒞任即審  
度形勢經營擘畫次第興  
舉先大挑山清高竇運河  
而水由地中行矣又開白

洋清河以東引水河而黃  
河始入海矣又開清口爛  
泥涉渚引河而淮水始出  
敵黃矣又於清口以下疏  
通雲梯關出海故道而下  
流之水得所歸宿又創築

周橋翟壩堤工置減水六  
壩以時宣洩而淮水暢流  
會黃揚屬亦免阡危矣至  
於開濬中河以避黃河之  
險艱改拖皂河以免駱馬  
湖之淤墊是皆設施之尤

大者惟其深思遠慮因時  
制宜用能上契

宸衷下全漕運宜

天眷優隆有寔心任事之褒也公  
處河工積弊之後毅然振  
作不避勞怨其陳經理事

宜一日而上八疏剴切周  
詳言之碩畫其他築堤建  
閘堵決疏滯以至防險保  
固斟酌損益之宜凡見諸  
章奏者悉綢繆於未雨之  
先而補救於既敝之後所

謂熟審乎黃運湖河之勢  
權衡在手高下在心者非  
公誰與歸也公著有治河  
書奏疏共若干卷論事調  
暢敷陳有體卓然成一家  
言今少司空奉

天子命協理河務追念前猷咨  
嗟手澤裒輯前後疏稿悉  
以鋟板世濟其美樹勲  
兩朝誠盛事也予故於剞劂之  
成樂為一言以序之

賜進士出身光祿大夫兵部尚



書兼都察院右副都御史  
總督淮揚等處地方提督  
漕運海防軍務兼理糧餉  
閔中張大有謹撰



靳文襄公奏疏目錄

卷一

治河題藁

恭報到任

河道敝壞已極

經理河工第一疏 挑清浦至海口

經理河工第二疏 挑疏清口

經理河工第三疏 高堰坦坡

經理河工第四疏 包土堵凌

卷之三 河工 疏 挑運河

經理河工第五疏 挑運河

經理河工第六疏 設處錢糧

經理河工第七疏 裁併河官選調賢員

經理河工第八疏 添設兵丁

男 治 豫 編 次

孫 樹 德 校 正

曾 孫 光 烈 全 校 字

靳文襄公奏疏卷一

總督河道提督軍務太子太保兵部尚書兼都察院右副都御史臣靳輔

治河題藁

恭報到任疏

題爲恭報微臣到任日期事案於康熙十六年三月初

十日准吏部咨令臣將安徽巡撫

勅印照例交與江南總督臣阿席熙署理文到之日并令

臣速赴新任與

欽差大臣會同察審河務等因臣於三月二十八日已將

與督臣交代過緣由

題明在案臣隨於本日行至浦口地方准前任河臣王光裕咨將伊坐名

勅書一道總督河道提督軍務關防一顆

王命旗牌十面副并書吏員役文冊等項差標下中軍副將陳傑兗州府運河同知葉方恒齋送到臣臣跪接收領隨星速兼程於四月初五日前抵宿遷縣地方臣於初六日卽在宿遷到任恭設香案望

闕叩頭謝

恩開印任事訖惟是臣庸愚駑鈍謬膺

簡命當此河工萬艱之時凜惕悚惶不安寢食祇有

畢竭頂踵以盡臣職於萬一而已至於一切興利釐  
弊疏濬隄防事宜容臣細加確核次第入

告其察審河務一案見在與

欽差吏部侍郎折爾肯等審取口供卽於本月初七日出  
宿遷起身前往淮揚等處俟勘實之日另行會

題外所有微臣到任受事日期相應題

報又查拜

進本章例應候滿三件然後彙同繕發今臣到任日期不  
敢遲報是以不及候三件之例卽行恭

進理合一併聲明伏乞

皇上睿鑒施行

河道敝壞已極疏

題爲河道敝壞已極修治刻不容遲臣謹先陳淤塞之原并將因勢利導之策分疏具題仰祈

皇上睿鑒速賜允行以通運道以足額賦以拯昏墊之民生以保見在之田土事竊微臣本駑駘陋質荷蒙

皇上殊恩授爲安徽巡撫奉職六載寸善無聞乃

皇上不以臣爲庸劣反加優擢陞爲河道總督臣拜

命以來夙夜兢兢旣感且懼感者感

皇上知遇隆恩臣雖肝腦塗地無以圖報於萬一懼者懼



臣才庸體弱惟恐不足當茲重任有負

皇上簡拔之盛心也是以臣朝夕孜孜惟虞隕越計自四月初六日於宿遷縣到任之後雖會同

欽差侍郎臣折爾肯等察審河務會勘雲臺山等事一面卽徧歷河干廣諮博詢求賢才之碩畫訪諳練之老成毋論紳士兵民以及工匠夫役人等凡有一言可取一事可行者臣莫不虛心採擇以期得當歷今兩月有餘竭盡臣之耳目心思備稽當日所以敝壞之緣由力求今日所應補救之次第大抵治河之道必

當審其全局將河道運道爲一體徹首尾而合治之  
而後可無弊也蓋運道之阻塞率由於河道之變遷  
而河道之變遷總緣向來之議治河者多盡力於漕  
艘經行之地若於其他決口則以爲無關運道而緩  
視之殊不知黃河之治否攸繫數省之安危卽或無  
關運道亦斷無聽其沖決而不爲修治之理矧決口  
旣多則水勢分而河流緩流緩則沙停沙停則底墊  
以致河道日壞而運道因之日梗是以原委相關之  
處斷不容於岐視也今若不察全局之情形事勢而

因循故事漫爲施工則堵東必西凌堵南必北凌徒  
費時日徒糜錢糧而終歸無益豈惟無益將河患日  
淡而莫可救藥矣何也黃河之水從來裹沙而行水  
合則流急而沙隨水去水分則流緩而水漫沙停沙  
隨水去則河身日淡而百川皆有所歸沙停水漫則  
河底日高而旁溢無所底止故黃河之沙全賴各處  
清水併力助刷始能奔趨歸海而無滯也查今日河  
患之所以日淡者皆因順治十六年至康熙六七年  
間所冲之歸仁堤古溝翟家壩王家營二舖口邢家

口等各處決口不卽堵塞之所致也蓋歸仁一堤原以障睢水并永堦邱家白鹿諸湖之水不使侵淮且令由小河口白洋河二處入河助黃刷沙者也自順治十六年歸仁堤冲潰之後睢湖諸水悉由決口侵淮不復入黃刷沙以致黃水反從小河口白洋河二處逆灌停沙積漸淤成陸地至康熙六七年間各處大水黃淮竝漲黃漲而王家營二舖口邢家口等處冲潰矣淮漲而古溝翟家壩等處冲潰矣王家營二舖口邢家口等處冲潰之後黃河之水由決口四漫

者多而由雲梯關外入海者少古溝翟家壩等處冲潰之後淮河之水由高寶諸湖直射運河冲决清水潭下滄高江等七州縣之田者多而赴清口會黃入海者少河淮兩水俱從他處分洩不復併力刷沙以致流緩沙停海口積墊日漸淤高從此由遠至近由外至內河沙無日不停河底無日不墊海口淤而雲梯關亦淤雲梯關淤而清江浦清口并淤矣迨至康熙十五年間各處又復大水黃淮又復並漲清口以下之河身既高不能奔趨歸海而睢湖諸水又合淮

水井力東激以故除古溝翟家壩等原中九處之外  
又將高良澗板工冲决口大小二十六處高家堰石  
工冲决口大小七處諸水盡由各决口直注運河加  
冲清水潭三淺等處各决口下滄七州縣之田而涓  
滴不出清口黃水又乘高四潰冲决于家崗等處又  
復灌入爛泥淺將武家墩板工冲開五十丈入故明  
所開之廢河歷楊家廟會合淮水直奔清水潭其武  
家墩上流刷成大河寬一二百丈不等又分一股入  
洪澤湖由高家堰石工决口會淮并歸清水潭而於

各舊決口之處則又浸淫四  
以致下流更淤而河身高墊  
浦至海口約長三百里向日  
工之下今則石工與地平全  
不等今則深者不過八九尺  
河淤運河亦淤今淮安城樓  
口與爛泥淺盡淤今洪澤湖  
堪慮者日今見在之河身每  
沙之水則自西北萬里而來

桃等處卽便緩弱散漫臣目見河沙無日不加積河  
身無日不加高若此時不及蚤大爲修治則不特洪  
澤湖漸成陸地將見南而運河東而清江浦以下淤  
沙日甚必至三面壅遏而黃流無去路矣夫以萬里  
遠來浩浩滔天之水竟至無路可去則勢必冲突內  
潰而河南山東二省恐俱有淪胥及溺之憂彼時雖  
費千萬金錢亦難尅期補救臣是以謂今日敝壞已  
極修治刻不可緩也但旣經修治則必使無旋修旋  
圯之虞更必使有可行可久之道始爲有當臣逐細



籌酌其間修舉情形有必當師古者有必當酌今者  
有須分別先後者有須一時並舉者總以因勢利導  
隨時制宜爲主臣謹竭臣之愚備採衆論而詳加斟酌  
將應行事宜分爲八疏條列具

題貼黃難盡伏乞

皇上睿鑒全覽

勅部速議允行庶已渰之田可耕見在之地可保運道可  
通額課可復其於

國計民瘼誠均有攸賴矣

經理河工第一疏

挑清浦至海口

題爲敬陳經理河工事宜第一疏事臣惟河道壞至今日已稱至極修治之不可緩盡人而知之矣然事勢有順逆施工有次序必須分別先後之宜而後可斟酌興舉也臣竊見今日治河之最宜先者無過於挑清江浦以下歷雲梯關至海口一帶河身之土以築兩岸之堤也查清江浦以下河身原濶一二里至四五里者今則止寬一二十丈原濶二三丈至五六丈者今則止濶數尺當日之大溜寬河今皆淤成陸地

已經十年矣茲欲令黃淮之水盡從故道入海必須  
稍開去路導之使行蓋築堤堵漫用水刷沙雖爲治  
河不易之策然河身淤土有新久之不同三年以內  
之新淤外雖板土而其中淤泥未乾衝刷最易五年  
以前之久淤其間淤泥已乾與板沙結成一由衝刷  
甚難故必須設法疏濬也今日清江浦至海口一帶  
河身之淤旣經十載如不從萬全立議而貿貿以治  
新淤之法治之恐凌口盡堵黃淮齊下之際因河身  
淺窄一時衝刷不開又生他變則臣一身受溺職之

罪固不足惜其如已費錢糧將來之

國賦有虧民生之昏墊何哉况用水刷沙卽日不必挑  
濬而東水歸漕則又必須築堤旣築堤矣與其取土  
於他處何如取土於河身寓濬於築而爲一舉兩得  
之計也今臣擬於河身兩旁近水之處濬水三丈下  
鍤掘土各挑引水河一道面濬八丈底濬二丈深一  
丈二尺以待黃淮之下注蓋黃淮下注之時中央旣  
有一二十丈舊有之河左右又各有八丈新鑿之河  
其所存兩旁之地雖屬堅土而薄僅三丈一經三面

之夾攻順流之沖洗不待多時即可盡行刷去將舊有并新鑿之河俱合而爲一矣又兩旁旣各挑淡一丈二尺則中央河心自可刷至一丈之外河至淡二丈寬四十丈便不窄淺從此日洗日刷日淡日寬自可免意外之變而漸復當時之舊矣其所濬丈尺計每地一丈掘土六十方卽以之挑築兩岸之堤堤底濶七丈面濶三丈高一丈二尺每丈亦用土六十方再查工部尚書臣龔如錫等條奏內開堤底以八丈爲度面以五丈爲準高以一丈五尺爲憑等語計每

堤一丈應用土九十七方半誠爲防河至堅之策今  
臣所議高濶之數俱減每堤一丈止料用土六十方  
者蓋以物力艱難姑暫從減省擬議俾其足以抵當  
河水而止仍俟物力稍寬之時再行量撥人夫協同  
議設守堤之兵加高加厚務仍如部臣等條議丈尺  
之數可也至部臣等原疏內開南岸白白洋河至雲  
梯關止北岸自清河縣至雲梯關止務須一律修築  
等語俱應照議興築查白洋河至雲梯關約長三百  
三十里清河縣至雲梯關約長二百里以每里一百

八十丈科之共約長九萬五千四百丈每丈用土六十方共計用土五百七十二萬四千方其九萬五千四百丈之內有原未有堤者有原有堤而今全無土者有原有堤而今更狹窪缺少須增填者有堤根存土高一二尺至六七尺不等寬三四尺至一丈五六尺不等者合有無多寡而計之率約存舊土高三尺寬八尺每堤一丈計率約存舊土二方四分通共約存舊土二十二萬八千九百六十方實須增土五百四十九萬五千四十方至於取土之處雖以離水三

丈爲度然河身有在中央者有折流在河南岸及北岸者遠近不齊必須隨地科算總之離堤三十丈之內不許取土其三十丈以外取土者每土一方用夫三工一百二十丈以外取土者每土一方用夫四工二百四十丈以外取土者每土一方用夫五工合遠近而牽算之大約每土一方用夫四工兩岸之堤共用土五百四十九萬五千四十方應用夫二千一百九十八萬一百六十工每工照例給銀四分通共需銀八十七萬九千二百六兩四錢又自雲梯關外以



至海口尚有百里之遙除近海二十里潮大土溼之處無容置議外其餘八十里之河身情形俱與雲梯關內無異若不量挑浚以導之量築堤以束之則黃淮合流出關之際河身既窄而淺兩旁又堅而厚大水驟至不能承受歸漕勢必四處漫溢雖關外漫溢與運道民生無涉然一經漫溢則正河之流必緩流緩則沙必停沙停則底必墊關外之底既墊則關內之底必淤不過數年當復見今日之患矣臣聞治水者必始自下流治起下流疏通則上流自不飽漲故

臣又切切以雲梯關外爲重而力請築堤束水用保萬全不敢泄泄從事以貽後此之大害也惟是近海之堤止期足以攔水可以不必過於高厚堤底止須寬五丈面亦須寬三丈高止須六尺亦一體照取河心之土築之兩岸共堤一百六十里計長二萬八千八百丈每丈用土二十四方計用土六十九萬一千二百方用夫二百七十六萬四千八百工每工照例給銀四分通共需銀一十一萬五百九十二兩二共需銀九十八萬九千七百九十八兩四錢其需用人

夫共計二千四百七十餘萬工應限二百日完工計  
每日需夫十二萬三千七百餘名念淮揚附近民人  
尚須供臣後疏挑浚幫堤堵凌等各工之用斷斷不  
能更有如許多夫前來應募臣查康熙九年前河臣  
羅多興修黃河各處之工除調用各處泉淺等夫外  
曾經令山東江南鄰郡地方協募赴工在案今此工  
之大數倍於前不得不循例而行臣擬令江南之鳳  
陽府屬募夫一萬五千名江寧府屬募夫一萬名蘇  
常二府屬各募夫八千名正太二府屬各募夫四千

名徐州并屬募夫五千名滁和二州并屬各募夫二千名山東兗州府屬募夫一萬四千名濟南府屬募夫九千名東昌青州二府屬各募夫五千名河南開封府屬募夫一萬三千名歸德府屬募夫八千名尚少夫一萬一千七百餘名應於淮屬之邳海睢宿贛沭六州縣地方召募其募夫之法應令各該府州就所屬州縣之大小近便酌量派募務募二十歲以外四十歲以內精壯強健之夫赴工常川供役不許以老弱塞責及往來更換以致曠悞工程卽於該府屬

首領州縣佐貳雜職等官內遴選能幹之員專管驗募限部文行到該省半月之內募齊人夫各帶土車鋤担等器飛星押赴工所董率料理依限挑築至於地廣夫多其間恐有偷安苟且情弊必須畫段丈驗之法以釐之其法容臣預督各監理官量取土之遠近按工畫段每用夫五千工爲一段編定字號插牌標識其中有原係平地者有已經缺窪須填者有存舊堤之土多寡不等者并堤段長短丈尺之數逐一書明標識之上仍立簿一本一體登記交各監理官

收存各監理官卽按各州縣協募人夫多寡之數照  
工撥給堤段令其如式挑築臣仍親臨工所用部臣  
冀如錫等條議鐵杵杵隙盛水不漏之法不時查驗  
以別其夯杵之堅否臣更請立懲勸之典以鼓舞而  
警策之凡各州縣協募人夫有老弱病廢及姦猾逃  
逸一名至五名免議外六名至二十名者各該州縣  
官罰俸半年所委專管官罰俸一年二十一名至五  
十名者州縣官罰俸一年專管官降一級調用五十  
一名至一百名者州縣官降一級留任專管官降二

華三司之考  
一  
級調用一百名以上者州縣官降一級調用專管官  
革職其所築堤段如有一處夯杵不堅盛水卽漏并  
底面丈尺雖合而面上兩旁低窪有一二丈者將專  
管官降一級調用兩處夯杵不堅盛水卽漏并底面  
丈尺雖合而面上兩旁低窪有三四丈者將專管官  
降二級調用三處以上夯杵不堅盛水卽漏并底面  
丈尺雖合而面上兩旁低窪至五丈以上者將專管  
官革職如所募之夫盡皆壯健竝無一人逃逸所築  
之堤隨驗俱堅堤面兩旁豐滿處處合式者該州縣

官不論俸滿卽陞專管官如係正途照依應陞之數加二級卽陞如非正途俱准照正途註冊一體加二級卽陞更請責成道府州并監理各官如各該道府州所屬有一官議處者將該道府州罰俸半年兩官議處者將該道府州罰俸一年三四官議處者將該道府州降一級調用五六官以上議處者將該道府州降二級調用所屬委官督工勤幹築堤堅固如式依期早竣者將該道府州亦不論俸滿卽陞其各監理官除募夫一項與伊無涉不議外凡伊所管各州



縣委官之內有因夯杵不堅築堤不豐滿一員議處者將監理官罰俸一年二三員議處者將監理官降一級調用四五員議處者將監理官降二級調用六員以上議處者將監理官革職如議處議敘相同者准與抵算如監理官揭叅者准免連坐若竝無議處止有議敘者將監理官照伊原任應陞之缺加二級從優卽陞如此則各官俱知勉勵可無闕茸貽悞之虞矣伏候

濬裁

經理河工第二疏

挑疏清口

題爲敬陳經理河工事宜第二疏事竊照臣請挑清江浦至海口一帶河身之土以築兩岸之堤乃先治下流以導黃淮歸海之計也然下流雖治而上有淤墊之處不行及早疏通則高家堰等一帶凌口盡堵淮水直下之時難免阻滯散漫之慮查洪澤湖下流自高家堰以西至清口約長二十里原係汪洋巨浸爲全淮會黃之所自淮流東凌黃水倒灌之後將此一帶湖身漸漸淤成平陸向之汪洋巨浸者今止存寬

十餘丈深五六尺至一二尺不等之小河一道矣查  
工部尚書冀如錫等條議內開清口一帶沙淤之處  
速行挑濬等語然淤沙萬頃挑浚甚難臣再四思維  
惟有倣照挑浚清江浦以下河身之意於小河兩旁  
離水二十丈之地各挑引水河一道俾其分頭沖洗  
庶可漸漸刷開至於挑清江浦引水河臣止擬離河  
身三丈而此處議離河身二十丈者蓋清江浦以下  
係十年久淤之堅土而此乃三年以內之新淤臣曾  
帶領夫役掘土試驗浮面一層板土深有二尺下則

係淤泥尺許淤泥之下又屬板土板土之下又屬淤  
泥掘深六尺有奇而尚不能到當日之湖底且面層  
板土雖極堅硬而第二層板土因在淤泥之下反潤  
而鬆故雖離河身二十丈之遠而易於冲刷不久便  
可合而爲一也惟是此處淤沙旣易冲刷而臣亦議  
開引水河者蓋臣目擊面層板土之堅硬恐一時冲  
刷不開又於他處生變亦未可定因思此番工程錢  
糧人力無不浩繁若有一處計慮未周恐有差之毫  
釐失之千里之悔是以不敢不略議導引之策以圖

萬全耳其所挑引水河應面寬六丈底寬三丈深五尺每淤地一丈掘土二十方遠傾於引水河六十丈之外兩岸共計七千二百丈共掘土一十四萬四千方每方用夫三工共用夫四十三萬二千工照例每工給銀四分共需銀一萬七千二百八十兩此工一治庶淮河下注之時可以冲關淤泥徑奔清口會黃刷沙而無阻滯散漫之虞矣伏候

睿裁

經理河工第三疏

高堰坦坡

題爲敬陳經理河工事宜第三疏事臣惟淮河之下流  
旣已疏治則水可直行而會黃刷沙矣但臨湖一帶  
除見在原冲各淩口外其餘堤岸無不殘缺單薄危  
險堪虞若竟堵淩口而不先修殘堤俾極堅固則水  
將尋隙地奔潰勢必堵者方堵而淩者又决豈非徒  
費錢糧徒勞民力耶此帮修堤岸又斷不容緩者也  
查工部尚書臣冀如錫等條奏疏內原有石工定要  
加高三尺殘薄之堤一律修葺高良澗一帶土堤必

照修築高堰之法一律寬濶等語所議極爲周匝惟是部臣等之議專爲堅固起見而臣身膺治河之職當錢糧絀乏之際不得不反覆籌維力求節省也大抵堤以攔水祇期修築得法使水不能冲倒而止似不必拘拘於石工埽工板工蓋石工之費數倍於板若將高良澗五千二百餘丈板工盡改爲石費實浩繁卽或石仍石而板仍板現據山旰同知多弘安估計加高帮濶工料册內開自七里墩至周橋閘共長一萬一千五百餘丈應用石板埽工并修一帶殘毀

段口共需銀三十九萬五千五百餘兩臣就該同知所估石埽板工之冊而核算之竝無浮濫則其費亦非小也况板工一項皆係以椿攔板以板束土用之平日尚有不能耐久之慮若遇大水乘風一擊而土鬆再冲而土卸矣勞民傷財將何底止臣再四思維因見淮湖運河等處板工易於損壞卽石工之傾圮者亦不可勝數惟見堤下係坦坦平坡者則雖遇大水而不致冲塌蓋水性至柔而乘風則剛其板石諸工率皆陡峻故怒濤撞激易於崩冲若遇坦坡則水



五	右	山	以	四	九	何	生	少
---	---	---	---	---	---	---	---	---

土既堅而又有草護再行設兵看守之法禁止民人之樵採驅逐牛畜之蹂躪則坦坡自可永久無虞坦坡無虞則本堤更屬萬全矣至於高家堰一帶石工亦宜照此幫築坦坡將石工併埋土內更爲至堅至穩之著也查白運河西岸歷七里墩武家墩高家堰高良澗至周橋閘北止共長一萬二千八百餘丈內有三千八百餘丈可以竟築坦坡其餘約九千丈堤根見被水占必須先於離堤一丈之處密下排椿多用板纜以蒲包包土填出水面然後用蘆柴細一尺

高小埽鑲邊內加散土用力夯杵築成坦坡一丈俟全淮下注則堤外之水自卽退去水退之後再行挑土帮修到底并將排椿盡埋土內至此一帶堤身向來原窄面不過二丈有奇底不過三丈有奇自上年冲塌淋卸之後處處單殘石工堤面猶有寬二丈者板工堤面寬者不過丈餘窄者僅有二三尺今本應悉照部臣等所議加高加寬丈尺之數但取土遠極挑運萬難其加寬之處姑先以二丈五尺爲準俟水退土出亦再令守堤之兵逐漸帮築今查高家堰高

良澗一帶板石諸工原高約有七尺應如議再加三尺共高一丈堤底外寬五丈內寬一丈連本堤二丈五尺共寬八丈五尺堤面寬二丈五尺每堤一丈用土五十五方今可以竟築坦坡之三千八百餘丈見存堤底約牽寬三丈五尺堤面約牽寬一丈五尺高仍有七尺許每堤一丈約存舊土十七方五分應增土三十七方五分通共約用土十四萬二千五百方近者取於半里之外遠者取於一里之外用夫四工挑土一方共用夫五十七萬工照例每工給銀四分

共需銀二萬二千八百兩其餘九千丈俱應先築坦  
坡一丈計每堤一丈暫省上十六方實用土三十九  
方然堤身頽卸單殘已稱至極每丈堤底約牽寬三  
丈面約牽寬六尺高止約牽五尺每堤一丈約存土  
九方應增土三十方共堤九千丈應增土二十七萬  
方近者取於七八里之外遠者取於二十里之外往  
返艱難不便計夫挑築必須照清水潭計籬買土之  
例每方五十籬共計土一千三百五十萬籬每籬給  
銀六釐共需銀八萬一千兩又椿木板纜蒲包蒜繩

邊埽三工等項每丈約需銀十兩共需銀九萬兩三  
共實需銀十九萬三千八百兩然所需之數較之見  
估用板用石用埽之工可節省銀二十萬一千七百  
餘兩且可免板工冲擊頽卸之患也伏候

睿裁



經理河工第四疏 包土堵漫

題爲敬陳經理河工事宜第四疏事臣惟黃淮之上下  
流旣議治理疏通而高家堰堤岸之殘毀低薄者又  
擬加帮高厚則築古溝翟壩一帶之堤并堵塞黃淮  
各處之漫口使河復故道可次第而施工矣查自周  
橋關歷古溝唐埂等處以至翟家壩南共計三十二  
里據山旰河務同知多弘安估計冊開築此三十二  
里之堤并埂并堵此內原冲成之九河及高良澗高  
家堰武家墩等大小漫口三十四處共需銀七十萬



五千八百餘兩臣相度水勢按冊而計皆屬必需之  
項似無浮冒蓋冊內堵凌皆係循例用埽而埽盡薪  
也遠運於數百里之外大繩捲束而投之水中其物  
料人工之費每填堤一丈水淺者費銀三四十金至  
七八十金不等水深者費銀一二百金至六七百金  
不等是以需用錢糧如此之多也且臣驗各處埽工  
凡柳枝多者尚可多延數年其蘆草多而柳枝少者  
不過一二年悉皆朽壞頽塌殊非經久之道於是再  
四思維尅水者土也當求束土禦水之法斟酌變通

以爲節省永固之計原不必循例而築用埽工也臣  
虛心酌畫除有鑲邊裏頭必須用埽者有急欲閉合  
龍門之時包土稍緩應速捲大埽立時填塞斷流者  
有修建滾水石閘等項應先築攔水小壩而此壩於  
開工告成之日原應毀廢棄俾水通流今若下椿包  
土恐日後難於毀壞亦宜仍用埽者俱照舊用埽外  
其餘一切工程俱宜密下排椿多加板纜用蒲包裹  
土蒜繩網紮而填之較之用埽計可省費一半而堅  
固耐久比埽又迥乎不同今擬將前項工程改下埽

爲包土仍築坦坡制水不過費銀三十萬兩較之原估之數可節省銀四十萬餘兩也至黃河內桃源清河安東三縣之新舊各處凌口水漲則刷成大河水涸則兩旁淤墊是以各該縣估計之冊隨時變更不能畫一目今黃水方大難以確估然臣親相情形大抵俟秋冬水落之際或應用埽或兼用包土不過再費銀八萬兩可以盡行堵塞使兩河之水悉由故道入海矣通計此疏內築堤堵凌共需銀三十八萬兩伏候

睿裁

五ノ職ノ職案新

四

1941

1941

經理河工第五疏

挑運河

題爲敬陳經理河工事宜第五疏事竊惟築防寒凌疏引黃淮使復故道合流入海事宜如果一一興行則閉通濟閘壩淤挑運河盡堵清水潭等各凌口以通漕艘誠爲今日至要之務所當次第修舉者也查運河自清口至清水潭共約長二百三十里通計四萬千四百丈因黃水內灌將河底淤墊甚高居民日患沉溺運艘每苦阻梗今必須將河身大爲挑濬凌口盡行堵築庶幾運道可得通行民生可免昏墊也

臣請

睿鑒勅下江南浙江江西湖廣各撫臣嚴督所屬將本年應運漕糧及早徵收受載火速催趕務於康熙十七年三月內勒令盡數過淮俟糧船過完容臣將通濟關壩卽日封閉一切商民船隻并該年回空漕艘俱令暫由周橋關遶出高郵州而行淮關部司亦令暫住周橋關收稅臣一面督集人夫將運河大爲挑濬面寬十一丈底寬三丈濶一丈二尺每河一丈挑土八十四方通計四萬一千四百丈共挑土三百四十

七萬七千六百方挑起之士俱令傾於東西兩堤之外更加夯杵將西堤築成坦坡東堤加倍堅厚以圖永久毋許將濬土亂堆堤上以致雨淋仍落河中每土一方用夫三工計共用夫一千四十三萬二千八百工限三百日完工每日用夫三萬四千七百七十六名查挑濬進河向有每工給銀四分之例亦有撥派坊里人夫量給銀米之例但淮揚二府節被水災里民困苦已極兼之此番工程浩大需夫家多萬難派撥况坊里人夫率皆老弱不堪之輩而又每每逃



大抵坊里夫十名不敵募夫三四名之用則即使  
派撥亦屬有名無實若一體召募則無告饑民又得  
藉以活命相應照例每工給銀四分共需銀四十一  
萬七千三百一十二兩共督工等項議敘處分事例  
并請如臣第一疏內題

請之事例一體而行至於堵塞高江二州縣之清水潭大  
潭灣等波口六處雖據南河分司估計冊開應用柳  
束人夫俱於各州縣協濟而所估錢糧尙需物料等  
費銀六十餘萬兩等語然此數處工程只須笑翟家

壩至武家墩一帶凌口盡行堵塞黃淮合流從故道  
入海之後下椿包土相機填塞并一帶西堤之外照  
築坦坡凡有水占堤根之處量用短椿笆簾等項攔  
土築堤不過總費十五萬金便可足用蓋清水潭一  
工自目今視之誠爲最難若俟各工告竣之後留此  
工於結末則流止水消取土亦易故可省費如許也  
計此疏內挑河堵凌共需銀五十六萬七千三百一  
十二兩伏候

睿裁

第 二 十 一 号

七

經理河工第六疏 籌畫錢糧

題爲敬陳經理河工事宜第六疏事竊惟一切治河事  
宜臣已於前五疏內一一陳請矣伏查案准工部咨  
爲欽奉

上諭事內開工部等衙門會覆尙書冀如錫等題前事等  
因查黃運兩河攔係運道民生今旣經尙書冀如錫  
等將應修各處驗明具題相應照議卽行大爲修築  
但今正需錢糧之際若照此驗勘修築需用錢糧甚  
多不便樂行修築應令新任總河將應修緊要處所

酌量修築堅固不致有悞漕運等因奉有依議之

旨欽遵行臣知照在案臣到任之後凡經歷河干驗閱形勢即將部臣條議工程細加揆度如果照議修築誠爲至堅但所需錢糧不下五六百萬當此軍興需餉之際措撥良難是以廷臣有不便槩行修築之議蓋部臣奉

命勘河目擊河道壞極情形不得不從堅固立議以爲一勞永逸之計而廷臣灼知司農仰屋之艱又不得不以酌量修築議覆也惟臣身任總河親見民生之昏

墊運道之阻梗田土日渰而賦稅日絀且又深知河  
帑之無餘請撥之無項安敢不委曲籌策以仰副  
宵旰之憂虞耶顧臣審勢揆情減築堤浚河之丈尺并條  
議坦坡制水下椿包土等法以代石埽板工然實尙  
需銀二百一十四萬八千餘兩并臣第八疏內應打  
造濬淺船二百九十六隻約需銀一萬兩通共需銀  
二百一十五萬八千餘兩乃必不可少之數也念河  
流爲害自康熙六年至今十載之間歲歲興工費過  
錢糧三百餘萬且更有歷年蠲免之正賦節次賑恤

之帑金不可勝計而河患之深日甚一日臣身膺重  
任不敢玩泄是以確酌全局曲思穩當之策臚列上  
請也惟是所需如許多金旣事在必不可少而又實無  
可撥之項臣因再四圖維不敢稍避勞怨委曲詳酌  
謬擬設處錢糧之計謹一一爲我

皇上陳之其一則議令淮揚被渰田畝補納修河之費也  
竊計淮揚二郡被渰田畝何止十餘萬頃祗因節被  
水占而耕鑿難施若黃淮與運河俱治則田土盡出  
可以施畚鍤而望收成矣其中量納修河之費豈特

理之所宜諒亦情之所願也然田畝有高低之不同其價值因有貴賤之各別臣細加體訪知此等田畝至水退可耕之時其在黃淮之東南者每畝值銀一兩至二三四兩不等其在黃淮之西北者每畝值銀一二錢至六七錢不等臣請俟大工告成田土可種之日容臣會同江蘇撫臣將凡被滄東南上則田一畝令納修河費銀三錢中則田一畝令納修河費銀二錢下則田一畝令納修河費銀一錢被滄西北上則田一畝令納修河費銀六分中則田一畝令納修



河費銀四分下則由一畝令納修河費銀二分其銀  
准分爲兩年完納若係無主之田但有人納修河之  
費者即便給與執業至於本田正賦照例三年之後  
陞科其每畝俱照二百四十弓之制科算毋許以多  
爲少欺隱不均如此約而計之二郡被淹田畝補納  
修河之費約可得銀一百六七十萬但議者或謂災  
民田畝不能優恤而反重賦之似屬病民殊不知撫  
民之道有經有權發帑救民而復寬其力者經也先  
憂民之憂設法拯救後樂民之樂多取不虐者權也

且臣採訪輿論皆稱田被水渰之後及河治水退則田皆沃土必有二三年加倍收成之美言人人同似爲確論顧此昏墊之民設兩河一日不治則民田一日不耕將凍餒流離伊於胡底是必河治而後民始得所也明矣夫以斯民得所之時坐享沃土倍收之利於是分粒米狼戾之餘以補河工萬艱之費此經權互用有不得不然者臣所爲不敢避怨而斷然以爲可行者也一則運河經過之貨物宜令加納剝淺之資也查運河內往來一切船隻向因河身淤墊阻

滯盤剝艱苦萬端若黃淮俱歸故道清口以內一律  
浚深則此後各船俱可暢行無阻省費甚多因令量  
輸所省之費以佐治河之用亦屬理之所宜情之所  
願也臣請俟運河浚深船艘通行之日容臣印發日  
記號簿二本交給淮揚兩關分司凡過往船隻裝載  
豆麥米糧等項者每石著納剝淺銀二分引鹽油燭  
等項者每百觔著納剝淺銀四分其餘一切雜貨細  
貨每百觔俱著納剝淺銀六分兩關止納一次不令  
重納兩關之中此關已經收過該船剝淺銀兩者卽

給印照爲憑該船齎此印照前赴彼關立時驗放如  
此收至一年卽行停止約可得銀一二十萬兩夫加  
稅似乎病商然臣細察商人遇河道淺阻則剝淺車  
脚之費視加納之數不啻數倍今治河以利之責其  
出餘利以助河工亦情理之最當者矧貿遷有無商  
惟視本計利於賣地權貴賤耳今助工於運河而取  
贏於賣地則子母仍無虧也一則開廣武生納監之  
事例也臣訪得武生之中亦有願納監生入文場鄉  
試而格於文武兩途不敢擅自請納者今若准令武

生亦照文生之例許其加納准入文場應試則願納者必多查文生加納銀一百二十兩俊秀納銀二百兩俱准爲監生今武生比之文生爲不及較之俊秀爲有基臣請許令武生加納銀一百六十兩准與文生一體爲監生入文場應試通行各直省督撫凡有武生納監者俱照例交納藩庫解赴臣衙門濟用大約一二十萬金似亦可得以上三款若蒙

俞允則治河之費已備卽有不敷統容臣於河庫內通融動用惟是此等銀兩俱在河工告成之後方可責成

輸納不能應目前緊急之需臣愚以爲宜令直隸江  
南浙江山東山西河南湖北各直省州縣俱豫徵康  
熙二十年分一切起存正雜錢糧十分之一約可得  
銀二百萬兩其中卽有未敷統容臣於河庫內通融  
動支至各直省豫徵銀兩請

敕各省督撫諸臣嚴督該省藩司卽日先將見存藩庫銀  
兩內照應豫徵二十年分十分之一之數限部文行  
到該省十日之內火速墊解臣衙門濟用如有遲悞  
容臣將該司查叅聽部議處該司仍一面照數豫徵

還庫補項俟河工告成之後容臣會同江蘇撫臣督  
令淮揚二郡府州縣官照議按畝徵收修河之費并  
督淮揚兩關收取各船剝淺之費抵還豫徵各直省  
康熙二十年分錢糧十分之一之數并移會各直省  
於該年應徵項下少徵十分之一扣還民間如此一  
轉核間不費公帑而大工可刻期興舉矣伏候

六  
省  
裁

經理河工第七疏 裁併河官選調賢員

題爲敬陳經理河工事宜第七疏事臣惟修治河工必先以措設錢糧爲要今措設錢糧之處已經臣條議  
上

請倘蒙

皇上俞允則大工自應刻期興舉矣惟是大工興舉之日協理必須多員而大工告竣之後保護尤資羣力與夫事可兼攝者則冗員應裁權宜歸一者則職守應併是皆當因勢度宜先爲酌派定其責成使之可遵



可守無紛雜掣肘玩愒坐悞之弊庶可望其樂於甦  
勉不爲推諉而共相維持以保永久也竊思臣身任  
總河凡直隸東豫江浙各省有河地方并河務河官  
皆臣統理統轄不待言矣其自臣而下兼理兼轄者  
則爲分司各道專管者則爲廳印諸員分管者則爲  
各州縣之佐貳雜職等員雖官之大小各有所司然  
其職掌之紛淆事權之雜出以致掣肘貽悞者皆當  
確議釐定也查河道項下興修守護等事既有專管  
分管各官駐宿河干朝夕料理其司道等官原以兼

總大綱承上接下應督率屬員指揮調度之任只須一官而兼轄數府不必一府而兼設數官者也今淮揚兩府既設淮揚淮徐兩道又設南河中河兩分司其間實多冗贅茲臣於司道之中權衡攸當竊見分司三年一換自以一官爲傳舍而他人亦以客官目之未免呼應不靈且分司無地方錢穀刑名之任其於民情之休戚風俗之姦良不能一一熟察道臣係久任之官則凡所舉行必圖久遠而又兼管錢穀刑名之事於地方情形自能周知一切調撥協濟事宜

庶易得當而官民之奉行尤稱惟謹臣愚以爲宜將南河中河兩分司裁去其該管各務量其地形事勢分歸淮揚淮徐兩道兼理淮郡之山陽清河安東鹽城海州沐陽贛榆并揚州府屬河道俱責成淮揚道兼理令該道仍駐淮安淮郡之桃源宿遷邳州睢寧并鳳陽府之靈璧縣以及徐州所屬河道俱責成淮徐道兼理今該道移駐邳州至北河通惠兩分司亦應併裁將北河分司事務照省歸併分交濟寧天津二道管理通惠分司事務交給通永道管理又東交

道遠駐沂州而兼轄滕嶧兩縣河務亦屬未當應歸併濟寧道兼理庶爲妥協也又淮安一府共有同知十員而管河者居其八皆係節次添設者也殊不知河工事務全在用人之當而不在設官之多矧治河之法疏浚防塞各有攸宜同知爲專管官與分管防守之佐雜微員不同乃畫河爲兩岸而分管之是竟置河身於不問矣且其間有彼此意見不同而推諉觀望者有屬員奉行不一而奔命不遑者事權之雜出誠爲未便也臣愚以爲同知八員之內今宜裁去

三員將山清同知原管運河事務歸併山盱同知多  
弘安管理駐劄淮安府山清同知原管外河并安海  
同知河務俱交宿桃南岸同知董安國管理改爲山  
清安海同知駐劄安東縣俱令淮揚道兼轄宿桃兩  
縣河務并歸仁一堤俱歸併歸仁堤同知佟國聘管  
理改爲宿桃歸仁同知駐劄白洋河邳睢靈璧三州  
縣河務仍令邳宿同知蘇順管理改爲邳睢靈璧同  
知仍駐邳州徐屬同知事務仍令祖文明管理仍駐  
徐州俱令淮徐道兼轄其所裁山清同知魏師段安

海同知李朝事宿桃山清北岸同知黃道弘俱應赴部改補又宿桃兩縣既有主簿四員理應每縣各設二員不應彼此牽混臣請將宿遷縣主簿王振先改爲宿遷北岸主簿宿桃南岸主簿改爲宿遷南岸主簿桃源縣主簿王金改爲桃源南岸主簿宿桃北岸主簿夏文象改爲桃源北岸主簿庶職掌俱各畫一而無紛雜混淆之虞此臣所爲事可兼攝者冗員應裁權宜歸一者職守應併者是也若夫河道一事攸關民生休戚地方安危良非渺小凡膺民社之寄者

皆當曲圖補救力爲保護不宜徒諉河官坐視敝壞  
如撥夫運料等事在正印官有人民地方之責者設  
法自易其管河同知通判佐雜等官與民絕不相親  
於錢穀刑名街坊里下諸務毫無關涉安能設施且  
府州縣之正印官往往視河務爲餘事等河官爲贅  
疣每有漠不相關之狀而無同舟共濟之情雖遇大  
聲疾呼往往置若罔聞以致掣肘悞工不一而足臣  
請嗣今以後凡遇河防衝決之事不論

欽工民工俱倣照盜案之例將該管之道府廳州縣佐雜

等官一併照例

題叅議處仍勒限半年修復完固亦照盜案定承修督  
修催修之例而責成之如有諱決者照諱盜例處分  
至於薦舉

大計等典凡有河地方之司府州縣正印并道廳佐雜等  
官俱將河工之治否一併考成以分殿最必任內無  
河道衝潰之事并遇決旋修不致殃民損課者方准  
保舉卓異如此庶各各知警共相綢繆於未雨之先  
而河道之冲決自少卽有冲決亦速爲修治不致蔓



延滋害如今日之甚此臣所爲大工告竣之後保護  
尤資羣力者是也以上事宜皆指平時而言如蒙

俞允則可爲將來防守章程至見議之大工如果刻期興  
舉則必須多選能員責成料理查工部尙書冀如錫  
等條奏內原有一員分工三十丈之議雖從慎重堅  
固起見然應修堤岸共約二十萬丈恐不能有如許  
堪委之員今臣第一疏內挑河身之土以築兩岸之  
堤每日用夫十二萬有奇除分管之佐雜等官見有  
各州縣管押夫役官員可以責成分管外臣請特調

才能廳印監理官十二員分頭董督而監理之查現有臣請改設之山清安海同知宿桃歸仁同知其二員應再選調十員又臣第二疏內濬清口以上一帶淤沙第三疏內增築武家墩至周橋閘一帶幫堤第四疏內築翟家壩一帶之堤并堵塞高家堰等各處決口等工程除約需佐雜官四十餘員容臣隨時酌量於各屬調用并將所調各職名彙咨達部其應用才能廳印監理官五員今見在止有山野同知一員應再選調廳印官四員分頭董督而監理之二共實

需選調廳印官十四員查此皆關係田畝賦稅運道  
民生重務必須遴選勤敏強幹才智俱優實心任事  
之員方克勝任臣再四思維非臣素知及歷試親見  
確有才能允堪任用者臣不敢濫任貽悞伏乞

皇上俯念河道關係重大允臣所請將見任江南太平府  
同知劉沛引揚州府同知王興元池州府同知管通  
判事喻成龍寧國府通判常君恩廬州府通判黃際  
會滁州知州趙清正和州知州夏瑋合肥縣知縣雷  
動聲清河縣知縣劉光業宿遷縣知縣李燦山東單

縣知縣韓第恩縣知縣何朝聘并原任五河縣丁憂  
知縣陳顯忠原任揚州府降調通判俞森等十四員  
准臣馳檄調取勒限來工各給委劄分畀事權授以  
機宜共襄大務其調取各官原任原缺應請

勅部卽爲銓補至臣第五疏內挑濬運河堵塞清水潭等  
處決口各工程原擬在後興舉應俟興舉之日再將  
應調協理官員另疏題

此臣所謂大工方舉之日協理必須多員者是也又各  
官之內除俞森事實臣見在另疏具

題外其餘十三員有臣於安徽巡撫任內曾經委用歷  
試才能者有臣素知其能而今又親見其勤敏練達  
者若夫丁憂之員雖有不准題留之例然此係因其  
有才堪用是以調取監理督工並無地方人民錢穀  
刑名之責與見任官有別相應一併

題明至於調取監理之廳印分管之佐雜等官所修工  
程必須交明該管廳印佐雜等官確驗如果合式堅  
固該管廳印佐雜等官即便出具收管印結該道府  
覆驗相同即便加結申送臣衙門親勘無異彙疏具

題將調取之大小各官無論原是正途與否俱作正途  
照依原任應陞之缺加二級從優卽陞其該管河廳  
佐雜等官分領自修之工如逾期完竣如式堅固出  
結中送道府州縣驗明相同加結轉送臣衙門親勘  
無異亦卽彙疏具

題照依調取各官一體議叙若夫給發一切銀兩如協  
募見募等夫俱一例紋銀四分一工椿埽水手五分  
一工木筩等匠三分一工俱循照往例給與仍著落  
各監理官公同各分管官五日一發當官給散其餘

一應料物等銀俱著從公速給毋許遲延如有劣員  
更換銀色短少分兩扣剋回頭等弊并或有姦徒陰  
謀取利冒領錢糧捏造譌言倡邪惑衆阻撓大工暗  
壞工程者俱容臣立刻嚴拿究明情罪遵照

勅書內事宜按軍法

題請正法警衆如此則各知警懼止有奮勉之人而無  
壞事之輩庶大工可以告成矣伏候

睿裁

經理河工第八疏 添設兵丁

題爲敬陳經理河工事宜第八疏事臣惟修治兩河旣定分工任人之法則必當求其成功矣但河工告成而不立法以期久遠恐數年之後姦弊滋生難保其不旋壞也臣到任以來細加體訪知保全河道之策全在能盡人力而不可諉之天數至於堤岸衝決之由則官民夫役均有罪焉官之罪有二一在備員闕茸不知河道爲何物其於運道民生不啻秦越人之視肥瘠雖有以未雨綢繆之策告之者而茫然不能



用也一在利於多事希圖乘機侵蝕故薄者不虞而  
缺者不補以致潰決廢壞不可收拾也民之罪有三  
或與近堤之人有讐而盜決以泮之或因已田乾旱  
而盜洩以溉之至於周橋翟壩姦民知商販畏淮關  
之稅重而樂於趨其地也於是盜決以俟之堤決而  
商至商至而伊得遂其乘機取利之謀矣若夫夫役  
之罪則總在利於動而不利於靜樂於有事而苦於  
無事是以百計陰壞之耳他如高良澗等處板工上  
年大水衝擊除決口二十六處之外其餘一帶殘堤

貼椿之土悉皆卸塌椿木無土擁護易於竊取致被湖內小船及水滄災民乘夜盜鋸者不一而足臣月擊鋸痕深爲痛惡雖出示嚴禁密訪查拿然犯者已逃從何究詰又聞向來有等壞事姦惡夫役當大埽方下龍門未合之時暗藏刀斧乘夜割斷揪頭繩以致所下之埽隨即衝消諸如此類欲保全河道者不過一二人而謀壞之者徧地皆是是以殘壞至此臣再四籌維欲圖將來久遠之計莫妙於多設專心保全河道之人則設兵以守而立勸懲之法使之知利

之當趨而害之當避誠爲不易之策也臣聞故明末  
年各省漕糧皆係世職官領運漫無考成以致無官  
不侵蝕無年不拖欠無日不追比糧歸姦橐而在上  
者無可如何流弊至極迨

本朝定鼎之後責成各衛見任守千等官領運按運考成  
欠者置之以法完者准與優陞不數年而銅弊一洗  
歲歲全完此有勸有懲使知有利有害面自爲趨避  
之明驗也臣愚以爲今既大費財力高築堅堤必須  
按里設兵使之住於堤上逐日看守并將疏浚修葺

事宜一切責成之外河自雲梯關而下至於海口爲  
兩河朝宗要道每堤一里必須設兵六名每兵一名  
管堤三十丈堤根栽柳務活堤旁青草務茂堤內則  
乘暇添土逐漸幫寬每二里半建一墩令十五兵居  
於墩側每墩給浚船一隻各繫鐵掃帚二個於船尾  
繫繩以五丈爲度每月之初一十一二十一日兩岸  
墩兵一齊各乘浚船或布帆或鼓棹或纜錨下鐵掃  
帚於水底溯流刷沙往來上下必令五丈之繫繩不  
能到底而懸鐵掃帚於水中方止兩岸共堤一百六

十里設兵九百六十名給船六十四隻再設兵二百四十名給船十二隻專令浚堤外至海口一帶之淤沙自雲梯關至海口應共設兵一千二百名應設守備一員千總二員把總四員給浚船七十六隻各分汛地而責成之自雲梯關而上南岸至清口北岸至清河縣各長二百里每里設兵三名每名管堤六丈五里建一墩令兵十五名住於墩側每墩亦各給浚船一隻鐵埽帚繫繩以四丈爲度應共設兵一千二百名守備一員千總二員把總四員浚船八十隻

亦照前法責成之自清河縣至宿遷縣兩岸各長二  
百里每里亦設兵三名每兵亦管堤六十丈五里建  
一墩令兵十五名住於墩側每墩各給浚船一隻鐵  
掃帚繫繩以三丈五尺爲度通其設兵一千二百名  
守備一員千總二員把總四員浚船八十隻亦照前  
法責成之自宿遷縣至徐州西兩岸約各長二百里  
每里設兵二名每兵管堤九十丈五里建一墩令兵  
十名住於墩側每二墩給浚船一隻鐵掃帚繫繩以  
三丈爲度通共設兵一千二百名守備一員千總二

員把總四員浚船六十隻亦照前法責成之內河自清口西南至翟家壩南共長一萬八千餘丈應共設兵四百名每兵管堤四十五丈五里建一墩令兵二十名住於墩側堤根栽密柳坦坡畜茂草坦坡之外二十丈俱密種菱荷蒲葦菱芡之屬爲永遠護堤之策應設守備一員千總一員把總三員運河由清口至邵伯鎮南約長三百三十里每里設兵二名每兵管兩岸堤各九十丈五里建一墩於西堤令兵十名住於墩側其栽柳畜草等項俱照翟壩一帶之法責

成之應共設兵六百六十名守備一員千總二員把  
總四員以上六營通共設兵五千八百六十名俱設  
步兵而無庸設馬內以一分爲百總管隊准支步戰  
兵糧餉其餘九分俱支步守兵糧餉其應設兵五千  
八百六十名容臣移會江南督臣於江蘇所屬額兵  
內抽調步戰兵五百八十六名步守兵一千四百十  
四名尚缺步守兵三千八百六十名容臣遴選召募  
每兵每月支銀一兩米三斗每歲共需銀四萬六千  
三百二十兩共需米一萬三千八百九十六石連守



備千把總等官之俸薪馬乾等項每歲約需銀四萬九千餘兩應將淮揚徐三府州屬并靈璧一縣額設之堰募堤淺等夫查明全裁卽以夫工充此兵餉其不敷者容臣於河庫錢糧內通融撥給歲需米石亦於河庫內動銀買給一併容臣於年終報銷至應給濟船二百九十六隻必須打造每隻約用銀三十四兩共約需銀一萬兩已經臣於另疏

題明矣其各弁兵建曠朋扣等項照例扣貯以爲各處歲修及修艚濟船之用其各官兵不必設造盔甲其

鎗刀械幟之類俱令自備如各弁兵所管地方堤坡  
堅實日漸幫寬並無浪窩殘缺之處柳密草茂外河  
之水果深五丈四丈及三丈五尺不等內湖坦坡之  
外菱葦荷蒲盛長如是三年無異將該管守兵拔爲  
戰兵戰兵拔爲把總把總拔爲千總千總拔爲守備  
有缺卽題陞無缺則報部照伊應陞之缺遇缺卽陞  
如各弁兵所管地方堤坡不堅或並不幫寬反有浪  
窩殘缺之處并柳稀多枯草被芟割外河之水不及  
五丈四丈三丈五尺三丈等深內湖菱葦荷蒲廢弛

不種兵責四十板枷號一月穿耳徧遊示衆仍革去糧餉另行遴補千把總革職守備降二級調用若各弁兵該管地方因循闕茸以致衝決堤岸者官革職拿問兵從重處死以上俱責成總河臣親往確驗并不時委官差人嚴查密察務使各弁兵人人警畏不敢稍弛如此則賢否別而勸懲昭利害攸分當莫不勉勵鼓舞其相守護保全河道之人多而陰謀廢壞之徒無可逞其姦計若果久而勿替雖百世可保無虞不特三年而已也至於一例之河道而臣議設兵

船有多寡之殊者蓋下流旣通則上流可無意外之  
滯是以外河獨重於雲梯關以下也又慮水底之事  
目不能及設有意外驟淤之處其本汛浚船不能卽  
疏則又當立調各汛船兵協力疏浚各疏本汛以守  
其常通融協助以防其變而黃河無慮矣黃河無意  
外淤淺之事則淮河自是安流淮河安流則運河益  
可無恙其翟壩一帶之兵倍於運河者翟壩一帶當  
淮河之衝爲上流最要之地也又查歸仁一堤已經  
侍郎臣折爾肯等同臣察審具

題見在候

首俟

命下之後應作何接築竣工之處容臣另議

題請至其間或更有應損益增減及一切未盡事宜有

毋庸續

聽者容臣竟自舉行有必當上

聞者容臣隨事入

告可也抑臣更有陳者凡一切工程需用錢糧多寡之數

雖皆臣確核估計然凡有可以設法節省之處臣自

當格外力求節省至一切堤岸河身之遠近丈尺有  
按冊而稽者有無案可稽約里而計者雖無大錯然  
其中細數或有與疏內未必恰合者統容臣於臨時  
確丈爲準若夫臣條奏八疏內之一切事宜有臣親  
自勘驗復采輿論酌妥定議者有臣雖訪實情形而  
無暇往勘特遣的當親信之人確驗繪圖向臣一一  
陳說斟酌定議者有得之人言而臣廣諮博訪果屬  
可行因而定議者總以事關

國計民生如臣之庸愚斷不敢偏執已見惟有廣集衆

智竭臣之驚力愚心以仰荅

皇上已饑已溺之懷并簡拔微臣之

殊恩於萬一而已至於黃淮爲患延蔓多年倘獲邀

皇上齊天之福得以奏績則運道民生俱爲萬幸設臣才

術淺昧料理失宜以致徒糜時日虛費錢糧無益於

民生運道并旋修隨圯限內冲决則請將臣從重處

分以爲後來溺職者之戒統俟工程告竣之後恭請

皇上特遣大臣確驗定奪者也伏候

睿裁

新文襄公奏疏卷一終

新文襄公奏疏卷一

三





靳文襄公奏疏目錄

卷二

治河題藁

敬陳經理第一疏

以中河之土築堤

敬陳經理第二疏

爛泥淺挑引河二道

敬陳經理第三疏

帮高堰堤以束淮濟運

敬陳經理第四疏

併脩清水潭以束淮敵黃

敬陳經理第五疏

挑河以濟重運

敬陳經理第六疏

改調河員以供大修

敬陳經理第七疏 立勸懲以儆汙吏

江南大修疏

指陳河道疏

經理三疏未盡事宜疏

經理七疏未盡事宜疏

再陳一疏未盡事宜疏

酌改運日疏

男 治 豫 編 次

孫 樹 德 校 正

曾孫光烈  
文烈  
全校字



靳文襄公奏疏卷二

總督河道提督軍務太子太保兵部尚書兼都察院右副都御史臣靳輔

治河題藁

敬陳經理第一疏

以中河之土築堤

題爲敬陳經理河工事宜第一疏事切臣看得今日治河之最宜先者無過於挑清江浦以下河身之土以築兩岸之堤臣前疏已備陳之矣惟是募夫一節如在工程稍緩量用人夫數萬名者不難就近招募然臣前疏因恐水漲無歸又生他變欲於一二年間將

兩河工程概圖完竣是以挑浚黃河之夫議每日用  
至十二萬有奇之多尙有其餘各疏內挑浚幫堤堵  
浚各工所需人夫每日亦不下七八萬總計每日用  
夫二十萬念淮揚附近斷不能有如許多夫應募故  
不得不將挑浚黃河之夫議令江南隣屬并河南山  
東協募也今

廷議謂遠派各省恐不肖官役借端擾民請

勅臣酌量設法就近募夫不致悞工等語臣思道遠工長  
不肖官役借端擾民之事誠難保其必無然就近召

募則斷不能取齊若倣照舊例多加工食以鼓舞招徠之則動須增費數十萬兩從何設處且使卽加給工食而淮揚被水已久困苦災黎除死亾賣身之外其逃散四方者一時不能聚集應募者少必至悞工臣反覆籌酌更得僦車代挑之法凡下鍤掘土并夯杵成堤俱用人力其往來運土則以僦車約可省夫一半并原限二百日完工者改爲四百日完工則前擬每日用夫十二萬有奇者今止須用夫三萬餘名并車三萬餘輛足矣又其餘各工每日亦需夫七八



萬其間但有可用傍車以省人力之處容臣隨時斟酌而行則需夫不至太多可以仰遵

廷議就近設法召募濟工矣至所需傍車查江南非出產之處但若議派東豫二省僱募恐仍有不肖官役借端擾民之事容臣竟動錢糧行濟東兗開歸等府價買解淮濟用統計南岸自白洋河歷雲梯關至海口北岸自清河縣歷雲梯關至海口挑河築堤工程其所用人夫工食車輛繩絆以及一切諸費容臣設法節省總於原題第一疏內所估需銀九十八萬九

千七百九十八兩四錢數內期於足用惟是車輛等項一切俱不派民而盡屬官買則其間料理之煩更多數倍臣再四思維必須將臣第七疏內所議守堤官兵豫爲設立責令照管夫車督率夯杵在伊等卽係將來守此堤工之人自能盡力以圖堅固更爲一舉兩得之道若夫兩岸遙堤臣原題面寬三丈底寬七丈高一丈二尺每堤一丈用土六十方然臣又各處閱歷細察情形遙堤固屬必需而縷堤尤不可少蓋黃河流急則沙行流緩則沙墊而河身窄則流急

寬則流緩今莫妙於築縷堤以束水而以遙堤并加築格堤用防冲凌使守堤人等盡力防護縷堤設或大水異漲卽有漫冲亦至遙堤格堤而止自不至於奪河成缺該守堤人等隨卽星將縷堤仍舊築起爲工亦易臣請將原估築遙堤之土六十方分築遙縷二堤并量增格堤其縷堤頂寬二丈底寬六丈高六尺每縷堤一丈用土二十四方遙堤頂亦寬二丈底亦寬六丈高八尺每遙堤一丈用土三十二方二共用土五十六方較之原估每丈餘土四方或隔五七

里或隔十餘里卽以所餘之土再築格堤一道格堤頂寬二丈底寬六丈高五尺以上各堤均令守堤人等一併加意防護并將各堤逐年加帮務極高厚可也再查南岸白洋河以上至徐州一帶堤工長二百八十里北岸清河縣以至徐州一帶堤工長四百里其間殘缺危險在在皆然斷須急爲併治至於治之之法臣籌維再四若徒加帮遙堤則旣不能束水而又無重門之障良非至穩之著莫妙於亦於近河去處加築縷堤并置築格堤以爲外藩其殘缺遙堤亦

卽一體加帮高厚方稱萬全也惟是工程浩大旣不能多用民力亦不敢全動官銀除臣先經嚴行各該州縣速撥民夫加帮舊堤俟詳至務令一律加帮外其所議加築之縷格二堤必須動支錢糧募夫興舉者也至此項堤工凡在駱馬湖以下者俱照白洋河以下之式縷堤築頂寬二丈底寬六丈高六尺每堤一丈用土二十四方兩岸共計二百里約長三萬六千丈用土八十六萬四千方又應築格堤約七千二百丈頂寬二丈底寬六丈高五尺每丈用土二十方

共用土十四萬四千方駱馬湖以上縷堤格堤俱築  
頂寬二丈底寬六丈高五尺每丈用土二十方南北  
兩岸除駱馬湖水占之處不必築堤外其餘約長四  
百六十里計應築縷堤八萬二千八百丈格堤一萬  
六千五百六十丈二共九萬九千三百六十丈計用  
土一百九十八萬七千二百方以上兩岸縷格二堤  
通共用土二百九十九萬五千一百方每方止以用  
夫三名計銀一錢二分科算共需銀三十五萬九千  
四百二十四兩如此則人力既盡自可少意外之虞

矣至於管工等官所管工程堅固合式與否其議敘  
議處之法容臣於第七疏內一併確議題

請伏候

睿裁

敬陳經理第二疏

爛泥淺挑引河二道

題爲敬陳經理河工事宜第二疏事該臣看得洪澤湖下流高家堰西北至清口一帶卽爛泥淺等處也臣原請於河身兩旁各挑引水河一道共需銀一萬七千二百八十兩

廷臣先議應如臣議速行挑浚等語後議大修旣議暫停此第二疏內引水河工程無庸議等語蒙

皇上軫念運道民生

敕臣再行確議查本年八月內洪澤湖下流爛泥淺一帶



已經淤斷黃淮相隔約有二十里之遙雖議堵決束水而不挑引水河則淤泥攔阻在前淮流不能下注是以臣隨於急工併舉等事案內一面題

請錢糧一面檄行淮揚道召募人夫專委原估淮安府山陽縣革職知縣柳天正爲監理官著令督同分管官六員并臣又委臣標効用官四員協力催督先築土壩一道攔阻黃流將淤斷河身挑挖疏通於八月二十一日興工至十一月初二日業已告竣目今淮水直抵土壩抵因河底墊高高家堰三官廟等大淺口

雖已閉合龍門仍有次小洩口數處尚未堵完淮水下注無多是以未經開壩俟次第堵塞淮水加強自卽開壩通流惟是原疏因正河淺阻估挑引河二道今正河全淤業已挑通應作挑引河一道科算尚有一道未挑必須及早挑浚湊通庶來年伏秋水漲之時淮水有路遄行不致更生他變也伏候

睿裁



敬陳經理第三疏

幫高堰堤以束淮濟運

題爲敬陳經理河工事宜第三疏事該臣看得高家堰等一帶臨湖堤岸無論石埽板工莫不殘缺單薄幫修之舉萬不容緩前據淮揚道佟康年山旰同知多弘安等估計共需銀三十九萬五千五百五十九兩零臣相度情形條議築築坦坡之法可節省銀二十萬一千七百餘兩實估銀十九萬三千八百兩廷臣先議應如臣議修築堅固等語後議大修旣議暫停此第三疏內修築坦坡工程無庸議等語蒙

皇上軫念運道民生

敕臣再行確議臣查運河底墊必須大挑以濟來年春運  
臣見於第五疏內議請矣但運河既議挑浚若不束  
淮水入河濟運而仍容黃流內灌則不久復淤豈非  
徒費錢糧徒勞民力耶臣是以將高家堰等臨湖一  
帶堤工洩口見在上緊堵塞束淮濟運也但自高堰  
三官廟大洩口閉合龍門之後湖水陡長二尺有奇  
連日西風鼓浪便見洶湧之形此猶在冬涼水落之  
際也待至來歲伏秋自是更加滂湃似此一帶殘壞

之堤若不及早自下而上次第火速幫修務極堅固  
勢必又於單薄之處更生衝潰之變一經再衝則淮  
水仍復旁洩黃水仍復內灌運河仍復墊高漕船既  
阻滯不通而見在挑河堵決一切大費之工盡歸烏  
有矣臣言念及此心膽皆慄除一面仰請

皇上俯念運道錢糧關係至重允臣仍照原估動銀十九  
萬三千八百兩之數一律幫築外但此幫堤之工甚  
長而來年伏秋水漲之期不遠若待部覆之後方行  
興舉則時日有限而工程浩繁必至貽誤臣已一面

檄行淮揚道并飭督山旴同知多弘安協理河務原  
任揚州府通判俞森原任革職山陽縣知縣柳天正  
等嚴督分管各官臣更委臣標効用候鈇守備陳杰  
等帶領其餘効用各官協力分工星飛催贊矣相應

一併

題明伏候

睿裁

敬陳經理第四疏 併修清水潭以束淮敵黃

題爲敬陳經理河工事宜第四疏事該臣看得運河以西臨湖一帶堤工自武家墩歷高家堰高良澗至周橋閘共計大小洩口三十四處俱應堵塞又自周橋閘至翟家壩應築土堤一道其中成河九道之處亦應堵塞以上工程先據淮揚道佟康年山旰同知多弘安等估計共需銀七十萬五千八百餘兩臣相度情形議不復砌石工惟下埽與包土兼用并築坦坡制水可節省銀四十餘萬兩實估需銀三十萬兩又



堵塞桃源清河安東三縣黃河新舊各洩口估銀八萬兩共需銀三十八萬兩等因

廷臣先議應如臣議堵築堅固等語後議大修旣議暫停此第四疏內築周橋閘等處之堤及堵各處洩口工程無庸議等語蒙

皇上軫念運道民生

敕臣再行確議查臣自到任之後偕

欽差侍郎臣折爾肯等查勘工程目擊武家墩洩口水勢洶湧壘臺缺陷詢據原任淮揚道降調副使黃桂山

盱同知多弘安稟稱自上年九月至本年二月經原  
任革職同知李德耀署事同知李朝事二官在於本  
工越築埽壩共用過工料銀五千七百三十兩有奇  
築過淺處及稍深處工程一百餘丈尚存中泓深處  
三丈有奇未經閉合忽於本年三月初五日桃汛泛  
漲復行潰衝今淺口見寬十丈有餘深四丈有餘難  
以堵塞必須遠越另做又估銀一萬七千二百八十  
二兩有奇等因臣往來相度見淺口之下兩岸俱屬  
堅堤若築攔河大壩約可省費過半隨行淮揚道修

康年力督該廳於五月初二日興工至七月二十三  
日閉合龍門九月初九日完工在案又本年九月初  
三日臣因黃運兩河處處淤淺竟有河水僅深數寸  
者回空阻滯難前臣焦思籌酌隨具急工併舉需費  
浩繁等事一疏一面

請借錢糧一面飛檄中河南河兩分司淮揚淮徐兩道并  
淮安府知府及各廳印河官至見任官不足於用又  
復遴委望誤能員并臣標効用弁員分頭協理臣居  
中調度往來查勘不時嚴加催督及自于家岡淺口

斷流之日黃水陡長二尺而白洋河閉合龍門黃水  
又增尺餘臣復親詣下流見黃水盡從王家營張家  
口洩口西奔而清江浦以下雲梯關一帶幾有斷流  
之勢臣復飛檄道廳印河等官將王家營張家口邢  
家口二舖口并一切無名小口盡行堵塞見在加幫  
寬厚其回空漕船已進甘羅城草壩者約有十分之  
七八此十一月望前之情形也近因天氣久晴兼之  
隆冬寒凍黃水槩消四尺黃河古城一帶運河板閘  
一帶仍復膠淺其未進草壩之回空俱在宿桃地方

臣一面檄行司道府廳印河各官分頭設法撈浚逐  
船送過淺處一面飛催山旰同知多弘安等星將高  
家堰高良澗一帶上緊幫堤堵浚以東淮流至高家  
堰三官廟大澆口雖工程浩大水勢湍騰然兩頭僨  
築計長一百八十一丈五尺已於十一月初一日閉  
合龍門又高家堰六安溝澆口築壩六十八丈五尺  
管家西澆口築壩十二丈八尺俱於十二月初一日  
閉合龍門見在各各加幫寬厚惟是臨湖一帶澆口  
三十四處尚有三十處未經堵塞兼之黃河下流底

高淮水下注未能直下刷沙臣再四察度見將高家堰未堵次洩口數處飭督各官無分晝夜飛星堵塞大約歲內可以斷流高家堰洩口盡行斷流之後淮流便可加強再於來春將高良澗各洩口次第上緊堵塞則淮水大強可以助黃刷沙併濟來年重運矣至築翟家壩之堤并堵成河九道之工程如不乘時併舉則清水潭萬難修治不特高寶等七州縣田畝永無播種之期而重運經過洩口危險異常殊非長法且將來楊家莊洩口堵塞黃河復歸故道之後淮

水翟壩旁分不能敵黃黃水勢必又從清口內灌淤  
墊運河誤運非小必須次第修築是臣原題需銀三  
十八萬兩堵浚築堤等工業已陸續興舉斷難議緩  
以致有半途而廢前功盡棄之虞者也臣未敢擅便  
伏候

睿裁

敬陳經理第五疏

挑河以濟重運

題爲敬陳經理河工事宜第五疏事該臣看得大挑運河并幫堤岸以及堵塞清水潭大潭灣東西堤洩口六處等工臣前疏內條議除可節省堵洩銀四十餘萬兩之外共實需銀五十六萬七千三百十二兩廷臣先議應如臣議務須挑通堵築堅固等語後議大修旣議暫停此第五疏內挑浚運河并堵清水潭等洩口工程無庸議等語蒙

皇上軫念運道民生



敕臣再行確議查運河自黃流內灌之後日墊日高本年八月內不但河水停而不流而河邊拆爲十字底漸乾涸臣隨於急工併舉等事案內一面

題明一面嚴督道府廳印河官并遴委各官星募人夫閉壩挑浚彼因回空急須修船不能久待深挑止量挑一二三四尺有奇不等於九月初七日開工十月初一日完工卽於次日開壩放船目下河水深者有四五尺而淺者止二尺及二尺四五寸不等回空雖可勉行而重運必須加挑今臣擬於來年立春後十

日地凍將解之時卽行閉壩大挑先挑面寬八丈底寬六丈深六尺每河一丈先挑土四十二方卽以之幫築堤工除本年九月內業已每河一丈挑過土十餘方及五六七八方不等外其餘應挑土方或俱募人夫或倣照臣第一疏內以車載代挑之法統容臣臨期斟酌量卸土之遠近而行總限一百日完工其來年春運過淮之期必須略爲寬限查康熙十六年起運十五年分糧船係五月初九日過淮全完七月初十日過臨全完今康熙十七年起運十六年分糧

船擬於四月初旬內挑河完工開壩放船起約在五  
月終可以盡數過淮全完一經過淮臣自不令停留  
嚴加驅趕務於七月中旬內盡催過臨總期不悞十  
七年回空以濟十八年春運可也伏乞

皇上敕部將十七年春運過淮之期准臣寬限至於臣前  
題疏內每河一丈估挑土八十四方一則深通運河二  
則幫固堤岸原屬必須之工今連本年九月所挑合  
之來春所挑共止擬每丈先挑四十二方者蓋工程  
太大斷斷不能速竣而漕船難以久待又不敢將重

運輕議由湖冒險越行是以不得不先挑一半其餘  
一半挑河幫堤并堵塞清水潭各浚口等工程伏祈  
皇上俯允照臣原題之數容臣隨時相機而行總之務期  
節省并斷不施工於無用之地以致糜費錢糧以盡  
微臣職掌也伏候

睿裁

華僑日報

丁八

敬陳經理第六疏

改調河員以供大修

題爲敬陳經理河工事宜第六疏事竊臣看得臣前題此第六疏內一切事宜有經

廷臣議允者有

廷臣議稱無庸議者蒙

皇上命臣再行確議臣謹隨時之宜復加詳酌逐一議請查南河中河北河通惠四分司向來各止漢官一員至前任河臣羅多任內各題增滿官一員已經八年矣臣到任之後據南河分司蔡音達禮等中河分司

沈圖等面稱伊等管理河工凡一切催夫辦料各事  
宜必得各有司同心協理万能有濟乃地方官員視  
分司爲贅疣往往呼應不靈不若道官所行之奉命  
惟謹而蔡音達禮更稱伊等例應三年一換方其初  
到任之時諸凡未諳及一二年後纔覺熟練而又屆  
瓜期不若道員之久任等語臣思其言皆切實事屬  
確情是以請將中河南河北河通惠四分司裁去其  
所管事務就近歸併各該道兼理也今部覆中河南  
河北河三分司俱應如臣議裁惟通惠分司所管事

務有報臣衙門者有竟報工部者且所屬河道俱係  
旗下地方不便交通永道管理相應仍留等因是此  
四分司應裁應留之處

廷臣已有定議臣無庸更爲置喙矣至於裁同知三員  
將宿桃二縣主簿四員分管兩岸并嗣後堤岸衝沒  
該管知府與道員一體處分

欽工民工俱照定例議處大計薦舉等典除布政司按察  
司外其餘道府廳州縣以下各官必河道無衝沒之  
事并旋衝旋堵不致奪河成錢淹沒田禾殃民損課



者方准卓異薦舉浚口工程限半年內堵塞遲違俱有叅罰工大難完者預行

題明等各情由俱應照

廷臣原議俟

命下之日卽令所裁分司六員同知三員赴部改補并宿桃主簿更定職掌餘俱載入例冊遵行惟是淮徐道駐劄之處臣前疏議令移駐邳州蓋以邳州爲適中之地也及臣親至邳州見該州地雖適中而不無偏僻宿遷縣爲漕運咽喉之地向有中河分司駐劄今

中河分司一切事務既裁歸淮徐道管理應令該道移駐宿遷縣方爲妥協又山盱同知所管歸併山清同知運河亦有清河縣地方應將山盱同知官銜改爲山清盱眙同知者也至臣前疏請調廳印官十四員分理大工會經

廷臣議允今臣將第一疏內原議限二百日完工者改爲限四百日完工原議用夫十二萬有奇者改爲用夫三萬餘名其用車運土之處又於第七疏內議

請預設官兵分頭料理是第一疏內原請用監理官十二

員者約可省用六員又第二第三第四各疏內一切  
工程見在次第催餉比至部覆之時約可完十分之  
二其原請用監理官五員者約可省用一員二共可  
省監理官七員尚少監理官七員又南岸白洋河以  
上北岸清河縣以上議增縷格堤并第五疏內先挑  
運河淤土一半以幫兩岸堤工約需監理官八員內  
除見在之徐屬同知祖文明邳宿同知蘇嶧揚州府  
管河通判聶文魁等三員可以分工監理外尚少監  
理官五員通共實需監理官十二員內有原任揚州

府降調通判俞森已經奉

旨還其原職見在高家堰等處協理河務并又有原任淮安府山陽縣革職知縣柳天正年壯力強素稱才幹因十五年分山陽高家堰并裏河堤工衝潰呈誤革職曾經漕運督臣帥顏保等以天正清廉愛民

題請將天正革職留任雖部覆未經允行而士民之愛戴天正者迄今不忝本年八月內臣因爛泥淺一帶淤斷必需能員督夫挑浚據淮揚道佟康年力保天正可用而漕臣又屢屢面稱其能臣隨委天正爲監

理官令之督率分管各官逐段深挑而天正躬親泥淖之中不辭勞苦不避風雨無分曉夜與夫役同甘辛不七旬而將二十里淤土盡行挑開其間有泥深丈餘人力難施之處天正隨機造器設法疏通不特功難泯沒而其實心任事之槩與勤敏幹練之才洵爲難得之品士民之稱其善政而訟其冤枉者牘且盈几臣愛其勤能已復委令協助山盱同知多弘安分工堵塞高家堰高良澗等處洩口去訖俟其再著勞績之時臣當另疏保舉以酬其功除此二員之外

尚少廳印官十員又查有原任淮安府睢寧縣因錢糧降級續完開復見在赴部銓補之知縣石之玖者臣因勘閱徐州堤岸道過睢寧聞之玖先年爲睢令之時督築堤工無分晝夜駐宿河干凡一切政務俱在工所辦理毫無貽悞且堤工一日不完則之玖一日不肯稍自暇逸等情臣復詢之淮徐道降調副使戴聖聰而該道之稱許之玖者與臣所聞無異并臣前疏所請之山東單縣知縣今陞北城兵馬司指揮韓第原任五河縣丁憂知縣陳顯忠皆係實心勤幹

之員均可不負監理之任者伏乞

皇上允臣所請

敕下部臣將石之玟韓第二官令之就近來淮監理并行  
陳顯忠原籍催令作速赴工又除此三員之外仍少  
廳印官七員容臣將原疏請調之太平府同知劉沛  
引揚州府同知王興元池州府同知管通判事喻成  
龍寧國府通判常君恩廬州府通判黃際會清河縣  
知縣劉光業宿遷縣知縣李燦等七員就近調取赴  
工并責成監理可也至此官七員臣原請出錢另補

今查劉光業李燦二官雖任衝疲之邑而年青才敏似可就近兼理河工容臣督令二官駐工辦事不必更令出錢又劉沛引等五官皆係廳員與正印官不同儘可調取赴工工完回任亦無庸出錢此卽臣前疏所稱或更有應損益增減事宜有必當上

聞者容臣隨時入

告者是也至於一切工程凡用監理廳印官一員者必須用分管佐雜官員以佐之今臣共用監理官十八員計需分管官一百八員查江南微員近因打造烏沙



等船閒者甚少除臣現於革職廢員之中擇其勤幹者一體委用外然不敷尚多臣請容臣於東豫二省佐襍官員之中查其職掌稍閒而才幹可用者隨便調取共襄大工方爲有濟也至於管工之監理分管各官伊名下派修之工合式堅固與否必須優定敘錄之典嚴立處分之法以鼓勸而儆策之方可責其龜勉趨事今

廷臣議稱如果工程合式堅固俟奏銷之時工部核明交與吏部酌量從優議敘等語臣本不應再瀆但念

黃運兩河無歲不修無年不壞流弊至今極難補救  
乃以微臣庸劣之才孱弱之資而膺茲艱鉅之任政  
不啻以螽負山此臣自知之最明者也祇以  
君恩深重不敢不勉竭駑駘以期仰副

知遇於萬一是用廣諮博詢考古酌今謬陳修治之計然  
而工程浩遠料理艱繁不得不將臣所見允堪  
任用之員列名題請惟是此等官員之中除柳天正  
原係廢員外餘者或係見任或係候補因其賢能而  
調取來工使之或離其見在之城郭而處於泥淖之

中或離其見在之室家而日與夫役爲伍或離其乘  
輿張蓋之榮而奔走於荆榛草莽之下尤且日費無  
資舟馬自備直待胼胝辛勤幸而工程告竣方得或  
回任或赴補或歸家若稍不合式更有嚴叅重處之  
虞其舍易就難舍利就害至於如此苟不預定優陞  
之典使之知有可至之途踴躍爭趨一官倡率於前  
而千夫効命於後又安望其事之克濟以共成此莫  
大之工也伏乞

皇上俯念運道民生關係至重此番極大工程與尋常築

堤堵淺者不同將監理分管各官准照微臣前疏  
題請之例凡監理分管等官所築堤工處處合式堅固  
該管廳印河官出具甘結道府驗實加結申送臣衙  
門親勘無異者俱准照伊原任應陞之數加二級從  
優卽陞如有原非正途者俱作正途一體陞遷至於  
分管官所築堤工有一處夯杵不堅盛水卽漏并有  
一二丈不豐滿合式者降一級調用兩處夯杵不堅  
盛水卽漏并有三四丈不豐滿合式者降二級調用  
三處夯杵不堅盛水卽漏并有五丈以上不豐滿合

式者革職監理官所轄分管官有因築堤不堅固合  
式一員議處者罰俸一年二員議處者降一級調用  
三員議處者降二級調用四員以上議處者將監理  
官革職如議處敘相同者准與抵算如監理官揭  
叅者准免連坐如此則功罪昭明賢者益奮而不肖  
者知勉工程可望堅固而無闕茸貽悞之虞矣他如  
劣員凡有更換銀色短少分兩扣剋回頭等弊并姦  
徒捏言惑衆暗壞工程等項俱應遵照  
廷議凡有發覺容臣拿問究審具

題重懲可也抑臣更有陳者挑浚築修之工雖經遴官  
委任然募夫辦料必須附近地方官同心協力始克  
有濟乃邇來之附近有司視河官爲贅疣河務爲餘  
事一任催呼漠然罔應查定例地方官員催夫不發  
誘非本汛并買料不速解送以致遲悞河工者定有  
處分之例

功令煌煌毫不知畏總緣處分尚輕耳臣請嗣後興舉大  
工其附近地方官不協同設法募夫不將急需之柳  
草等項一切物料火速協買上緊解運以致遲悞河

王者容臣不時

題叅將州縣官降三級調用道府官降一級調用如此  
庶各各知警可免貽悞又河南山東俱有特設管河  
道嗣後凡勘閱情勢估計工程報銷錢糧應歸管河  
道專責其一切督催挑河築堤夫役并買辦物料事  
理必須該地方之道員協同催饋聯銜會詳一體責  
成方爲有益也相應一併

題請伏候

睿裁

敬陳經理第七疏

立勸懲以儆汙吏

題爲敬陳經理河工事宜第七疏事竊臣看得疏通運道全在束水歸漕而欲束水歸漕則舍徧築堅堤更無善策但不肖官員姦民蠹役率皆喜動惡靜樂於有事而苦於無事往往有陰求敗廢之者是以堅堤旣築之後必須設防守之法否則不久必壞猶之未修築堤也旣設防守之法尤當立勸懲之典否則不久必弛猶之不防守也臣再四思維反覆籌酌是用謬陳盡裁夫役特設官兵令之各駐堤上將防守修



葺事宜一併責成之并請嚴立議處優定議敘之例以鼓舞而儆戒之也

廷臣先議應照臣議等語後議大修既議暫停無庸議等語蒙

皇上軫念運道民生

命臣再行確議臣惟高堰等諸臨湖一帶堤工臣見在幫寬塞沒束淮濟運而黃河兩岸各堤尤須次第速築是原議防守之兵誠屬必須者矣惟是堤成而後設立官兵交給防守更不若先設官兵而卽令協同看

築堤工之爲尤妙也蓋臣自到任以來迄今八月凡  
淮揚各處堤岸莫不盡行親勘有虛鬆頽塌者糴糶  
鑽穴者大約皆因分杵不堅無人看守所致及觀民  
間新幫之堤甚有以大由溼土疊累而成者其空鬆  
之狀何待水衝凡驟雨一淋卽便塌卸似此工程又  
安能禦怒濤之撞擊也揆厥所由總緣築堤之人痛  
癢不關止圖苟且完工并不求其堅固雖督築之官  
定有黃河一年內河三年如限內衝決從重處分之  
例然大抵止顧目前不思遠慮且卽有實心任事之

官而一二人之耳目有限安能徧察數十里之工程  
與盈千纍萬人夫之勤惰是以欲堤岸之堅固原屬  
最難今與舉大工雖設監理之廳印官率同分管之  
佐稜官不時勘查催督然工程浩遠耳目難周誠有  
鞭長不及之慮若先將應設之官兵預爲設立每兵  
一名交河堤四十五丈并人夫一二十名車一二十  
輛與之令其日則催夫運土勤督夯杵夜則看守料  
物照管車輛且告以此堤旣成之後卽係爾永遠防  
守之工保過三年定卽從優拔補若因夯杵不堅而

有意外衝決之變則獲罪不小性命攸關非比泛常等語在此等官兵既知利害兩途判若霄壤且不費已財而盡皆他人出力自必盡心以求堅固况更加分管官之往來催儻監理官之統督稽查自可無苟且塞責之工洵爲至當不易之計也臣請

皇上俯念河道關係重大容臣將應設官兵卽爲預設責成協同築堤其遴補官弁召募兵丁之處并容臣量才確酌務令人地相宜另行咨

題報部至臣前疏議每兵一名所管之堤有三十丈四

十五丈六十丈九十丈之不等原從沃地有易險之  
不同起見今臣復加斟酌頂衝危險之處每兵止管  
三十丈亦屬繁難而尋常平易之堤每兵管至九十  
丈亦皆閑空今莫若每兵一名一律管堤四十五丈  
及待伏秋水漲之時則調取閑空汎地之兵協守繁  
難危險之地更爲妥當又每兵一名其所管之遙縷  
堤四十五丈皆係頂寬二丈底寬六丈必須逐年加  
幫高厚以圖久遠以保萬全其按年責成加幫堤工  
之尺寸容臣俟堤成之日另行酌議

題請爲例但以一人而幫堤四十五丈力少工長難期  
寬厚臣擬每兵一名聽其自募幫丁四名一併同住  
堤上共相守助至幫丁旣同官兵協守堤工必須代  
爲預謀生計臣往來相度目擊黃河兩岸近堤之處  
頗多無人耕種之荒土卽其間亦有成熟民田而瘠  
薄不堪納糧無幾臣請嗣後凡離堤一百八十丈以  
內俱爲河地將此地分給幫丁耕種責成協保堤工  
至此等地土凡原係荒地卽令幫丁開墾或間有見  
在納糧之田卽令業主爲幫丁或聽業主撥伊家屬

爲幫丁協同保堤挑土加幫高厚此幫丁之制一成則人力益衆而防守益密再加鐵埽帶隨時採浚設有驟淤更調各汛船兵協力疏浚之法久而勿替便可永保無虞不特三年一年而已也至臣原題共設兵五千八百六十名內請於江蘇所屬抽調二千名尚少三千八百六十名俱行另募今

廷議准於江蘇所屬額兵內抽調戰守兵二千名再於臣標兵內亦移步兵一千名守堤其尚少二千八百六十名准臣選募等因查臣標官兵係隸山東省經

制而不在江南且北至張秋起南至珠梅隔止一帶  
三百七十餘里皆係臣標官兵汛守其間彈壓地方  
催餉漕船護送差使責成甚多尚苦不足斷難遠調  
况設兵守堤責成修葺之法臣愈思愈當其山東河  
南二省臣亦欲次第一律舉行但江南未經定制是  
以遲遲俟江南定制之後容臣再將東豫裁夫設兵  
之處另爲

題請是臣標官兵應俟將來另題俾防東省堤工此江  
南守堤之兵仍請



皇上俯允照臣原題添募三千八百六十名所需糧餉除  
裁一切各夫工食之外統容臣於河庫內動支給發  
蓋設兵幫丁之制一定則每年歲修錢糧亦可量圖  
節省以節省工料之資補兵餉不敷之用並不更動  
公帑而河堤保固運道以通民生以奠誠一舉數得  
之利故臣敢於力請也又歸仁一堤仍在確酌俟隨  
後另

題外至於所修工程內微小事宜准臣竟自舉行工完  
銷算之時開明具

題若事大者仍行

題明并守堤弁兵議處議敘之處以及盜沒故沒擬罪  
之例俱經

廷臣議允應照

廷臣原議臣無庸更議倘有未盡事宜應損益增減者  
仍容臣臨期分別或竟行或入

告可也總之臣以一介寒微駑駘陋質蒙

皇上屢加拔擢擢昇以重寄臣雖肝腦塗地亦不足以仰答  
殊恩於萬一是以雖自知才力之不能勝任而仍不敢因

循苟且必欲勉強籌維以期得當至其間干係重大設有疎失獲罪不小旁人每爲臣危爲臣慮而臣不敢自計也臣惟竭區區報

主之心以盡分內之職掌而已若夫各疏內一切工程如捐納人多錢糧湊手則自奉

俞旨之後大約三年可以告竣如限期之內黃淮不復故道糧艘不能通行民生仍在昏墊容臣自行糾劾恭

請

皇上嚴賜處分以彰

功令倘邀

皇上齊天之福幸而告成其堤工之堅固與否仍請  
皇上特遣大臣確驗定奪者也伏候

睿裁



江南大修疏

題爲江南大修河道業已題奉

俞綸豫省歲修工程微臣勢難兼顧伏乞

皇上睿鑒責成河道撫臣就近勘核隨機興舉以固河防  
以保運道事竊臣惟河道歲修工程乃未雨綢繆之  
策若應修而不修則堤岸難保無虞不應修而亦修  
則糜費甚屬可惜是以臣於一切工程莫不親詣河  
干與該管各官詳審確勘定議興舉其有已經勘定  
而仍當損益增減者亦復隨時酌宜不憚更改此臣

區區之心欲於保固河防之中更求節省錢糧之法也今據河南管河道王日藻詳估三處歲修工程共需銀二萬六千餘兩當此河帑告匱之時動支如許銀兩而臣未細勘情形確量丈尺設其中有濫興工作浮估錢糧之弊臣何由而知卽欲親行查勘而往返之程不下三千餘里江南大工方在興舉臣斷不能遠離貽悞反覆籌維惟有仰請

皇上將豫省河務責成河南撫臣就近料理凡一切估計歲修工程但著該撫臣親勘核定一面興工一面移

會臣衙門知照其有應

題應咨事件亦聽該撫臣主藁會臣

題咨其間臣若有見聞所及必與撫臣盡心參酌斷不  
因已經責成撫臣而臣遂置豫省河工於膜外至豫  
省堤岸自責成撫臣之後設有疎防衝沒之事臣不  
敢竟諉之撫臣願與撫臣一同聽候照例議處以重  
河防以信

功令俟江南大工告竣之日應否仍舊容臣等再爲酌議  
題



請定奪蓋河南撫臣衙門駐劄河干而

敕書內原有兼理河道字樣與別省撫臣不同且撫臣就  
近勘核事必得當而屬員奉行亦速欺冒之弊亦無  
所施臣遠處江南鞭長莫及呼應不靈不能周知情  
形確查弊竇是豫省河務責成該撫臣親行兼理較  
之臣衙門隔遠遙度者其得失相去正不啻天淵之  
別也緣係條陳河防重務事理貼黃難盡伏乞

睿鑒全覽

敕部議覆施行

指陳河道疏

題爲指陳河道危切仰祈

睿裁事竊臣看得歸仁一堤原以障睢湖諸水使之由白  
洋河入黃刷沙并爲高堰等一帶長堤之外藩者也  
在明時因有泗州祖陵惟慮水侵故所以修防歸仁  
堤者甚力及

本朝定鼎之後司河諸臣惟盡力於漕艘經行之地歸仁  
堤卽有殘損以爲無關運道率緩視之而不爲修葺  
以致堤工衝沒睢湖諸水盡行束注洪澤湖而不復

出白洋河口黃流反攝其後將白洋河口淤成平陸  
益以烟墩茆良口七里溝新莊口等處屢屢告浚河  
底日墊日高高堰勢不能支淮揚水患無寧日而運  
道時憂阻塞矣前任河臣羅多王光裕雖經估計具  
題將歸仁堤大爲修治挑通引河設立三壩以爲啓閉  
宣洩之計無奈黃水高於內地是以壩雖設而迄今  
未開其原估銀一十七萬六千七百五十六兩零業  
經前任革職歸仁同知劉光耀領用過銀十二萬兩  
又經見任宿桃歸仁丁夔同知佟國聘領用過銀八

千兩僅存原估未支銀四萬八千七百五十六兩零  
其劉光耀做過工程雖潦草塞責未能如式堅固然  
亦因上流諸水無路宣洩撞衝擊汕以致新修之工  
莫不歪斜傾倒此皆

欽差尙書臣伊桑阿等侍郎臣折爾肯等所目擊者臣自  
到任之後親勘四次灼見河高堤矮是以批令該廳  
道於冬至之後用平水法確量酌奪今據量石工堤  
頂較之河岸見矮四尺九寸五分卽將堤工照估加  
高至一丈仍比河岸低二尺一寸五分至於議修滾

水壩四座之說臣忘大修歸仁堤原期束水歸河助黃刷沙若改設滾壩則上流諸水勢必仍注洪澤湖不能復入黃河與原

題大修之義相背若謂堤矮河高將歸仁堤頂再議加高則必須於原估堤頂之上再加五尺使堤工高過河岸二三尺庶足捍禦然堤頂又加五尺必當更爲幫寬數丈以壯堤根且劉光耀所修傾倒不堪之工尤須從新另修計其甃石土方人夫等項約應增費二十餘萬兩當此錢糧匱乏之際斷難輕議且大費

錢糧而果能束水歸河臣何難確議上請殊不知黃河未治水行地上而不由地中卽大費二十餘萬金錢將歸仁堤加高幫寬亦止可蓄睢湖之水於堤內不能挽入黃河以爲刷沙之助况河底墊高洪波四漫之際設或伏秋水漲南岸遙堤又有潰沒之事則黃流內灌是若建瓴與睢湖諸水併力下注其排山倒海之勢雖歸仁堤堅固如鐵亦難免於復衝是仍屬無益徒將難措之金錢付之一擲也臣反覆籌維再三勘度必俟黃河復歸故道旣浚浚通使水由地

中安流而不泛濫河岸然後歸仁堤可以竣工今臣  
見將經理河工事宜各疏內工程分頭興舉并委監  
理官俞森陳顯忠王興元等多造鐵掃帚僱覓大船  
用溯流揭沙之法疏浚黃河俟確有成效隨堵塞楊  
家莊沒口挽河使歸故道然後將歸仁未完堤工確  
估另

題再爲興舉庶不糜費錢糧而且可期經久也臣謹具  
疏

題明伏乞

睿鑿敕部議覆施行

臣等謹將睿鑿敕部議覆施行



196

196

經理三疏未盡事宜疏

題爲

題明經理河工第三疏內未盡事宜事竊照臣先因高家堰高良澗等處一帶臨湖堤岸殘缺單薄危險異常臣往來相度必須將殘堤逐一加幫高厚然後次第堵塞庶免已塞復衝之患等因於敬陳經理河工事宜第三疏內

題估在案查此等堤岸原高六七尺不等臣估築加高三尺共高一丈并外築坦坡內築陡坡今高家堰

石工五千餘丈已經一律加高其高良澗板工五千餘丈亦經改爲小埽椿工見在督夫挑土尙未修竣惟是五家墩澆口一處高家堰石工澆口七處雖經堵完而高良澗板工澆口三十六處止堵完十六處尙有大小口十處未經堵塞并翟家壩成河九道之處全未動工計淮水之下清口者不過十分之五耳而已成一派汪洋清波萬頃之勢目今運河內湍流直瀉急溜非常幸賴今春將挑河之上幫築寬堤僅免意外之虞然掃灣之處塌卸甚多見檄該管道屢

印河官分頭搶救至黃河自清江浦以下出漕四漫亦委監理各官或用鐵掃帚揭沙之法乘流疏浚或督催夫役搶築堤工至於高家堰一帶石工五千五百餘丈原高七尺者今水與堤平將臣原疏所稱可築坦坡之三千八百餘丈俱被水占堤根其所恃以捍此滔天之水者惟新加之三尺土堤耳淮水僅來一半而其勢之洶湧已至於此若今歲秋冬來年春月再將高良澗未完洩口十處并翟家壩成河九道之處盡行堵築則來歲伏秋湖水益漲大爲可虞臣

反覆籌維但坦坡既不能速築必須將高家堰石工  
加高三尺與新加土堤相平然後另加土堤三尺共  
高一丈三尺至於堤裏原止估築陡坡一丈者所恃  
外有坦坡耳今坦坡既不能施工而堤身單薄必需  
加築戩堤一道面寬一丈底寬二丈高一丈又高良  
澗一帶亦應幫戩堤面寬一丈底寬二丈高八尺方  
爲萬全之計其需用土方止須將原估坦坡之土移  
爲戩堤加高之用所少無多惟加高石工三尺除各  
洩口內衝卸舊石輒由盡行撈取濟用外計其添買

甄石灰米匠役之費約需銀五萬餘兩亦於臣原  
題敬陳經理河工事宜各疏內通融節省應用不復更  
請錢糧除見在檄督該管各官飛星辦料與舉外臣  
謹具疏

題明伏乞

皇上睿鑒施行

中華民國二十二年

二二

經理七疏未盡事宜疏

題爲

題明經理河工第七疏內未盡事宜事臣惟從來河漫之患率由於堤岸不堅而堤岸之不堅皆緣欲保全河道之人少而求廢壞河道之人多是以屢塞屢衝愈救愈壞而無所底止也今江南河道蒙

皇上軫念運道民生動用正項錢糧

命臣大爲修治臣欽承重任刻刻以隕越爲虞反覆籌維力求善策是以先於敬陳經理河工事宜第八疏內



條議設兵守堤并

請優定敘錄之典嚴立處分之條以鼓舞儆戒俾之共保  
河堤等因業經議政王等會覆奉有

俞旨欽遵在案惟是臣原疏

題設守備六員千總十一員把總二十三員兵丁五千  
八百六十名原議守黃河自海口以至徐州運河自  
清口以至江都并高家堰等一帶臨湖堤岸也至於  
徐州州城以上河堤臣原因其離河較遠不估大修  
是以未議設兵及臣於本年夏月徧行親勘徐州南

岸歷蕭縣碭山至河南虞城縣境北岸歷豐縣碭山  
至山東單縣境各長二百餘里除連山之處原未築  
堤外計其有堤之處每岸不下一百餘里其間坍塌  
殘缺在在皆然以致本年七月河水泛漲漫缺多口  
臣因思既有堤工亦應防守况臣條議建設減水石  
壩而又見在檄行道廳州縣各官勸諭居民共相出  
力陸續修築堤岸以期各保田廬雖此係民力幫修  
原不動用錢糧不能剋期全竣而逐漸所修之堤若  
不防守是徒勞民力無益民生矣是以徐州以上之

堤斷當一例設兵防守方稱萬全但此一帶地方並無歲修工程與徐州以下不同自此以下兵管堤九十丈令之填補狼窩穉穴植柳蓄草儘可無悞約需增兵五百餘名又臣原疏議設六營俱就黃河形勢定議不照州縣地方分汛今復加籌酌一切河防重務必須各專管河廳與各河營守備同心協力各率所屬官弁共相修防守護始克有濟而無悞若照臣前議定立營制不無稍有牽扯莫若就河廳所管地方爲河營之汛地內惟山清安海同知所管河堤兩

岸各縣長三百餘里地方太廣設兵二千餘名斷非  
一守備所能管轄應分爲二營通計江南淮揚徐三  
府州并靈璧盱眙二縣見設河廳六員者今應設防  
河守備七員千總十六員把總二十九員內管理徐  
屬河務同知所管地方應設防守徐屬河堤守備一  
員千總三員把總五員分防徐蕭豐碭四州縣堤工  
管理邳睢靈璧河務同知所管地方應設防守邳睢  
靈璧河堤守備一員千總二員把總三員分防邳睢  
靈三州縣堤工管理宿桃歸仁河務同知所管地方

應設防守宿桃河堤守備一員千總三員把總六員  
分防宿桃二縣堤工管理山清盱眙河務同知所管  
地方應設防守山清盱眙運河湖堰守備一員千總  
二員把總四員分防山清二縣運河并山盱二縣臨  
湖堤工管理揚屬河務通判所管地方應設防守揚  
屬河堤守備一員千總二員把總三員分防高寶江  
三州縣堤工管理山清安海同知所管地方應分爲  
二營共設守備二員千總四員把總八員內分一營  
設防守山清外河守備一員千總二員把總四員分

防清河一縣并山陽北岸自清河縣界起至安東縣界止南岸自清河縣界起至雲梯關止一帶黃河堤工再分一營設防守山安河堤守備一員千總二員把總四員分防安東一縣并山陽北岸自安東縣界起至海口止山陽南岸自雲梯關起至海口止一帶黃河堤工如此則責成既專防守俱便文武協力保全河道之人多而陰謀暗害者無所施其姦計可以永固河防於勿替矣至於增設官弁十四員增募兵丁五百餘名約每歲應增俸餉之需不過七千餘兩

總在河庫內動給增費無多而所以保全河防運道  
國計民生者甚大且所添之兵嗣後一體責辦柳草以  
備歲修之用則數年之後更可節省買料錢糧誠一  
舉而數善備焉者也若夫各官兵保固三年從優議  
敘設有衝沒從重議處之例應於各該營工程告竣  
之日爲始如某營汛地工程先完臣當先咨達部以  
憑部臣扣算年限可也查臣原

題經理河工事宜疏內倘有未盡事宜應損益增減者  
容臣臨期分別或竟行或入

告等因經議政王等議覆奉有

俞旨欽遵在案今添設官兵自非微細事宜臣謹特疏具  
題至此七營守備應各給條記一顆庶上下一切文移  
可免詐僞舛悞之慮相應一併題

請伏乞

皇上睿鑒敕部議覆施行



THE UNIVERSITY OF CHICAGO

1971

再陳一疏未盡事宜疏

題爲再陳經理河工第一疏內未盡事宜事竊照臣於  
康熙十六年七月初六日將江南做壞河道分列八  
疏題

請大爲修治其間第一疏內所估計者黃河南岸自白洋  
河起歷桃源清河山陽三縣出雲梯關至海口共長  
四百一十里北岸自清河縣起歷山陽安東二縣出  
雲梯關至海口共長二百八十里兩岸各築長堤一  
道通共估銀九十八萬九千七百九十餘兩此就尙

書臣伊桑阿等條奏內所估工程臣惟將尙書臣等所估土方酌減十分之三四并於尙書臣等原估之外增估雲梯關外一帶工程其餘原未估及也迨具題之後臣循河而上親行相度目擊南岸自白洋河以上歷宿遷睢寧靈璧以至徐州計程二百八十里北岸自清河縣以上歷桃源宿遷邳州以至徐州計程四百里其間堤工處處殘缺在在堪虞且堤離河近設有潰衝必至奪河成患阻運殃民臣憂心如灼寢處不寧方擬具疏入

告聞適值

廷臣以需餉之時費用無出將臣前

題各疏俱議暫停荷蒙

皇上軫念運道民生

敕臣再行確議臣隨將南岸白洋河北岸清河縣以上各  
至徐州之情形事勢逐一聲明并議各加築縷堤一  
道并築格堤以爲重門之障增估銀三十五萬九千  
四百二十餘兩二共實需銀一百三十四萬九千二  
百餘兩統於第一疏內一併

題詩隨蒙

廷議覆允於康熙十七年二月十一日奉有依議之

旨欽遵在案臣自奉

旨之後見在嚴督各官將徐州以下估定工程酌量緩急  
分頭僱修設兵委官加意防守當此伏秋大水幸皆  
保固無虞惟是徐州而上南岸歷該州之十八里屯  
楚王墓賈家樓等處經蕭縣并河南之永城縣復由  
江南之碭山至河南之虞城縣界止北岸歷該州之  
大谷山楊家莊許家莊等處經豐縣碭山至山東省

之單縣界止兩岸各長二百餘里其間地高并有山之處俱無堤工凡屬地窪之區悉有堤岸有有堤一道者亦有有堤兩道者其見有之堤雖不似徐州而下之頂衝危險然殘缺亦多祇以離河甚遠卽有漫衝亦不至於奪河妨運臣是以不敢估用錢糧以煩司農之仰屋惟督令該地方官量撥民夫逐漸修築如康熙十六年八月三十等日蕭縣之石將軍廟吉門兩河口等處共漫堤工一百二十餘丈經臣將防守各官

題叅郡覆將廳印河官革職戴罪修築續據該管各官  
督率民夫竭力堵築俱於十七年四月初二日告完  
屢據各官詳請具

題開復臣因洩口雖已堵完而殘堤未經幫固恐一爲  
開復則又泄視不前是以不准所請批令將殘堤幫  
完之日始爲具

題開復等因在案豈期今歲七月江南方告旱荒而上  
流之水奔騰沸湧而來虞永曹單豐礪蕭徐之間數  
日之內陡長數尺水高於堤平漫而過據淮徐道吳

燁等申報蕭縣長堤漫錢九處共長三百八十七丈  
一尺礪山尚未查確河南虞城縣亦漫三日俱經臣  
駁取經修防守職名俟覆至照例

題叅外臣因思

皇上不惜費數百萬金錢

命臣大修河道蓋不僅專爲濟運而實欲兼之保民也今  
徐州以下雖在大修而上流漫衝以致宿徐等州蕭  
礪虹靈睢宿等縣處處被災雖漫溢之處離河甚遠  
並不奪河阻運然大水驟至之際禾苗盡空秋成失



望若不併爲圖治則歲歲伏秋勢必年年淹沒此數  
州縣民生又安望其有起色耶除河南黃河容臣與  
河南撫臣董國興確酌修防毋令漫溢外至於江南  
徐州以上并蕭碭一帶必須設法治之庶可稍救此  
數州縣歲歲被災之苦但軍興需餉之際安敢再請  
錢糧臣往來相度反覆籌維審勢揆情更有一得之  
慮不敢不亟爲我

皇上告也臣維黃河之水雖合千支萬派而來然怒漲之  
時亦皆遂寸加增兩岸之堤高者不過一丈低者僅

有五六尺若河身之水止增三四尺猶可也其如河  
底勢高每每驟長一經長與堤平即便漫堤而過水  
過之處堤工隨被洗去頃刻立成缺口於是堤外逐  
漸所積五六尺高之水盡從洩口奔騰而下所過之  
地禾稼漂流室廬傾倒臣愚以爲既知水之逐漸加  
增則當作一逐漸洩之之法則惟有建築減水壩之  
爲得也查桃源縣地方向有減水壩四座臣親爲勘  
量每座止寬一丈七尺合四座計之其洩水之地不  
及七丈以無窮之水而俱欲賴此七丈地面洩之自

屬無益今臣擬築之減水壩東西寬十二丈南北長十八丈六尺中立磯心六座兩旁俱用石牆土內密釘排椿灌以漿灰上鋪石板聯以鐵錠每壩一座共成七洞每洞各寬一丈八尺計其洩水之地共有十二丈六尺先於礪山縣南岸建壩一座以減豫東二省驟來之水礪山壩內疏洩不及者隨於蕭縣南岸又建一壩以減之更於徐州北岸大谷山去處并州城對岸子房山去處連建二壩以減之至州城之下尚有疏洩未盡者則於花山去處亦建一壩以減之

如此則隨漲隨減隨流河內之水既無湧積漫  
堤之虞堤內之流亦無泛濫奔騰之害不特蕭碭豐  
徐之田畝漸漸可耕而徐州以下邳睢靈璧新舊河  
堤俱可不至橫沒以上碭蕭徐三州縣地方所建五  
壩內南岸二壩所減之水導歸睢河從姬村永堽等  
湖而下使沙停湖內聽清水由白洋河復入黃河北  
岸州城迤上二壩所排之水排入微山呂孟等湖而  
下亦使沙停湖內聽清水由韓莊閘歸運河出駱馬  
湖復入黃河花山一壩所減之水引令從新浚大口

內而下亦使沙停口內聽清水由貓兒窩歸運河亦  
出駱馬湖復入黃河至宿桃一帶則仍受全河之水  
自是怒漲非常於是亟於宿遷北岸攔馬湖朱家堂  
溫州廟連建三壩以減黃河與駱馬湖會合之水又  
於桃源北岸之古城黃家嘴二處亦建二壩以減黃  
河與白洋河會合之水更於清河北岸西王家營張  
家莊二處安東北岸邢家莊一處連建三壩以減黃  
河與淮河會合之水以上宿桃清安四縣所建八壩  
俱在北岸其所減之水內宿遷三壩與古城一壩俱

引入楊家莊大澗口內黃家嘴壩引令歸黃家嘴舊  
衝口內西王家營張家莊二壩俱令歸張家莊大澗  
口內邢家莊一壩引令歸邢家莊舊澗口內各各排  
入倉基等湖使之東北山沐陽沐河海州之漣湖二  
河入海如此則每歲五六月之間凡遇河流暴  
漲而宜洩有途加以人力修防之密自不至於壅積  
傷堤漫衝橫洩其餘夏初秋季水平之時與冬夏等  
月水涸之候則皆仍復歸漕安流趨海更免芻洩停  
沙淤高河底之患以上通共建壩一十三座并量挑

引河引水入舊口歸各湖以免漫漭田畝此項工程約需費銀二十六萬餘兩然此壩一建則水不湧漲其原估應築之遙縷格堤可以相地勢之高卑與離河之遠近凡地勢卑而頂衝危險離河甚近者仍築遙縷堤二道地高而離河遠者止築一道以省錢糧計臣原

題第一疏內需銀一百三十四萬九千二百餘兩者臣約畧計之可以節省五十餘萬兩內除應費建壩銀二十六萬餘兩仍可照原估節省銀三十餘萬兩且

此壩與各工告成之後不特無奪河阻運之虞而沿  
堤田畝水災亦可漸減其於

國計民生實大有攸賴也臣再三籌度委無疑意除一  
面飛督各官辦料興舉并相度地勢建築堤工外相  
應特疏

題明伏乞

皇上睿鑒全覽施行



1951-1952

1951

酌改運口疏

題爲

題明酌改運口以免再墊運河事竊照淮揚運河由江  
達淮綿長四百餘里其出口之處是爲清口離淮黃  
交會之所不過二百餘丈黃流稍漲卽從清口灌進  
運河以致運河之底逐漸墊高歲須挑淺勞民傷財  
不可殫計臣檢閱明時舊制亦因黃流屢墊運河原  
有重運過淮之後隨卽閉壩攔黃除貢鮮船隻仍應  
開放之外直待回空南下始行啟壩等因載在河誌

諸書可考然臣思閉壩之說不特不便於商民關權  
而空重往來之時仍不能禁黃流之不進是苟且之  
策而非不易之計也今臣奉

命將運河大爲浚挑不敢不另圖良法以期永遠查目今  
高家堰洩口七處久已盡行堵完高良澗洩口二十  
六處亦將堵竣止餘數千丈未合龍門計是月之內  
皆可斷流雖翟家壩成河九道之處尙在次第興修  
而約畧淮流之下注者已有十分之七黃河從楊家  
莊洩口北瀉之後桃源清河每多淺澁臣慮阻運道

一面委官僱覓夫船用鐵掃箒往來揭沙一面委官  
多募人夫將楊家莊南岸挑挖引水河一道挽流濟  
運今黃流之下注者尙不及十分之一然淮黃交會  
之處觀其水勢每遇西南風作則淮流稍勝於黃而  
東北風起則黃淮勢便相敵將來各工告竣之後淮  
河之水不過增十分之三而黃河之水尙當增十分  
之九則其內灌運河有理勢所必然者臣往來相度  
查清口迤南之河乃臣上年九十月所挑之爛泥淺  
第一道引河也清河西南一里許又有支河一道乃

華文選卷之二  
臣今年春月所挑爛泥淺第二道引河也自清口向  
東南行七里是爲七里墩旁有石閘一座卽名七里  
閘閘內有淤高河形一道係明季所挑新河閘外則  
原屬洪澤湖之灘地也今閘之內外悉皆淤成平陸  
矣自清口進河向東北行二里許是爲新莊閘卽天  
妃閘乃漕運咽喉又東行一里許是爲文華寺卽明  
季所挑新河之盡頭也臣再三籌酌必須將清口永  
遠閉斷從文華寺淤高之新河迤南挑七里直至七  
里閘以七里閘爲運口折而西南又挑七八里至武

家墩再折而西北又挑三里許達爛泥淺第一道引河之上流通舟濟運復將爛泥淺第二道引河臨湖去處乘今冬水涸之時再挑小支河數道多引湖水使歸第二道引河下注清口用以敵黃凡北上之運艘與一應商民船隻不令由新莊閘并清口出入而令文華寺出七里閘遶武家墩入爛泥淺第一道引河之上流下達清口轉入黃河如此則運口與淮黃交會之處相隔十有餘里且河身曲折而又另有敵黃之支流則黃水雖當伏秋暴漲之際亦不能更灌

運河運河既不爲黃水所灌則自無墊高之患此後不必年年挑浚卽或年深月久兩岸積土淋入河中亦止須隔數年而量爲小挑其節省之民力錢糧殆亦不可勝計矣臣約估所費查七里閘一座原爲減水而未常通舟牆底俱高必須拆修方可通運然石料俱在惟用人工與灰米等項併武家墩受水之處須築石礮數十丈束水俾湖波雖值大漲之際亦不得多進運口又文華寺出口之處亦於北岸築石礮數十丈以禦衝擊連一切挑河諸費不過需銀三萬

餘兩然此工一成則臣原題第五疏內挑河土方亦可量爲減挑節省錢糧十萬餘兩以見在可省之資而建此永常之利誠計之最得者也臣審量已久事屬萬全除見在檄行該管各官備料募夫與舉外緣係更改運口事宜相應特疏

題明貼黃難盡伏乞

皇上睿鑒全覽

敕部議覆施行



第 一 卷 第 一 章

一

靳文襄公奏疏目錄

卷一

治河題藁

題明經理第一疏未盡事宜疏

特陳歲脩疏

特請大脩疏

歸仁具

恭報合龍疏

清水潭

恭報完工疏

改運口

恭報合龍疏

翟家壩九河

再陳未盡事宜疏

請留漕濟工疏

再請留漕濟工疏

請脩運河疏

因河命官疏

恭報水漲疏

經理未竣工程疏

築壩挑河疏

挑河避險疏

男 治 豫 編 次

孫 樹 德 校 正

曾 孫 光

烈 文

全 校 字



靳文襄公奏疏卷三

總督河道提督軍務太子太保兵部尚書兼都察院右副都御史臣靳輔

治河題藁

題明經理第一疏未盡事宜疏

題爲

題明經理河工第一疏內未盡事宜事竊照河道做壞

已極蒙

皇上軫念民生昏墊之苦准動正項錢糧

命臣大爲修治臣雖至庸至劣敢不仰體

馮慈 盡駑駘以期得當計自奉

旨之後歷今四月有奇見在嚴督該管之道府廳印河官

并調到之監理分管各官以及臣標効用弁員分頭

與舉併力僨工矣惟是其間一切事宜較之臣

題原疏有應損益增減者除微小事宜臣俱仰遵

廷議竟自舉行外所有必須入

告事宜臣不敢不具疏

題明至此番

題明之後或仍有應損益增減者臣又當隨時隨事據

實入

告者也查黃河堤之高寬丈尺臣原

題估疏內開黃河南岸自白洋河以下北岸自清河縣  
以下各至雲梯關止通築遙縷格堤遙堤高八尺縷  
堤高六尺格堤高五尺南岸自白洋河以上北岸自  
清河縣以上各至徐州止俱築縷格二堤其在駱馬  
湖以下者縷堤高六尺格堤高五尺在駱馬湖以上  
者縷格堤俱高五尺俱係面寬二丈底寬六丈等因  
此不過舉其大畧也其間損益增減之處原應臨期



斟酌今臣屢歷河干反覆詳勘有頂冲之地舊遙堤貼近河身不能又築縷堤應卽以舊堤爲縷堤而於舊堤之內另築遙堤以爲重門之障其費倍於縷堤者有地勢甚窪情形頗險不便照原估高寬尺寸必須多費土方者有地勢稍亢情形不險不必照原估高寬尺寸可以節省土方者總之危險之處臣不敢苟且圖安惟有加意用工以防意外之慮然費用繁多又不得不於平坦無虞之處力求節減以此補彼通融僭築以期有濟河工耳又挑土入夫數目臣原

疏南岸白洋河以下北岸清河縣以下每土一方分  
別遠近牽算給銀一錢六分卽以挑河之土運築成  
堤等因皆係查照往例土方工食酌量議估可也殊  
不知往例多係壘土成堤而未嘗實事夯杵是以取  
土一方卽可成堤一方今臣立定規則以上土五寸  
爲一層將第一層夯杵築堅然後再上第二層之土  
一律加夯逐層逐寸徹底夯杵并用石礮打平以期  
堤工堅實用保久遠每取土一方僅可築堤六分及  
六分有奇不等臣親行徧試莫不皆然今若照取起

卷之三十一  
三  
之士算給工食則人夫可以餬口應募既多然用十分錢糧而所築之堤止六分有奇不特與原

題丈尺不合而堤工單薄難免漫冲之虞若照築成之土算給工食則十夫工程必須人夫十五六名始能築起各夫難堪賠累往往潛自散去及再行召募而任呼不應貽誤匪輕雖給與驢頭俾代人力而各夫以不諳餵養且知

廷臣有工完變價之議誠恐不時倒斃不無賠償之累是以不肯領驢臣卽行東豫各處停止購買其有購

到者俱經發還矣臣復思得車運之法隨造小車試驗每夫十名給車二輛可以省夫一二名而造車之費每車止用銀四錢五分臣卽動支錢糧分頭償造土車萬餘輛給散各夫各夫旣免餵養之煩又無賠償之慮是以紛紛領用然以十夫而領兩車仍不能築起十五六夫之工程夫頭人等往往告苦求增工食臣每巡閱堤工各夫環跪而呼謂從前築堤並無此番夯杵之法從前領銀十二兩於附近取土一百方便可成堤一百方今領銀十二兩遵奉於附近二

十丈以外取土一百方如式築做必得添夫二十名  
專事夯杵打礮及添夫夯礮而所取百方原土僅築  
成六十方堤工且陰雨之日難施番鋪熒熒小民安  
得賠墊一半若不增給斷難再築等語臣屢爲親試  
事屬實情複製三寸圍圓鐵杵一根將新舊各堤杵  
隙盛水逐一試驗舊堤處處皆漏新堤十處之中十  
有七八處不漏仍有一二處滲水臣察其根由或係  
沙土或係夯杵不到所致也因念前此河堤之易於  
潰變者實緣土鬆所致况見今如此遂層夯築而以

杵隙盛水之法試之尙不能全然不漏何敢不竭力督夯以期堅固臣反覆思維往來察度宿桃山清安五州縣人力弱而工程多人力弱故挑土少工程多故募夫難此五縣築堤土方必須免其遠運止令於附近離堤二十丈之外取土晴明便於力作之日按土方給銀陰雨難施畚鍤之時每名量給食米柴菜銀一分二釐以資餬口將原估銀一錢六分扣畱一分爲製造土車夯杵石礮鍤鋤等項并給各夫陰雨食米柴菜之資其餘一錢五分爲築成堤土一方之

工食各夫既得土車之力而陰雨又免枵腹且復量  
爲增加自不致於裹足不前至徐靈睢邳一帶人力  
稍強而工程較少應量減一分照一錢四分一方科  
算至於陰雨難施畚鍤之時亦一律給以食米柴葉  
之資可也惟是遠運土方原爲深挑河身起見今俱  
改爲附近取土非臣置河身於不問也臣往來相度  
如清河北岸等處必須挑挖引河者相機挑挖外其  
餘俱用鐵掃帚揭沙乘流浚深河底之法似乎有濟  
且較挑河之費所省實多前此重運經過宿桃之時

已獲小效今臣見委監理官王興元等僱募夫船各給鐵掃帚五百枚分工揭浚倘得將見在數尺淤之河底浚深至二三丈則水自歸漕而河可復故矣其浚河船隻與其常川僱覓不若多造官船同是動支錢糧而原船仍在可爲守堤兵丁平時浚河運料之需且守堤兵丁必須每十名給船一隻臣原疏止造二百九十六隻實屬不敷必須添造三百餘隻始可足用是以多造官船誠一舉兩得之事也至添造浚船約需銀一萬餘兩而僱募揭浚黃河水手絳夫約



需銀四萬餘兩俱於臣原

題敬陳經理河工事宜各疏內通融節省應用不復更  
請錢糧以上各項除臣見在舉行外相應隨事

題明伏乞

皇上睿鑒施行

特陳歲修疏

題爲特陳歲修大修工程各別仰祈

睿鑒勅部仍照原疏允估以清錢糧事節准工部咨將臣  
題估康熙十七年分歲修孫家堂蔡家樓郭家嘴等  
工并堵朱衣城九龍廟凌口以及報銷康熙十六年  
分長樊大壩歲修各工逐案議駁內開俱應在臣原  
題敬陳經理河工第一疏大修內開銷等因到臣准  
此該臣看得水雖流於地下而其消長之故則皆本  
乎天時是以每歲立春之後雨澤漸降則河水漸增

及至伏秋大雨時行而泛濫滔天不可禁遏也臣常  
往來相度知黃河流域之漕南北相去不過數百丈  
而黃河攔水之堤南北相去竟有千餘丈至數千丈  
不等蓋尋常之水雖皆安流於河漕之中而伏秋之  
水往往瀰漫於河漕之外故不得不築堤以約攔之  
也夫既有河漕以注尋常之水而又有河堤以束暴  
漲之水似乎無慮殊不知黃河挾沙而行變遷靡定  
大風搏擊之後溜在中泓者每每改趨近岸水溜近  
岸則河岸日就坍塌卸此犂一卸則彼岸必淤從此日

卸日淤將原係徑直之河不十餘年或數十年而改爲灣曲之河矣其始之所卸不過岸灘自無足慮及曠日持久而漸及堤根河溜冲至堤根若不急爲防護則堤工坍斷大溜旁洩立成奪河之患故不得不下埽以禦之此所以有歲修之工又所下埽料經年率皆腐朽加套鑲護萬不容緩此所以上年歲修者今年每須重修今年重修者來年又須復修也總之歲修之工與大修迥不相同大修乃堅築土堤於河灘之上以攔伏秋暴漲之水歲修則預下大埽於河

溜之中以禦四時頂冲之水者也今部臣議覆臣題  
康熙十七年黃河歲修并堵朱衣城九龍廟决工俱  
稱應於原估大修銀兩內動用更將十六年防守伏  
秋之長樊大壩一工亦稱應於十七年大修案內開  
銷等因查臣原題南岸自白洋河至徐州北岸自清  
河縣至徐州共估銀三十五萬餘兩乃係築土堤以  
攔伏秋漲漫之工並未估有歲修埽料堵築工程其  
所估堤工高寬丈尺土方錢糧數目備載原疏在部  
可考况此等康熙十七年分江南黃河歲修已題未

題工程并堵築朱衣城九龍廟兩決口工程以及十六年歲修長樊大壩一工總計所費河帑不及四萬兩而臣題請大修銀二百五十萬兩之內復於建築減水壩并酌改運口兩疏內議節省銀四十萬兩夫已經

題請之錢糧既可節省四十萬兩之多臣何難一如部議於四十萬兩內動支四萬爲此等各工之用但大修歲修實不相同似無庸將大修案內原未估計之歲修等工一概牽入大修之內也除將部駁各案仍

照原咨逐件另疏

題覆外伏乞

睿鑒勅部將臣十七年分已題未題各歲修工程等堵朱  
衣城九龍廟浚工以及報銷十六年長樊大壩歲修  
一工仍准於河庫內照例銷算庶工程錢糧各清各  
款而無牽混舛錯之虞矣貼黃難盡伏乞

睿鑒全覽勅部議覆施行

特請大修疏

歸仁堤

題爲特

請大修歸仁堤工事竊照歸仁一堤原以束睢湖諸水使之由白洋河出口助黃刷沙兼爲高家堰等處一帶堰堤之外藩者也自河道廢壞以來河底高於民田堤頂卑於河岸以致黃流內灌將白洋河口淤平睢湖諸水不能復出會黃竟自凌堤南注併入洪澤湖擊潰高家堰冲開清水潭漫漶泗宿桃清山鹽高寶江與泰等十一州縣之田畝阻運道而害民生已非



一日矣雖前此興修曾經動支過銀十二萬八千兩  
祇因葺職原任歸仁同知劉光耀潦草塞責且睢湖  
諸水無路宣洩撞冲擊刷以致新修之工莫不歪斜  
傾倒無益河防臣於康熙十六年秋冬并十七年春  
月率同該管道廳各官再三相度議於原估堤頂之  
上再爲加高五尺并將堤身帮寬三丈不堪石工從  
新另砌約需磚石灰木土方人夫等項銀二十萬餘  
兩又石工兩頭土堤共二千四百八十餘丈內有缺  
口八處其加帮堵塞之工尙未議及迨後約畧計之

又需費銀三萬餘兩是此一工必得銀二十四萬餘兩方可修竣然費錢糧二十四萬餘兩而果能束水歸河自應急舉殊不知黃河未治即使費銀二十四萬恐仍難保其不復冲開臣是以於康熙十七年四月二十日具爲指陳河道危切等事一疏

題明緩修俟黃河疏浚深通然後確估另題等因在案也及臣分委各監理官催覓夫船揭沙疏浚已將黃河浚深四五六尺不等凡清江浦以下久淤之河原深二三尺至五六尺不等者日今俱深八九尺至一

丈二三尺不等矣今臣擬於本年桃汛之後復爲大浚再加北岸創建減水大壩使本等之水安流漕中暴漲之水減出壩外則將來河身漸深而泛溢之勢漸減又當乘機興築歸仁堤挽睢湖諸水使入黃河以助刷沙之力以固高堰外藩斯稱萬全惟是前此雖估銀二十四萬餘兩今臣復加相度反覆籌維更得一勞永固兼可節省錢糧之法敢亟爲我

皇上陳之查歸仁堤石工自一堡至十一堡原長五千七百餘丈而石工之西至虹縣界原有殘缺土堤四百

八十餘丈石工之東原有殘缺土堤二千餘丈臣前  
估需銀二十四萬有奇者乃係重修石工并一律加  
高修補各殘缺土堤共長八千二百餘丈之工程也  
今查自虹縣界至西石工頭止計長四百八十五丈  
仍需照原估加帮內築戩堤面寬二丈底寬三丈高  
一丈每丈用土二十五方又堤內刷成深河必須填  
出水面每丈用土十五方共計每丈用土四十方通  
共用土一萬九千四百方又石工自一堡而下只須  
築至七堡止計長四千五百餘丈其餘尙有石工一

千 百餘丈并土堤三千丈可以不必概築應另於  
七堡石工起橫挑引河一道卽以挑河之土運至五  
十丈之外創築大橫堤一道直接白洋河上三教堂  
格堤迤西止約長一千八百丈更將遙堤挖開另建  
七洞滾水大石壩一座黃漲則下板攔黃不使內灌  
湖漲則啓板洩水俾其刷沙見在石工四千五百丈  
面約寬二丈底約寬三丈五尺高七尺今不必拆修  
竟以舊堤爲外藩而於舊堤之內另築大鐵堤一道  
底面俱寬七丈高七尺每丈計土四十九方應築鐵

堤之處係積年刷成深河寬五六丈至二三十丈不  
等深三四尺至八九尺不等今應填出水面以便興  
築戩堤計牽淺深不等每丈用土二十八方又戩堤  
之上應再加築堤一道底寬七丈面寬一丈高八尺  
外坦內陡每丈用土三十二方通共計每堤一丈用  
土一百零九方石工四千五百丈共應加新土四十  
九萬五百方二共計七十五萬九千九百方取土遠  
近不等近者照黃河堤工之例每方給銀一錢五分  
稍遠者給銀一錢七八分極遠之處必須隔河船運

者給銀二錢并二錢三四分不等牽算每方給銀一錢八分共需土方銀九萬一千七百八十二兩又自七堡石工起直接白洋河上三教堂格堤迤西止橫挑引河一道約長一千八百丈挑面寬二十二丈底寬十八丈深五尺每河一丈挑土一百方共挑土十八萬方至五十丈之外逐層夯礮築成面寬二丈底寬十丈高一丈之大橫堤一道每挑河一方給銀一錢五分通共給銀二萬七千兩又建滾水大石壩一座并越堵七堡舊石工凌口一處西石工頭迤西舊

土堤凌口一處共約需銀三萬兩通共實需銀十四萬八千七百八十二兩較之重修石工不特可省銀九萬餘兩而工完之後誠可爲一勞永逸之謀者也其需用錢糧查臣原

題經理河工各疏內請大修銀二百五十一萬七千六百餘兩已奉

俞旨 在案續經臣於更改運口并建減水壩一座疏內共議節省銀四十萬兩今此大修歸仁堤之費臣請於前題節省四十萬兩之內動支一十四萬八千七百



八十二兩濟用惟是此工既不重修石工而全用土築以期堅久則需夫自多然宿桃等沿河州縣處處併舉大工不能更有閒夫爲修築歸仁堤工之用不得不令附近歸仁堤之泗州虹縣各協募人夫三千名五河臨淮二縣各協募人夫二千名共協募夫一萬僂築此工至於募夫一事邇來各處興工夫頭人等往往彼此影射透領錢糧工程不完每煩追究臣與所屬道府廳印各官從長酌議量工程土方之多寡令百姓按田畝出夫上工其應給土方工價俱照

題定之數與民間抵兌錢糧凡十八年應徵一切錢糧俱令停徵俾百姓得以安心力作凡有應支應解款項令該州縣隨時詳明將大工錢糧墊解墊給官無徵比之煩民免追呼之苦衙役之需索難施上下之考成不累工程可以速起而錢糧不致透支一舉而數善備焉山清安海宿桃邳睢靈徐等州縣臣見在舉行凡官紳士民俱各稱便今令泗虹五臨四州縣共協募夫一萬名其應給土方工食銀兩亦照此抵兌錢糧之法而行誠計之最得者也臣謹一併

題明貼黃難盡伏乞

皇上睿鑒全覽

勅部議覆施行

恭報合龍疏

清水潭

題爲恭報清水潭東西兩堤凌口閉合龍門各日期仰

慰

睿懷事竊照清水潭一工從前屢塞屢冲將淮屬之山陽  
鹽城揚屬之高郵寶應江都泰州興化等七州縣田  
畝盡沉水底室廬漂蕩男婦流亾十餘年來每歲旣  
損額課數十萬而發賑請蠲之資更難悉數且新舊  
凌口相連南北寬三百餘丈深三四五六丈不等東  
西一片汪洋茫無涯際風起則怒浪掀天寒至則堅

華夏通志卷之三十一  
凌凍結商民之不能久待絕流而渡履冰而行以致  
沉舟殞命者不可勝計蒙

皇上軫念運道民生特發正項錢糧

命臣大爲修治臣欽承

簡命日夕憂惶惟恐施治失宜有負

皇上委任至意於是往來相度反覆籌維作棄深就淺之  
計先委揚州府清軍同知王興元管河通判聶文魁  
爲監理官續因兩堤齊舉且又加築新河監理不足  
又委原任高郵州丁憂知州馬雲階候補知縣牟銓

元揚州府管糧通判卞永吉共計監理官五員并揚  
屬河營守備李有功等分管官高郵州州判劉培初  
寶應縣縣丞鄭光啓主簿王澤民等以及臣標効用  
等弁共計六十餘員各各奮勉爭趨分頭償築臣不  
時臨工親爲調度并令淮揚道劉國靖嚴加飭督催  
償自康熙十七年九月初八日興工起中下埽個內  
釘排椿外填坦坡築成西堤一道於康熙十八年三  
月十六日已刻閉合龍門按漕尺臨河丈量計長九  
百三十一丈五尺又築成東堤一道於康熙十八年

三月二十日午時閉合龍門臨河丈量計長六百零五丈更挑新河一道計長八百四十丈臣因清水潭壞舟無算擬棄舊名改名永安新河目今東望七州縣田畝業已盡行涸出舊日錢糧計日可復運艘民船永可安瀾而免波濤之險矣至此工先據南河分司蔡音達禮淮揚道佟康年等估費五十七萬有奇且柳枝夫役照例議派民間不估錢糧今臣一切料物盡照漕規價買而人夫皆見銀僱募約計所費不過九萬餘兩按司道原估計之少費銀四十八萬餘

兩此皆

皇上洪福齊

天是以百靈効順將歷年大爲民害之凌口不七月而堵塞  
斷流也又往來運土全賴船隻江寧府知府孫芳承  
造浚船一百六十隻於原

題價值之外又復捐資三千餘金將船分外加大并募  
善駕水手六百餘名常川在工撐駕深得其益又揚  
州府知府高得貴率屬造船 自隻亦皆堅固適用  
并催夫催料之克勤以及附近州縣協力辦料運土



者功俱難泯統容臣俟工完之日分別等第另疏  
請敘者也所有清水潭東西兩堤閉合龍門各日期臣  
謹先疏恭報伏乞

皇上睿鑒施行

恭報完工疏 改運口

題爲恭報加挑運河酌改運口工完開壩日期并

題明高家堰清水潭二處工程事宜仰祈

睿鑒事竊照淮揚運河必須加挑臣於康熙十八年正月

十九等日破土築壩堵水斷流令山清高寶江儀等

各州縣分頭募撥人夫大加挑浚至三月二十六四

月初一等日盡行完工臣隨於四月初六日由新改

建運口開壩放水南下訖惟是既經開壩放水自應

力僭糧船飛輓北上但清水潭東西二堤雖經閉合

龍門而埽上土薄必須大加壓實然此工就近無土  
惟賴船運若糧船一行加以差使商民各船一齊擁  
擠則土船挽運難前貽悞匪細臣再三籌酌不得不  
將高郵南北西金門開下板封閉嚴飭在工各監理  
分管大小官弁飛督夫船上緊儼築至四月望後約  
有八分工程於四月十八日啓板放船方稱萬全惟  
是臣前疏

題明重運糧船五月內盡行過淮已經部覆在案今必  
須再寬半月限期於六月望盡數過淮臣自沿途驅

僂務令八月內盡過天津不悞本年回空可也又高  
家堰等處一帶臨湖堤堰已經臣築成面寬三丈五  
尺底寬五丈五尺高一丈之堅堤矣而洪澤湖水因  
翟家壩成河九道之處又經堵過八道湖水無從旁  
洩日漸加長一遇西風則怒浪掀天竟有蓋頂潑漫  
之勢且拔椿撤埽擊卸石工不一而足臣反覆思維  
將五丈五尺之底加至寬八丈三丈五尺之面加至  
寬六丈更於六丈堤面之上另築高六尺之小堤一  
道並於湖內投土填成坦坡以護椿埽石工將上年

題能加高石工三尺停止不加全以用土爲主約計所  
費除原估續估之外更須增銀七八萬兩然此工一  
成實可鞏固萬年臣將原估應挑運河土方酌量減  
挑以所省挑河之資爲加高湖堰之用蓋加高湖堰  
正所以永保運河也今不必更增錢糧移此就彼而  
處處堅完永無他虞誠計之最得者也至此番挑河  
臣委大小官弁一百餘員分頭償督臣復不時往來  
嚴加查察將

朝廷優敘之典處分之例三令五申時加勸勉能者獎勵

之不及者懲誠之各官弁莫不鼓舞奮發兼工疾僨  
是以雖節省錢糧爲別工之用而本河仍俱一律挑  
浚見當日之河底如江都縣挑出唐開元年間所建  
石閘高郵州挑出古井二眼各工挑出唐宋古錢并  
爛木朽器等項甚多目今開壩之後自清口以達江  
儀中漕寬浚兩堤屹立兼之運日已改黃流不復內  
灌運河自無淺阻之慮可免屢屢挑浚勞民傷財矣  
若夫各官弁効命勤勞并協撥人夫之州縣協助食  
米之鹽商容臣分別等第另疏請敘者也臣謹一併

其

題伏乞

睿鑒施行

恭報合龍疏 翟家壩九河

題爲恭報翟家壩成河九道盡行閉合龍門各日期仰  
慰

睿懷事竊照淮河東岸上自盱眙縣之翟家壩下至山陽  
縣之周橋閘計程二十五里乃淮揚運河上游之門  
戶山鹽江高寶興泰等七州縣民生之關鍵也當黃  
河未經南徙之時淮流安瀾直下此等去處原屬高  
阜之地木閘水患迨黃流南徙奪淮入海清口以下  
三百餘里之間淮爲黃併水勢十倍於昔夫水行循



道止此河漕也下既爲客水所襲泛濫滔天矣則其上  
游本等之流勢不能涓涓暢注於是壅遏四漫而  
此二十五里之間每被滄沒并山陽寶應高郵江都  
四州縣河西低窪之區盡成澤國者蓋六百餘年矣  
故明萬曆初河道廢壞雖不若今日之甚而清口淤  
高堰決與今日情形大畧相似彼時河臣潘季馴築  
堤堵決束水歸漕治效班班可考然此二十五里之  
地面不議加高者蓋明朝祖陵在泗居淮水之西故  
停河東之障以爲洩水之區也殊不知彼時物力頗

饒如慮淮漲西浸何難兩岸並築大束全淮以滌清  
口之淤闢海邊之墊而顧留患於門庭歷年旣久遂  
致成河九道使淮揚水災頻罹疊見臣不能不致憾  
於季馴之以善治河稱而亦有此失著也今

皇上軫念運道民生大發帑金

命臣遍爲修治臣隨力督該管各官次第興舉今據淮揚  
道副使劉國靖山清盱眙同知多弘安山清盱眙河  
營守備陳杰等各報稱翟家壩成河九道之處奉委  
堵築於康熙十七年十一月內督同各分管官弁分

頭興舉內周橋閘南徐家口成河一道寬一百一十五丈水深七八尺丈餘不等下埽堵築於十八年正月二十日閉合龍門古溝東成河一道寬三十四丈水深七八九尺不等於二月初四日閉合龍門古溝西成河一道寬十九丈水深六七八尺不等於二月初十日閉合龍門茹家圍南成河一道寬二百四十六丈係漫灘水深二三四尺不等於二月二十九日閉合龍門夏家橋成河一道寬三百三十丈七尺係漫灘水深二三四尺不等於二月二十九日閉合龍

門谷家橋南成河一道寬三百九十五丈五尺係漫灘水深二三四尺不等於三月二十四日閉合龍門唐埂北成河一道寬一百丈係漫灘水深二三四尺不等於三月二十四日閉合龍門唐埂南成河一道寬二十八丈水深六七八尺不等於三月初九日閉合龍門翟家壩成河一道寬五十五丈水深六七八尺不等於五月初一日閉合龍門等因各呈報前來臣復行親勘果皆堅固見在培土加高是此凡成河九道之處計共寬一千三百二十三丈二尺爲從

皇朝通志卷之三十一  
法  
來未舉之工者業已盡合龍門矣此雖在工大小各  
官効力爭先罔敢或懈然實我

皇上洪福齊天之所致也臣更查得山寶高江四州縣河  
西瀦水諸湖向之萬頃汪洋茫無涯際者目今逐漸  
涸出臣擬設法調劑使四州縣河西見在民田高者  
不致頻曠低者不致頻澇并新涸湖地廣爲招墾俾  
積荒積困之區漸成樂土庶幾增賦足民上下均利  
其間一切善後事宜容臣酌妥另

題外所有翟家壩成河九道各閉合龍門日期臣謹特

疏恭

報至山清盱眙同知多弘安寢處河干實心任事者業  
已兩載有奇臣屬各監理官中之勞績最著者以弘  
安爲第一統俟工完之日與在工一切大小官弁逐  
一分別等第另疏請敘者也臣謹具

題伏乞

皇上睿鑒施行



再陳未盡事宜疏

題爲再陳經理河工第一疏內未盡事宜事該臣看得  
黃河之治否不特關運道之通阻而尤關民生之安  
危

國計之盈絀必須再三詳勘始可得其要領彼時河水  
係極涸之候而臣所量河涯低處有高出水面六七  
尺者高處有高出水面八九尺一丈并一丈有奇不  
等者及自河涯以至堤王或遠一二十里或遠三四  
十里高峻之堤不過高過河涯二三尺卑薄之堤有



與河涯相平甚至較之河涯反低二三四尺不等者  
大率以見在堤頂較之極涸之河流至高之處不過  
出水七八尺低矮之處僅止出水三四尺每歲伏秋  
雖遇雨少之年必長水五六尺若逢水發之際往往  
加漲丈餘夫以加漲丈餘之水而流至僅高三四尺  
之堤未有不漫頂竟過立成缺口以遍滄田畝者矣  
上年水漲之時四野橫流一片汪洋茫無涯涘其蕭  
縣十七年分遙縷堤漫缺一十九處與十六年分石  
將軍廟吉門兩河口等漫缺堤工均屬勢所必至寔

非人力所能防守者也至其漫缺之由蓋因河涯有高卑之不同水一漲發卽從河涯低處漫流內灌頃刻卽至堤根不數時而陡長數尺不終日而水與堤平不兩日而水比堤高竟自漫頂而過矣臣是以議建減水石壩欲使暴漲之水隨漲隨減隨減隨流庶堤外無湧積漫頂之虞堤內無泛濫奔騰之害已蒙皇上俞允在案惟是減水石壩雖見在辦料興舉而隨河攔水之堤亦屬必不可少查南岸自徐州城至河南之虞城縣界北岸自徐州城至山東之單縣界通計

共長四百餘里內有見在連山與河涯原高從來水  
不能到不必築堤之處約百餘里又有地勢稍高在  
平時水漲間或漫流而減水壩一成之後不致漫溢  
內灌可以暫緩興築之處約有百里其餘四州縣境  
統計須亟築大格堤四千餘丈縷堤三萬餘丈大格  
堤全係創築高八九尺一丈不等縷堤雖多創築而  
亦間有加葺舊堤之處高四五六尺不等照例每方  
給銀一錢四分通計約需銀十萬餘兩查此四州縣  
地方例係民修工程然小民當疊災之後實難責之

枵腹力作若聽其自然又恐有潰決奪河之患臣反復籌維查臣奉

命大修河道原

題准銀二百五十一萬七千六百餘兩內有

題定節省銀二十五萬一千二百餘兩伏乞

皇上俯念河防關係運道民生至重至大准臣於節省二十五萬有奇之中動支銀十萬兩爲建築徐州州城以上徐蕭豐碭四州縣緊要縷格等堤之用則不特將來之運道無虞田廬可保而此際流離死徙之災

黎皆可招徠畚鍤寓賑於工誠一舉而兩得有裨  
國計民生誠非渺小也臣謹會同江南總督臣阿席熙  
江寧撫臣慕天顏安徽撫臣徐國相合詞具

題伏乞

睿鑒全覽

勅部議覆施行

請留漕濟工疏

題爲亟請留漕濟工以救淮徐億萬生靈事竊照淮徐所屬各州縣上年二麥被夏旱秋水災荒情形已經督撫臣節次

題報在案臣因相度河工往來奔走目擊邳宿徐蕭礪五州縣災荒爲各州縣之最已具淮徐異常災荒等事一疏議將此五州縣漕糧改折舊欠緩徵等因於本年正月二十二日題

請在案然臣前疏所敘乃係正月中旬以前之情形彼時

淮郡尙安粟米每倉斗一石不過值銀一兩粳米值銀一兩二錢豈意數月以來饑民日多而米價日貴粟米每石賣至一兩三四錢粳米每石賣至一兩六七錢不等男婦大小挖草根剝樹皮而食者淮城左右遍地皆是甚至鳩形鵠面之徒數十成羣白晝入人之家哀求借貸不論其家允借與否凡見米糧公然取去洪澤等湖空濶去處饑民百十相聚各駕小舟攔阻商船假借米爲由竟行強取有協理河務通判俞森因夫食艱難於遠處買米數百石堆貯清江

浦地方饑民乘夜竊取該通判驚覺起救率領家人  
追趕但見倉皇逃命者悉皆婦女穉子不下一二百  
人該通判止獲男子一二名其餘不忍深究聽其逸  
去歸查貯米已失三四十石矣地方災困流離一至  
於此臣焦心如焚不遑寧處念正月下浣較之中浣  
情形業已迥乎不同則二三四月之間二麥未熟青  
黃不接之時不知更當若何矣所幸淮徐併舉大工  
無告之民儘可招之畚鍤寓賑於工洵屬最善但向  
來築堤每土一方用夫三名給工食銀一錢二分而



夫頭義民尙有羨餘以養其家口今臣

題增爲一錢五分且原擬二十丈以外取土而夫頭義民之勤幹而所募皆壯夫者方能如式成堤若稍稍怠緩混收老弱之人便有賠累之慮總緣從前舊例俱係堤根取土累高成堤今則取土旣遠而且徹底夯杵是以費土費工也今饑民雖多而皆尪羸無力之輩夫頭義民人等知其日食多而用力少恐致累悞工程不敢一概濫收然淮徐各工見募之夫計已有六七萬若再令增募可有十萬每夫每日必須食

米二升有夫十萬日需米二千石月需米六萬石迨  
至麥熟之期約需食米二十萬石而淮徐各州縣處  
處空虛全無儲蓄臣再四籌維惟有截留漕米以濟  
夫食廣招饑民以事畚鍤仍倡督屬僚各各捐貲設  
廠賑粥庶可使米價立平億萬生靈皆得拯救除頭  
帮已經過淮漕糧臣不敢請留外伏乞

皇上俯允臣請將江南鳳徐揚鎮常等府十八年起運十  
七年分正耗漕糧准臣截留二十萬石并請容臣照  
籌餉固所以足兵等事案內粟米每石折銀七錢粳

米每石折銀九錢之例將截留過粟米若干石粳米若干石共該折價銀若干兩或卽給臣爲大工錢糧之用或於臣見貯大工錢糧之內撥還戶部充餉緣由另疏題

請定奪至臣有此米二十萬石當卽分發各監理官轉給夫頭義民人等粟米作價銀七錢五分粳米作價銀九錢五分以每石七錢九錢抵還戶部折價以每石五分給運軍遠運水脚之費其應給各丁行月等項錢糧俱可盡行節省一面行令各監理官督令夫頭

義民人等毋論壯夫與尪羸餓夫一概招收力作凡壯夫一名應給工食銀四分照舊以二分爲本夫日食之用仍給二分俾其養家尪羸餓夫不能如壯夫之用力者除本夫日食之外每名止量給米一升以資其養家之用在饑民家口稍得餘糧存活之資而義民夫頭亦免工程賠累之苦寔爲兩利之道查東豫災荒荷蒙

皇上浩蕩洪慈特遣大臣動帑施賑今淮徐災荒若此所幸見舉大工儘可不必動帑但得截留漕米二十萬

石寓賑於工則米價立平殘黎俱可得所因念京通各倉存米甚多留此二十萬石以救淮徐之民實屬不得已之舉倘以

國儲不便多折臣請將江浙兩省十九年起運十八年分漕糧內應改折之五十四萬餘石止折三十四萬餘石少折二十萬石以抵臣

請留二十萬石之數如此一轉移間在

國儲毫無所損而淮徐各州縣億萬餓殍皆可力救且可消地方之隱患速各處之工程兼使人心稍寧得

以安業布種則本年更可望其有麥有秋其有益於  
國計民生者誠非渺小也事關地方重大急務貼黃難  
盡伏乞

皇上睿鑒全覽

勅部迅賜議覆速行微臣遵奉施行



再請留漕濟工疏

題爲亟請留漕濟工以救淮徐億萬生靈事該臣隨經檄行淮揚道等催令徐鳳揚鎮常五府州屬起運漕米帮船速赴截留工所去後彼時因徐鳳二屬米數無多而揚鎮常三屬漕糧又因山清高寶江儀六州縣大挑運河處處閉壩不能飛渡各工無米接濟適有六安衛本州帮領運廬州府屬六英霍三州縣正耗米二千五百餘石運至清口又有淮安府屬清河桃源睢寧三縣之米皆在領兌堪資接濟查臣原題



疏內雖未議留淮廬二屬之米然總屬漕糧不得不就近取便以濟當時急需至於二月間淮徐一帶粳米每石值銀一兩七八錢粟米每石值銀一兩三四錢而且無從購覓日見騰貴人情惶惶難以名狀蒙皇上深念鳩鵠災黎饑餓無告特准截留漕糧二十萬石且

勅議允行最爲神速臣自欽奉

俞綸之日即便遍張曉諭小民感戴

君恩歡呼遍野市行米價不數日而每石頓減銀數錢不

半月而碾熟粳米止賣銀一兩一二錢不等矣人心  
賴以安定地方賴以清寧此皆

皇上如天之仁有以致之也迨至四月終旬二麥漸熟雖  
因旱不能俱收而各處間有薄獲各夫爭食新麥領  
米者少臣揆情度勢不得不將原議截留之大河衛  
二三等帮領兌常州府屬之米仍令輓駕北上也今  
行據淮揚道副使劉國靖查明冊報前來計臣寔留  
過徐州等衛所領兌徐鳳揚鎮淮廬六府州屬康熙  
十八年起運十七年分兌改正耗漕糧一十六萬八

千九百一十石七斗七升二合三勺五抄五撮九圭  
六粟二顆八粒九黍一稷七糠七粃九粃三禾內粃  
米一十五萬四千四百三十石二斗一升七合八勺  
二抄八圭八粟七顆五粒五黍六稷七糠一粃七粃  
三禾每石折銀九錢計銀一十三萬八千九百八十  
七兩一錢九分六釐三絲八忽七微九纖八沙八塵  
一渺四茫五溟五遠七巡又粟米一萬四千四百八  
十石五斗五升四合五勺三抄五撮七粟五顆三粒  
三黍五稷六粃二粃每石折銀七錢計銀一萬一百

三十六兩三錢八分八釐一毫七絲四忽五微五纖  
二沙七塵三埃四渺五漠四茫三溟四濛二共銀一  
十四萬九千一百二十三兩五錢八分四釐二毫一  
絲三忽三微五纖一沙五塵三埃五渺五漠八茫八  
溟九濛七巡此項銀兩本應於大工錢糧內撥出報  
部充餉但臣奉

命大修河道

題准銀二百五十餘萬兩前此戶部撥給過銀一百四  
十九萬餘兩已將用完見在咨部添撥此項米折銀

兩相應仰請

皇上勅部算入添撥微臣大工錢糧數內以免反復撥解之煩至節省過截留各船應給行月本折銀米數目容俟該糧道冊報至日彙咨達部其民間私貼各軍贈銀贈米各軍於領兌之日久已用去臣俱循照從前留漕舊例概行免追又各夫所出每石水脚銀五分俱給各軍爲守候開壩運米赴工陸續分發人夫等項數月盤纏日食之資若夫截留米數雖較原數少留米三萬一千餘石其江浙二省十九年起運十

八年分漕糧所折五十四萬石之內應否仍各徵  
色十萬石起運以足

天庾統聽部奪臣謹一併具

題伏乞

勅部議覆施行

UNIVERSITY OF MICHIGAN LIBRARY

1110

請修運河疏

題爲亟請併修河北運河以爲輓漕永利之謀事竊照  
江南河道自徐州州城以下歷靈璧睢寧邳州宿遷  
桃源清河山陽安東九州縣黃河并清河山陽寶應  
高郵江都五州縣運河以及山陽盱眙二縣臨湖等  
一切河身堤堰蒙

皇上軫念運道民生准發帑金二百五十一萬餘兩  
命臣大爲修治臣凜遵

俞旨力督監理分管官弁將敬陳經理河工事宜各疏內



一切工程上緊僨催約計已完十分之七其餘未完  
見在僨築又經理河工案內工程之外有臣續題大  
修歸仁堤并修徐州州城以上蕭碭豐等四州縣縷  
格等堤三萬餘丈以及堵塞宿遷縣楊家莊大淩口  
等三案工程亦在分頭興舉工完之後如該管文武  
官弁兵丁人等果能勤於加修依法防守自可永無  
阻運殃民之患惟是駱馬湖以北一帶河道寔爲漕  
運咽喉斷須亟行併治以爲一勞永逸之謀也查重  
運糧船自過淮出口之後溯黃河行一百七十餘里

而抵宿遷又十餘里而進駱馬湖口一片汪洋由湖  
面行四十餘里始得溝河又行三十餘里至窪灣口  
入邳州境溝河有三道東則由錢家宅隅頭集以達  
窪灣西則由溫家灣萬家集以達窪灣中則由九龍  
廟萬家集以達窪灣此三路溝河向來俱可通舟近  
因徐州花山口黃流下注將中路淤斷尙存東西兩  
路其駱馬湖水勢在夏秋盛漲之時深處有水八九  
尺淺處亦有五六尺不礙舟行而冬春水涸之際深  
處不過四五尺淺處止有尺餘一二尺不等甚至僅

有水數寸者一切船隻俱難飛渡臣思駱馬湖行運已將十年何至今日而淺阻若此因而遍歷湖干廣爲諮詢始知駱馬湖底原係低窪田故明先年河道安瀾俱皆耕種明季黃河屢凌河底墊高常有漫溢之水將其中最窪之處停積不流遂有駱馬湖之名然亦不過中間數十頃至於四旁之地夏秋則間有漫水而冬春則俱皆乾涸彼時官民船隻盡由董口而行及嗣此之後黃河又復屢冲河底愈加墊高至康熙八年董口淤斷將此數千頃地方盡成大湖康

熙十六年以前黃河底高水出漕上雖遇隆冬極涸之際而水面低於河涯不過二尺河水尙浮行地上故駱馬湖之水亦盈自康熙十六年楊家莊遙堤潰决大溜北瀉甚速宿遷黃河之底較前稍深隆冬之時水面低於河涯不下六七尺河水漸行地中是以駱馬湖亦漸有乾涸見底之勢也臣於本年正月慮稽重運特委監理河務同知黃道弘宿桃河營守備劉文道等督率船夫撈浚除河兵浚船不計錢糧外共用過日工人夫四萬八千餘名方將十八年起運

華夏通志卷之三十三  
十七年分重運糧船浮送北上然係水底撈土爲力甚難挖成河溝而風浪飄擊不久仍必填平况臣奉命大修河道兩岸盡行築堤復建減水石壩使本等之水安流漕中加漲之水減出壩外立法修防久而不替則河身日淤湖底既涸則漕艘無從北上若歲歲撈浚寔無底止不特糜費錢糧人力於無用之地而勢必有悞漕運甚爲可慮臣反復籌維必須另挑新河一道此應挑之新河查前河臣羅多曾議於董口以西挑水旱工程三十餘里彼時因工用浩繁重運已

迫是以暫停董口以西之工而止挑駱馬湖東邊墩  
郎河七百餘丈今此河之北一望三十餘里盡皆淺  
涸萬難復行不得不仍於湖西另挑也但若照前議  
由董口挑起則不下五千餘丈爲工太遠爲費加倍  
今臣勘得應於阜河地方挑旱工一千八百丈水工  
六百丈共挑河二千四百丈便可直接温家溝水滾  
之處此河二千四百丈挑起之土卽以之堅築兩岸  
堤工四千八百丈頂寬二丈底隨地勢高低情形險  
易以定寬窄不等每丈牽用土五十二方共用土二

十四萬九千六百方每方連挑河築堤水工旱工牽  
給銀一錢七分共需銀四萬二千四百三十二兩又  
水工堤一千二百丈用草牛小埽填埂攔水每丈需  
草一千束每束價銀二釐六毫共需銀二千一百二  
十兩又於河口建雙金門大磯心石閘一座椿石灰  
鐵等料并匠工人役共約需銀一萬六千兩以上通  
共需銀六萬一千五百五十二兩又溫家溝起歷窰  
灣口至邳州境內之徐塘口共程七十餘里兩岸共  
約長二萬六千丈一律俱係平灘全無堤岸而匪從

未興修每年水漲之時一片汪洋水涸之際露出兩岸水冲缺口共有二十餘處約計共長一千餘丈堵塞之費椿蒜草料約需銀二萬兩又堤工二萬六千丈築頂寬二丈底寬五丈高五尺每丈用土十七方五分共需土四十五萬五千方取土遠近不等近者一錢五分遠者一錢七八分牽算一錢六分共需銀七萬二千八百兩又東堤應建減水涵洞十座每座約需椿石工料等銀五百兩共需銀五千兩以上通需銀九萬七千八百兩二共通計需銀十五萬九千



三百五十二兩此工一成則東省河流徑直下注存本等之水於河漕之中而洩暴漲之水於涵洞之外堤工鞏固運道無虞誠一勞永逸之計且可使邳宿二州縣水沉積荒之田逐漸涸出以足從前額賦有裨

國計民生良非渺小其所需銀兩查河庫近年節存約可抵十分之四其餘不敷容臣於各工內百計設法力圖節省以濟此至要之工時當餉絀之際不敢更請錢糧以煩司農仰屋至此邳宿二州縣運河既經

創築堤工以計久遠則守護修防斷不可廢臣擬於宿桃河營調把總一員蒞汛宿遷運河堤岸邳睢靈璧河營調把總一員蒞汛邳州運河堤至二州縣運河既已蒞設汛弁尤須設兵以資修防但河庫錢糧不敷不能再議增兵臣反復籌維查山清盱眙廳營所屬武家墩歷高家堰高良澗周橋閘以至翟家壩一帶臨湖堤堰見係每四十五丈設兵一名蓋以此堤係淮揚二郡百萬生靈之保障誠不可忽也然臣先因洪澤湖萬頃汪洋每遇西風則怒浪掀天拔椿

撤埽擊卸石工是以議於堤內加帮寬厚堤上更築  
小堤湖內填成坦坡等因

題明在案至於湖內坦坡原擬照每高一尺填坦坡五  
尺之法以填出水面爲準俾護椿埽石工及飭令各  
官督夫填築臣往來勘閱目擊堤外坦坡較之堤裏  
之帮堤更爲得力但每高一尺填坦坡五尺實屬不  
敷於是將堤內應帮之土酌量移加堤外凡高一尺  
之堤加築坦坡八尺凡一尺之水亦填成坦坡八尺  
將椿埽石工盡行淤埋土內地亢水淺之處每丈用

上三十八方有奇水澗地窪之處每丈用土一百三方有奇目今工程約有八分其已經全完之處雖歷遇奇風而大浪將抵坦坡其勢便殺從前掀天撞擊之形絕不再見洵稱鞏固之工工既極固則汛防稍易臣擬酌調湖堰汛兵百餘名移防邳宿運河卽或仍有不敷亦於各營修防稍易之處量調足用再照此工乃運道至緊之工康熙十九年春運漕艘必待此工告成方能銜尾北上時日無多若候部覆方舉恐來年春運太遲則圓空必悞臣已一面嚴督邳睢

靈璧同知蘇增等分頭興工約計來年五月可以濟  
運臣謹一併

題明貼黃難盡伏乞

睿鑒全覽

勅部議覆施行

因河命官疏

題爲再陳經理河工第七疏內未盡事宜事竊照山陽縣黃河兩岸計長不下四百里向止設管河主簿一員蓋該縣向來工程惟至白沙爲止自白沙而下歷雲梯關以達海口原俱置而不問今臣奉

命大修爲一勞永逸之計雲梯關內外俱經築堤是以縣遠如此夫工程旣如此之遠斷非一主簿所能料理查該縣沿河一帶有關司巡檢羊寨司巡檢二官儘可責成分管臣

請將山陽縣北岸清河縣界起至安東縣界止南岸清河  
縣界起至蘇家嘴止一切河堤工程俱責成該縣外  
河主簿管理其南岸自蘇家嘴起至雲梯關止一帶  
工程責成馬邏司巡檢管理其雲梯關外南北兩岸  
河堤工程俱責成羊寨司巡檢管理庶無工遠貽悞  
之虞又邳州并宿遷縣運河乃漕運必由之地最爲  
緊要臣因駱馬湖淺涸難行另議改挑新河由阜河  
出口并

請大修兩州縣運河堤岸尤須特設耑員管理查邳州止

有州判而無州同其州判一官兼管黃河離運河近者六七十里遠者百餘里不等萬難兼顧臣

請添設邳州州同一員駐劄貓兒窩將邳州百里運河責成兼管至宿遷運河兼管需員查歸仁堤工見設主簿一員本工非漕運經由之地且有弁兵防守儘可將宿遷南岸堤工一併歸併管理臣

請將宿遷歸仁堤主簿孫文繡改爲宿遷南岸歸仁主簿將宿遷南岸主簿傅志桓改爲宿遷運河主簿如此則一切要工各有兼員料理措施既當責成俱專自



可無貽悞之慮有裨運道良非淺鮮至於應補官員  
統俟奉有

俞綸之後容臣將勤幹著勞之員另疏題

請可也查臣先於敬陳經理河工事第七疏內

題明倘有未盡事宜應損益增減者容臣臨期分別或

竟行或入

告等語經議政王等會覆奉有

俞旨欽遵在案今係添設官員調撥管轄事宜是用特疏

題請伏乞

睿鑒勅部議覆施行



恭報水漲疏

題爲恭報淮徐河湖異常水漲情形事竊照本年自入夏以來旱魃肆虐徧野焦枯災荒情形節經各督撫

臣

題報在案臣恐奇旱之後必有大水而武家墩高家堰高良澗翟家壩等一帶臨湖堤堰并山陽南岸三百里黃河堤工爲轉漕通道并山鹽高寶江興泰等七州縣民生關鍵於是力督各監理分管等官鼓舞人夫上緊僱築至八月之杪九月之初方據報山陽南

岸堤工次第築竣其武家墩等一帶臨湖堤堰僅僅  
填完堤外坦坡正在酌量復帮堤內斂堤并更加堤  
上小堤間忽於九月初七日據徐屬同知祖文明徐  
屬河營守備唐建功等各報稱奉臣牌行令該廳備  
將徐州州城以上并蕭碭二縣南岸堤工會同細加  
覆丈以便部文一到立即興舉等因該職等隨於八  
月十九日自徐州郭家嘴勘量起歷王家山北辰集  
郝家集軍趙家集丁木集黃家口侯家口定國寺魏  
家寨於二十二日至毛城舖不意天降大雨數日不

止平地積水職等坐守數日擬待天晴丈畢豈期二十  
十六日又兼黃水陡漲出漕漫灘由舊缺口南下一  
片汪洋必俟水退方能丈畢等因臣恐更有新冲缺  
口復行嚴查去後續於十月初四日據該廳申稱本  
年黃河水勢較之去歲更大八月二十六日忽然陡  
漲普面溢流由康熙十七年之馬家廟柳園西等十  
九處漫缺舊口內分流南下並無更冲新口等因又  
據蕭縣知縣邵瑗報稱八月二十八九日黃水泛漲  
平地水深數尺合縣田畝盡被滄沒等因又據宿遷

縣知縣尙登岸報稱九月十三四日之間水從西來勢甚洶湧日夜加長將田畝盡行滄沒等因又據徐州宿州靈璧虹縣泗州等各州縣俱報大水陡長處處漫漚等因臣查徐州州城以上堤頂卑於河崖而蕭縣爲尤甚夏秋泛漲普面漫溢冬春水落仍復歸漕歲歲皆然已非一日矣康熙十七年七月內黃河陡漲漫缺蕭縣長堤馬家廟等九處縷堤柳園西等十處臣用水平法逐一量勘灼知見有長縷二堤俱在低窪之區實不堪守故於本年七月內爲再陳經

理河工第一疏內未盡事宜事案內

題請動用各工節省銀十萬兩另築近河堤工蒙

皇上軫念民生

俞綸隨沛乃部文未到而水已大漲臣思此大漲之水必  
由蕭宿徐州靈虹泗州宿遷等州縣直注洪澤湖撼  
擊新築未完堤堰於是復加嚴檄飭令山清盱眙同  
知多弘安力督各官毋分晝夜飛速僱工去後迨至  
九月二十五六七八等四日之間洪澤湖水陡長七  
尺臨湖一帶堤堰悉皆漫上坦坡高過舊石工一二



三尺不等直上新加土堤計土堤之頂不過出水面  
一二尺不等而六安溝等最窪之區水面將與堤平  
加以連日西風怒浪掀天萬分危險所賴坦坡雖沒  
水內而堅固異常緊護各工且極大之浪一到坦坡  
之上其勢便殺故凡一切樁石埽料絲毫不損較之  
本年正月二十三日湖水涸盡之時風暴驟起即便  
拔樁撤埽擊卸石工者其情形之安危已不啻天淵  
之別今臣一面飛督該同知等速僱堤內斂堤堤上  
小堤并於十月初十日暫開高良澗閘洩水歸高寶

諸湖以分殺洪澤湖之勢日來水勢少定可保無慮  
此武家墩高家堰高良澗翟家壩等一帶臨湖百里  
堤堰之情形也又黃河堤工惟山陽南岸攸關最重  
臣於本年四月內令各官一槩築至高出水面八尺  
爲度然仍慮新築之土不耐水浸且減水石壩尙未  
砌完誠恐驟長之水無路宣洩必傷新堤是以將清  
河縣北岸張家莊舊洩口河形一道不及築堤留爲  
洩水之地今黃河之水普面暴漲洶湧異常自九月  
二十七日於河灘低處出漕起至二十九日兩岸盡

行漫漲一望瀰漫卽由所留張家莊舊河形內分洩  
北注然張家莊雖經分洩北注而山陽南岸之馬邏  
盧舖一帶其新經加高八尺者今止存堤頂一二尺  
不等而侍家塢堤工之頂僅高出水面八九寸危險  
之狀更爲至急臣見在飛檄該管官弁於已成之堤  
頂上加築小堤以防意外今水勢雖湍急非常而不  
復加長似亦可保護無虞此清口以下三百里黃河  
堤岸之情形也至於山清運河自九月二十六日淮  
湖陡漲之後一體大水急流奔湍迨至十月初一日

竟與堤頂相平處處有漫溢之勢淮城民命危殆異常臣方在勘閱雲梯關上下黃河堤工而節據道廳營弁報文臣卽飛馳旋淮與該道廳商一宣洩之途而板閘河西戚家橋老堤係康熙八年舊冲決口底埽腐朽竟於十月初三日黎明時分平折下陷鼓開數十餘丈其水由舊河直注淮安之西湖下寶應汜水界首高郵等湖而去此工一決而河水頓落淮城數百萬生靈方獲安枕且運河之水究竟與全湖大河有間而臣見在集料興工尅期堵塞不足爲民生

運道之患惟凱旋大兵船隻因凌口迤下有新淤淺  
工一段并龍汪閘水溜湍急上閘艱難不無有稽遲  
之慮然臣見在委官挑淺下埽不過旬餘即可通行  
無阻此運河之情形也臣伏思

皇上宵旰憂勤無刻不以民生疾苦爲念故雖當軍興餉  
絀之際而不惜動支數百萬正項錢糧

命臣大修河道臣仰戴

皇上如天之仁惟求有濟於民瘼

國計是以於修治河工一切事宜雖經臣具疏

題定而閱歷既久之後凡有應增應減仍不憚隨時酌  
改以期有當本年大水臣雖曾料到而實不料如此  
之大由今以思設或春間不照臣原題續題將高堰  
石工五千餘丈加高三尺而不填築水內坦坡則此  
時百里湖堤盡行毀壞湖堤一壞則清水潭立即併  
潰不特所費

朝廷金錢百餘萬兩無可收拾而從此民生之昏墊運道  
之梗阻殆無已時矣然水內坦坡之工實由於正月  
二十三日之風暴拔椿撤埽擊卸石工而後定計此

誠

上天曲體

皇上憂勤愛民至意是以於甫經立春之後而忽降此異常風暴懲戒臣等亟爲改圖以保此民生運道也至此番大水詢之居民皆稱較之康熙十五年又加二尺良由於半年亢旱聚雨澤於一時是以若此陡漲也邇來自微臣以下一切所屬大小各官莫不東奔西馳心胆俱碎今豫省并徐蕭水勢消落歸漕已經半月淮屬河湖水雖未退而已不復加漲一切緊要

新工幸俱獲保無患惟是運河舊堤悉皆沙土一逢水漲卽便可虞者實不止於板閘河西一處今臣擬徧爲相度凡舊係堵决埽工并沙土單薄掃灣受刷之處俱另行酌量再加寬厚以爲來年伏秋捍禦之計其需費銀兩統於大挑節存數內通融動用總之嗣此以後臣益當細心竭力百計綢繆凡應損益增減之處隨時確酌舉行不敢屢疏煩瀆惟求一勞永逸務爲萬全之計以仰荅

皇上宵旰之慮耳除豫省水漲情形經豫撫臣董國典會



疏

題報并板閘河西凌口見在興工堵築其踈防各官職  
名已經嚴行查取俟詳至另疏

題叅外所有本年淮徐河湖異常水漲情形臣謹恭疏  
題報伏乞

睿鑒施行

經理未竣工程疏

題爲

題明經理未竣工程并塞新漫缺口各事宜仰祈

睿鑒事竊臣蒙

皇上殊恩委以督河重寄旣因庸劣無才工程不能蚤竣而又疊遭奇雨以致復多漫缺臣罪實深已於另疏請賜處分矣惟是天災何可測度所恃人力以補天工耳今奇雨漫堤終由於人力之未盡而臣旣遇此奇雨則所以綢繆於將來者更不敢以不密是

上天降誠所以彰臣之罪啓臣之愚而實則篤

國祐於萬世鞏河道於久遠也臣謹將歷來經理之原委與目下堵塞之緩急以及曲圖善後之計敬爲我皇上陳之念臣自拜

命到任之日目擊運道梗阻民生昏墊情形不禁憂心如灼彼時遠近之人皆云河道壞至今日必無可治之理代爲臣危謂臣半生功名此番盡付流水而臣愚以爲世無必不可爲之事惟視人之用心用力何如耳况

大庾玉粒歲歲必須挽運乃自黃流躡淮之後河底日淤  
伏秋尙且膠舟冬春水落之時幾至斷流矣豈可因  
循貽悞於是匍匐河干畢誠揣度實見此時河道有  
必不可不治之勢而又實有可治之理隨將尙書臣

伊桑阿等

題請興舉之工行令各屬估計前來共需銀四百餘萬  
而臣細閱冊內雖從極堅起見但軍興需餉安能措  
如許多費於是再三斟酌從至省至減科之止估銀  
二百五十一萬餘兩具經理河工事宜七疏力請修

治彼時臣之親友見臣屢疏力請知臣者矜臣之愚  
忠不知臣者目臣爲癡妄良以臣估費旣少而自任  
甚力自限復嚴不存絲毫退步耳夫臣雖至愚豈不  
知凡事當留退步庶可爲日後免咎之地况治河之  
事何等艱繁人人皆曰難而臣獨言之若易臣豈真  
癡妄一至此哉祇以今日河道旣不容於不治然當  
百務廢弛之時官則以因循觀望諱凌誘卸爲能役  
則以扣剋侵欺設法冒銷爲事而地方姦詐之徒乘  
官吏之不肖拿罔設騙共蝕河帑弊竇無窮臣承極

報之後安敢不力挽頽風是以估計必從極省先絕  
上下之覬覦限期必從極嚴更杜官員之怠玩漫缺  
必報以除其諱淩之心責成必備以去其諉卸之念  
惟期盡人事而不敢諉之天災竭人力而不敢媚求  
神祐此臣一點血誠謂苟如此庶可固屬員之志氣  
清從前之銅弊以期治效之必成也矧臣自官學生  
拔至總督受

皇上如此恩遇臣雖粉骨碎軀不足仰報萬一乃當此大  
任而先自欺以欺

主留退步以冀卸過卽或

皇上不卽加誅而

天地亦安容此不忠之臣於

堯舜之世是以惟勉竭臣愚而不復顧慮一己之退步

私便也迨旣奉

俞綸竭蹙興舉臣往來察勘又見得黃河之水消長不時

一經長與堤平卽便漫堤而過必須籌一逐漸宣洩

之法以期久遠於是議建減水石壩通計宣洩入海

之途共寬一百餘丈臣愚以爲儘可洩伏秋之暴漲

矣迨至十八年秋間上流霪雨黃水陡長丈餘臣因  
而更加測度細揣黃河受水洩水之勢必得有三百  
餘丈宣洩入海之途方免壅潰於是行令各官逐一  
增添以洩黃漲又將高良澗周橋二閘改爲十丈寬  
減水壩二座并將武家墩廢閘亦改爲減水壩分洩  
湖漲更於寶高江三州縣各建減水壩一座以洩上  
流減來之水據臣之愚以爲如此料理似乎稍周可  
以無患豈知今年雨澤甚多端午節前湖河業已平  
滿方在僨砌減水石壩圖速竣以資宣洩間不意五



月二十四日之後，淫霖霧霈兩月不斷，湖河相連，水高於堤，以致未完新工與遠年舊工平漫過水者五十餘處。此番奇雨詢之老年之人，皆云從未之見。然既已見於今日，安知不復再見於他年？惟因此奇雨而更求善後之謀，此臣所謂

上天降誠，所以彰臣罪，啓臣愚，而實則篤

國祐輦河道者也。茲臣承此降誠，復加揣摩，斷須於黃運、河湖分頭再添建減水壩數百丈，并加挑爛泥淺引河，多引淮水會合黃流，安瀾暢注，庶嗣此以往，尋

常之水涓滴不洩可使河底日漸刷澁泛濫之水隨  
消可使河堤免於漫缺卽或再逢霪雨而奇災亦無  
壅遏漫潰之慮方稱萬全也至於新經漫堤過水已  
成缺口者約有二十餘處若斯時急行堵築所需工  
料浩繁臣擬俟天氣大晴水消土見之時併力興修  
可以省費大半其所需銀兩統於大工內節省應用  
不敢更請錢糧蓋敬陳經理河工事宜八疏內一切  
工程臣原請二百五十一萬餘兩續於康熙十七年  
請建減水壩并酌改運口兩疏內

題明節省銀四十萬兩及拜疏之後臣復加籌酌既建  
減水壩則堤工不必太高原議築遙縷堤兩道者止  
須築縷堤一道徐邳睢靈宿等五州縣并桃清北岸  
原議除民修舊堤之外民復加築縷格堤者亦行停  
止惟催民夫速帮舊堤約可再節省銀五六十萬共  
擬節省銀一百萬兩以備他工之用不意十八年春  
間淮徐處處大饑小民救死不暇安能枵腹帮堤然  
各州縣兩岸舊堤殘缺異常若俱緩待民修勢必立  
成大患事關重大不得不將應民修之堤擇其单薄

至極之處亟動錢糧募夫帮築計費過銀九萬餘兩  
又高家堰一帶填築水內坦坡等項先經增估銀八  
萬兩續因去冬黃流助虐湖水將平堤頂兼之大風  
時起浪高丈餘拍堤而過是以今春又分外加高并  
水內坦坡每丈多填土三十方不等計續估八萬之  
外又多用銀三萬餘兩尙未完工將來大晴水落之  
後必須再加上方銀四萬餘兩始能一律告竣又由  
陽縣南岸潘家壩等處各險工大溜逼堤雖經下埽  
防護然實爲淮揚兩郡保障不得不於迤裡加築遙

堤一道越包數險以防意外計費過上方銀二萬餘兩又十八年春加挑運河案內多挑永安新河并高郵城南淺工共費銀一萬五千餘兩又楊家莊南岸先挑濟運引河因下多淤土經今兩載寬深如舊並未刷開誠恐楊家莊合龍之後水壅不行或生他患是以又復加挑大引河一道計費過銀一萬四千餘兩又酌改運口案內原議永閉新莊閘令糧船由七里閘出束水礮後臣相度形勢又於加挑運河案內多挑支河一道使新莊七里三閘俱可通船出束水

礮但束水礮僅砌石礮十餘丈原未估底豈知大水漲發之後往往蟄陷雖經下埽防護而船隻出口之艱與當年打新莊閘無異臣再四斟酌必須將束水礮改爲有底雙金門大石閘一座并幫大橫堤一道隔攔湖漲計共須增銀二萬餘兩又加浚爛泥淺引河增建減水壩數百丈所需料物人夫百計節省約共需增銀十二三萬兩以上各工共銀四十五萬兩內有在原估數內續報節省而勢難節省者有不在原估數內而勢屬必需者統計臣原估費二百五十

一萬餘兩者將未完工約用銀一百九十六萬餘兩  
原擬節省一百萬兩者今止可節省五十五萬兩至  
此節省之數先因大修歸仁堤敝築徐州州城以上  
縷格等堤堵楊家莊交口三案曾經

題准動用節省銀四十萬兩又併修邳宿運河案內

題明缺費十分之六動用節省銀九萬餘兩仍存銀五  
萬餘兩以爲新漫各腐工缺口補苴之費至臣

題明河工事宜每與原疏多有增減蓋臣凡舉一土其  
中必力圖節省其原擬節省之數乃臣不敢欺

君之血誠故不敢稍留退步也又以河道爲

國家重大之務斷須慮出萬全而臣智識短淺不能一  
慮卽周故不憚隨機酌改查臣先於敬陳經理河工  
疏內曾將嗣後凡有未盡事宜應損益增減者容臣  
臨期分別或竟行或入

告等語

題明在案此臣承河道極敝之後凡有當綢繆之處不  
敢不竭盡心力以期必濟至臣負罪之下更陳善後  
之圖者實因此番竒災出於萬分意料之外而既有



此意外之奇災則不得不傾盡萬分之人力此尤臣披心瀝胆雖萬死而不敢避者故不得不備陳原委仰祈

皇上之睿鑒也若夫臣原

題經理河工七疏內工程并築此新漫各工以及加浚爛泥淺大修歸仁堤戢築徐州州城以上縷格堤併修邳宿運河等一切工程俱可於明春三月限期左右盡行完竣惟減水石壩原擬明年夏初可完不意今歲五六月連綿大雨塘水占溢匠役束手且又

漆壩數百丈必得來秋方可告完也臣謹一併

題明伏乞

皇上睿鑒

勅部議覆施行



築壩挑河疏

題爲

題明築壩挑河併寬漕運限期事竊照微臣奉

命大修江南河道必使黃河盡歸故道會准入海無旋堵  
旋淩再釀奪河之患方敢謂之完工今石工開壩雖  
酌加工食十分之五於通省遠募石匠二千餘名飛  
星僱砌然工程浩繁必俟來秋方能盡行告竣其餘  
一切堤工來春三月內俱可全完至於宿遷縣楊家  
莊大淩口中泓止廢四十餘丈見在加緊進堵來年

二月可以閉合龍門惟是楊家莊以下至清河縣境一帶河身向有茶鹽城古城劉真君廟基蔣溝腰鋪等淺工數處每至隆冬即便淺澁雖設法疏濬而他處俱已深通惟此數處不能見效加以今歲異常大水並未刷開揆厥所由總緣河道變遷是以河底墊高已非一日見在河身未必盡是故道此等去處其下非係純淤卽屬崗土若聽其自然則大溜不能急下楊家莊大王勢必多費料物更慮合龍之後一時冲刷不開又生他變亦未可定臣再四籌維必需乘

此冬盡水涸之際於楊家莊引河上口築壩斷流將  
此淺工數處逐一挑浚庶上流每進一堵下流多刷  
一分及至合龍之後水到成河方保無患也但今年  
糧船先因重運徵兌稍遲繼因黃淮交漲挽閘艱難  
以至抵通亦晚迨回空南下又遇凱旋兵船停泊讓  
路而今歲天寒較早未過冬至河流即便凝結見今  
尙有一千餘艘凍阻黃河之北臣雖嚴督文武官弁  
設法敲冰然冰凌頗厚晝夜僨催日行不過數里及  
里許不等兼之黃河凍實來往行人履冰而渡目下

不能卽開約計各船過淮之期已在歲除之後若待  
至彼時方始挑淺則桃汛將屆勢必貽悞大工攸關  
非細今臣擬於十一月二十七日閉壩斷流飛集人  
夫遇淺卽挑限十二月二十五日告完更將清口爛  
泥淺一帶應加挑挖疏濬之處亦行一併滾挑期於  
同時俱竣一經挑完隨卽開放將見在凍阻固空務  
於正月望前催過淮安赴次受兌則來年重運不出  
五六月俱可過淮是漕糧仍無貽悞而大工獲免意  
外之虞有裨運道民生良非淺鮮矣至於挑河人夫

工食約費銀六七千兩但既將淺處挖深則河流易  
下大工料物可圖節省統於原估錢糧內通融動給  
可也除一面如期築壩挑河外臣謹一併

題明伏乞

皇上睿鑒施行



朝之親公次野老三

三

--	--	--	--	--	--	--	--	--	--

挑河避險疏

題爲

題明挑河避險請再寬限漕運事竊照塞凌必先疏下楊家莊合龍非遠乘時挑濬下流淺注以免他患緣由業經臣具疏

題明見在分頭僱挑刻期告完惟是桃源縣境內舊有九里崗上渡口雞嘴壩烟墩龍窩等五大險工每年歲修之費不下一萬四五千金自康熙十六年楊家莊潰凌之後各險俱平每年量加搶修并未多用埽

料今全黃復故而舊埽腐朽勢必徹底鑲套大加防護內除九里崗一工先經挑挖引河改溜歸中外其餘四工約其所費不下一二萬金當此河帑匱絀之時凡有可以節省之法臣安敢不力爲圖維今再三籌酌相度情形龍窩一工必須稍寬壩臺加意用埽其烟墩上渡口雞嘴壩二工盡可於對岸各挑小引河一道卽將挑河之土填塞河身築成欄河土壩三工所費統計不過二三十金而引河既成將來惟緊防土壩則水到舊工止於掃灣則溜不至十分危險

伏秋埽料可省過半又桃源李家口地方河身直逼堤根而本工原無丁頭底埽危險更甚亦須乘時一律速挑引河以避極險臣見在設法募夫分頭償挑然非至正月望日不能告竣是臣先

題十二月二十五日開壩放船正月望前將回空盡行催過淮安者應請再寬兩旬至二月初旬方可過淮赴次受兌然總可不悞來年重運也又山清高寶一帶運河臣先於敬陳經理河工事宜第五疏內

題明每河一丈挑土八十四方後三次挑河每丈共止

挑土六十六方內山清兩縣河身之土俱係浮沙十八十九兩年大水竟將浮沙刷去止挑六十六方之處盡行寬濶計其刷去之土約有一二百方不等見今淮城以上水面較之康熙十六年之河底尙低數尺且當此隆冬水涸之時而河內仍有水五六七八尺及丈餘不等惟寶應界首一帶當日被湖水橫冲入河敵住黃流以致盡是淤泥雖遇兩番大水竟未刷開目前之水僅有三尺以行運而論頗可無悞但上流濬通而水至此處被膠淤緊不得暢注未免有

傷堤岸臣復爲思維黃河旣在築壩加挑引河以省  
險工之多費不若乘時將寶應運河淤泥之處亦復  
再爲挑濶二三尺實大有益於運道者也除一面集  
夫加挑俟工完之日核明土方工價將黃河四險引  
河入歲修案內

題銷寶應加挑運河入大工案內彙銷外臣謹一併  
題明伏乞

皇上睿鑒施行

新文襄公奏疏卷三終

新文襄公奏疏卷三終

靳文襄公奏疏目錄

卷四

治河題藁

請借錢糧疏

題明放水日期疏

酌改河員以重責任疏

報明挑完阜河日期疏

再報河漲情形疏

恭報楊家莊合龍疏



謹陳歲脩疏

恭報大工水勢疏

恭請欽差閱工疏

詳陳臆說疏

恭報進京疏

請帑修蕭渡工疏

恭報回工疏

加修善後工程疏

請添河員疏

恭報兩河險工官員疏

謹請加修疏

男 治 豫 編 次

孫 樹 德 校 正

曾孫光烈文全校字

興大圖書分類法

靳文襄公奏疏卷四

總督河道提督軍務太子太保兵部尚書兼都察院右副都御史臣靳輔

治河題藁

請借錢糧疏

題爲額

請撥借錢糧以濟要工事竊臣謬膺治河之責蒙

皇上發帑金二百五十餘萬兩

命臣大爲興舉臣考求諮訪而知河身之積淤墊高從未  
有如今日之甚者是以臣或於從未築堤之處增築

堤工或於從未建閘壩之所增建閘壩蓋皆就今日之河求今日之治籌酌再三而萬不能已者也念請發帑金既有定額自不容於額外又滋多費臣朝夕悚惕惟有茹荼率屬力圖節省以求無絀而已臣於上年核收支之數額帑尙有餘賸不意蹇遭霪雨奇災補苴未免多費嗣後通盤合算僅足敷用已無餘存矣且此僅足敷用又有實係存銀而猝難應目前之急用者如餘存棒木石由鐵錠鐵錫等項物料值銀二萬餘兩又各監理官名下有夫頭掛欠銀四萬

餘兩查此二宗原係額內之帑其料物皆可供將來  
歲修之需夫欠亦皆可責成追取然一時不能濟用  
則應找發各工之銀便缺少六萬餘兩矣至於臣另  
疏所議楊家莊毛家宅白洋河等處應開一丈六七  
尺之濬引河三千餘丈約又需銀四萬餘兩乃屬增  
舉要工關係全河萬萬難已者以上三項是共需銀  
十萬兩矣但臣若於請發前帑之外而又爲濬請則  
干冒昧之辜若緘默不言又恐因循貽悞獲罪更深  
總之微臣一身之罪愆不敢逃避而

國家莫大之重務尤不敢不盡心綢繆臣展轉圖維敢請將附近錢糧借撥十萬兩給支要工容臣一面將夫欠四萬餘兩責成勒追并將存贖料物二萬餘兩於逐年歲修扣銀俱行抵還借項外其餘四萬兩再容臣於竣工之後設法節省統行扣還如此則於前請帑額之外仍無多費而應舉要工亦不致以帑絀而貽悞也仰祈

皇上洪恩俯念微臣萬不得已之請

恩賜俞允則

國計民生均有攸賴矣伏乞

勅部議覆施行



華ノ國ノ正名

三二

題明放水日期疏

題爲恭報挑完運河閘壩放水日期仰祈

睿鑒事竊照駱馬湖淤淡水淺阻礙漕船經臣特疏

題請動支大工河庫節存銀十五萬九千三百餘兩在

於邳宿境內築堤建壩另挑新河一道引山東閘河

之水由阜河出口歸黃河濟運業經部覆奉有

俞旨欽遵欿築間不意去年入夏疊遭奇雨遍地汪洋比

至九月水退復集人夫而更逢奇凍畚鍤難施是以

今年正月二十九日臣復行閉壩加工挑築先於恭

報黃運兩河開壩放水日期等事疏內

題明在案開壩之後臣嚴督各監理官多募人夫飛星疾僨所有缺口三十餘處陸續堵完減水石壩二座亦俱建砌完畢溫家溝水工堤岸築高八九尺不等於三月初四日開壩清水直注黃河楚閩差旅船隻俱於當夜進口北上重運銜尾而至悉皆通行無阻兼可遠避湖險矣除一面催督各官將堤工原未築完及被上年雨淋殘毀之處星飛僨竣另疏報銷外謹將邳宿新河挑濠開壩放水日期并重運無滯情

形恭疏

題報伏乞

睿鑒施行



酌改河員以重責任疏

題爲酌改河官汛地以均責成以重河防事該臣看得  
江南黃河兩岸上自東豫二省交界下至海口歷十  
二州縣地方延袤將二千里臣奉

命大修盡行修築長堤在在皆須防守而各州縣河官汛  
地有遠近之殊修防有睽隔之勢其間未協之處不  
得不預爲綢繆以期至當也如安東縣河道向無可  
守之堤今載築幫修并與山陽縣換管堤工共長三  
萬七千餘丈其中更有茆良口等處險工主簿一員

萬難兼顧查該縣有五港司巡檢現駐佃湖可以分  
管請自清河縣界泗舖溝起至夏村營止令安東縣  
主簿管理自夏村營起至雲梯關止令五港司巡檢  
管理又宿遷縣南岸蔡家樓彭家堡等處險工主簿  
一員催僱修防刻無寧暑令歸仁興築大堤該簿不  
暇顧及查有桃源縣古城司巡檢止管地方地勢近  
年因河道變遷古城一鎮不過寥寥數家不若將統  
務併歸該縣典史而以古城司巡檢改爲宿遷歸仁  
司巡檢移駐歸仁隸該縣理歸仁堤又宿遷北岸主簿

河道遙長兼以中隔駱馬湖奔走維艱實有鞭長難及之勢查新改宿遷運河主簿雖管運河兩岸堤工一萬餘丈而駐劄阜河帶管附近黃河堤工頗屬最便請以駱馬湖西至直河一帶黃河堤岸併歸運河主簿管理其駱馬湖以東至古城一帶河汛仍責北岸主簿管理庶馳驅易到可以無悞修防又徐州上下管河州判二員皆兼兩岸堤工一遇晦明風雨舟楫難以飛渡實有坐悞之虞請以上河州判改爲徐州南岸州判專管徐州南岸工程下河州判改爲徐



州北岸州判移駐河北專管徐州北岸工程又碭山縣主簿止可管本縣河南堤工其河北堤工亦難兼顧查豐縣河道止有十五里請將豐縣主簿移駐盤龍集改爲豐碭主簿專管豐縣并碭山縣河北堤工其蕭縣主簿著令移駐郝家集臨河適中去處就近修防庶免貽悞旣據各該道廳呈詳前來臣覆加確酌竝無添設之煩止須一轉移間而河工運道實大有裨益也相應具

題伏乞





報明挑完阜河日期疏

題爲報明挑完阜河通舟濟運日期仰祈

睿鑒事竊照本年七月內黃河異漲將阜河口淤墊一千餘丈經臣於七月二十七日具疏

題明隨馳赴阜河親駐工所力督道廳營印管河各官弁一面煞壩挑淺一面堵塞旁流於八月十五日完工開放通舟訖重運糧船現在次第進京北上無阻臣謹具疏報明伏乞

睿鑒施行

1941

9

再報湖漲情形疏

題爲再報湖漲情形并陳開洩事宜事竊照本年因奇旱之後聚雨澤於秋中山陝東豫諸省積霖彌月彙入黃河以致河流異常泛漲由蕭縣漫溢盡歸洪澤湖內九月二十五六七八等日湖水陡長七尺高家堰一帶堤堰處處危險幸賴新填坦坡堅固僅免無虞并於十月初十日啓高良澗閘洩水各緣由先經臣於十月十八日具有恭報淮徐河湖異常水漲情形事一疏

題報在案惟是臣先因湖水平定已及一旬且時將仲冬理應有消無漲是以備陳可保無虞之狀不謂前疏甫於十八日拜發而二十四五等日西北颶風大作更甚於前洪澤湖水又復加漲二尺兼之浪如山涌竟從堤頂之上處處潑漫而過而六安溝高堰大壩二處大溜直注業已萬分洩裂而山清盱眙同知多弘安親自站立水中身先夫役與各分管官弁百方搶救迨至二十六日危而復安若其得以施人力而仍獲保固者總賴水內坦坡之益至於運河龍汪

閘上之水高于閘下五六尺閘旋大兵座船一千餘隻不能飛渡日用人夫千餘名僅挽船數隻而又半爲沉壞損船傷人不可勝計領兵委署護軍統領也喀等屢向臣言作何設法過閘之計臣於二十七日又復遍爲勘閱查得武家墩迤南舊有洩水石閘一座年久湮沒然閘雖廢壞而兩旁河堤見在可以開洩臣於是日未刻親駐彼地督夫挖開此處一開而龍汪閘上之水頓減二尺兵船方得銜尾北上惟是高良澗武家墩戚家橋洩口三處之水彙歸高寶諸



湖積流兩月諸湖悉皆盈滿運河窄小不能容受而臨湖堤頂僅高出水面二尺有奇臣念永安新工雖坦坡堅固可保無虞而際此隆冬湖面漸漸凍合設或指日東風凍解則積凌乘風勢不可遏將見臨湖數千丈舊石工必有撞卸成沒之患隨遍行勘閱查得江都縣鰍魚口地方有舊河形一道迤東三四里許卽接涇洋大湖臣隨行令揚州府廳印河等官并該管營弁將鰍魚口東堤於十二月初七日掘開二十丈洩水由舊河形入涇洋湖達廟灣入海一面逐

日探量水勢俟高寶諸湖之水減去二尺卽將鯀魚口洩水去處立行堵塞凡此皆一時權宜之計蓋大工未竣而大水驟來若不相機預爲疏導俾其逐漸流通則壅積漫潰爲害必大故不得不爲此權宜之策直待大工告竣之後方可爲一勞永逸之計也但事關掘堤洩水事宜相應具疏

題明伏乞

皇上睿鑒施行



恭報楊家莊合龍疏

題爲恭報宿遷縣楊家莊大工閉合龍門日期仰懇

睿懷事竊照江南河道敝壞蒙

皇上軫念運道民生特發帑金大爲修治臣凜遵

成命力督所屬監理分管大小官弁竭蹙經營先將敬陳

經理河工事宜八疏內工程斟酌節省僭修完竣續

將八疏內節省錢糧又加修酌改清河縣運口添建

黃運河湖各減水壩加築徐州州城以上堤工另挑

阜河大修歸仁堤并堵楊家莊淺口等六工而堵楊

家莊決口一工實大修河道結末至要之工也祇因  
下流淤墊最久雖設法疏浚而合龍甚難以致上年  
二月二十五日有走埽之事今臣親駐工所調集各  
處監理分管大小官弁一百餘員從新淡挑引河廣  
購料物毋分晝夜百計經營於康熙二十年十二月  
二十八日午時閉合龍門訖目今黃淮二瀆盡歸故  
道漕運無阻田土可耕皆我

皇上洪福齊天以致河靈效順非臣之愚所能竣此大工  
也至此工既竣卽應恭請

欽差大臣臨工查勘但臣自康熙十七年興工以來歷經四載凡十七十八年分所築堤工兩遭大水殘損甚多臣見在嚴督原經手各官著令各集原夫逐一修補又臣凜鑒十九年異常奇雨不得不多建減水甌石各壩料物雖經購足而工程浩大需匠最多凡附近千里內外之石匠莫不徧覓鑿砌而尚有零星未完必俟本年三月方能盡行全竣除臣一面力督各官弁疾僱未竣餘工綢繆善後事宜一面將一切工程錢糧備造清冊完日恭請

欽差大臣臨工查勘并將在事督工勤勞與各省協濟辦

料各官弁另疏

請敘外所有楊家莊大工閉合龍門黃淮二瀆全歸故道

日期臣謹先疏

題報伏乞

皇上睿鑒施行

謹陳歲修

題爲謹陳康熙二十一年歲修事宜事竊照黃河水勢  
與大工情形已經臣另疏

題明矣伏念臣奉

命治河固期克竣大工尤須綢繆善後俾無旋修旋壞之  
弊方不負

皇上銳意平成視民如傷之至意卽動用此二百五六十  
萬帑金亦不致虛糜於無益之地也查黃河自康熙  
六年烟墩潰決之時桃源以下淤成平陸及烟墩堵



塞而黃家嘴陳家樓七里溝新莊口等處相繼潰決  
此塞彼開曾無寧歲至康熙十五年新莊口雖經閉  
合龍門而新莊口以上則有白洋河于家岡一帶數  
十里無堤地面新莊口以下則自清河縣至雲梯關  
皆無攔水之堤河流略漲即便漫灘四散水不歸漕  
以致河底日墊而淤泥日深更加康熙十六年楊家  
莊潰決幾至奪河臣隨於康熙十七年挑挖楊家莊  
南岸大引河一道十八年於引河之南又復加挑一  
道并於白洋河毛家宅二處各挑大引河一道數年

以來運道之賴以輓輸者皆此四道引河之益也今楊家莊大工業已完固雖伏秋尚須防守鑲套而人力易施足保無患惟下流一百四十里河身之內有淤泥硬底止深一丈一二尺溜刷兩月衝洗不開之處東水難下深有可虞臣見在百計圖維或加挖引河或用鐵埽帚聯成大簾分頭施浚然必須將宿遷縣以下至清河縣兩岸遙堤除見高出水跡五尺者不議外其不及五尺者再行加高以高出大漲水跡五尺爲度堤外隨水勢深淺用順埽一例鑲護以禦

風浪以保伏秋方稱萬全蓋伏秋水力勇猛此等淤底之河必須勇猛之水再加施浚始能制成大河而欲使勇猛之水專力刷河無旁洩之患必須加意用埽防堤始克有濟也此幫堤工程凡原動錢糧者仍用錢糧加幫桃源縣民工仍令民幫惟宿遷縣民工若全待民幫必至貽悞應以一半動錢糧加幫一半令民力加幫其動錢糧加幫者總於大修案內彙算至於一切埽料例應動歲修錢糧購辦約而計之應用草一二千萬束以及柳椿蘆葦等項需費甚繁又

各處險工料物均須多爲儲備以防全河異漲奈上年河銀已經用盡本年河銀尚未解到工程至緊不能久待臣萬不得已行據淮安府查得該府庫見有應解部漕項銀三萬八千四百四兩零伏乞

皇上俯允臣請將此漕項銀三萬八千四百餘兩准臣暫爲借用容臣一面嚴催各屬速解本年河銀俟秋杪冬初照數撥還該府著令解部還項抑臣更有請者一年錢糧原供一年之用查從前舊例每年歲修料物多係令民間預先辦運來工量給三分之一其餘

二分直待

奏銷之後方始具領找足往往因河銀未經解到報銷稽遲直至一二年之後始行給發其辦料人戶不無苦累邇來徐邳宿桃清山安各州縣險工所用一切歲修料物臣因見有大工錢糧是以或責成府廳或責成州縣或責成佐貳衙官俱將料價預先全發然後催令運料來工或有不及卽發者亦令隨便墊給隨卽赴領補項數年以來頗稱便民無擾今大工已竣庫無餘資不能通融若因不能通融而仍令民間

先解後給則恐又生擾累之虞臣查所屬各州縣應解河銀爲數甚微於各該州縣條鞭計之不過太倉之一粒耳合無仰請

皇上敕部確議行令各藩司轉督各州縣嗣後將一年應解河銀定限該年三月內盡行起解完足註入考成不得仍循往例待至夏秋如此則在解銀各州縣原無所損而各險工應需料物可以預行購備用免民間墊銀辦料之繁河工獲濟上下均利莫便於此矣臣謹一併

題請伏乞

睿鑒敕部議覆施行

恭報大工水勢疏

題爲

題明黃河水勢大工情形仰祈

睿鑒事切照黃河水勢自上年楊家莊洩口龍門漸窄之時先已長水四尺有奇迨十二月二十八日閉合龍門之後適當積凌水發至本年正月初八日止計又長水五尺二寸連前共長水九尺有奇彼時楊家莊上至宿遷縣計程二十里下至清河縣計程一百四十里盡皆漫灘出漕一片汪洋查兩岸遙堤南岸自



白洋河以下至雲梯關外北岸自清河縣以下至雲梯關外皆係大修案內動帑興築之工南岸白洋河以上北岸清河縣以上除險工埽臺月堤縷堤之外其一切遙堤原係民修工程內桃源縣遙堤一萬餘丈已經臣鼓舞該縣紳衿督民修竣惟宿遷縣遙堤甚長臣雖一律鼓舞而民力不勝僅有人夫數百名是以歷時雖久而築工無多若全待民力勢必坐悞臣萬不得已將該縣楊家莊以下兩岸堤工八千餘丈并直河最險工數百丈以及一切險汛應加築月

堤之處悉皆動帑興舉於本年正月大漲之時凡宿  
桃二縣創築加幫已經告竣之

欽工民工堤根雖俱有水三四五六尺不等而堤頂尚高  
出水面二三四五尺不等惟宿遷北岸楊家莊以上  
朱家堂蕭家渡一帶民工一千餘丈并南岸楊家莊  
以上小河口徐家灣一帶民工一千餘丈向因舊堤  
尚高是以未及加幫豈知水漲之際直平堤頂臣嚴  
飭該縣飛撥人夫搶救業於堤頂之上加築數尺寬  
小子堤一道自正月初八以至十三水勢稍定不復

再漲方謂可保無虞正在催夫再加寬厚間不意正月十四日寅時颶風大作浪若排山南岸小河口徐家灣一帶悉皆拍堤過水將宿民搶築未完工程盡行打去迨至巳時又加地震而徐家灣堤工已被漫洩一百餘丈矣至於楊家莊埽臺自合龍之後異常折陷合龍時水深四丈有奇者至正月望後竟加深至八九丈不等原估用套肚埽六層者竟增至十二三層不等更加正月二十五日未時北壩埽臺陡然折陷深一丈五尺長二十餘丈過水甚急臣心膽皆

碎親督各官弁兵丁夫役人等毋分晝夜百計搶救  
幸賴

皇上洪福得以轉敗爲成至此工原估銀十八萬九千餘  
兩上年二月約計用過銀十二萬有奇彼時龍門僅  
餘九丈臣方喜此工不過再費銀二三萬兩尚可節  
存銀三四萬兩不意桃汛大漲於二月二十五日走  
埽一十二路及臣從新辦料百計設法採柳調丁更  
調山東額夫一併協助僱工至合龍之日約畧所費  
適與原估相當計其鑲套壓土之資不過再費萬金

而止孰知河底日陷壩臺日折自正月初至二月杪除額兵之外每日仍用募夫五六七千名不等草柳蒜椿不能悉數約計又多費至三萬餘金以有限一定之錢糧多方遠購之料物而填此無窮巨壑臣目擊心傷寸衷如刺直至今三月初間埽臺始獲堅固然楊家莊以下多年久淤之河則又一時衝刷不淺見在之河雖有深三丈以上之處而亦有止深一丈有奇之處第他處河身卽不能刷深者亦必刷寬而清河縣地方之上下腰舖白馬墩曹家窩龍王廟前

等五處既不能刷深又不能刷寬以致河流到此陡  
生湍急之勢而無暢注之情又楊家莊毛家宅白洋  
河等處歷年共挑引河九道原深一丈及一丈二三  
四五尺不等者大溜行經兩月有奇而仍然如故亦  
未加深以致漫灘之外久不歸漕臣因思江南河道  
凡一切黃運河湖堤堰閘壩

欽工民工合淮揚徐鳳四府州所屬之徐蕭沛豐碭邳睢  
靈宿桃清山安甯寶高江儀泰等十九州縣兩岸計  
之將及三千里之遠前此未常一齊修治止於堵漫

濟運而零星動帑每年約用銀三四五十萬兩不等然係逐漸請撥是以不覺其多臣自奉

命督河已經五載矣以所用帑金分年牽算亦止每年五十餘萬因係一次彙請二百五十餘萬是以只覺其費今幸賴

皇上如天之福楊家莊業已鞏固各工亦俱漸完卽有徐家灣漫口然沿邊之水僅深二尺有奇臣見在調兵集夫就淺越築不難剋期堵斷但河身不能卽刷寬深在春月而情形若此將來伏秋異漲其何以堪臣

愁思萬狀實屬寤寐皆憂者也總之微臣一介愚庸  
蒙

皇上優拔總河之職彼時遠近之人皆稱此河斷乎難治  
卽治亦徒糜

國帑斷乎不成而海運陸運紛紛起議臣彼時目擊河  
道敗壞不堪若不急爲大修則運道中阻輸輓不前  
勢必循海運陸運之說而海運之險陸運之擾殆有  
不可勝言者臣身任總河一籌莫展聽其阻運殃民  
卽自膺重譴固不足惜其如民生



國計何哉因而再四思維念昔賢有云人定可以勝天  
臣惟竭蹶經營不存絲毫偷安苟且之念則仰賴

皇上之洪福敬藉

皇上之威靈斷無難治之理於是一力肩任請帑大修又  
恐浮議之搖阻屬員之因循故復請定三年嚴限以  
期必成至於大修一案先據各屬估計需銀四百餘  
萬而臣力排衆議謬出已見止估銀二百五十餘萬  
及

廷議允估之後復欲於中節省銀數十萬兩併修原疏

未估各工此臣區區之愚自謂受

恩深重雖肝腦塗地不足仰報萬分之一當此河道壞極  
之後惟有力求必治以抒

聖明南顧之憂且軍興之際需餉正殷若請帑太多則過  
煩司農仰屋又豈臣心所安是以魂夢之中惟以竭  
蹙肩承力圖節省爲事而不自覺其蹈於輕忽也壩  
臺務期於平穩而愈益折澁河身自望其寬澁而偏  
不刷動言念及此不禁槌心泣血向來以能盡人力  
自可回天而不知治河之難每出意料之外如此也

除修防保固事宜臣見於另疏

題請并徐家灣漫鎔去處見在興工堵築勒限斷流一面照例查取各官職名俟詳至另疏

題奏外所有黃河水勢大工情形臣謹特疏題

報貼黃難盡伏乞

皇上睿鑒全覽施行

恭請欽差閱工疏

題爲恭請

欽差大臣勘閱工程事竊照微臣奉

命大修江南河道業已漸次告完先因康熙十七十八年  
分所築堤工兩遭大水殘損甚多不得不嚴督原經  
手各官著令各集原夫逐一修補又減水輒石各壩  
僱匠艱難尚有零星未竣約在三月方完是以於恭  
報楊家莊大工閉合龍門日期疏內

題明容臣一面力督各官疾償餘工一面備造工程錢

糧清冊完日恭請

欽差大臣臨工查勘等因經議政王等會議覆允奉有依  
議之

旨欽遵在案查此番大修工程約有三千里之遠臣雖時  
常往來然工程未竣不過順便償催觀其大畧令工  
完報銷必須逐段勘明而求其逐段勘明非兩三月  
工夫不能遍及計臣拜發楊家莊合龍之疏乃本年  
正月初二日也彼時原擬三五日之間大工壓土堅  
固臣隨親履各工將長短闊狹淺深高寬丈尺備細

勘核不過三月可以勘完工程既經勘完則按工程以核錢糧便非難事不意正月初五日起楊家莊龍門一帶黃流從埽底透過翻花大溜洶湧異常埽臺陡折甚深所幸存料尚多臣卽親駐壩臺之上嚴督各官弁兵丁夫役人等毋分晝夜鑲套搶救而隨套隨折臣亦隨折隨套本工存料用盡又將各歲修工所備之料盡行運來直至二月十五日方始折定三月初六日方斷黃流計此兩月有奇臣惟親駐楊家莊調度催督不敢一刻輕離以致各處工程未得親

行勘核今三月已將半矣若必俟臣逐處勘明方行

題請

欽差則適當伏秋異漲之際彼時處處出漕工程盡被水

占

欽差到來從何詳核臣反覆思維惟有一面

題請

欽差一面速行遍勘比至

欽差將到之時臣已逐一核定隨將工程長短濶狹深淺

高寬段落備造清冊一送

欽差大臣履勘一送部臣查核庶乎妥便至臣前疏所稱  
未竣餘工并另疏加幫宿桃二縣遙堤工程以及徐  
家灣漫決去處俱在飛星疾儻迨至

欽差臨工俱可全完不致有悞勘閱也臣謹恭疏

題請伏乞

皇上睿鑒俯賜特差大臣臨工勘閱施行





詳陳臆說疏

題爲詳陳臆說欺罔矛盾情由仰祈

睿鑒事竊臣隨一面陪

欽差勘工大臣科道沿途查勘工程一面將崔維雅所著  
河防芻議與兩河治畧二書閱其大畧迨勘工完畢  
於八月二十七日行至徐州九月初三日

欽差大臣等傳臣與維雅同至公所會議恭進河防議畧  
一案而維雅又另出一冊內開條議二十四款臣與  
欽差大臣等公同閱明臣隨云你說減水壩不好我說減

水壩極好若不虧各壩減水高家堰并運河堤工如何承受維雅云一個減水壩將來就是一個凌口臣云黃河各壩雖未開放而堰堤漕堤業已試效兩年來見不成凌臣又問見今運河淡一二丈人所共知你如何還要挑呢維雅云也有淺處臣又問云你說還有淺處是那一個處淺我如今與你各差一人前往揆水其水最淺有一丈如有七八尺淡之處就算我輸如何維雅不答維雅云歸仁堤必要從新修過三教堂清水出不來必要開胡家溝引清水出黃河臣

云地有高低水是平的三教堂與胡家溝相去不遠  
若目前河高地窪三教堂怕黃河內灌則胡家溝也  
怕內灌若日後黃河刷深胡家溝清水出得來則三  
教堂也出得來何苦不就省反要多費維雅云我不  
駁你你到駁起我來我也是

欽差臣云誰說你不是

欽差就是

欽差也要講理難道只憑你說不容我說麼隨經

欽差大臣等口稱你兩人所辯亦不足爲憑崔布政司既

有條議二十四款斬總河也登答二十四款來臣隨帶冊至臣寓逐款登答明白移覆

欽差大臣等於本月初九日復集公所臣問維雅云你要與凌口上源起挑挖引河直至清口若依你與挑就從節省估計也要費銀八十八萬兩况你議挑之河止寬十丈深二丈而你條議內又稱見在之河寬二三十丈深一二丈既有此見在寬深之河何故又要挑徒爲糜費呢維雅云要不挑就不挑罷並不答明其餘各款亦俱不能答但向臣云總之我不該上這

本如今悔不及了我並無不好心腸等語一面隨口說誓又云你原是舊上司官又比我大我原該讓你臣荅云你這話說錯了凡事只要論理那裏論得官職大小當仁不讓於師那裏論得上司我與你不過是個朋友公事公言只要有理何必說官大小臣隨又問云你所著河防芻議第六卷內說自李化龍開泃河之後徐州運道已廢故明崇禎八年東河水淺運復由徐叅議徐標於徐洪上流劄開月河與運河相連運得無滯

國朝漕運因之等語查

國朝漕運俱由董口進汴河並未走徐州月河你這話是那裏來的維雅云這是河防一覽上有的臣又云河防一覽是故明萬曆年間總河潘季馴的書徐州月河係故明崇禎八年徐標開的彼時難道潘季馴又活轉來麼維雅隨云不是河防一覽想必是淮安誌書隨令伊家人取書來看究竟伊家人亦未取書來臣反復詰問彼時維雅舉止張皇語無倫次遂云如今紙上談兵哄

朝廷的人要多少豈止我麼本月十二日復集公所

欽差大臣等向臣與維雅問云你兩人所議二十四款還有畫一之處麼臣荅云別無可畫一就是加帮堤工可以畫一但崔藩司要一概加我必照水跡加亦微有不同處隨據維雅荅云第二款挑引河之說總河旣云費錢糧多我與總河畫一罷臣隨問云你前日取淮安誌書查徐州月河怎麼說維雅云我說的徐洪上流就是沭河臣隨云這話愈說錯了沭河在山東離徐甚遠你還一曉得就著書麼維雅云我怎不



曉得若我不曉得我怎麼著書呢又向臣云你不要  
怪我我是

朝廷叫我來的

朝廷面分付我說你去著實看看該說的去處你俱實說  
我所以不得不說臣隨云誰嗔你說有理去處儘你  
說我斷無不依你的今黃運兩河全賴減水壩保全  
河道你盡議拆毀叫我怎麼依你呢維雅又云你還  
不知道哩不但我說你的減水壩不好就是京裏江  
南在位大人也有說你減水壩不好的他們對我說

你云好生看看說說那些減水壩把我們江南的田地都滄壞了等語臣隨云你這話更說錯了你是皇上差出來的怎說在位大人況且我未建減水壩之前淮揚七州縣田地一片汪洋就如大海一般倒說不滄如今處處耕種遍地禾苗反說滄了顛倒是非有這理麼維雅無詞以荅惟支吾設誓而已此皆臣於欽差大臣科道諸臣之前與維雅三面問答之言也伏念臣以庸愚之資謬荷鉅艱之任如螽負山刻虞隕越祇以

君恩深重不敢不竭蹶圖維期於得當以仰報

主恩於萬分之一是以不論官民士庶凡有言及河工者莫不虛心採訪求其盡言以期克濟况維雅曾經兩任河官而又著書立說其爲諳練留心似無可疑是以微臣初准部文之時私心竊喜以爲必可得其相助爲理及細閱其先著之書與後呈之條議二十四款乃知其不過逞臆說以爲欺罔也查維雅所奏恭進河防議畧仰祈

睿鑒以備採擇事奉

旨這所奏修河事宜著差往勘閱河工大臣將崔維雅帶  
去會同總河確議具奏書并發該部知道欽此是維雅  
河防芻議兩河治畧二書內所載之言應聽勘工大  
臣會同微臣確議者也乃維雅自知二書內所載各  
條多係勦襲陳腐之言不合見在機宜於是另作條  
議二十四款堅稱二書所載各條卽在此二十四款  
之內不必另議不令臣等會議奉

旨確議之案而令議其另作私書其欺罔者一也又查維  
雅恭進河防議畧疏內稱臣於康熙十三年九月間

將前後親身閱歷者詳考規制確酌時宜繪圖著說  
輯成河防芻議一書彼時卽欲繕寫

進呈以身任外吏無由上達等因而河防芻議第三卷  
周橋翟壩圖說條內稱丁巳秋謹識等語夫丁巳乃  
康熙十六年卽微臣奉

命督河到任之年也維雅將該年著成之書而捏稱康熙  
十三年九月輯成此不肖官吏有所規避營私而倒  
提年月之故智維雅於對

若之際公然行之而不自知其矛盾其欺罔者二也又查

河防芻議第四卷寢開新河條內稱宿桃清三縣地方通共長一萬三千一百四十餘丈康熙十三年冬月勘明詳請等因卷查康熙十二年間前任河臣王光裕爲緊急運道事檄行原任淮徐道戴聖聰著令會同管河濟寧各道夏鎮中河兩分司親往宿遷確勘宿遷以東可否另開運河接山東之水直至清河縣出黃河等因隨經該道戴聖聰勘明詳覆內稱量得宿桃清三縣挑河築堤去處共長二萬三千一百四十七丈六尺估銀六十三萬八千八百七十三兩

七錢六分本道策騎奔馳一一荒度躬親閱歷反覆  
籌畫惟慮河決致有難成之悔不如仍舊河施帮築  
之工事半功倍等語隨經前河臣王光裕照議批允  
卷案見在此康熙十二年十二月二十一日淮徐道  
戴聖聰之詳也彼時維雅係河南管河道亦在會同  
之列故得有淮徐道詳藁今將淮徐道原詳之文更  
改數字且將量明共長二萬三千一百四十餘丈者  
改爲一萬三千一百四十餘丈原係康熙十二年十  
二月詳覆者改爲康熙十三年冬月詳請竊人之能

以爲已能於同僚之間不過無耻而以此書

進呈實則誑

君其欺罔者三也又查維雅河仍芻議第四卷淮揚疏築  
條內開黃河倒灌雲梯關上下淤墊幾成平陸等語  
第六卷或問辨惑條內一開雲梯關爲入海之路向  
來寬三二百丈不等今爲黃河沙淤僅五六丈餘等  
語一開維雅屢勘桃清大工周視相度稔知清口雲  
梯關上下數百里河身沙墊高至二丈三丈不等河  
渠全沒等語而兩河治畧小引內開宿遷楊家莊五



年不塞是以下流勢緩沙停桃清淤高雲梯關海口  
僅若行潦等語夫河防芻議係維雅於康熙十六年  
以前之書業已將清口雲梯關淤墊情形三爲申說  
是楊家莊未凌之前下流久已淤墊之明驗矣而兩  
河治畧引內則強歸其咎於不塞楊家莊所致同日  
進呈之書而其說不同在維雅只圖吹求微臣之短而不  
自知其自相矛盾於

君父之前也其欺罔者四也又查維雅河防芻議第六卷  
內稱故明崇禎八年叅議徐標於徐洪上流掘開月

河與運河相連運得無滯

國朝漕運因之等語又兩河治畧阜河新渠難成議條  
內稱故明清黃交會則在茶城前建二閘後添一閘  
當年頗稱利涉不可倣而行之乎等語查故明漕運  
原由茶城彼時河淡水落是以清水得出黃河今自  
河底屢墊以來黃河之水高於內地丈餘不等若仍  
於此處行運則運艘未必可通而濟寧以南之運道  
全皆汙沒矣臣題奉

諭旨創開阜河業已行運兩載現今時方秋杪而駱馬湖

沿邊一帶盡成平陸人馬通行若非預開阜河一工則此時阻運之狀當不知如何拮据矣維雅不特不知阜河并不知董口更不知駱馬湖情形而遽謂臣與無益之工糜無益之費勞民傷財等語不識阜河不開則漕運將從何路上達以必不能行之茶城而維雅諄諄言之以見在濟運之阜河而維雅故稱無益是誠何心且維雅兩河治畧引內將前人紛紛各議俱以爲揣摹無稽之浮言非閱歷諳習之確見等語今維雅於茶城阜河董口駱馬湖之孰高孰低孰

通孰阻全然不知浮言乎確見乎閱歷諳習乎揣摩  
無稽乎臣實不能爲之曲解矣其欺罔者五也夫  
維雅河防芻議第四卷減水石壩條內稱挑浚難施  
之處宜倣崔鎮等壩之例而推行之將見石壩旣設  
遇有滔漲開放分流會漕濟民等語又稱自中州以  
至淮徐沿河兩岸隨地相度或數十頃或數百頃共  
建石壩一座俟伏水大漲放水使行薄瘠變爲膏腴  
民生有濟

國稅可充利賴非細等語又淮揚疏築條內開苾稻河

閘口不過十丈安能洩二三十里泛漲之水等語又  
兩河治畧確理漕堤條內開宜相度地勢酌建閘壩  
蓄洩得宜運道民生攸賴等語又多建石閘條內開  
必於漕堤一帶多建石閘原設大小閘座除已經修  
造外或照原閘再加淤濶或原閘不足更多添建尤  
保固漕堤善後之遠計等語夫維雅於

進呈

睿覽書內業將黃運兩河減水閘壩應改淤改濶添建多  
建等因諄諄申說不啻至再至三矣及至工所日擊

微臣已建多壩無可指摘於是另作二十四款抹煞  
進呈之書將臣已建多壩盡議拆毀填塞與

進呈書內諄諄申說之言自相水火其欺罔者六也以上  
諸條皆係維雅

進呈書內所載其矛盾情由歷歷見在與

欽差大臣科道諸臣公會議時臣與維雅問答之言皆  
係確有憑據者臣是以敢於陳明若維雅作威作福  
得之屬員口傳而非臣親經目擊者臣俱不敢敘入  
總之微臣無識無才原不足以當督河之寄先失於

易視河工繼失於走埽逾限凡此不職之狀皆足以  
招物議之來况督撫藩臬諸臣職在安民而臣職在  
勞民尤易啟謫無怪乎維雅之斥臣爲勞民傷財矣  
然維雅若止於斥臣卽使甚至辱臣詈臣無所不致  
臣亦能容而不較至於臣歷年建築如許工程乃係  
節次題奉

俞綸而興舉者目下見有成效將來賴以安瀾而維雅一  
旦盡欲拆毀從新另修據其所議不下費銀五六百  
萬兩且拆毀各壩宣洩無資則凌黃河凌高堰凌漕

堤淤清口墊運河之患不久卽見矣糜費紛更墮工  
僨事以淺近而論則微臣之身家性命所關以遠大  
而言則

國家之運道民生攸繫在臣之身命顧不足惜而運道  
中阻民生墊溺其爲將來後患者尙可勝言耶臣中  
心恐懼寤寐驚憂反覆思維有斷不敢不據實逐一  
直陳以備

睿覽者也貼黃難盡伏乞

皇上俯賜全覽施行



SECRET

SECRET

恭報進京疏

題爲恭報微臣起程赴

京日期并料理緊要工程緣由仰祈

睿鑒事竊臣一面分行各屬上緊防守料理工程一面捧

佩

敕印於本月二十二日起程訖惟是目前最要緊者莫如

堵塞宿遷縣蕭家渡淺口并挑宿遷縣楊家莊桃源

縣白洋河清河縣大王廟曹家窰安東縣蓮花菴等

處引河五道蓋楊家莊以下一百四五十里河身必

待蕭家渡合龍之水方能刷成而蕭家渡一工必須  
冬杪春初早堵完罔俾其逐漸衝刷始克成河至此  
引河五道乃係保運固工至要之務尤須於蕭家渡  
未堵之前及早挑完若遲過冬春水涸之候難以施  
工則勢必又悞一年矣但河庫已罄募夫買料實無  
見銀臣再四籌維一面見在確估另

請錢糧一面分行東豫二省并江南附近州縣設法賒購  
料物暫撥民夫乘時僱工許其俟請到錢糧之日照  
數發還各該州縣令各該州縣代民完解緊餉庶乎

命赴  
可以無悞此臣見在舉行之事誠恐各州縣因臣奉

京不無遷延觀望以致坐悞之虞臣是以不得不特疏  
題明嚴行責成以免其推諉貽悞者也臣謹具

題伏乞

睿鑒施行

REFUGEE STATUS BOARD

12

請帑修蕭渡工疏

題爲請帑堵築蕭家渡要工以期黃河早歸故道事切

照微臣奉

命大修江南河道所有

題請過興舉各工方幸告竣而復有蕭家渡民堤坐陷  
一事以致黃河又復旁洩此實臣智短才疎綢繆不  
善所致臣雖萬死何足贖辜乃蒙

皇上不將臣從重治罪而特免責賠仍令臣領帑加修且  
天語諄諄訓誨備至臣感泣無地伏思自古聖君使過之

仁未有如

皇上之至寬至厚者臣雖肝腦塗地粉身碎骨不能仰報  
洪慈於萬一嗣今以往惟有欽遵

聖諭益加慎重小心以期河工之必成以盡微臣之職掌  
而已至於自堵塞以及善後各工臣前約畧估計需  
銀一百二十萬兩其中緩急分爲三等第一等最急  
之工乃係挑楊家莊白洋河曹家窪三處引河共二  
千五百餘丈并設法加鑿攔馬河減水壩內外岡土  
十餘方以及堵蕭家渡浚口九十餘丈共約需銀十

五萬兩第二等次急之工乃係將黃河邳宿運河

欽修民修并原應民修而尚未加修之一切堤工止高出  
本年大漲水跡二尺內外者約有六萬餘丈俱加至  
高出大漲水跡六尺爲度并添築黃河各減水壩尾  
三和土五千餘方共約需銀三十八萬兩第三等可  
緩之工乃係將黃河邳宿運河

欽修民修一切堤工高出本年大漲水跡三四五尺不等  
者共十四萬餘丈俱一律加至高出大漲水跡六尺  
爲度并高家堰高良澗翟家壩一帶堰堤一萬五千



餘丈普例加幫餞堤頂寬一丈五尺不等底寬二三丈不等高八尺至一丈六七尺不等又添建翟家壩并南北運河共減水壩三座加挑大王廟蓮花菴二處引河共二千餘丈黃河堤近河身積水汕擊并運河堤根終年漫泡水內之處應築做椿笆工二萬餘丈共約需銀六十七萬兩以上三等共需銀一百二十萬兩第一等最急之工必須飛星疾僨定於春分節前將蕭家渡閉合龍門使黃河盡歸故道不致再洩第二等次急之工必須急早與舉以待來年伏秋

第三等可緩之工亦當乘時修築以爲善後永保河  
堤之計今臣躬承

皇上面諭命臣細心採訪臣敢不其慎其重所有次急可  
緩等工容臣回至工所與所屬各官再加詳酌隨卽  
另疏具

題若夫最急之工誠屬刻不容緩伏乞

皇上睿鑒敕部先撥附近山東河南見銀一十五萬兩俾  
臣得以如期疾僂必於春分節前將蕭家渡合龍完  
固以期無負

皇上教誨天語務使黃河全歸故道不復再生他患以贖  
臣罪於萬一也臣謹先疏

題請伏乞

睿鑒施行

恭報回工疏

題爲恭報微臣到工日期并陳見在挑築情形仰祈  
睿鑒事竊照微臣奉

旨赴

闕蒙

皇上不加嚴譴而仍令臣領帑竣工自臣面承

聖諭之後於十一月十九日又蒙

皇上再傳

聖誨以治河原屬極難之務而臣失之孟浪憫臣之愚昧

念臣之迂拙戒臣之輕浮臣跪聽之下感激無地伏  
思自古人君之使過未有如我

皇上之寬厚仁慈自古人君之誨臣未有如我

皇上之諄切備至臣雖草木而躬被

天高地厚之恩欲求仰報萬分之一不知何以爲報惟有  
益加小心益加慎重時切凜畏將

皇上至訓鑄鑠肺腑永矢欽遵而已今臣於十一月二十  
日出京城門二十一日長行道過濟寧衙署繕拜慶  
賀本章至十二月十一日抵江南宿遷縣蕭家渡工

所查此工原寬九十餘丈而從外越築約長一百一十餘丈臣先於十月內委陞任宿桃同知佟國聘見任宿桃同知李燦分管兩壩進埽今臣到工之日已築過五十餘丈中泓尚賸五十六丈見在嚴催疾儻至於合龍之期必俟挑河完竣方可閉合臣先於十月初間檄行附近州縣借撥民夫限令歲內挑完三處引河是以擬於正月內閉合蕭家渡龍門及續接所司申報知十一月初旬而人夫尚未到工各屬旣觀望遲延則挑河之役非正月杪二月初不能告竣

挑工既遲則合龍自不敢早臣是以於請帑疏內聲  
明春分節前方可合龍也今全黃水勢仰賴

皇上洪福已有一半歸正河尚有一半歸洩口臣見在嚴  
催急儻不遺餘力凜遵

皇上慎重小心之戒百計籌維以期早合龍門不致再洩  
所有微臣到工日期并見在挑築情形臣謹恭疏

題報伏乞

皇上睿鑒施行

加修善後工程疏

題爲謹請加修善後工程以期永保河防事竊照江南河道加修善後工程臣原估銀一百二十萬兩乃從永遠保固起見誠屬必需之項也今部議前後共止准撥銀九十六萬兩其餘二十四萬兩因臣先會題借過江蘇藩庫銀十萬兩漕項銀三萬八千餘兩并大修案內曾動過河庫銀十萬餘兩是以將此二十四萬一併扣除臣何敢復爲置議但微臣原係按工程而



請錢糧則必得將錢糧撥足然後工程可以如估告竣若扣帑二十四萬兩則勢必不能照估償工矣如謂臣前此曾經多費是以必須扣除則臣前此節省頗多其實未嘗多費又不敢不將原估續估工程并實用錢糧數目逐一備陳於

皇上之前也查康熙十六年間微臣奉

命督河彼時江南河道四分五裂水行地上堤不成堤河不成河田地沉淹民生墊溺所屬管河司道廳等官凡稍知河工者皆曰河道壞至今日修治最難若照

冀尚書等所估工程必須銀五六百萬方可告竣等語臣以軍興需餉安有如許錢糧隨嚴行各官加意節省共估銀四百餘萬然止於南岸自白洋河起北岸自清河縣起各至雲梯關爲止其南岸白洋河以上北岸清河縣以上并南北兩岸自雲梯關以下至於海口俱未估及臣念南北兩岸白洋河清河縣以上若不加修則下流雖費銀四百餘萬而上流難保雲梯關以下若不加修則河流散漫海口不能衝關水壅不行上流尤屬難保是以自徐州起至海口盡

行估築堤工不照各官估計另出已見止共估銀二百五十一萬七千六百餘兩且將一切憫臣勸臣可危可懼之言全然不顧力任其事而不敢稍有游移也但此所估錢糧乃係築徐州以下黃河兩岸堤工并高家堰至翟家壩一帶幫堤堵洩大挑山清高寶四州縣運河挑爛泥淺淤泥堵運河清水潭等各口黃河桃清山安四縣各口造浚船二百九十六隻等工也至於築徐州州城以上徐蕭豐碭四州縣堤工堵楊家莊大洩口堵花山洩口大修歸仁堤并邳宿

兩州縣運河之堵洩挑河築堤建壩清河縣運河之酌改運口等工以及湖堰運河之添建減水各壩添造汎船等項皆在原估之外內徐州州城以上估銀十萬兩堵花山洩口估銀一萬九千四百餘兩大修歸仁堤估銀十四萬八千七百餘兩堵楊家莊洩口估銀十八萬九千三百餘兩邳宿運河估銀十五萬九千三百餘兩酌改運口兩次估銀六萬餘兩添建湖堰運河減水壩十四座共銀七萬四千餘兩又添估造船銀一萬餘兩并十九年大水後補葺工程五

萬餘兩以上各工皆續估之工統計需銀八十一萬餘兩再加原估各工二百五十一萬餘兩是前後共估銀三百三十三萬餘兩查再陳經理河工第一疏未盡事宜等事案內省築堤工改建黃河減水壩經臣

題定於建減水壩之外可以再節省銀三十萬兩今亦作數扣除計前後各工共估銀三百三十三萬餘兩者實該用銀三百零三萬餘兩今臣工完核算實止用銀二百七十六萬餘兩較之原估續估除

題明節省之外又節省銀二十七萬餘兩此皆歷歷有  
卷見在工部可考者臣故曰臣節省頗多其實未常  
多費也况部臣扣除二十四萬之內有河庫銀十萬  
餘兩乃係微臣屢次

題明應動之款尤屬不應扣除查臣估計堵塞楊家莊  
浚口疏內開有除動節省錢糧之外尚鈔銀三萬八  
千一百六十餘兩擬多用捐栽柳枝或仍有不敷則  
於河庫內通融動支等語今此工除用捐栽官柳之  
外尚多費銀三萬五千四百一十兩有奇則此原鈔

之三萬八千一百六十餘兩自應動河庫錢糧又亟請併修河北運河疏內臣原估需銀十五萬九千三百餘兩內開將河庫近年節存約可抵十分之四等因

題明在案查此工照原估十分之四科算該動河庫銀六萬三千七百四十餘兩二項合算共應動河庫銀一十萬一千九百餘兩今臣所用河庫十萬餘兩適合原

題之數無可扣除者也至所借江蘇藩庫銀十萬兩并

漕項銀三萬八千四百餘兩實係照舊工程  
非分外多費亦俱無庸扣除如部臣必欲補還亦止  
可陸續於河庫內逐年節省扣解此時萬難預扣以  
致悞工也伏乞

皇上俯念河工關係重大矧當全黃歸故加修不可泄忽  
之時

敕下部臣將所扣銀二十四萬兩急爲撥發俾臣得以及  
時償工務期保固其前此借過江藩庫并漕項銀共  
十三萬八千四百四兩有奇容臣力行各屬將逐年



歲修工程百計節省自康熙二十四年爲始每年扣銀一萬四千兩附東豫二省藩司隨便解交戶部限十年扣解全完如此一轉移間則目前旣可不悞工程而十年之間仍可全還戶部以充

國用也臣謹具

題伏乞

皇上睿鑒敕部議覆施行

請添河員疏

題爲兩河汛險工長官少不能兼顧謹

請酌調添設以保永固事竊惟修防河堤有堤矮漫溢之  
患有風浪擊堤之患有鼠窟穴隙滲水之患有堤被  
浸久忽然坐陷之患有大溜奔注塌崖坍堤頂冲掃  
灣上堤下坐遷變非常危險莫測之患凡此五者雖  
爲害有重輕之不同而皆足潰堤成沒阻運殃民是  
以修防必期縝密而不宜稍有疎忽也至於修防之  
法全賴料物人夫固不待言矣然欲料之速集來工

有夫之不致逃曠則非能幹多員駐工調度威惠並  
行不可得也本年自蕭家渡合龍黃河歸故之後三  
四兩月止於宿桃二縣黃水漫漲及臣設法疏浚百  
計防守五月業已歸漕豈知一經小暑霪雨數月黃  
淮交漲之後又益以山東諸泉大水橫發凡臣奉

旨加修之堤有易於取土五月以前告完者堤頂高出水  
面四尺有奇不等其取土艱難加以六月後連陰數  
月畚鍤難施未經告竣者堤頂出水一二尺不等甚  
至僅存數寸自七月二十一起至八月初二日止

旬有二日之間河流異常泛漲礪山北岸之盤龍集南岸之毛城鋪定國寺蕭縣之北辰集徐州南岸之護城石堤楊家窪房村北岸之李道華樓子房山靈璧南岸之雙溝集睢寧南岸之余家堂戴家樓邳州北岸之鯉魚山羊山寺董家堂沈家堂青墩營宿遷南岸之蔡家樓朱衣城毛家宅北岸之直河岔路口炭渚西門外二郎廟等處約有一二萬丈皆堤頂止高出水面三五寸七八寸不等彼時內係久雨積水淡二三四尺不等既已無處取土而外則大溜奔騰

幾平堤頂加之以霪雨不時旣變漫溢又慮坐陷更  
恐大風汕擊穉穴狼窩穿隙過水臣晝夜無寧憂虞  
惶懼力督一切官弁各各多募人夫購辦草料百計  
搶救幸賴

皇上洪福齊天旬餘之內並無大風而八月初三河水陡  
落尺餘得以無恙及水勢稍落而河流愈急一切險  
汛搜刷堤根處處危急臣那東補西飛運料物隨機  
下埽抵禦直至九月初間方能保定除該管大小官  
弁員駐工弁臣標効用等弁盡行差遍外臣又添委

見在加修大工之監理分管等官一百餘員分地協防搶救方得無虞臣因而展轉籌維防險必須官多庶可分地責成各圖鞏固本年之得以無恙者賴有見在加修大工之諳練監理分管等官一百餘員協助該管廳管印河官弁分地防守也然此等各官大工一竣卽應他補不能恃爲久常臣若不預畫萬全之計勢必臨事無人貽悞匪細臣萬不得已擬

請將汛長工遠之處酌量添官內凡就近有見任官員可用者卽令兼管河工就近無見任官員可用者方爲

添設分管至於文武官弁互相表裏凡有

欽工之處設一武弁卽應設一文職蓋武弁專管兵丁栽柳蓄草填補獾穴狼窩下埽簽椿等務其購辦料物動用錢糧以及督管歲修人夫皆係文職之事如一武卽有一文則有首尾之應手足之孚彼此同舟盡力相濟如兩武弁汎地而止一文官督管夫料未免顧此失彼每有奔馳不及倉卒貽悞之虞查淮揚徐三府州屬見在設立七河廳七河營內除徐屬邳睢靈璧山清外河山安山清盱眙揚河等六廳營汎地

工程俱各相當卽有多寡亦相去不遠無庸更議外  
惟宿桃廳營黃河兩岸除月堤不計外共有縷堤五  
萬餘丈更有運河兩岸并歸仁堤工二萬餘丈加以  
險汎如林在宿遷則有蔡家樓雞嘴壩蔡家樓下灣  
彭家堡蕭家渡徐家灣楊家莊白洋河等新舊大險  
七處在桃源則有九里崗烟墩劉家莊上渡口龍窩  
雞嘴壩七里溝李家口三岔等新舊大險九處尙有  
時下雖未修防而將來勢必成險之工并一切搶修  
次險工程不可勝計更有運河清黃交會之處不時



下閘啟閉以及浚淺挑淤約計宿桃兩縣工程之多  
倍於別汛而僅有一同知一守備萬萬不能分身料  
理本年伏秋異漲新險危急之時同知李燦駐桃源  
三岔工所守備劉文道駐桃源九里崗工所督夫集  
料下埽搶救頃刻不敢遠離然該汛除此二工之外  
桃源尙有七險宿遷亦有七險加以運河與各未竣  
堤工處處有漫溢之勢臣另委監理同知劉沛引原  
任宿遷縣知縣胡天龍督率分管該管各官弁專防  
宿遷運河工程又委監理知縣尙登岸趙良臣督率

分管該管各官弁分防宿遷攔馬河西門外二郎廟  
蕭家渡一帶工程又委監理候補知府佟國聘督率  
分管該管各官弁專防楊家莊白洋河一帶工程又  
委監理候補同知黃道弘督率分管該管各官弁專  
防宿桃交界古城一帶工程又委監理知縣沈仲寅  
督率分管該管各官弁專防桃源南岸工程又委監  
理知縣吳世貢督率分管該管各官弁專防桃源北  
岸工程又委桃源見任知縣何勳分頭購辦草料催  
督人夫統計宿桃一汛除見任知縣不計外其專司

河務者同知守備二官并臣又另委監理官八員督率大工分管并見任各官弁共相協助始克保固無虞夫以本年見用監理廳備十員協力保固之工而將來僅有一廳一備兩員欲其處處周到不生意外之變誠屬鞭長不及勢必貽悞者也今臣

請將宿桃一汛添設同知一員守備一員將一汛分爲兩汛令見任宿桃同知李燦專管宿遷黃運兩河并宿虹兩縣歸仁堤工改爲分管宿虹河務同知見任宿桃河營守備劉文道改爲分管江南江北宿虹河營

守備添設分管桃源河務同知一員桃源河營守備一員又宿遷運河向設主簿一員把總一員兼管黃河堤工今查運河兩岸原有堤一萬餘丈近又加挑新河一道計長三千餘丈連黃河堤工統計共長二萬餘丈且清黃交會漕艘咽喉之區汎廣工長一主簿一把總萬難遍及查該縣有劉馬莊巡檢一員應令兼管駱馬湖以上黃河新河工程并調撥把總一員協同料理其見在運河主簿把總應令專管石礮以內運河兩岸堤工并阜河攔黃壩工又宿遷縣北

有攔馬河減水壩五座與黃河堤工隔遠見在主簿把總不能兼顧應令宿遷縣典史就近兼管又邳州北岸堤工長一百餘里武職見有把總二員而文職止有州判一員不能兼顧查該州有直河巡檢一員應令兼管河工與該州判分管黃河堤工又邳州運河堤工一萬餘丈應調撥把總一員協助州同修防又徐州北岸堤工計長一百餘里武職見有千把總三員應裁去千總一員止留把總二員文職止有北岸州判一員實難徧顧查該州北岸見有呂梁巡檢

一員應令兼管河工與北岸州判分汛防守又邳州  
運河

欽工一萬餘丈業已設官設兵協力修防但黃林莊以下  
徐塘口一帶尙有運河六七十里雖原無堤工不用  
特設文武防守而向來每歲有民夫挑淺之役亦應  
有一文職專督之查該州見有新安巡檢一員駐劄  
頗近應令新安巡檢專管徐塘口上下挑淺工程又  
睢寧縣黃河南岸除遙月堤之外止算縷堤計有一  
萬六千餘丈且有戴家樓韓家莊二處極大險工更

有搶修工程不一而足查該汛武職見有千把總二員而文職止有主簿一員實難兼顧查睢寧縣並無縣丞臣

請添設睢寧縣管河縣丞一員與主簿分汛防守又安東縣黃河北岸堤工二萬二千餘丈又山陽北岸有堤工三千餘丈而安東南岸亦有堤工臣已令彼此交換將安東南岸堤工交山陽管河官弁專管其山陽北岸堤工換交安東管河官弁專管庶無隔河遠顧之難是安東北岸將及二萬七千丈此二萬七千丈

之內武職設千把總四員而文職止有該縣主簿并  
五港司巡檢二員應裁去千總一員添設安東縣管  
河縣丞一員共計文武官各三員以便協力防守又  
山陽外河南岸自季家淺至雲梯關通長三萬一千  
餘丈見在武職有千把總四員而文職亦止外河主  
簿馬邏司巡檢二員應裁去把總一員添設山陽外  
河縣丞一員與外河主簿等分汛防守又高家堰當  
全湖之衝必須官品稍大之能員防守而見在係一  
大使官品太微應裁去大使改設高堰主簿一員又



雲梯關外黃河兩岸堤工綿遠武職見有千把總二員而文職止有羊寨司巡檢一員亦難隔河兼顧應令羊寨司巡檢劄薛家套專管雲梯關外北岸堤工并將所裁高堰大使著令駐劄大套分管雲梯關外黃河南岸堤工又清河縣運口亦係漕艘咽喉且大溜奔湍經年險急最爲緊要今該縣縣丞旣管運河工程又管黃河南岸堤工顧此失彼實有貽悞之虞查該縣見有馬頭司巡檢一員應令馬頭司巡檢管黃河南岸俾縣丞專管運河庶免貽悞又山陽運

河一百餘里乃係水陸要衝修防最密見在武職有千把總二員而文職止有該縣裏河主簿一員實難兼顧查該縣見有縣丞一員應令兼管裏河與主簿分汛防守又揚州府屬高寶江三州縣運河上自山陽縣交界黃浦起下自江都縣灣頭并芒稻河止通長二百四十餘里合東西兩岸計之不下四百餘里其間椿工石工埽工閘座減水壩等工多如林除通判守備之外武職尙有千把總五員而文職僅有一州判兩主簿共三員實有鞭長難及之虞查高郵州

見有州同一員寶應縣見有縣丞一員應俱令兼管  
河工與州判主簿分汛防守又江都河道長一百二  
十里見在主簿一員僅堪管理芒稻河灣頭以上各  
欽工堤壩閘座其灣頭以下歷郡城至瓜洲尙有河道六  
十里其間雖無

欽工而亦有民夫挑淺之役主簿不能兼顧查該縣見有  
縣丞一員應令兼管灣頭起至瓜洲止一帶河道以  
便主簿專管灣頭以上一切緊要

欽工又儀徵縣河道長七十里雖無

欽工堤岸而亦有挑淺之工查該縣原無管河專官見有  
縣丞一員應令該縣縣丞就近兼管河道又盱眙縣  
主簿與山陽縣高良澗主簿汎地相接而盱眙主簿  
所管盱眙堤工不過十餘里山陽主簿所管山陽堤  
工計長七十餘里應令山陽主簿止管至周橋爲止  
其周橋以南古溝唐埂一帶雖係山陽地方應交盱  
眙縣主簿管理將盱眙主簿改爲山盱管堤主簿又  
山陽雲梯關外海口一帶有近年新淤無主葦草灘  
地臣前委効用千總劉淳駐彼清查數年以來前後

共查得新淤灘地六百餘頃從前已採過葦草一百餘萬束臣見在通行各工查明收過葦數一面

題報一面入康熙二十一年分歲報冊內開銷至此項葦灘將來歲歲可得葦草百餘萬束大有益於河工但地廣柴多必須特設千總一員督管河兵專司採網之事其所設千總歸山安河營管轄支領俸餉以上淮揚徐三府州屬黃運河湖一切堤工除用附近見任官員兼管河工并各營千把總或裁或添仍係彼此調撥者不計外通計實添設同知一員守備一

員縣丞三員主簿一員此皆微臣再三斟酌妥當方  
敢陳請倘蒙

皇上俯念河道攸關重大特賜

俞允則將來各處堤工俱有專責官弁修防自密永可無  
悞其有裨運道民生實非淺鮮也至於應添官員俟  
奉有

俞旨之日容臣於見在工所各官之內擇人地相宜勤勞  
最著者另疏保舉具

題并各官弁各管某某工程段落丈尺各應駢劄某某

地方以及各營千把總應裁應添作何調撥之處另  
造清冊送部以專責成俾爲永遠定例外臣謹一併

題明伏乞

皇上睿鑒

敕部議覆施行

恭報兩河險工官員疏

題爲兩河汎險工長等事今將淮揚徐三府州分管黃  
運二河併湖堤各同知通判州同州判縣丞主簿巡  
檢典史大使等官駐劄地方修防汎地起止理合造  
冊施行須至冊者

計開

徐屬河務同知一員駐劄徐州所屬河官八員  
徐州州同駐劄州城修防黃河南岸汎地上  
自蕭縣界王家堂起下至青田止



南岸州判駐劄房村驛修防黃河南岸汎

地上自青田起下至靈璧縣界止

北岸州判駐劄河北館驛門修防黃河北

岸汎地上自大谷山起下至王家

山止

呂梁巡檢駐劄呂梁修防黃河北岸汎地

上自狄家山起下至邳州界止

蕭縣主簿駐劄郝家集修防本縣黃河汎

地

陽山縣主簿駐劄縣城修防黃河南岸汎

地

豐碭主簿駐劄盤龍集修防豐縣黃河及

碭山縣黃河北岸汎地

沛縣主簿駐劄夏鎮修防本縣運河汎地

分管邳睢靈璧河務同知一員駐劄邳州所屬

河官七員

邳州州判駐劄州城修防黃河汎地上自徐

州界起下至馬船幫止

直隸通志卷之四十五  
直河司巡檢駐劄州城修防黃河汎地上  
自馬船幫起下至宿遷縣界止

州同駐劄猫兒窩修防運河汎地上自徐  
塘口起下至宿遷縣界止并唐宋

山堤工

新安司巡檢駐劄泇口修防運河汎地上

自山東嶧縣界起下至徐塘口止

靈璧縣主簿駐劄雙溝集修防本縣黃河

汎地

睢寧縣縣丞駐劄姚家集修防黃河汎地

上自靈璧縣界起下至戴家樓止

主簿駐劄魏家集修防黃河汎地上自戴

家樓起下至宿遷縣界止

分管宿虹河務同知一員駐劄白洋河所屬河

官七員

宿遷縣縣丞駐劄縣城修防黃河南岸汎地

上自睢寧縣界起下至小古城止

南岸主簿駐劄白洋河修防黃河南岸汎

地上自小古城起下至桃源縣界止

北岸主簿駐劄縣城修防黃河北岸汎地

上自縣西門起下至桃源縣界止

劉馬莊巡檢駐劄阜河集修防黃河北岸

汎地上自邳州界起下至張莊運

口止并新運河上自阜河口起下

至運口止

運河主簿駐劄阜河集修防運河汎地上

自邳州界起至阜河口止

歸仁司巡檢駐劄歸仁集修防宿虹二縣

歸仁堤汎地

典史駐劄縣城修防攔馬河減水各壩

分管桃源河務同知一員駐劄桃源縣所屬河

官四員

桃源縣縣丞駐劄縣城修防黃河南岸汎地

上自宿遷縣界起下至烟墩止

南岸主簿駐劄縣城修防黃河南岸汎地

上自烟墩起下至清河縣界止

北岸主簿駐劄衆興集修防黃河北岸汛

地上自宿遷縣界起下至上渡口

止

三義鎮巡檢駐劄三岔修防黃河北岸汛

地上自上渡口起下至清河縣界

止

分管山清外河同知一員駐劄清江浦所屬河

官五員

清河縣主簿駐劄縣城修防本縣黃河北岸

汎地

馬頭司巡檢駐劄甘羅城修防本縣黃河

南岸汎地

山陽縣外河縣丞駐劄清江浦修防黃河南

岸汎地上自清河縣界起下至朱

家嘴止

外河主簿駐劄蘇家嘴修防黃河南岸汎

地上自朱家嘴起下至童家營止



馬邏司巡檢駐劄盧鋪修防黃河南岸汛  
地上自童家營起下至陳家社止

分管山安河務同知一員駐劄安東縣所屬河

官五員

安東縣縣丞駐劄縣城修防黃河汛地上自

清河縣界起下至縣東門止

主簿駐劄夏村營修防黃河汛地上自縣

東門起下至彭家灘止

五港司巡檢駐劄佃湖修防黃河汛地上

自彭家灘起下至雲梯關止

山陽縣羊寨司巡檢駐劄薛家套修防黃河  
北岸汎地上自雲梯關起下至泗

汾港止

山陽縣大套大使駐劄大套修防黃河南岸  
汎地上自雲梯關對岸陳家社起

下至陸家社止

分管山清盱眙河務同知一員駐劄淮安府所  
屬河官六員

清河縣縣丞駐劄甘羅城修防運河汛地上

自甘羅城西南角起下至山陽縣

界橫堤頭止

山陽縣裏河縣丞駐劄府城修防運河汛地

上自府城西南角樓起下至寶應

縣界止

裏河主簿駐劄府城修防運河汛地上自

清河縣界起下至府城西南角樓

止

高家堰主簿駐劄高家堰修防湖堤汎地

上白石工頭起下至清河縣界橫

堤頭止

高良澗主簿駐劄周家橋修防湖堤汎地

上自周家橋起下至石工頭止

山旰主簿駐劄翟家壩修防湖堤汎地上

自翟家壩起至周家橋止

揚屬河務通判一員駐劄高郵州所屬河官七

員

寶應縣縣丞駐劄縣城修防運河汎地上自

山陽縣界起下至劉家堡止

主簿駐劄縣城修防運河汎地上自劉家

堡起下至高郵州界止

高郵州州同駐劄州城修防運河汎地上自

永安河尾起下自江都縣界止

州判駐劄州城修防運河汎地上自寶應

縣界起下至永安河止

江都縣縣丞駐劄府城修防運河汎地上自

灣頭關起下至瓜洲止

主簿駐劄府城修防運河汎地上白高郵  
州界起下至灣頭關止

儀徵縣縣丞駐劄縣城修防本縣運河汎地

UNIVERSITY OF CALIFORNIA

11

謹請加修疏

題爲謹請加修善後工程以期永保河防事竊臣奉  
命大修江南河道共計動帑創築幫築過黃河兩岸堤工  
十八萬一千餘丈又動帑創築過邳宿運河堤工二  
萬一千餘丈又督徐蕭碭豐沛靈睢宿桃清十州縣  
民夫加幫過不動錢糧黃河兩岸堤工四萬五千餘  
丈三共已修築過堤二十四萬八千餘丈此等堤工  
雖已告竣然凡於康熙十九年未逢大雨以前築竣  
者未免稍矮至十九年大雨異漲之後築竣者則皆



增高今欲求久遠安瀾之計必須一槩加至高出大漲六尺爲度方稱萬全臣於康熙二十一年六七月間伏水大發黃清交漲之時逐處接量得此堤二十四萬八千餘丈之內凡堤頂高出水面五尺六七寸至六尺以上并未水到堤根俱不必再加者共約長六萬六千餘丈水浸堤根而堤頂高出水面三尺以上至四五尺不等可以稍緩加幫者共長十四萬餘丈水漫堤根而堤頂止高出水面二尺上下急須加幫者共長四萬二千餘丈又徐州北岸未幫民堤水

未到堤根不必加幫外尚有雖宿兩縣未幫民堤一  
萬八千餘丈亦係水浸堤根堤頂止高出水尺餘一  
尺不等兼之堤頂窄狹外無坦坡更覺危急尤須一  
併動帑及早加幫統計急工六萬餘丈應加高三四  
尺不等并將陡坡改爲稍坦每丈牽用土三十四方  
每方一錢五分又陰雨食米夯霖麻等項并水工取  
土艱遠加增工食等項每牽丈需銀五兩五錢共約  
需銀三十三萬兩又緩工十四萬餘丈應加高一二  
尺有奇不等亦改陡坡爲稍坦坡并緊要大路分外

加寬每丈牽用土一十九方每方一錢五分連陰雨  
等項約需銀三兩一錢共約需銀四十三萬四千兩  
又各減水壩急須築做三和土五千餘方厚薄不等  
并添做朱家堂西王家營兩壩石磯心又增建南北  
運河湖堰減水壩共三座共約需銀八萬兩又邳宿  
運河最窪之處堤根浸於水內終年不得乾涸并黃  
河堤工離河太近以及堤外積水成湖風浪不時刷  
汕之處共計約有二萬丈必須添築椿笆工方可保  
固經久每丈料物匠工約需銀四兩共需銀八萬兩

又高家堰臨湖石工連堵浚埽工共長五千九百三十三丈八尺見在頂寬二丈者應加至頂寬三丈五尺見在頂寬二丈五尺者應加至頂寬三丈五尺每丈牽用土三十餘方必須設法於離堤二三十丈外水內築堰攔水挑運料小河一道卽以挑河之土築成堤工每方約需銀三錢計每丈需土方夫工銀十兩共需銀五萬九千兩又高良一帶椿埽連堵浚之處并武家墩幫堤堵浚之處以及翟家壩堵浚築堤共長九千七百二十三丈三尺應幫至頂寬三丈每丈約

需土二十方亦於離堤二三十丈外挑運料小河一道每方牽給銀一錢八分計每丈需土方夫工銀三兩六錢共約需銀三萬五千兩又清河縣大王廟前加挑引河一道長六百餘丈挑濶一丈五尺每丈約需銀十八兩計需銀一萬二千兩以上各工臣先於上年九月內傳集所屬各監理等官再三斟酌必得如此加修方可待將來異漲今臣復至工所細心採訪與各官詳加復勘委無更改又先因安東縣蓮花菴有難刷淺工一千四百丈前此亦估加挑今與該

管道廳印河等官詳加酌議目擊水勢漸趨兩岸誠恐挑河未成有鼓衝難竣之患今改議停挑此道引河將南岸緊要堤工幫寬丈餘待水至堤根之時下埽裏護再於大茭陵迤東起直接馬邏添築大遙堤約長三千丈以爲重門之障共約需銀二萬餘兩以上通共需銀一百零五萬餘兩內工程雖有緩急之分然必及早如估加修庶將來或遇奇雨異漲亦可恃其修防不致復生他患也伏念臣奉

命治河歷五年之久除原估銀二百五十一萬七千餘兩

井二次借地丁漕項銀十三萬八千餘兩俱經用完  
又用過河庫銀十餘萬兩而今兩次請銀一百二十  
萬兩臣非妄議費帑也內中如堵蕭家渡澆口加挑  
緊要引河加幫原應係民夫修築之工計長一萬八  
千丈均屬必不可緩又阜河爲漕運咽喉之地雖目  
今淤通無阻而兩岸堤工終年浸於水內一有疎虞  
關係甚大斷須火速加幫以期永固又微臣新築與  
民夫幫過堤工內止高出上年六月內大漲水跡二  
尺左右者約計四萬二千餘丈必須速爲再加其餘

各工雖尚屬可遲然蕭家渡堵塞之後黃淮二瀆若  
止照康熙十七十八二十二等四年之水足以  
保固無慮設或再如康熙十九年奇雨數月遍地江  
湖則見在工程尚屬單薄必得及早預爲鞏固之計  
以待大水方稱至穩至安之著至臣前此估計一切  
堤工止估高五六八尺不等今則自五尺起築至高  
一丈四五尺不等而猶議再行加高蓋臣初任之時  
適當軍興需餉之候是以逐工俱從極省估計曾將  
俟工完之時另議撥夫協助河兵加幫高厚等因



題明在案今河兵修防險要東撥西調刻無寧居而民夫又不能濟急幫丁又尚未定制臣雖欲俟工完之後逐漸加幫似黃淮二瀆之水消長無常卒然漲發每令人措手莫及此皆臣愚昧無知偏心於曲求節省而不覺智慮短淺一至於此以今日而追憶前言不禁慚愧無地汗流浹背者矣今臣添估各工凡緊要去處俱係悉心籌畫倘蒙

皇上允行可爲永遠安瀾之計其所需銀兩查河工於康熙十三年以前原有捐納事例今海宇清平各省事

例俱經停止合無將河工事例較前稍寬其途倣江南賑饑之例聽各處官民捐納以濟其事惟是捐輸銀兩不能刻期應手而工程緊急難以緩待除臣先具請帑堵築蕭家渡要工等事一疏內已蒙

皇上敕部撥發山東省地丁銀十五萬兩見俱解到外伏乞

敕部再撥山東河南二省地丁銀一百五萬兩俾臣火速乘時及早興舉俟收事例銀補還其康熙二十年借過江蘇撫臣所屬地丁銀十萬兩康熙二十一年借

過漕項銀三萬八千餘兩亦俟收事例銀補還如此  
則河道永保安瀾善後良圖莫過於此矣至黃河情  
勢變遷靡常或其間稍有應損益增減之處容臣遵  
照敬陳經理河工八疏內議政臣等定議事小者准  
臣竟行事大者另疏題明之例遵奉而行以期確當

臣謹具

題伏乞

皇上睿鑒

敕部議覆施行

靳文襄公奏疏卷四終

四  
靳文襄公奏疏卷四終

五

REPORT NUMBER 2

11

--	--	--	--	--	--	--	--	--

34

536

靳文襄公奏疏目錄

卷五

治河題藁

恭報蕭渡合龍疏

全河歸故疏

請加堤岸疏

置造汎船土車疏

減糧增兵疏

購辦柳束疏

康熙二十三年

課程堡夫疏

衛河水勢疏

大挑月河疏

高郵州

恭謝天恩疏

謝

賜清慎勤

善後事宜疏

請錢糧

欽奉上諭疏

勘工河南起程日期

兩河水勢疏

欽奉上諭疏

蘭儀等處添官

男治豫編次

1888/18

孫樹德 校正

曾孫光烈 全校字

上海圖書館藏



--	--	--	--	--	--	--	--	--	--	--	--	--	--

浙文襄公奏疏卷五

總督河道提督軍務太子太保兵部尚書兼都察院右副都御史臣靳輔

治河題藁

恭報蕭渡合龍疏

題爲恭報蕭家渡閉合龍門日期仰祈

睿鑒事竊照微臣奉

旨挑挖引河堵塞蕭家渡洩口限春分節前完工臣駐宿  
工所百計僱督續因欽遵

俞旨會議漕船遲悞并造船式樣二案於二月初四日自

工起行赴淮會同

欽差侍郎臣宜昌阿副都御史臣色克德馬世濟等并漕  
臣邵甘江南江西督臣于成龍江蘇撫臣余國柱安  
徽撫臣徐國相會議完畢於十五日自淮起行十七  
日仍抵工所查蕭家渡埭口先於二月十五日業已  
合龍因臣於赴淮之日諄諄叮囑在工官弁務必節  
省料物毋或糜費各官弁見水勢平緩因臣節省之  
囑少用蒜繩迨龍門已合正河之水積高五六尺水  
勢猛勇繩少不能挽留將龍門埭冲去龍門埭既去

撤動大溜更帶卸旁埽三層幸而正河湫通壩臺隨  
卽保住臣於次日抵工詢知原委深悔欲求節省反  
致遲延費料於是從新調度分外多加棘繩并將所  
冲埽料拆取應用毋分晝夜飛星疾僂仰賴

皇上洪福齊天於三月初一日未時閉合龍門訖計春分  
節前之限實逾九日除一切善後事宜容臣另疏具

題外所有蕭家渡閉合龍門日期臣謹恭疏

題報伏乞

皇上睿鑒施行

12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100

全河歸故疏

題爲全河歸故之後險汛口漸加增謹

請撥足額編河道錢糧以便辦料修防永圖保固事竊惟  
黃河發源最遠合千枝萬派之水而來其勢浩瀚其  
力勇猛其行如疾雷飛電卒然而至每令人措手不  
及苟非百計爲未雨之謀籌防捍之策斷難免不測  
之患也若夫未雨修防之法大畧有五一則加高堤  
堰以禦漫溢一則多用椿埽以抵風浪一則巡查罅  
隙以杜潰決一則堅修減壩以資宣洩一則緊守險

汛以防奪河以上五條如第一條慮水漲漫溢臣已借到東豫藩庫錢糧見在多委監理分管等官分頭廣募人夫飛星齊舉將卑矮堤工一律加幫高厚比至伏秋俱有頭緒足保無虞第二條慮風浪汕堤臣見在多方購買椿料或做排椿或下順埽隨機防護亦可無虞第三條慮獾狼穿堤爲穴臣已嚴著弁兵兼委各監理分管等官逐日巡查凡遇獾穴狼窩立即填塞堅實亦可無患第四條慮減水壩一有不堅大水驟下勢必浮椿卸石釀成後患臣見在添做三

和土相機開放亦屬無虞惟防險一事最爲艱難往  
往倉卒之間立成大險如桃源北岸七里溝一工向  
來河離堤根有百餘丈之遠本年正二月內雖經逐  
漸坍塌然尙有五十餘丈乃蕭家渡合龍之後大溜  
直下三月初八初九兩日之間坍去四十餘丈僅存  
十二丈矣此處堤內係舊浚口數丈深潭一有疎虞  
立成奪河之患臣心膽俱碎所幸蕭家渡尙有防守  
伏秋未用料物臣隨卽遍差標弁那緩就急不分晝  
夜飛星押運赴彼於上流磯嘴壩尾立下大埽十餘



個挑水往南一面加幫七里溝壩臺挑漕下埽裏護  
日來方始無患又清河縣玉皇閣一工向來離堤五  
六十丈今於本年正二月間逐漸塌坍僅存河崖三  
丈此工先曾預備今見在下埽抵敵洪流亦可無慮  
但自合龍以來已歷兩旬雖河道刷寬水勢稍定然  
似此險汎日漸加增臣驚憂惶惶魂夢罔釋展轉思  
維別無他法惟有多備夫料使人力勝水隨機搶救  
以期克保無虞不使再變而已人夫一項除架船裝  
料鋪埽簽椿收放揪頭繩纜栽柳修柳巡查堤岸看

守料物修補水溝填塞狼窩獾穴等一切緊要諸務  
俱有河兵力作僅僅足用至於纏纜打纜搬運草柳  
拉埽擡梯挑土幫修埽臺等一切雜作則用歲修人  
夫查往例歲修工程從無募夫之例皆係酌撥附近  
民夫資其力役是以黃河險工奏銷冊內止開料物  
價值而無募夫工食錢糧江南河南山東三省處處  
皆然後河南一省經前河南撫臣佟鳳彩因每年所  
用歲修人夫太多且不特附近州縣而遙襄隔遠州  
縣亦行檄撥人夫不無遠涉之苦於是具

題請令各州縣按地畝加徵歲修人夫錢糧於就近僱募免其遠撥部議不准加徵令動裁贖裁扣銀兩僱夫應用至於江南山東則俱仍舊今康熙二十二年山東曹單二縣黃河工程除用額夫之外照例酌撥附近州縣民夫協助額夫力作江南徐州除郭家嘴長樊大壩小店等舊險工三處外又加楊家窪新險工一處并加修徐州護城石堤臣共酌撥徐屬歲修夫一千名協助河兵力作邳州原有董家堂五工頭等舊險二處近年又加塘池大壩鯉魚山等新險工

二處本年及添羊山寺新生大險一處并運河亦有零星險汎臣共酌撥該州歲修夫一千二百名協助河兵通融往來力作睢寧縣向無舊險近生韓家莊戴家樓大險工二處本年又加孟家灣接連戴家樓險工一處俱係極大工程臣共酌撥該縣歲修夫一千二百名協助河兵力作宿遷縣舊有蔡家樓彭家堡險工二處近增白洋河一險并更有零星險汎臣共酌撥該縣歲修夫八百名協助河兵力作桃源縣舊有烟墩龍窩上渡口雞嘴壩李家口等險工五處

本年又增七里溝大險一處又古城三岔二處將來亦有大險臣共酌撥該縣歲修夫一千三百名協助河兵力作清河縣舊有甘羅城運口二工近又增惠濟祠一險本年更增玉皇閣險工一處臣共酌撥該縣歲修夫八百名協助河兵力作山陽縣近有湯董莊潘家窪高家莊上張莊真武廟周家渡唐家堡小菱陵何家莊大菱陵沈家圍等險工十一處本年又增左家口險工一處臣共酌撥該縣歲修夫一千四百名協助河兵通融調撥力作安東縣近有蓮花菴

南門外險工二處本年又增二鋪茆良口等險工二處其餘尙屬未定臣酌撥該縣歲修夫八百名協助河兵相機力作又寶應縣堤工甚多單薄臣亦酌撥該縣歲修夫三百名協助河兵加幫力作此臣循照往例見在舉行之事各州縣亦深知險汛攸關重大俱經循例撥夫陸續上工是人夫一項已覺稍有頭緒惟是淮徐兩府州險汛林立其本年應估歲修工程者共有四十餘處而黃河搶修與邳宿山清高寶江七州縣運河歲修搶修以及高家堰一帶臨湖險

河內排椿俱經估入大修外其各歲修工約需木五萬餘株加以黃河之天妃壩王公堤運河之一切閘座甌石等工需用木石甌灰米鐵等項統計所需料值不下銀十五六萬兩康熙二十一年以前河庫餘贖之銀俱經於大修案內支用全完訖康熙二十二年分五直省額徵河道錢糧止有一十八萬餘兩內

直隸河南山東三省之夫食歲修料價以及通融湊  
給七河營官兵俸餉約去十萬兩其可留濟江南歲  
修之用者不過八萬餘兩以必需十五六萬兩之工  
料而止實有銀八萬兩是僅有一半料物人力不能  
勝水水力強於人力當其奔騰浩瀚之時勢必束手  
無策付之無可奈何而已從此一有疎虞臣死固不  
足惜而前此大修數百萬金錢盡化烏有阻運殃民  
殆無底止矣臣憂心如焚反覆籌計查五直省河道  
錢糧原額係二十六萬餘兩後因除去蠲荒七萬餘



兩是以止有一十八萬餘兩若將五直省原額蠲除  
荒災之欵照驛站錢糧之例逐一撥補足額俾得多  
購料物預先堆貯使人力足以勝水方爲萬全之策  
又河道錢糧較之兵餉更急蓋兵餉止須按月給散  
而河工料物必須預先購備也臣先於康熙二十一  
年三月內具謹陳康熙二十一年歲修等事一疏請  
將五直省河道錢糧限三月內解足以濟工用等因  
部覆不准奉有依議之

旨欽遵在案臣何敢復爲瀆請但河庫已罄而購料刻不

可緩必得將河銀及早預解庶乎有濟伏乞

皇上俯念河道關係重大全黃業已歸故若綢繆稍有疎忽則必盡棄前功立釀後患特賜

乾斷敕部將五直省河道錢糧凡每年應徵并應蠲除荒災之數俱令各該州縣全照原額務於每年三月內盡行解足其各該州縣該年應蠲除荒災之數聽各州縣於應解藩司別項錢糧欸內扣除如此則在各州縣毫無所損而河工無掣肘之虞工程允可永固運道允可永通民生亦漸可永遂矣臣謹特疏

題請伏乞

皇上睿鑒敕部迅賜議覆施行

ナ

請加堤岸疏

題爲請加上流堤岸以保河道萬全事竊維江南河道  
雖上年大修已竣而尙屬卑矮是以蒙

皇上發帑加修今臣見在廣募人夫分頭疾僱更將原估  
加至高出上年大漲水跡六尺者今酌量地勢寧再  
加高一尺以高出水跡七尺爲度此臣欽承

皇上軫念運道民生毋令再沒之

聖諭是以不敢不加慎加詳也今自蕭家渡合龍之後已  
歷兩月有奇雖漫漲之水未盡歸漕而較之合龍之

時已消尺許臣徧委官弁分頭僱築卽令僱築之員分頭防護加以徧修減水壩尾并設法施浚淤底河身仰賴

皇上洪福或可不至又生他患但此就江南而言也江南之上更有山東河南堤工其在山東者不過兗州府屬之曹單兩縣統計約長二萬餘丈臣已飛調山東額設人夫并酌撥附近州縣民夫嚴著道廳印河各官竭力飛僱以求保固惟河南開歸兩府堤工通長一千餘里向來附近州縣原有歲修人夫出自民間

年年加修頗稱鞏固自前任撫臣佟鳳彩題歸官僱  
之後民旣漠然罔顧而官復畏難不言以致工程損  
削不堪自康熙二十一年以前江南浚口未堵撤溜  
甚繁上流不致十分壅滯今江南浚口全堵除減水  
壩之外更無旁洩之途而河南堤工當風吹雨淋人  
畜踐踏多年未修之後有雖高而薄者有雖濶而低  
者有旁若鋸齒者有頂似劔脊者種種不堪之情臣  
雖未親歷其地而行據管河道臣祖文明之報文并  
撫臣王日藻之移覆閱之不禁心悸念江南河道費

過國家如許金錢甫有頭緒設或河南一有疎失則前功盡棄固不待言而阻運殃民更無底止爲今之計斷當綢繆於未雨之前及早加修以保萬全者也惟是道里綿長工程浩大若遽議動帑恐司農仰屋維艱若因循不修又慮坐釀大患臣反覆籌維寤寐憂懼祇以身在江南料理加修大工不能親赴豫省徧爲察勘所幸撫臣王日藻曾爲豫省河道濶知豫省河情伏乞

皇上敕下該撫臣將開歸兩岸堤工卽日親行徧勘某處

堤工高厚堅寬可以不修某處堤工卑矮窄薄斷須  
加修某係極險某係次險或仍照往例撥歲修人夫  
興築或必照近例動帑募夫興築一面勘明確估具  
題一面作何廣集多夫飛星速僱使雖遇異漲而人力  
勝水足保無虞如此則上流既可保無虞庶下流河  
道得以刷淡不致仍前散漫方爲運道民生萬全之  
計也臣謹特疏具

題伏乞

皇上睿鑒敕部迅賜議覆施行



一 華北の歴史地理

三

置造汎船土車疏

題爲

奏銷置造船車鐵掃帚等項器具錢糧事竊照黃河水勢無常變遷莫定隨機疏浚斷不可弛然浚河之法非船不行至於鐵掃帚一項則亦必需之器具也臣先於康熙十六年七月內具敬陳經理河工事宜疏內

題明應造船二百九十六隻需銀一萬兩并每船一隻懸鐵掃帚二枚等因續於康熙十七年六月內恐船

三  
隻不敷又具題明經理河工第一疏內未盡事宜事  
一疏將必須再添造三百餘隻約需銀一萬餘兩等  
因復經

題明又初興大工之時各夫俱以夯礮之法太嚴用力  
多而工食少紛紛告苦募僱不前臣隨設法置造土  
車每夫十名給車一輛以期稍省人力俾其樂趣亦  
經

題明各在案今臣行據淮揚道多弘安造具成造過船  
隻土車鐵掃帚等器用過錢糧清冊前來查浚船一

項除日前奉

旨加修堤工案內宿遷運河東岸三千餘丈西岸一千餘丈兩面皆水無處取土必須船裝遠運并黃河兩岸低窪去處創建排椿工程往來搬料需船甚繁舊船實不足用見在添造一百二十隻俟加修工完另冊報銷外其在康熙二十一年九月以前共造過船五百三十二隻大小不等共用過銀一萬八千五百二十二兩四錢一分二釐四毫六絲內河南管河道所造四十隻每隻牽費銀七十六兩有奇較原估每隻

多費銀四十二兩有奇蓋此船原係爲黃河運柳成  
造之船是以船隻甚大所費較多其餘四百九十二  
隻俱比原估各有節省其船固用以浚淺而運土之  
日更多清水潭高家堰等工全賴此船運土方能築  
成目今亦俱見在運土運料并浚河也土車一項除  
淮揚道多弘安於前任山清盱眙同知任內自造土  
車七百輛爲高堰高良澗一帶之用已於工程冊內  
開造者不計外其各州縣共造過土車二千二百五  
十輛共用過銀一千零一十二兩五錢此等車輛俱

於各工通融調用是以不造入各工項下而彙冊報  
銷至鐵掃帚一項共置二千個共重二萬二千九百  
八十二觔每觔銀五分三釐共用過銀一千二百一  
十八兩零四分四釐三項通共用過銀二萬零七百  
五十二兩九錢五分六釐四毫六絲除冊揭送工部  
查核外臣謹具

題伏乞

皇上睿鑒敕部核銷施行

مكتبة جامعة القاهرة  
Cairo University Library

١١١

減糧增兵疏

題爲

題明減糧增兵以鞏河防事竊照

朝廷之上惟期運道安瀾民生樂業是以不惜帑金特設河臣修治河道然民情愚昧往往不顧

國家大計而惟求利其私圖有堤外之民一經水漲則室廬田畝未免沉淪於是惟願堤開水洩以遂其居者有堤內之地卑瘠無收人力莫措於是惟願沒堤內灌淤成沃土以遂其耕者更有天時亢旱者思沒



水以溉其田疇求害仇家者思洩水以滄其人畜每  
以一己之利便卽欲傷難築之工程雖律典煌煌定  
有盜洩之罪然不能確執其人而誅之臣是以

請設防河兵丁立勸懲之法以鼓舞而儆惕之俾各工俱  
有專心保全河道之人則姦徒盜洩之計無所施而  
工程凡有罅隙卽可立刻飛傳集衆搶救是設兵一  
事誠河防至要之著也臣先於敬陳經理河工事宜

疏內

題設戰守兵五千八百六十名續於

題明經理河工第七疏未盡事宜疏內

題請添兵五百餘名二共實應設兵六千四百餘名此皆康熙十七年以前題奉

俞綸之案也迨康熙十八年間續增大修歸仁堤并挑築邳宿運河兩工添堤將及三萬丈而未議添兵臣雖於亟請併修河北運河等事疏內請減高堰湖堤之兵防守運河然臣彼時乃未經大風大浪之前是以妄爲此冒昧孟浪之見究竟高家堰一帶刻刻須防惟慮兵少斷不能撤爲他工之用查歷年以來七河

營奏銷兵數有六千三四五百餘名不等良以工長  
兵少未經設立一定之數之所致也今臣再三核酌  
必須再添設兵丁七百餘名共設兵七千二百名方  
可足用然添兵七百餘名卽應添餉一萬有奇而庫  
帑有限歲修尙慮不敷安能又添此項臣百計籌維  
而得減糧增兵之法不敢不急爲上陳也查七河營  
題定額兵六千四百餘名內應設戰兵六百餘名守兵  
五千八百餘名此戰守兵六千四百餘名每名月應  
給米三斗經臣

題准每月給米折銀三錢三分今臣復爲斟酌當年因米價湧貴是以請給三錢三分嗣後米價亦有賤時况防河兵丁終年力作寢食泥塗之中與汛守地方之綠旗兵丁必須置買鞞帽修整器械每多盤費者不同其米折銀兩可以量減期於足以餬口而止今臣擬將原給米折銀每月三錢三分者酌減三分之一改爲每兵一名每月止給米折銀二錢二分又原題每兵十名設戰兵一名今酌改爲每守兵五十名方設戰兵一名其有該汛兵丁不足五十名僅止四十

華三身之身正身五  
名左右者亦設戰兵一名以上二項每歲共可節省  
銀一萬餘兩以此節省之資爲添募守兵七百餘名  
之用在

國家每年給餉仍照歷年之數並無多給分毫而河工  
實增兵七百餘名得其終年力作之益計無利於此  
者矣除臣見行各道廳營官弁自本年七月初一日  
爲始兵丁米折銀兩槩減三分之一照二錢二分支  
給一面以節省之數添募兵丁力作俟兵丁募足工  
程分定另造細冊送部外緣係減糧添兵事宜相應

特疏

趙明伏乞

睿鑒敕部施行

1941-1942

1941

578

購辦柳束疏 康熙二十三年

題爲

題明分購康熙二十三年歲修柳束并請回空順帶以  
保全河事竊照黃河變遷不定掃刷無常若非預備  
多料隨機搶救斷難免冲潰奪河之患也本年自三  
月初一日蕭家渡合龍全黃歸故之後忽生桃源北  
岸七里溝清河北岸玉皇閣等新險勢甚危急臣隨  
嚴督各官弁飛星運料分頭搶救幸七里溝一工下  
埽不多而水勢隨緩費料有限至玉皇閣一工或上



提或內陷自三月至今二百餘日之間終朝下埽費料極多此猶微臣於本年三月內具全河歸故等事

一疏內

題明之工也迨四五月間臣愚以爲除增此二險之外餘不過防其漫溢及風浪汕擊而已然慮其漫堤也業已請到錢糧惟有竭力僱工加高束水慮其風浪汕堤也見在多方購草購木或簽排椿或下順埽二者俱可無患則本年伏秋似可不至十分拮据豈知一交六月水漲溜急先將桃源北岸九里崗迤上大

河離堤二百餘丈之處不兩旬而塌至堤根臣飛督  
各官弁毋分晝夜運料搶救九里崗正在十分危急  
之時而三岔地方大河離堤六七十丈之處亦卽塌  
至堤根未幾而劉家莊大河離堤七八十丈之處又  
復塌至堤根又未幾而山陽南岸老壩口地方大河  
離堤二三百丈之處亦隨塌至堤根更未幾而宿遷  
南岸蔡家樓下灣從來平緩之處亦復塌至堤根矣  
他如安東南門舊埽工以下直至東門山陽南岸唐  
家堡舊埽工上下大茭陵舊埽工上下沈家圍舊埽

工上下以及馬邏一帶新增險汛或數十丈或數百丈者不一而足報險報急請夫請料之文盈几疊架臣驚憂惶懼胆裂心摧所備料物無多而東撥西調不啻如桂如金也臣日不能終食夜不能終寢羽書一至隨卽飛行或令肩挑或令驢馳或船裝或車載處處差員節節僭運除該管官弁之外凡附近監理分管等官以及臣標一切効用弁員差委殆盡臣復宣揚

皇上之洪恩鼓之以優敘之足榮曉諭

功令之森嚴做之以處分之可畏各官弁亦俱勉力奮往  
自小暑以至於今百有餘日之間無分晴雨晝夜奔  
馳幸賴

皇上洪福齊天得以安全無恙今值霜降節氣水勢漸消  
水力漸緩本年堤岸險工已可保固無慮矣但各工  
所積柳料悉皆用罄無餘而來年桃伏轉瞬卽至若  
不預爲購備則臨期束手惟有坐視凌裂臣就今年  
危險之形以衡來歲需料之數如蒜草椿蘆尙可就  
近設法至於柳枝一項新栽者旣嫩小未堪採取而

舊柳又已用完實所謂赤手空拳百無一有誠不禁  
胆慄心寒夢魂憂怖者也臣再四思維惟有做大工  
協購之例令隣省隣郡暫爲協購一次俟保過康熙  
二十三年伏秋則險汛稍定而臣歷年來督令河兵  
所栽堤柳與屬員捐栽圍柳俱可量採濟用卽或不  
敷於江南附近地方設法採購可不煩隣省之遠協  
也伏念康熙二十二年臣原估約需柳七十餘萬今  
約畧計之業已出估計康熙二十三年歲修必須柳  
一百萬束始可保全今臣擬令河南開封府協柳二

十萬束歸德府協柳十萬束山東東昌府屬協柳十  
萬束兗州府屬協柳十五萬束濟南府屬之德陵平  
禹等近河州縣共協柳五萬束直隸天津以南河間  
廣平大名三府屬近河各州縣協柳十二萬束江南  
揚州府屬除高寶興三州縣見在協草外其餘六州  
縣共協柳六萬束江寧府屬協柳六萬束鎮江府屬  
協柳三萬束太平府屬協柳三萬束常州府屬協柳  
五萬束鳳陽府屬除盱泗天靈虹五州縣見在協草  
外著令鳳陽等近河各州縣共協柳五萬束以上四

直省近河州縣共協柳一百萬束度康熙二十三年雖有奇險亦可保固無患設或來年水不甚大得於此中節省二三十萬以爲二十四年防守之需則二十四年分賴此贖柳再加堤園可採之柳足以資用可以不至再煩隣省協濟迨至康熙二十五年之後則臣歷年督栽勸栽之柳盡皆長成用之不竭從此歲歲加栽永無協柳之事矣至於採辦柳枝從來爲歲修之用者每束給銀三分爲大工之用者每束給銀四分五釐蓋歲修用柳少正於附近採取是以止

給柳價大工用柳多必須隣省遠購是以又增運腳銀一分五釐也今令隣省協柳似應照大工給價但歲修柳枝從無開銷四分五釐一束之例且河庫匱絀卽欲加增亦無可動之項相應仍照歲修三分之一束之例給發各州縣採運來工以便銷算若夫直隸山東一線運河止有糧船差船經過萬不能僱船裝柳臣請將節次裝載旋旅赴京之回空兵船先儘裝柳其不敷者用康熙二十三年分八月以前過津之回空糧艘順便帶裝計其一裝一卸不過耽遲數日



斷不敢有悞康熙二十四年新運也臣非不知隔省  
協柳事屬艱難但黃河業已歸故而修防尤屬難弛  
倘柳料不能接濟一經水漲異常束手無策臣雖以  
身填水亦屬徒然彼時一有凌裂則從前費過數百  
萬帑金盡歸烏有而運道民生俱付之不可問矣臣  
百計熟籌萬不得已爲此隣省協柳之請伏乞

皇上俯念河道攸關重大特賜

俞允勅部速行各撫臣轉飭近河各州縣乘本年冬至節  
界柳滋含蓄之時飛星採貯俟來春一經凍解火速

衰船全解來工以濟康熙二十三年伏秋防守之資  
其協柳各地方官并督催之道府俱請照協辦大工  
柳束之例准與議敘以鼓舞其速運濟工如有遲悞  
者

題叅議處如此則堤工可固河道幸甚

國計民生俱幸甚矣伏乞

皇上睿鑒

勅部速賜議覆施行



課程堡夫疏

題爲開歸堡夫課程疲累已極仰懇

阜仁特賜矜豁事該臣看得開歸堡夫一項河南撫臣王  
日藻灼知堡夫困苦是以特疏

題豁部議柳蔴等物關係河工應否豁免及免課程豫  
省河務有無貽悞之處請

旨行臣會同詳議具

題臣欽遵備檄河南管河道確議通詳去後今據該道  
祖文明詳覆前來臣復加細訪查此等夫役每歲所

領工食有限止宜責令守堤墊探水積土灌溉柳株  
修補穽穴狼窩庶職掌輕而盡力亦易自著令辦納  
課程料物而各夫殆不免於苦累矣况所辦料物卽  
於本處支用猶可也殊不知辦料之地竝非用料之  
地竭各夫之筋力貯料於風日之下用之不無遠運  
之煩不用又有朽壞之慮迨經年累月旣朽旣壞而  
別工忽然取用不得不從新另賠於是苦累至極勢  
必相率逃亡究竟不能全賠類皆豁免而各夫困於  
苦累反將本等力役日就廢弛是徒有辦納課程之

名而更失防守工程之實其益於河務者甚小而損於河務者頗大也伏乞

皇上俯照撫臣原

題將開歸堡夫課程特賜准豁不特各夫可免重累而兼得盡力修防其於豫省河務實有裨益而竝無貽悞者也今據該道呈詳前來臣謹會同河南撫臣王

日藻合詞具

題伏乞

皇上睿鑒

勅部議覆施行

勅部議覆施行

二

衛河水勢疏

題爲衛河水勢微弱漕船浮送難前謹請

天詔申飭輓水歸河立濟重運事該臣看得堵塞衛水渠口以濟漕運一案部覆奉

旨漕運民田均關緊要何以使衛水可濟漕運兼不悞民田灌溉著臣會同撫臣確議具奏欽此欽遵移咨到臣准此臣隨移會直隸河南兩撫臣并行直守大名河南管河分守河北各道確議去後又復節次駁催今據各該道詳覆前來除直隸大名府屬之元大濬滑



內黃等五縣沿河兩岸地高原無借水之渠無庸置  
議外其河南衛水之源發自輝縣合懷慶之大小丹  
河衛輝之淇水安陽之洹水經直隸山東境內會流  
而至臨清總名衛水以濟漕運內輝縣旣設五閘以  
潤禾苗而安陽又有一閘以溉田畝兼之河內縣兩  
岸二十餘里民田需水灌溉則旁洩在所必然者矣  
臣惟重運漕船行至臨清之北全賴衛水浮送庶可  
早達

天庾乃輝縣河內安陽三縣又需此水以溉民田凡遇三

春雨少之年民田無水往往引流芴洩以致運河淺阻漕艘難行案查順治五年前河臣楊方與具題議每年二三兩月聽民用水四月以後卽便封貯閘板堵塞渠口以濟漕運等因部覆奉

旨欽遵在案但民田需水之候四月更甚於三月是以雖有四月封板塞渠之例而民間必不能遵任臣衙門大聲疾呼終不放水下注臣萬不得已復有請

勅直豫兩撫臣嚴督該管官員火速起板堵渠不使衛水芴洩之疏蓋原從速漕起見也今部覆奉

旨漕運民田均關緊要何以使衛水可濟漕運兼不悞民  
田灌溉著臣會同撫臣確議具奏欽此欽遵仰見我  
皇上愛民至意必期上下均利誠

堯舜之用心矣臣雖愚昧敢不仰體

皇仁酌議妥確乎今據河南省各道府詳稱輝安河內等  
三縣農務在於每年之三四兩月而漕船盡數抵臨  
之期大約在於五月今議四月之前聽民取水溉田  
自五月初一日爲始封貯閘板堵塞渠口以濟漕運  
倘該管各官漫不遵奉聽臣等會疏糾叅等因會詳

前來臣按其所議誠爲妥協於我

皇上使衛水可濟漕運兼不悞民田灌溉之

恩綸足稱不悖矣惟是各省漕船不下五六千隻卽過臨

極速亦得兩月之期如輝安河內等三縣恪遵五月

初一日封起塞渠之議則不出五日衛水自卽至臨

七月之內尾帮可盡抵通回空可無遲悞倘因循積

習仍前陽奉陰違則悞漕之事勢所不免爲今之計

惟有嚴定處分之例如五月初一日不封板塞渠以

致五月初十日之內衛水尚不暢注臣等卽將該管

道府廳印河官特疏

題叅到部必得部臣將陽奉陰違之該管各官從重處分庶各官知所儆畏不至因循錮習也伏乞

皇上睿鑒俯念漕運關係緊要

勅部將五月初一日封板堵渠之議著爲定例并嚴定不遵官員處分則例以便永遠遵奉臣謹會同河南撫臣王日藻合詞具

題伏乞

勅部議覆施行

大挑月河疏

題爲估計大挑高郵月河工程錢糧事據淮揚道多弘  
安詳據揚州府管河通判聶文魁詳蒙本道牌蒙  
批據該廳呈詳前事蒙批仰淮揚道再加細核確減  
冊詳以憑核

題繳等因批道行職蒙此該卑職查得高郵州境自南  
關至車邏鎮南一帶河道於大修案內建有減水壩  
座以資宣洩惟是伏秋暴漲之時湖水內灌其勢奔  
湍直注東堤各壩以致往來舟楫掣溜礙橋不特漕

糧船隻關係重大而一經碰斷橋脚則陸路飛差驛馬立爲中阻必須用船擺渡不無耽遲蒙本部院再三飭議是以估將高郵州城西窰港口外臨湖薛家壩東起迤南趨過車邏滾水石壩出運河口止挑挖月河一道使上流湖水分洩江都之露舫邵伯等湖而空重糧艘俱由月河輓運則伏秋大漲旣不致漫堤冲汕而舟行亦免於掣溜碰橋運艘旣獲安行而驛路免於阻滯此係至緊要工所需工料前經造冊詳估蒙本部院以河帑不敷萬不能照日給四分之

例止可量給食米鹽菜以資各夫餬口卑職敢不仰  
遵今減而又減酌調附近各州縣民夫每名每日止  
給食米鹽菜銀二分二釐各州縣因上關運道下利  
民生莫不鼓舞樂從然此二分二釐僅供各夫在工  
之食用不能養及家口若欲於此內再爲酌減則不  
特不能養家并不能餬口又非憲臺體恤斯民之意  
矣今本工估挑新河及加挑原舊河形共七段長二  
千九百五十七丈五尺建造木橋八座并開砌石工  
裹頭共該土方料價工匠銀七千三百三十八兩六



錢四分九釐此皆實工實料難以再減等因呈詳到道據此該本道看得高郵州境內自薛家壩東起至車邏滾壩以下止挑挖月河一道不獨可以分洩湖波免致水漲漫堤之患而漕艘由此輓輸更可避掣溜礮橋之虞實係至要之工但河庫無銀而此工大有利於民生運道不得不設法節省前據該廳詳估本道駁核再四每夫一名止給食米鹽菜銀二分四釐茲蒙本部院批道再行確減隨行該廳復加駁刪今每夫一名止給食米鹽菜銀二分二釐僅足各州

縣所撥人夫餬口之資更無養家之惠若於二分二釐之內再欲節省則各夫不特無以養家并不能餬口矣茲共實估土方工料銀七千三百三十八兩六錢四分九釐等因前來本道覆核無異相應轉呈具題等因冊詳到臣據此該臣看得高郵州地居卑下爲衆水滙歸之區從前費無限錢糧動無限民力砌最堅之石工築最高之埽壩而此塞彼冲竟無寧歲臣凜奉

俞綸於高郵城南一帶修建減水輒石壩五座以資宣洩

數年以來方保無患然伏秋暴漲之時湖水奔騰而  
來直趨各壩湍急非常以致往來船隻每被溜掣礮  
橋一經礮斷橋梁必須數天修整不特有傷損漕船  
之虞兼之有稽阻飛差之患臣是以行令該道廳等  
確議於該州城南運河之西挑挖月河一道自薛家  
壩起至車邏迤下止仍歸入大河使空重各船由此  
輓輪避此數壩溜掣之險其於運道民生河工三者  
均有裨益惟是此工需夫甚多者照日給四分之例  
隨便召募別夫河帑有限險汛繁多歲修辦料尚且

不敷安能於此工多費臣再四籌維行令附近州縣酌撥民夫力役每夫一名每日止給食米鹽菜銀二分二釐用其力而僅免其枵腹之苦不能更計其養家之需蓋爲日無多且原屬保運利民之舉各州縣亦頗鼓舞爭先也茲據淮揚道多弘安詳估挑挖新河及加挑原舊河形共七段長二千九百五十七丈五尺建造木橋八座并開砌石工裹頭共該土方工料銀七千三百三十八兩六錢四分九釐駁核已明無可再減其做過工程用過錢糧俟該道核詳至日

奏銷今據勘估呈詳前來相應具

題伏乞

勅部議覆施行

恭謝 天恩疏

奏爲恭謝

天恩事臣惟上古致治之隆或誕敷文德或大告武成或  
刑期無刑而敷教在寬或奠平水土而烝民乃粒或  
巡行而萬方騰後后之聲或端拱而四海戴無名之  
頌此堯舜禹湯文武之治載在詩書經傳爲萬世帝  
王之極則者也今我

皇上御極以來無日不以民瘼爲念慮天下吏治之風或  
下也故首尚清介立賢無方獎善懲惡宥過錄功且

恐久而生怠又復

御書清慎勤三字頒

賜天下各督撫諸臣俾得朝夕仰瞻凜然有上帝臨汝之  
思慮天下民生之不免於困苦也故遇災必蠲災重  
必賑憫竝徵之苦累而緩其積逋以甦之知開墾之  
利民而遲其陞科以養之崇節孝以厚風俗禁凶暴  
以戒姦頑內而部院外而督撫諸臣凡擬議刑名稍  
有未合必奉

特旨駁正期於允協以至無刑至於崇正學黜邪說講解

經書刊刻頒布闡列聖仁義道德之蘊契唐虞危微  
精一之傳

幸闕里謁

先師孔子詔行三跪九叩頭禮尊師重儒賓禮齒德以  
致海外重譯之國不憚數萬里之遠匍匐來朝遣子  
入學是

皇上文德之敷遍於遐邇凡有血氣莫不尊親也又如逆  
賊吳三桂等負恩作亂擾及數省我

皇上命將出師授方略於閩內振威武於遐方不數載而



諸逆全平卽數十年來從未向化之鄭克塽等亦皆稽首

闕廷傾心歸命是

皇上武功之烈冠乎古今凡在覆載罔不臣服也若夫河道爲

國家血脈攸關運道民生

皇上憂勤宵旰銳意平成不以臣爲不肖委臣以治河之任臣感激無地報

恩心切未及熟慮漢思不覺孟浪易視遂自限三年告竣

詎料屆期罔效潰凌頻仍斯時也不特內外臣民謂  
臣斷不能治而臣亦有口莫辯幾於不可解矣臣之  
身命業已置之度外乃蒙

皇上特出乾斷不加臣以誅戮

名臣赴

陛親賜誠諭大隆使過之仁

命臣旋工竣事臣恪遵

訓旨痛悔從前鹵莽之非百計謹慎圖維而後兩河得以  
無恙是今日河工獲成實皆

皇上至聖至明之肇造微臣犬馬餘生實出

皇上矜全曲宥之洪賜也茲蒙

皇上不惜

聖躬之勞遠

幸河干

親臨勘閱一切工程凡臣仰遵

聖諭料理合式者

皇上皆以爲是其臣料理未周尚須詳酌者又荷

皇上一一指出至臣拮据數載尚未明晰之工

皇上一臨其土而洞若觀火是非可否凡

聖諭所及莫不至確至當開臣愚昧又蒙

皇上面諭臣云河工大概雖定而善後事宜更爲要緊應  
作速斟酌行之更

命臣將治河事宜酌古準今著書一部俟河道大成之日  
卽便進呈以垂永久欽此及

聖駕回至宿遷蒙賜臣

御製五言律詩一首

駕行之後又蒙

賜臣

御乘佳哈船一隻并旗纛幃幔鋪氈等項俱全皆俱一一

謝

恩跪領訖伏念我

皇上文德武功明刑弼教莫不駕軼三代媲美唐虞更以  
運道雖通而田畝尚未盡涸親臨遍勘曲計籌維必  
不使一夫失所且

鑾輿所到士民扶老挈幼持香擁祝喜觀

大顏踴躍歡忻之聲亘古未有是我

皇上乃集唐虞三代列聖之大成誠詩書所載振古帝王  
僅一無竝之

盛矩也至若微臣奉職無狀救過不遑幸賴

皇上指授方畧河工得以保固乃蒙

皇上於賜詩之內謂臣已著勤勞臣跪誦之次感而欲泣  
君恩深重實媿不敢當也至臣往返隨

駕蒙

皇上勉臣誠臣

天語甚多臣俱敬鏤心骨沒世凜遵矢當捐糜頂踵益竭

犬馬之愚悉籌善後之策俾兩河永奠不致再有他  
虞以仰荅

聖主洪恩於萬一耳除河工一切善後之計容臣次第入  
告其治河事宜一書容臣遵

諭著就進呈

睿奪至蒙

皇上賜臣

御製詩命意深遠書法精妙臣世世子孫奉爲至寶見在  
選工勒之貞珉俟鐫成另呈

御覽又

賜臣佳哈船製度新奇安穩神速誠爲難覲之物臣卽照式添造以濟緊急之用臣謹一併恭疏奏

謝字多逾格伏乞

皇上鑒宥施行



--	--	--	--	--	--	--	--	--	--

善後事宜疏

請錢糧

題爲謹陳河工善後事宜仰祈

睿鑒事康熙二十三年十一月初十日

皇上臨幸清河縣運口蒙

天語面諭臣云這運口閘將來水急難行應再添造一座

又奉

上諭云今年黃水倒灌運河不可爲訓爾須酌一至妥之策務令永不倒灌欽此又本月十二日臣於宿遷縣蒙

皇上欽賜

御製詩句臣叩頭謝

恩復蒙

皇上面諭臣云如今河道雖大概已成但善後事宜爾著實用心籌酌必期永遠無虞欽此臣伏思河工雖水土之役而修治機宜最細最密稍有不當便有差之毫釐謬以千里之勢臣以庸劣之資孟浪輕忽料理失宜逾期不竣及奔走八年之久甫能粗知大略其細密之處昧然難別也乃

皇上方幸河工而

御駕所到舉凡應與應改應增應慎之處

聖諭一出而事事精詳確當瞭如指掌開臣愚蒙救臣疎

忽我

皇上聰明聖智誠萬古帝王莫能與京者也臣遭逢

聖主敢不益竭犬馬之愚以求得當臣隨恪遵

上諭復加細心籌酌查徐州以上直至河南滎澤縣之西

河道俱寬數百丈若遇伏秋異漲漫灘而上直抵兩

岸堤工其寬不下數十里迨至徐州而北岸係山嘴

南岸係州城中央河道僅寬六十八丈將千支萬派

浩浩無涯之水緊緊束住不能暢流河流旣艱於下  
達則自難免上擁是以明朝二百餘年之間徐城屢  
屢潰冲而徐州迤上南岸之漫溢迄於今歲歲見告  
也臣先於大修案內將黃河南岸碭山縣毛城鋪地  
方創建減水石壩一座又於黃河北岸徐州大谷山  
地方創建減水石壩一座蓋擬分洩徐城迤上之異  
漲也乃康熙二十一二十二兩年已賴兩壩宣洩得  
以無患迨至康熙二十三年河流異漲兩壩不足宣  
洩又復於李道華樓十八里屯等高阜無堤之處漫

灘而行且將碭山北岸王家堂堤工漫缺三十餘丈  
此徐州州城以上之情形也今臣細酌善後之計在  
黃河南岸必須於碭山縣毛城舖地方減水壩之上  
再添建減水滾底石閘一座不特分洩異漲而石閘  
之水先至壩後可免建瓴傷壩之虞又於徐州王家  
山十八里屯二處就山根開鑿減水滾底石閘三座  
更於徐州北岸大谷山等處添鑿減水滾底石閘二  
座統計徐城以上共添減水石閘六座遇平常之水  
則閉閘束流遇非常異漲則啟閘分洩每閘一座約

可洩水一百方可殺徐城大河水勢一尺徐城以上  
統計添閘六座共可殺大河水勢六尺徐城自免潰  
冲而徐城以上各堤俱可保固矣又河流自徐城下  
行一百餘里至睢寧縣鯉魚山地方北岸係仰魚山  
而南岸一帶爲峰山龍虎山兩山相峙夾黃河於中  
夾河面僅寬百丈而河底乃係山脚冲刷不深河流  
到此又爲一束以致今年有來字堡之漫缺也今臣  
擬於南岸峰山龍虎山之旁開鑿天然減水溪底石  
閘四座以爲隨機分洩之計又南岸各閘壩減下之

水必由歸仁堤經過目今止有五堡減壩一座并便  
民閘一座不足分洩應於五堡附近添建淡底石閘  
一座減水大石壩一座竝將便民閘再行改淡五六  
尺以資分洩庶可無虞又攔馬河先後共建減水壩  
六座今必須再添建淡底石閘一座使河流由閘先  
進積水以養壩尾俾免傷壩之虞又南岸各閘壩不  
特可以殺黃河怒漲之勢而淮流微弱之時又可藉  
以分別黃河之水由歸仁堤下注洪澤湖使助淮流  
然洪澤湖週圍數百餘里所引上流分黃之水一時



不能灌滿則仍難免黃水倒灌運河之患今必須再於清河縣之西建雙金門大石閘一座并於閘下挑引河一萬餘丈如遇黃河十分異漲則立啟此閘由引河分洩歸海則黃淮會合之處又可減黃水一二尺有裨運道最爲吃緊至於清河縣運口添建石閘一座更屬保運濟漕至要之工亦應於運口閘之上乘時速建者也以上各工除清河縣西引河一萬餘丈臣擬不動錢糧調山東額夫并江南各州縣歲修夫以及各營稍閒之兵協力僱挑外至於應開鑿山

根天然閘九座添建石閘五座大減水石壩一座并  
改閘一座約共需銀一十八萬兩河庫徵收之銀僅  
足爲歲修之用不能更有餘資然臣亦不敢另請錢  
糧伏乞

皇上睿鑒勅部確議俯將就近兩淮鹽課錢糧借撥一十  
八萬兩俾臣乘時料理此所借之銀請照從前借江  
藩漕項銀十三萬八千兩之例容臣於逐年歲修工  
料之內百計設法節省并清查新舊河湖灘地開墾  
取租還項自康熙二十五年爲始分爲十年每年解

還戶部銀一萬八千兩如此一轉移閒而河道永保  
安瀾可無意外之患矣臣謹具

題伏乞

勅部議覆施行

欽奉上諭疏

勘工河南起程日期

題爲欽奉

上諭事康熙二十三年冬間臣恭隨

聖駕勘閱河工蒙

皇上面問臣云河南工程爾都見過麼臣回奏云河南商  
丘以上堤工臣俱未見隨蒙

皇上面諭臣云爾亦該去看看等因欽此欽遵今康熙二  
十四年桃汛已過轉瞬伏秋凡江南黃河一切險汛  
臣俱遍爲親勘相度見在之情形揣摩將來之變態

嚴行所屬道廳營印管河官弁并管工監理分管等  
官分頭辦料畫地責成著落防守務期保固外切慮  
豫省工程雖撫臣料理極妥然臣未經目擊終屬紙  
上揣摩且身任總河之職而不將全河勘明臣心殊  
切怍怍於以知我

皇上命臣往看之意誠至當不易之理也今臣於三月二  
十四日自江南起行由濟寧一帶查勘挑河工程隨  
於四月初六日自濟寧起行歷歸德開封二府所屬  
抵滎澤縣將豫省黃河兩岸工程逐一勘明又抵武

陟縣閱視沁河入黃之口於四月二十一日回至濟  
署復赴江南督理大工除豫省應行善後事宜臣見  
在會同豫撫臣王日藻勘酌查議俟酌妥之日另疏  
具

題外所有微臣奉

諭親勘河南省工程日期緣由臣謹具疏

題明伏乞

睿鑒施行

1941-1942

1942

兩河水勢疏

題爲恭報兩河水勢情形事康熙二十四年七月初九日欽蒙

皇上遣臣子吏部員外郎靳治豫自

京馳驛至清江浦查問黃河水勢情形等因到臣臣

祇奉

君恩感而欲泣竊念黃河爲患自古有之我

皇上不惜經費之繁多惟冀人民之樂利屢發帑金令臣修治且又屢承



聖書指授下啟愚蒙實千載一時矣乃我

皇上稟

天地化育之心弘萬物胞與之量猶恐一夫不獲必欲盡躋

春臺因

京師之久雨遂淡念夫黃河

堯仁舜智誠萬古帝王之極則也臣謹遵將見在河道情

形為我

皇上陳之查江南淮揚徐一帶自五月二十七日天雨起

連陰三十四日至七月初一日方晴此三十四日之

中止有六日無雨而傾盆大雨如注之日甚多黃河  
水勢自徐州至宿遷比上年伏水大二尺比上年秋  
水尚小七寸駱馬湖受山東久雨大水比上年伏秋  
水大二尺攔馬河減水壩上年止開三座今年六座  
全開內第二座輒壩冲壞幾空第三第四兩壩亦有  
傷損應俟水消後修補如式自宿遷縣至清口一帶  
黃河比上年伏水大三尺比上年秋水大一尺清口  
至海口因黃淮竝漲比上年伏水大五尺比上年秋  
水大二尺高家堰一帶因洪澤湖水漲非常堤頂僅

存一二三尺不等比上年伏水大六尺比上年秋水大二尺二寸黃河兩岸一片汪洋水自南堤直抵北堤堤根水深二三四五六尺不等幸賴加修案內將堤工逐一加高又得減水各壩宣洩之力目今壩頂尚高出水面三四五尺不等雖黃河秋水尚未漲發然竭力保守自可無虞惟高家堰一帶水旣日增而又屢起西風將堤頂之土打去約有一半雖將減水壩開放宣洩而水勢太大不能遽退各官率兵夫寢食工所刻刻驚心竭力搶獲期於保固總賴

皇上洪福俱可無妨然此工雖屢次加修而仍屬單薄容  
臣俟水消之後另圖萬全之策

題請遵行運河內天妃閘被上年大水冲損閘牆見在  
實閉大修本年糧運全由七里閘而行七里閘被今  
年大水亦經冲損閘牆亦應俟水退修補然往來船  
隻俱可通行高寶江都運河水勢俱與上年相同可  
保無患者也伏念我

皇上備格

天之精誠隆超古之功德自必河伯效靈安瀾底定若臣以

庸劣之資遭逢

異數惟恪遵

皇上指授之方略切諭之機宜捐頂糜踵竭心思手足之  
力以仰

洪慈於萬分之一而已臣謹將兩河水勢情形具疏  
題報卽令臣于治豫齋捧覆

旨伏乞

皇上睿鑒施行爲此具本謹

題

欽奉上諭疏

蘭儀等處添官

題爲欽奉

「諭事該臣看得豫省河道居江南之上游豫省河道安則江南之河道亦安臣已於另疏陳明矣惟是河道全資修守而修防專賴得人是以前州縣管河官員品職雖微而關係甚重非年力強壯熟諳河工者不足勝任也卽得幹員矣尤必諒其力所能及者而責成之庶不至於貽悞今豫省沿河如蘭陽儀封滎澤三縣兩岸均有堤工俱長數十餘里乃向來止有管河

官一員不特奔馳難及而每歲伏秋異漲之時處處出漕河面寬數十餘里且急溜非常每一過渡卽費窮日工夫安得作往來修守之計又如虞城縣堤長百里而修防僅有一主簿亦萬難兼顧者也此四縣者必須添設河官四員但增官勢必增俸是以臣等行令藩司河道等官酌裁可省之員添設至緊之缺今據該藩司郎永清該道祖文明等再三酌議前來查濟源縣原無修防之責所有額設主簿一員儘可裁去又修武封丘兩縣縣丞虞城石榴壩驛驛丞職

掌俱開均可裁去內一議裁濟原縣主簿一員移設  
蘭陽改爲蘭陽管河主簿與見任蘭陽縣縣丞分管  
該縣兩岸工程一議裁修武縣縣丞一員移設儀封  
改爲儀封縣管河縣丞與見任儀封縣主簿分管該  
縣兩岸工程一議裁封丘縣縣丞一員移設滎澤改  
爲滎澤縣管河縣丞與見任滎澤縣主簿分管該縣  
兩岸工程一議裁虞城縣石榴堦驛驛丞一員另添  
設虞城縣管河縣丞一員與見任虞城縣主簿分管  
該縣工程又陽武縣主簿止能管北岸工程其南岸



工程查該縣見有縣丞一員應歸該縣丞就近管理  
又原武南岸有堤六百餘丈界在鄭州境內應歸併  
鄭州見任州判帶管吏查得山東單縣有南岸堤工  
二千餘丈錯雜於河南虞城縣堤內應改歸歸德府  
管河通判督虞城縣印河官就近修防河南考城縣  
北岸有堤工五千餘丈界連山東曹縣境內應換歸  
兗州府黃河同知督曹縣印河官就近修防內考城  
北岸堤工甚爲殘損應俟修完更換如此一轉移間  
而繁簡緩急均得其宜修防者足以施其力則責成

既專自免貽悞之虞矣除山東省尚有未盡事宜容

臣會同東撫臣核明另

題外臣謹會同河南撫臣王日藻合詞

題請伏乞

皇上睿鑒

勅部議覆施行

--	--	--	--	--	--	--	--	--	--

靳文襄公奏疏目錄

卷六

治河題藁

欽奉上諭事 條陳下河

再報兩河水勢疏

請免課程疏 開歸堡夫

請循定例疏 錢糧免其具題

霖霖漫漲疏

恭謝天恩疏 鹿脯等件

恭報赴京疏

欽奉上諭疏

海口

分添縣治疏

挑築未盡疏

挑中河

欽奉上諭疏

差看兩河

恭謝天恩疏

陳潢職銜

男 治 豫 編 次

孫 樹 德 校 正

曾孫光

烈文 全校字

靳文襄公奏疏卷六

總督河道提督軍務太子太 兵部尚書兼都察院右副都御史臣靳輔

治河題藁

欽奉上諭疏 條陳下河

題爲欽奉

上諭事竊臣跪聽畢再四籌維寢食俱廢隨與臣幕客陳  
潢曲計所以仰副我

皇上視民如傷至意陳潢體臣愚忠欽遵

聖主明諭相度熟籌因擬一改圖之見與臣商確臣細細

揣摩似屬千慮之一得茲將下河被災原委及改圖情形謹一一爲我

皇上陳之查宋元以前不特下河原無水患卽高郵寶應諸湖多屬田畝直至明朝初年始被大水漫漚成湖者也臣於康熙十七八等年堵築清水潭之時於兩堤之中又復浚挑河底以利重運乃挑出洪武永樂洪熙并宋元舊錢以及各色尋常器皿不計其數更有甃井石街等項經臣題報在案念舊錢器皿或係丹行遺失亦未可知若夫甃井石街確係民居証據

夫以清水潭爲高郵最窪最險之處尙係民居則高寶諸湖等處更可知矣此被水漫漚之明驗也復思天災霽潦自古有之然何至一經漫漚卽使永成大湖之巨浸且歷二百餘年之久而又波及下河使其受害無底乎總緣宋元之時黃河雖南浸而尙未全徙直至明朝初年向北之流盡絕始全徙而南於是遂徑奪淮渠以入於海淮渠窄小淮水壅不得下遂陡長尋丈先將清河縣原係民居之洪澤村一帶低地漫漚而爲洪澤湖及洪澤湖不足停蓄又從高家



書二二卷之三十一  
二

堰翟家壩等處旁流東注將高郵寶應低地亦俱漫  
渰而爲高寶諸湖推原其故總因黃奪淮渠淮水不  
得不分流東注是以成湖之地永不得復田疇之舊  
而又移禍於下河也每年春冬之間黃淮不漲洪澤  
湖水勢消落無涓滴洩入高寶諸湖則下河卽受平  
安之福無如一到夏秋二瀆齊漲洪澤湖之水往往  
驟漲數尺丈餘不等臣屢經測驗知運河地勢卑於  
高堰地勢一丈有奇而運河堤頂亦卑於高堰堤頂  
一丈有奇堰堤減洩之水其奔趨運河也有建瓴之

勢焉苟不作量入爲出之法以減洩之則亦必漫堤而過下河之被害益深矣故臣於堰堤之上則建可以洩水一千方之減水壩而於運河漕堤之上則建可以洩水一千二百方之減水壩使漕堤減水之地多於堰堤進水之地則自不至壅積傷堤所以未增減壩之前清水潭屢築屢冲自建一千二百方減壩之後則歷七年之久三遭大漲而安然無恙也夫高寶一帶之下河地勢極卑形如釜底淺下之水不得不以下河爲壑所幸下河之東卽係大海則下河之

水自當以大海爲壑其疏浚海口之議似若可救下  
河乃臣必堅主築堤束水并開一百六十丈大河之  
說而不敢專言開海口者何也蓋因臣細測地勢自  
清江浦南行至江都縣之茱萸灣共三百餘里又折  
而往東行一百餘里至泰州又一百餘里至海安鎮  
過海安則折而往北卽范公堤也沿范公堤而行歷  
安豐東臺何梁丁溪白駒劉莊等場共計二百餘里  
而抵鹽城縣又北行一百餘里而至廟灣場復折而  
往西行一百餘里至蘇家嘴又一百餘里至清江浦

總而計之自清江浦起行沿下河週圍走遍仍回清江浦計程千里有奇內止有廟灣天妃石碇三口向係下河洩水入海之處人馬至此必登舟過渡餘皆可以行馬之路也惟是下河之地濶三百餘里長二百餘里乃卑處於週圍馬路之中雖有廟灣等口之洩而存蓄積水仍然一望汪洋其釜底之形如此是以高堰洩下之水下河不得不爲承受之壑也且臣測釜底之下河其形尙卑於沿海之地誠恐海潮有內灌之患故前此猶爲之鯁鯁過計今亦姑無論海

潮之果內灌與否但止就水性而言方其奔赴之時雖有排山倒海之狀然自近至遠必隨地形之高卑盡其平滿之量然後遞流而前所謂盈科而後進者也方淮流盛漲之際高堰洩水洶湧而來勢必先盈釜底之科而後漸達於海夫以高堰洩下之水歷此二百餘里釜底之區地勢遙遠即使海口早於內地然俟其遞流到海之時釜底之禾苗未有不化爲烏有者也 淮揚士著之人又有謂開浚小河自可導水使出者殊不知河之貯水猶器之貯水也有一

石之器斯受一石之水若有一石之水而僅設五斗之器則水之入器者止五斗而此多餘之五斗必浮溢於器外矣况下河既成釜底而今所開之河勢必亦就釜底中挑挖者也夫止就釜底挑挖則徒增釜底之深而已究竟盈科遞進之勢斷不能飛越民用以入海則仍不能救禾苗之淹沒也且下河地畝如遇乾旱之歲卽不增開海口亦皆可望其有秋者也若遇大水之年其本年苗禾之全遭淹沒不必言矣然苟再增開海口以爲廣洩之計亦未常無三四分

之益也但其水既大則退之雖廣且速亦必須俟之  
冬底甚或遲至來春是民間既失本年收穫之望而  
又失及蚤種麥之期萬一又如康熙二十三、四兩歲  
遇頻年之霑潦則又當如何耶臣思

皇上之所以治下河者專爲救此災民耳若增挑海口之  
後而民田仍不免於淹沒不幾有負我

皇上軫念災民之至意乎是以臣前疏請築堤束水使淮  
水之洩下者盡歸堤內藉堤之高以助其出海之勢  
則自無旁溢而堤外一切高窪之地皆可耕耘且開

一百六十丈之河則雖有源之水滔滔而來而寬河  
足以有容自可安瀾出海則下河之水患庶幾永息  
而可不負我

皇上軫念災民之至意矣但慮興工艱難而所費錢糧浩  
繁正在躊躇莫定今蒙我

皇上面諭臣子問臣作何設法修治有何意見臣恨不剜  
心嘔血竭此愚誠因令陳潢曲加籌畫至十八日之  
黎明陳潢向臣云潢思得今年正月間

廷議閉塞減壩之時原止議閉運河堤上之壩時蒙



皇上聖諭謂水源出自高堰壩上因

特諭併閉高堰之壩潰念水貴揆源誠出自

聖明睿見因想杜患於流不若杜患於源則欲治下河莫

如設法徑治高堰之爲得也今查高堰堤外之直東

則爲下河而高堰堤外之東北則爲清口今若自翟

家壩起歷唐埂古溝周橋閘高良澗高家堰等處於

堰堤內東首離堤一百二十丈去處築大重堤一道

束堰堤減下一千方之水使之北出清口實爲便利

又念清口爲淮黃交會之區若無設法分洩之策而

遽增此一千方之水則遇二瀆交漲之時必有水壅之患今幸黃河北岸新挑濟運中河一道其寬大足以容受實可大洩異漲是清口所受分外之餘水卽可於清口左右分洩而去不致壅積傷堤也今此一千方之水應於黃河北岸清河縣之仲家莊見建輓漕石閘之外擬再於仲家莊并陶家莊王家營各建大石閘一座連見建之閘共成四座約可洩水五百方又從未過水之西王家營大壩約可洩水三百方此所洩之八百方皆可由新挑之濟運中河徑直歸

海又山陽南岸草灣以下向挑運料小河一道創建  
小閘一座目今工已垂竣但河小而無堤不能束水  
今應將小河拓寬俾成大河并於河之迤南加築大  
堤約長四萬五千丈并一律添建大石閘二座約可  
洩水三百方此三百方可由黃河南岸運料河內徑  
直入海又鹽河一道原借中河之水以資輓輸者今  
應於安東縣亦建大石閘一座既可大利鹽商又可  
分洩去水一百方此一百方可由鹽河徑直入海如  
此則清口雖增水一千方而此各河實可洩水二千

二百方寧使洩水之數寬於增水之數則庶幾可保  
萬全又天長盱眙山澗之水遇霪雨之時約尙有二  
百方此則俟高堰重堤竣工之日引之由人字河灣  
頭關二處一經苳稻河入江一經串場河入海如此  
則洪澤湖之水可以涓滴不侵下河而下河永免水  
患且工程又易更可大省錢糧似此謬擬之意見或  
可上慰

皇上之宵旰於萬一聽臣再爲裁酌等語臣殫心竭慮酌  
畫思維又與潢窮晝夜之力再三駁詰辯難至十九

日之辰刻似覺愈辯愈確方始定議且爲之約畧估計其所築之堤約高一丈七八尺至二丈不等共長一萬六千丈連緊要險處防守埽料等項每丈牽費銀三十兩一萬六千丈共需銀四十八萬兩南岸運料河原極淺窄無堤今應加拓寬濶卽以加拓之土築堤約四萬五千丈每丈約費銀五兩共需銀二十一萬五千兩石閘六座約需銀十二萬兩內除取無用各閘壩舊料湊用外共添購料物并人工匠作等費止約需銀九萬兩其疏洩天長盱眙兩處所費有

限應於歲修案內隨便估

題統計改圖之工實需銀七十九萬五千兩而此工一成則洪澤湖雖遇異漲而水由高堰兩堤之中北注不復東滄下河其下河見在一片汪洋十餘萬頃之地盡可變成沃產一善也且不特下河可免水患而高寶諸湖俱可涸出田畝數千頃若一例招人屯墾則可以裕河庫而保護堰堤二善也至於高堰一帶原係最險之工今增此堤便可得重門之障三善也洪澤湖廣濶非常一遇風起則多覆舟沉溺今由此

堤內之河出入則避湖險而就安流有便於商民者甚大四善也凡此情形臣細加揆度總因新挑黃河北岸行運之中河可以分洩黃河異漲之故是以臣可信其意見之不誣也然臣細思此事當與部臣孫在豐督臣董訥漕臣慕天顏撫臣田雯會勘公議但部督撫三臣離淮甚遠一時知會不及臣子治豫恐復

命稽遲不敢久待臣念欽蒙

皇上有問明來奏之

旨臣今既有此見何敢不卽爲上

聞但臣又不敢以一人之斷遽爾入

告展轉躊躇因思漕臣慕天顏前任江蘇藩臣之時卽能  
留心河務今到任之後每將下河之事與臣商酌講  
究臣將所知情形屢爲陳說漕臣頗稱有合又因密  
邇淮城理合就近會同叅酌臣是以卽日邀請而漕  
臣慕天顏隨於二十日清晨至臣寓署臣細細告以  
改圖之策是日同往高家堰清口等處相度情形漕  
臣亦辯難良久乃始點首謂此改圖甚當實可以仰



答

皇上南顧之憂勤等語是臣得漕臣所見之同又幸有一  
印證矣茲臣子治豫回

京復

命除部督漕撫諸臣會議之日將此情形再加公同相度  
或別有善策另行酌議具

奏外臣謹欽遵

聖諭將設法修治并改圖之意見擬合先疏

題知至臣幕客陳潢前於康熙二十三年

聖駕開工之日蒙

皇上以有無得人爲問臣已將陳潢姓名上達

宸聰矣然前此並未見之章疏而臣於今日不得不據實

奏明者蓋以此等圖維實出陳潢一人之意見且因併

前創新挑行運中河之議今始得以分洩黃淮異漲

之水憶臣治河以來藉潢之殫瘁經營盡赤心以佐

臣之不逮者不少是以其間興工之委曲細微以及

將來取必竣工之責非潢協力區畫不可念微臣以

垂老之軀兼之多病萬一卽填溝壑又或病卧不能

國朝文獻通考卷一百一十一  
二  
馳驅則繼臣司河者必得仍令陳漬在幕以佐之庶  
可始終以畢微臣之工而不致有岐悞矣此臣十年  
以來之血誠欲吐而未敢者而今則不得不預爲陳  
明者也總之微臣之愚忠惟願

國事有濟而臣可告無罪則雖死猶有餘榮不特居功  
蔽賢之念所不忍萌卽引嫌避忌之私亦所不敢計  
也臣從敬荅

明問不敢絲毫隱諱起見是以據實上  
聞爲此具本卽令臣于斬治豫齋捧覆

旨伏乞

皇上睿鑒施行

臣等謹將

等因

111

111

再報兩河水勢疏

題爲再報兩河水勢情形仰祈

睿鑒事竊照康熙二十四年七月初九日蒙

皇上遣臣子吏部員外郎靳治豫馳驛來至江南查問黃

河水勢情形臣隨於本月十一日具恭報兩河水勢

情形事一疏卽交臣子治豫齎捧覆

旨。在案自十一日之後十二薄暮大雨一時十三至十六

四日之內俱係晴天不意十七十八十九傾盆大雨

三晝夜至二十一日未止迨二十二三四五甫晴四

日而二十七八九又復四晝夜大雨若七月三十日起至八月十五日止十六日之間雨者十一日無雨者僅五日此臣於清江浦日記之陰晴也其他各處雖稍有不同而大畧亦俱相似淮揚滁鳳堯五府州屬數十州縣霪雨疊災請蠲求賑之文重疊交至堆積盈几或稱平地水長丈餘或稱岡阜盡皆淹沒或稱牆垣悉圯或稱廬舍皆衝或稱屋脊難窺田禾莫問或稱雞犬絕響或稱風浪滔天或稱西水下奔海潮上灌或稱海潮狂嘯溺死人民或稱升屋而屋

倒於水棲樹而樹拔於風乘舟而舟被浪覆人逐波  
流屍隨風濤等因臣披閱之次殊不禁心爲之傷目  
爲之慘也卽如微臣清江浦所居衙署四面皆水街  
市水深三四五尺不等幾漫馬背臣往來閱工竟由  
門內乘舟而出且圍牆半圯臣之卧榻直與街通若  
臣濟寧衙署則僅存堂屋大屋其圍牆與羣房莫不  
傾倒不堪以臣之公署且然則小民棲止之居槩可  
見矣他如寧波衛回空糧船四十九隻於七月二十  
八日停泊邢莊聞被夜間狂風暴雨打壞三十一隻



風息之後止救屨五隻其餘二十六隻盡皆打散總  
之今歲奇雨在淮揚一帶則與康熙十九年相同而  
究徐上游則倍於十九年不止除各州縣被災情形  
應聽督撫臣查報外臣在河言河所有河道情形臣  
謹一一爲我

皇上陳之查黃河水勢自七月十一以後至今竝未再漲  
江南碭蕭豐靈邳睢六州縣黃河兩岸堤工俱皆保  
固惟徐州南岸牛市口地方堤外積水原淡於七月  
二十七日被異常大風鼓浪將堤土頃刻打去彼時

雖搶救有人而風雨大極連人打落堤內有力莫施  
不半日而打開堤工二十餘丈所幸離河甚遠且黃  
水並未出漕積水兩日流乾隨即掛口該管官弁見  
在挑土填築不足爲患駱馬湖因山東異常大雨各  
處山河之水一時下注全歸駱馬湖內自七月三十  
至八月初一一晝夜之間驟長湖水八尺五寸水勢  
如山突然湧至毋論平地橋梁盡皆行水直至初三  
方始消落水消之後逐一查勘知攔馬河減水橋壩  
六座衝損十之五六并據報去厰房住屋二十餘間

草蘆大甌烏樟葉椿木石灰菘麻等料甚多目今水已大落然秋汛未終其衝損橋壩必俟霜降以後方可興工修補至此處原係山岡且離河亦遠亦不足爲患也惟邳宿兩州縣運河乃漕運咽喉至要之地其東西兩岸堤工臣於大修加修案內節次費過無限錢糧人力其西堤以內週圍百餘里數千頃田地自康熙二十年至今業已豐收四年矣本年七月十一日以前雖運河水面離兩岸堤頂不過二三尺不等而東堤外駱馬湖水面離堤頂尚有六七尺不等

也豈期山東各處之水不論河湖田地普面奔流以致一晝夜之間駱馬湖水陡長八尺有奇八月初一日先從東堤頂上普面過水一二尺漫進運河隨從西堤頂上漫灌邳州將甬離水患甬收四年之田地數千頃仍俱付之波臣矣此宿遷縣以上黃運河湖之情形也至宿遷縣以下至於清口亦因駱馬湖水陡漲雖大半由攔馬河橋壩洩去而仍有小半歸入黃河以致最高堤頂止出水一二尺不等而稍窪之處河水竟與堤頂相平各官弁危急羽書絡繹不絕

甚至北岸宿桃交界之古城鎮街業已過水二三尺而桃源之曹家嘴堤頂外半邊與水面相平內半邊忽坐陷寬丈餘者長百餘丈此二處離河至近設有疎失則立成奪河之患所幸古城鎮街原係山岡土性堅硬方一面過水之時隨即飛下小埽挑土搶壓不二日而保固無虞其曹家嘴後半邊坐陷之處乃係遠年虛鬆之舊堤土也幸加修築內前半邊新加之土夯築堅固獲免淩裂由今以思此工之得免大患者實

皇上洞燭機先發帑加修堤岸方得保全否則微臣既不  
敢請帑又無力加修延至今日一壞而不可復救矣  
臣追思往事殊不禁汗流浹背感戴

君恩于生生世世也至於溫州廟古城減水壩二座因水  
平橋面異常衝擊以致壩底礮心亦多傷損日來水  
勢消落業已堵閉斷流俟冬初勘明另議修補此宿  
遷以下清口以上一帶黃河之情形也若清口以下  
至於海口黃河水勢與七月十一日以前相倣惟山  
陽縣南岸真武廟以上韓家莊堤工於八月初六日

全河入溜南徙新生險工一百六十餘丈地土虛鬆雖見在下埽而隨下隨衝不能存立查此處內有遙堤足爲淮城保障且險處土雖極鬆而離險數里卽屬膠土斷無奪河成決之患者亦不足慮此清口以下至海口黃河之情形也他如高家堰一帶洪澤湖水自七月十三日起至月杪止業已耗去一尺四寸今八月半個月內仍復加長一尺二寸比前尚少二寸最可慮者一起西風爲害不小臣見在百計設法作防禦西風大浪之策以期務保無虞若夫寶應高

郵江都三州縣運河水勢異漲非常處處皆平堤頂  
惟賴高郵城南各派水壩晝夜宣洩且減壩宣洩不  
及者卽從旁邊卑窪堅堤之「平漫而過蓋此處地  
高土硬且有閘壩之水相抵凡從矮堤平漫之水溪  
不過三四五尺入冬不久卽可涸出不能爲患不似  
城北東堤清水潭等處之一決不可復救者比也此  
運河湖堰之情形也總之今年奇雨非常之久以致  
水勢非常之大雖工程不無損傷而損傷之處俱屬  
易於修補其緊要危急幾有奪河成決之患者幸而



華之書之書此卷一  
保固無虞此皆我

皇上洪福齊天之所致也至於損傷之工容臣俟水勢消  
定確勘情形隨機修補其經修防守各官應否

題叅之處亦容臣逐一查明遵例具

題可也臣謹將黃運河湖水勢情形再疏

題報伏乞

皇上睿鑒施行

請免課程疏

開歸堡夫

題爲再

請豁免堡夫課程柳料以甦苦累以固河堤事竊照微臣  
恭蒙

聖諭往看河南工程臣欽遵於康熙二十四年四月內前  
赴河南巡歷查勘間北有民人擁臣馬首悲泣呼號  
問其原委則開歸二府屬之堡夫劉文盛等備言身  
等每年止領工食銀三四兩不等餬口尚且不敷不  
意順治十三年管河道方副使突然建議令身等每

年辦柳一百束蔴十筋芟三十套纜二十條名曰課程遂以爲例血賠多年皮穿骨盡前蒙巡撫都院并本部院兩次會

題請免課程部議不准今身等田產變完漸及妻子身家已竭性命難存叩乞本部院再疏具

題豁免身等課程如或不然身等情願不領工食退役歸農等因又據開封府南河同知黃錦北河同知主與元歸德府管河通判劉禮管河道副使祖文明各據各州縣申據各堡夫哭稟哀求或免課程或退工

食等因通詳前來又准河南撫臣王日藻咨同前事  
各等因到臣該臣看得河南開歸二府屬額設堡夫  
九百一十四名計其工食每名每歲止牽領銀三兩  
八錢有奇論其力役而灌溉堤園官柳修補車道馬  
路填築殘毀水溝狼窩獾穴頗不安閒順治十三年  
管河道方大猷議令每夫每歲辦柳枝一百束蔴十  
觔芟三十套纜二十條謂之課程自課程之法立而  
堡夫苦累不堪矣查課程之繁莫過於柳今卽以柳  
論之每夫一名採青柳八千緡而貯之附近廠中不

過一月之勞耳何至於苦殊不知辦柳非難看守此柳爲難而轉運此柳爲尤難此其所以苦累至於不堪也蓋堡夫所辦之柳若隨辦隨用則堡夫之事自畢矣然辦柳之時非用柳之時也有柳而不卽用勢必仍貯堤旁堤乃通行人之大道也損失蹂躪之事何日無之此柳一日不交工堡夫一口不能釋負此看守之苦也又貯柳之地非用柳之地也或數年不用則數年堆貯堤旁或一朝取用則一朝卽應運去需柳之處與貯柳之處動輒相隔數百里卽由船轉

運而其搬柳上船往返動經三四五六七八十里不  
等一夫窮日之力不能搬柳一束以一日不能搬柳  
一束之堡夫而忽令將一年所辦之一百束與二三  
年所辦之二三百束逐束交船斃斃夫力其何以堪  
此轉運之苦也不惟是也竭堡夫之筋力若柳可適  
用有益於工尚可也奈何所辦所貯之柳隔一年則  
枯隔兩年則朽三年之後則寸寸斷落漸成灰土矣  
此等久貯之柳多年不用悉皆變成灰土堡夫以不  
能再賠控告委官驗明之後不容不盡行豁免竭夫

力以辦柳而不免於盡成灰土豁免其賠而不得其  
用究何益於工哉况堡夫因有此柳之累反將修補  
殘缺等力役盡行廢弛是不惟無益而實則有損矣  
且河南工程不比江南江南歲修全賴長椿大埽抵  
敵洪流河南土性極鬆下埽每難存立是以水勢近  
堤即便豫築月堤以爲重門之障其必須用埽者不  
過如滎澤護城堤等一二工而已臣因河南課程柳  
束久貯不用盡成灰土淡爲可惜見在僱覓船隻將  
近年堪用之課程柳束運至江南以爲歲修工用不

意非大工之需僱船甚難將江南歲修柳價每束銀三分盡爲水脚而尚苦不足則運來亦甚非計且江南新栽之柳日漸長大將來斷無舍近圖遠之理是豫省課程終歸於無用已耳總之此等課程不辦則可甦小民之累而亦有益於河堤仍辦則小民之困愈深而修補之役愈廢允當急與除免者也竊查此案先於康熙二十二年內經豫撫臣王日藻特題請免部議行臣查議臣查明有損無益原委題請照撫臣原疏豁免而部覆堡夫每年所輸值銀六



千餘兩仍議不准豁免此部臣從有用之錢糧起見也殊不知名爲值銀六千餘兩究竟大半豁免有課程之虛名而無用柳之實濟反弛堡夫實在之力役其損良多也伏乞

皇上睿鑒俯念堡夫辦輸課程實係有損無益

敕下部臣自康熙二十四年爲始將原任管河道方大猷條議開歸二府屬堡夫課程一案槩予除免將見夫力稍甦修防不廢有裨河道民生良非淺鮮矣臣謹會同河南撫臣王日藻合詞

題請伏乞

敕部議覆施行

--	--	--	--	--	--	--	--	--	--

請循定例疏 錢糧免其具題

題爲

請循河工定例以便遵守以固河防事竊照黃運兩河工  
不下數千餘里其間防守機宜有歲修搶修之別凡  
大溜直衝堤根搜刷堤底必須長椿大埽抵敵洪流  
以免奪河成決之患且下埽之後每年自春至冬有  
時而折陷有時而衝損尤須隨折隨套隨衝隨補刻  
刻守護時時修防每一工而費帑在五百兩之外并  
至數千兩以及萬餘兩不等必須逐案預爲

題估俟部議允估奉有

俞旨之後又復駁查核減造冊奏銷者謂之歲修又如石岸石閘石壩等項或數年一修或一二十年一修其費俱在數千金或一二萬金之外者亦應預先

題估工完奏銷者亦俱謂之歲修若河道偶然變遷而未成大險堤岸閘壩偶被損傷而未至大壞彼時若稍稍遲慢則工程漸損而需費愈繁是以該管廳員一面詳明臣衙門一面飛星運料隨機修防每一工而費帑或數兩或數十兩或二三四百餘兩總在五

百兩之內者將用過錢糧冊詳臣衙門確核刪減造入歲報冊內彙

題開銷者謂之搶修又如上年原係大險費過錢糧甚多而次年忽然平緩用料無多計值不出五百兩之數者亦歸搶修案內銷算此歷來成例也又每年歲修工程俱動河庫錢糧辦料下場聞從前專有一班河棍或自稱木商赴官領銀買木或自稱草戶自稱柳戶蒜戶赴官領銀買草買柳買蒜究竟領帑到手任意花費險工立等料物而任催不前貽誤不可勝

言嗣此而後椿木一項必確正有身家之木商方准預給帑銀然亦不過先給一半餘俟木株交工完畢方始找給卽草束蔴蔴等料凡有殷實草戶蔴戶領帑者亦止先給些須隨後陸續查找又柳枝草束大抵產自民間凡工程緊急之時欲求濟急不得不徑令民間辦交彼時預發錢糧每有衙役中飽之弊於是先收民間之料計其所值與之抵兌正賦錢糧此法一行小民最沾實惠凡此料價均非當時全給者此不特歷來成例亦屬理勢必然總緣河帑爲保護

民生運道之資不敢不慎重也今部臣於康熙十八年間議覆康熙十四年歲報河道錢糧案內稱嗣後凡有應給之款卽於該年給發不得仍前隔年找支等因自十八年以至於今六年之內屢駁不休并令將搶修工程亦俱預爲具

題等因臣竊念部臣爲

朝廷上卿綜理溥海內外一切錢糧何等重大凡部臣所議皆從慎重起見臣自當一一祇遵何敢故爲違拗但其間就理有難以必遵部議者在部臣亦止可得



其大綱而不獲知其細故也蓋河道額設錢糧爲數有限而修防黃運河湖上下兩岸數千餘里工程若非量入爲出斟酌緩急刻刻籌算力圖節省則發帑最易而收料不前貽誤匪小况河庫雖不能充盈亦當畧有見銀存貯以備不時之需若不准隔年找支則勢必當年盡行發完設或於河庫空虛之候而忽生意外危急之工束手無策豈不立釀大患耶是以歲修料價銀兩必須仍准隔年找支方於河工有益臣所謂難以必遵部議者此其一也至於搶修工程

原係搶救一時竝非終年修守者可比若必預爲

題估則耽延停閣貽悞甚大况歲修工程每年不過數十件而一估一銷尚且案牘盈箱臣核造艱難年年展限若搶修工程每歲不下一二百件若亦照歲修之例一估一銷則每歲應添本章三四百件不特徵臣萬萬不能料理亦斷不敢將些須河帑逐一上瀆宸聰臣所謂難以必遵部議者此又其一也伏乞皇上俯念河工關係重大額帑有限不便盡行濫支搶修費帑無多危急之秋不便耽延釀患

漢書卷之九十五  
三  
敕下部臣准臣仍循往例應當時給發者容臣當時卽給  
應隔年支給者容臣隔年找支并一切搶修工程仍  
免

題估庶省章奏之繁多而得河工之實濟有裨河防良  
非淺鮮也臣謹特疏具

題伏乞

敕部議覆施行

霍霖漲漫疏

題爲霍霖之漫漲非常杜患之綢繆貴蚤謹

請再加善後工程以期永奠下河永拯民生事竊照高寶  
等七州縣下河田畝久被積水沉淹我

皇上聖駕親閱河工目擊萬頃汪洋情形特頒

上諭不惜經費命臣等大加修治其修治事宜臣見於欽  
奉

上諭事另疏內具

題請

旨矣惟是今歲異常靈雨各工處處陞危其陞危情狀臣  
已節次具疏

題報在案因思我

皇上開浚下河之舉真爲拯救災民第一善政行曠古未  
行之事也臣奉

命董理斯役自當竭盡心思耳目之力百計綢繆不留絲  
毫罅隙以貽後日之患庶盡微臣職掌若臣稍有泄  
忽則上負

朝廷下負百姓臣罪不容誅矣今下河一工費帑至二百

七十餘萬兩工完之後必須永無他患始稱益國利民若一有芴潰勢必全功盡棄爲害不可勝言矣然下河之上則有運河運河東堤所以攔高寶諸湖之水不使隨處漫淹下河田畝者也運河堤工之上更有高家堰一帶臨湖堤工所以攔洪澤之水不使全湖傾注助高寶諸湖水勢衝斷運河東堤者也故運河東堤爲下河屏翰而高堰堤工更爲運河屏翰斷須逐一加修俾無意外之患庶下河可以永奠民生亦可永遂也查高家堰一帶臨湖堤工共長一萬五

千六百五十餘丈臣先於加修案內估每丈加土二十方三十餘方不等蓋前此堤根積水不過寬三五十丈深一二三尺原擬稍晴數月積水漸消隨即設法築堰挑運料小河一道每丈不過多費銀一二兩即可取挑河之土加幫堤工也不意三年以來時雨頻降堤根積水日增寬至百餘丈一二百丈不等深至三四五六尺不等如欲設法築堰每丈必須多費銀五兩有奇方可築成查此工通共止估銀九萬四千餘兩每丈止牽估銀六兩有奇若築堰費去五兩

有奇則所贖之銀不及一兩安能挑挖如許幫堤土方故不得不停止挑河惟作隨機設法取土加幫之計今已歷兩載有奇而尚未加幫完竣且費盡人力設法加幫之土而湖水大極一起西風每被擊去今臣再四籌酌必須於臨湖一面加釘密排椿一路內下丁頭小埽與見在堤頂相平然後於埽上加土三尺緊壓丁埽以禦風浪再於堤內離堤五六七八十丈地面另挑運料小河卽取挑河之土築束水堤一道束大堤內積水於小河之中以便運料運土搶救



工程庶風浪大作之時可以隨便施用人力不致束手無策眼見凌裂之虞內應加密樁之工約計一萬三千丈用料多寡不等每丈牽用一尺四五寸圍圓木二十根柳枝三十束纜柴二十束埽柴八十束紅草六十束并買毛竹銀一錢計需料價銀九兩七錢六分一萬三千丈共需料價銀一十二萬六千八百八十兩應築束水堤一道約長一萬一千五百丈築頂寬二丈底寬六丈牽高八尺每丈用土三十二方運挑帶築每方給銀一錢八分共需土方銀六萬六

千二百四十兩又上自武家墩下至楊家廟舊有河  
形一道計長四十餘里儘堪洩減水壩減下之水穢  
因內中有數段淤淺之處不能暢注旣不能通舟運  
料而又每致旁流今應挑淤一律查此淤淺之工約  
長四千丈每丈挑寬五丈深五六七尺不等其挑起  
之土儘幫兩岸堤工約計每丈需夫工銀三兩共需  
銀一萬二千兩又自楊家廟至寶應湖邊一帶平灘  
計長四千丈應挑河一道以引上流減洩之水直達  
上湖俾免壅積漫堤之患且可使裝料之船直抵高

家堰一帶以爲運料之資其河應挑面寬六丈底寬四丈深八尺每丈挑土四十方所挑之土運至西岸離河十五丈去處堆築成堤此工以挑河爲準每方給銀一錢二分計需銀一萬九千二百兩以上四工共需銀二十二萬四千三百二十兩如式完工之後凡高家堰一帶臨湖萬餘丈工程雖當極險危之時而料齊土足隨機修防足以搪風禦浪障洪澤湖之水不使傾注永爲運河之屏翰者也至運河東堤自淮安起歷寶應高郵至江都之灣頭止并西堤殘缺

應修之工共約長五萬丈每丈用土少者十餘方多者四十餘方牽算每丈加土二十五方取土難易不等牽給一錢七分一方每丈需銀四兩二錢五分五萬丈共需銀二十一萬二千五百兩又自高郵湖至邵伯湖雖舊有小河一道僅深三四尺不等寬四五丈不等是以水漲之際不能宣洩直待非常大漲則又一片漫淹又盧港至蕪城墩迤北金灣三閘至芒稻河此二處亦俱有小河而淺窄更甚今應大爲挑挖務極寬深俾水勢小漲之時即便逐漸宣洩免致

壅積爲患此三處共約長八十丈每丈約挑土一百  
方運至十五丈之外堆築成堤此工亦以挑河爲準  
每方給銀一錢二分計需銀九萬六千兩以上二工  
共需銀三十萬八千五百兩如式完工之後凡運河  
與高寶諸湖之水攔束有資宣洩有資可以永保安  
瀾無隨處漫餓之患足爲下河之屏翰者也至此疏  
內共需銀五十三萬二千八百二十兩臣不敢請費  
錢糧擬於下河屯墾額餘官田所收籽粒佃價等項  
內銷算但此等工程內有十分之六係必不可緩斷

須於一二年內先爲興舉以待下河完工者其餘十分之四應俟下河工竣之時陸續興舉者臣請

皇上敕部借撥銀三十萬兩容臣先將必不可緩之上星飛僭竣其應陸續興舉之工俟收得籽粒佃價即便陸續興舉至借撥銀三十萬兩亦與下河借帑一律俟工完之後分爲五年解還戶部蓋此等工程實爲下河屏翰臣惟力圖鞏固爲永奠下河之計以期工必可成事必有濟

國賦日增而民生日遂庶不負我

皇上已溺已飢之心

至聖至仁之念也臣謹具

題伏乞

皇上睿鑒

敕部議覆施行

恭謝天恩疏 鹿脂等件

奏爲恭謝

天恩事九月十六日據臣子靳治豫從

京師寄到家信一封內稱九月初四日蒙

皇上召臣子治豫至

乾清宮

御榻之前

天顏咫尺面問臣子河道近日水漲異常臣家信內有無  
工程情形言語臣子治豫照臣家書所有之言一一



回

奏蒙

皇上面諭云朕去年閱工親看黃河兩岸堤工在爾父人力已盡無可再加倘或更有踈虞亦是異常天災了今年如此大水若保得無事黃河必能加刷寬濶將來就可恃矣等因欽此臣讀畢

天語感極而繼之以泣伏念臣本一介寒微才庸質魯蒙皇上屢次拔擢授以總河之職歷任八載有奇小勤不足以補拙無勞不足以蓋愆乃

皇上不加譴黜屢

賜優容臣之感激業已淪肌浹髓仰報無由矣今歲商羊

肆虐竒雨爲災

皇上念切河工差官查問卽令臣子治豫馳驛前來俾臣  
數年不見面之父子忽然聚首歡忭非常迨臣子治

豫回京復

命又蒙

皇上向臣子問臣好否至於河道情形災荒景狀屢

聖懷而賜

明問者

天語甚多字字皆憫念兆姓之言臣俱不敢縷述又蒙

皇上賜飯賜茶并

親諭一等侍衛宜都額真吳大禪將伊自己被褥等項讓

與臣子治豫住宿馬匹弓箭等項讓與臣子治豫乘

用次日跟隨

聖駕行圍夫治豫以無才無學之童穉小臣而得親瞻

聖朝蒐狩之盛

恩榮極矣迨蒙

恩之後又蒙

賜御膳珍品鹿脯鹿尾鹿舌等項治豫郵寄來淮臣望

闕叩首謝

恩亦得親嘗嘉味凡此

鴻恩皆人臣不易得之異數臣鐫鏤臟腑頃刻不忘實以  
恩深難報爲懼今又蒙

皇上謂臣人力已盡無可再加臣竊思庸劣如臣不識因  
何而得邀

聖主之寵榮如此其極憐憫如此其至此臣之所以感極

而繼之以泣也至於黃河水勢日來業已大定山陽縣南岸韓家莊缺口內水微流緩離口百餘丈之外僅深二三尺不過一月之內即可斷流其餘各險如山陽縣之馬邏安東縣之便益門清河縣之玉皇閣桃源縣之烟墩龍窩九里岡屢報險急然俱已護定惟邳州之五工頭溜抽底埽險急非常睢寧縣之武官營大溜南侵刷去遠灘數百丈逼近堤根似此二工乃目前之至險然其間應守應棄臣見在隨機斟酌而行期於不至爲患若夫防守河工原屬微臣職

掌此等危工本不應上竇

天德祗以

皇上洞晰河道機宜刻刻以民生運道爲慮故敢畧陳大  
概以備

聖明睿察至臣家三世受

國深恩而臣與臣子治豫之受

恩更深更重計惟有捐項糜踵竭犬馬之心力仰報

皇恩於萬分之一而已臣謹恭疏奏

謝謹具

奏

聞

恭報赴京疏

題爲恭報微臣起程赴

京日期事該臣除一切河務交與該管官員謹慎看守

外臣卽捧佩

敕印率同按察使于成龍於康熙二十四年十一月初二

日自清江浦起程訖所有起程日期臣謹恭疏

題報伏乞

睿鑒施行





欽奉上諭疏

海口

題爲欽奉

上諭事該臣看得高寶江興泰山鹽等七州縣下河田畝  
被積水沉淪者自明代已然其患非一日矣我

皇上親幸斯土目擊黎民昏墊之苦

特沛恩綸大加修治旣

遣臬臣于成龍專管督理又以微臣任河年久應知挑浚  
機宜并

命微臣綜理其事此蓋曠古未行之盛舉也蓋堯舜而後

言治水者不過求其順軌湍行安流歸海而已若河道業已疏通而并欲將從前積水之區盡使變爲沃壤凡有一夫不獲悉皆湮

宸衷如我

皇上今日之至聖至仁誠遠軼三代直並唐虞者矣臣等

生逢

盛世身沐

洪恩敢不捐頂糜踵黽勉奮發力圖報效必期有成乎惟是治之之法宜握要領審全局而曲圖節省也蓋不

握要領而漫然施工則徒糜

國帑功必無成不審全局而泄然從事則工雖倖竣隨必潰壞不圖節省而循例估費則需帑太多終成築舍此皆不可也今淮揚之人多侈言治法矣究其作何經營不過執禹貢先治下流之說以爲多挑海口淤沙洩去內地積水使汪洋之區涸出乾地然後查勘舊渠逐一挑浚等語言人人同而已殊不知禹之先治下流乃因兗州地窪而然也今此七州縣下河海口高昂內地低於海潮不下五尺從前海潮內灌

不可以耕曾經宋臣范仲淹築堤以障之堤成而民  
享其利名其堤曰范公堤頌之感之至今不衰今若  
循先挑海口之議則是引潮內侵與范堤障水之意  
相悖不特積水必不能洩而糜帑殃民將無底止矣  
治之之法全在束水注海夫內地既卑於海潮五尺  
則應於內地築堤高一丈六尺以高一丈六尺之堤  
自足束高一丈之水內水既束高一丈則高過海潮  
五尺其趨海之勢必速而無留滯之虞矣堤既高一  
丈六尺則堤頂高過水面六尺其束水之力必堅而

無芻潰之患矣臣所謂宜握要領者此也築堤束小固爲握要之計然運河之新舊減水閘壩何止數十處卽下河七州縣之河渠溝港所以承運河各閘壩之水者何止數十道若不盡行築堤以束各處減下之水則水仍散亂無收漫漭田畝若欲一槩興築則其費數倍何止需帑千餘萬金臣再四籌維查減水壩之最大而多者莫過高郵城南今應將高郵城北并車邏以南邵伯鎮以北之零星閘壩俱行閉塞拆取石料移於高郵城南邵伯鎮南二處改建浚底大

石關二座俾洪澤湖減下之水並天長盱眙各山澗之水由高郵城南之南關大壩五里八里柏家墩車邏等壩并新議建之大石關內洩去十分之八邵伯鎮南已建之減水壩並新議建之大石關內洩去十分之二邵伯鎮南所洩之水半由芒稻河並通州入江半由串場河入海高郵城南所洩之水應自車邏鎮起築大橫堤一道直抵高郵再自高郵城東起築大堤二道歷興化縣白駒場至海東各關壩洩下之水彙歸一處直達大洋且必量入爲出寧使出水之

地寬大於進水之地使所進之水安流下注而無擁  
刷堤工漫潰洩裂之虞故內地窪區築堤高一丈六  
尺之河止寬一百五十丈海灘高地築堤高一丈之  
河必寬一百八十丈也臣所謂宜審全局者此也至  
於水工堤堰艱於取土者舊例每方給銀三錢尙有  
攤歛夯礮之夫在外然三錢一分之土近者不過取  
於數里之外遠者不過取於一二十里之外今此番  
堤工興築於萬頃汪洋一望無際之中近者數十里  
見土遠者百餘里見土艱難旣數倍於尋常則其不



費之費從何措處查雖築之水工共長六萬三千丈  
牽需土六百零四萬八千方毋論取土之艱數倍常  
時卽以加價一倍計之而此六萬三千丈工程卽需  
帑三百六十餘萬兩矣且夫船兩難曠日持久不知  
竣工於何日也臣百計籌畫作就近取土之計其法  
先定堤基隨用船裝遠土於水內築成圍埂其埂出  
水二尺中間寬三十丈長五十丈圍埂旣成一面用  
草料防護一面將埂內之水車乾然後於離堤基十  
五丈之外挖土挑至堤基之上密加夯破築成大堤

其堤應築成頂寬二丈底寬十丈高一丈六尺高堤  
一丈用土九十六方連船塋築堤之土並車水防塹  
一切夫工器具料物以及陰雨食米等項每方止需  
銀二錢六分六萬三千丈共止需銀一百五十七萬  
二千四百八十兩較之尋常估費者約省過半臣所  
謂曲圖節省者此也司臣于成龍於奉

旨任事之後臣卽令其先行相度各出已見以資啟發該  
司閱歷月餘其訪採輿論審量經營之處頗饒苦心  
然亦持先開海口及費帑多而歲月艱難之議於是

臣與該司面爲商酌作聚米之形區畫開浚價築諸  
法令該司覆加確酌今據該司冊估前來更增護堤  
埽料以爲周詳之計尤屬允當至於應舉工程除水  
工六萬三千丈需銀一百五十七萬二千四百八十  
兩之外其餘一切挑築工程大畧與舊例相同止於  
築堤者每方連陰雨食米等項給銀一錢六分連挑  
帶築者以築成堤土爲準每方連陰雨食米等項給  
銀一錢八分內一自白駒場至海口應挑大河二道  
共約長二萬四千丈卽以挑河之土築成頂寬二丈

底寬七丈高一丈之大堤二道每堤一丈用土四十  
五方連挑帶築每方給銀一錢八分二萬四千丈共  
需銀一十九萬四千四百兩又自白駒場北至廟灣  
南歷海安泰州至芒稻河約共應築堤十五萬丈其  
堤大小不等用土多寡不等土方價值一錢六分一  
錢八分不等共需銀七十六萬八千兩高郵州邵伯  
鎮南各建大石閘一座白駒場南北兩岸亦各建大  
石閘一座共建石閘四座除拆取廢閘石由外其添  
買石由轉運舊石以及椿木灰米錠錫夫匠工食等

項並開旁添建木涵洞二百個分引河流稍殺閘門  
內建瓴之勢共需銀六萬兩又前工盡完之後上流  
湖河之水悉由新築水工大河內入海涓滴不能旁  
洩若遇天旱之年難免禾苗枯槁今創建木涵洞二  
百個隨時啟閉以資灌溉爲永遠裕

國利民之計每個需銀一百兩共需銀二萬兩又水工  
大堤六萬三千丈地勢最卑而河寬水急風浪時侵  
若不預爲保護之計則一時風起便有倉皇無備束  
手莫措之虞此堤一有損失則全功盡棄爲害非輕

今估將此六萬三千丈工程盡捲四五尺高順埽再加丁頭草橫壘鑲護每堤一丈估用草蘆椿柳夫匠工食等項共計銀二兩四錢三分六萬三千丈共需銀一十五萬三千零九十兩又白駒場至海口共堤二萬四千丈雖地勢稍高而河寬水急亦應用草防護每丈需草價銀六錢共需銀一萬四千四百兩以上修治高寶等七州縣下河工程共需銀二百七十八萬二千三百七十兩伏乞

皇上敕下部議將所需前項銀兩先賜撥發一半以便乘

時僭工餘容陸續請撥其完工限期請自興工之日  
爲始除陰雨土凍難以畚鍤之日不計外請限三年  
告竣庶事無諉卸而可免曠日持久之虞矣臣伏念  
此番經理蒙

皇上如天之仁有不惜帑金惟冀民生得所之  
聖諭則似乎支費不難然臣又念

國帑自有

國用今請撥至二百七十萬餘兩之多而不思所以補  
苴之計非臣心所敢安也况若補苴無計則亦無可

如何今以臣之愚

臣不力

奏請行尤非臣心所

工所暫時之借支

解還戶部其解還

大堤六萬三千丈

料以及建高郵城

百個共需銀一百

爲七州縣田畝而



河止兩岸堤工十五萬丈並邵伯鎮南白駒場兩岸  
石閘共三座所需銀八十一萬三千兩乃係創興各  
場運鹽之大利者也何也蓋水工海口堤河工竣之  
後各減水閘壩之水既盡歸新河入海則七州縣水  
渰原額之地畝必皆盡行涸出地既涸出則串場河  
亦涸而淮南綱鹽一百三四十萬引無從輓運故必  
須並築串場河兩岸之堤再并建邵伯鎮南白駒場  
新河兩岸之石閘三座也臣查見在淮南運鹽之艱  
有三一則串場河底高低不一天氣稍旱則河稍高

之處即便淺澁而多輓拽之費矣二則串場河不通  
運河凡引鹽出場必另用小船由漫灘積水湖內盤  
壩而過方到運河船上是又多盤脚僱船之費矣三  
則鹽船必經芒稻河每遇水漲之候大溜掣船異常  
危險非用數百人增添繩纜設法輓拽不能過溜是  
又多僱夫之費矣以上三費每鹽一引必須增費一  
二錢不等若此築堤束水之工一成則運河大船可  
以竟至串場河受載自串場河開行或過高郵閘或  
過邵伯閘寬河大港一水直達揚州既無淺澁之艱

又無盤壩之阻更免溜掣之險省費既多而鹽船又得安流計日可到故曰創興運鹽之大利也臣竊以補帑之法凡因有利田畝而興築者則所費之帑應於田畝項下陸續補還其因有利運鹽而興築者則所費之帑應於鹽引項下陸續補還查應於田畝項下陸續償還者計銀一百九十六萬九千三百七十兩其償還之法臣遍歷下河七州縣地方西至運河東至大海南至江泰舊河北至黃遙堤按其廣袤之遠近察其積水之淺深約畧科之將來完工之後除

去河湖城郭村鎮墳塋鹽場柴蕩之外可得田十四  
五萬頃而此七州縣全書所載額田不過十一萬頃  
是額外餘田不下三四萬頃矣卽以泰州一州而論  
地方平行廣濶按法而稽應有四五萬頃今全書額  
田僅有九千二百餘頃蓋所種實田止有此數而餘  
皆沮洳沉沒之區耳一州如此他可類推故曰工完  
之後則額田而外可得餘田三四萬頃也今臣擬將  
涸出之地逐一清丈先將原額數內之田盡行給主  
其原額之外者額餘官田當廣招窮民墾種然尋常

招墾之法其田率皆荒蕪之土而所以招徠者不過  
給牛種緩陞科而已夫土旣荒蕪而所給又不敷於  
農本則耕者勢難盡其耘耔之力力旣不盡則雖寬  
緩起科之歲月而民迫於饑寒終不能使蒿萊變爲  
沃壤理勢然也今臣等擬督廉能之吏搆草舍備牛  
種給衣食俾無告之災黎先去饑寒迫身之苦而有  
安居得業之樂自無不子來恐後盡力開墾矣初年  
則倣民間佃戶之例與之共分籽粒民以所分之籽  
粒償本年之衣食官以所分之籽粒爲下年之墾本

如是三年之後民業漸覺殷足然後做民間授受之  
例許其納佃價於官給爲永業此等田地照此式開  
墾之後在民間授受俱值銀一二三兩一畝至瘠者  
方在一兩之內今擬地畝肥瘠不等肥者止取佃價  
銀一兩二錢瘠者止取佃價銀六錢每畝止牽取佃  
價銀九錢額餘官田最少亦有三萬頃可得佃價銀  
二百七十萬兩內以一百九十六萬餘兩解交戶部  
抵還借支之項其餘七十餘萬兩應將高家堰臨湖  
堤工並山寶高江四州縣運河堤工再加高厚更將

山清好寶高江六州縣境內凡有關於高寶下河之零星應挑應築工程逐一料理以期永保無虞爲久莫下河之計又此中或有存贖之銀并二百七十萬兩之外或更有多得佃價銀兩悉皆戶部充用蓋高堰運河并此六州縣零星各工俱與下河唇齒相依者也各工安則下河亦安各工設有不虞則下河亦隨之浚裂今以下河開墾之餘資爲永安高堰運河等工之計誠

國計民生萬世之利也其佃價二百七十萬兩乃必然

可得之數而將來又出於民情之最願最樂者所謂  
應於田畝項下設法償還者也其應於引鹽項下陸  
續償還者計銀八十一萬三千兩查淮南綱鹽每歲  
一百三四十萬引河堤告成之後每年既可省盤剝  
之費一二錢不等今止令其於所省之內每引每年  
納河堤銀九分以七年爲率七年數足之後免其再  
納計每年可得銀十二萬兩不過七年而此八十一  
萬金之帑又可補還無欠此亦必然可得之數在鹽  
商量捐費之資而坐享久遠之利所謂應於引鹽項



下陸續補還者也至此工地方廣濶錢糧浩繁且清查屯墾事務冗雜應暫設廳官六員專管招徠鼓舞督墾開屯及清查地畝分發錢糧諸務并暫設州縣佐貳官十九員以分任之此暫設之廳官佐貳官俱俟工完之日另疏請

裁至於挑築堤河二十三萬七千丈并建大閘四座木涵洞四百個應委監理官五十四員分管官二百餘員分頭疾儻尅期告竣所委監理分管等官俱係客官應

請照康熙十七年間議政王等議覆微臣敬陳經理河工事宜第六疏事案內之例於工完之日容臣列名具

題恭請

皇上洪恩准其照見任應陞品級加二級從優卽陞其因公呈誤官員准其還職其暫設廳員并州縣佐貳官員應俟清查地畝墾屯完畢將所費

國帑二百七十餘萬兩逐一償還之日更請

皇上洪恩准其加三級從優卽陞其非正途出身者俱照正途一例陞轉以鼓有功勞吏除應設廳官六員臣

見在繕疏保

題外其應設州縣佐貳官十九員并應委監理官五十四員容臣等一面遴選續疏具

題至於應委分管官二百餘員容臣等照大工之例隨時委用彙造各官履歷工程清冊咨送吏工二部可也除一切未盡事宜疏內不能備載請照前此大修工程之例凡些小事務應竟行者容臣等籌酌隨便竟行重大事務應具

題者亦容臣等商定不時入

告并將估計清冊揭送工部查核外臣謹具

題伏乞

皇上睿鑒

敕部議覆施行



分添縣治疏

甌爲江南徐泰海山四州縣地廣民刁安沐清桃等縣  
河淤土廣謹陳分併添設縣治事宜以全

國賦以便民生事竊惟從來畫地分官所以爲親民之  
計也

國賦以之而充民生以之而遂但按其疆域大州縣不  
過百十餘里小州縣不過百里以內不等官日與民  
相親而民亦日與官相習旣無鞭長不及之虞亦無  
扞格難操之慮過是則非宜矣故自漢唐以來每有

今昔異宜隨時分併之事或因其山川之形勢或因  
其民物之聚散而各爲之制焉考之史冊無代不有  
微臣奉

命督河前後十有餘載往來於淮揚徐各屬之間者不啻  
如織久知徐州爲南北要地而幅幘甚廣民情亦復  
刁悍凡遇催徵輒多逃避境外相習成風恬不知怪  
以是地丁倉糧年年拖欠不完知州不能兼顧只得  
聽其頑梗無如之何不過三二年便卽考成望誤而  
去故凡爲徐州者雖有長才無從處置反視官輕一

葉絕無顧戀振刷之心矣似此因循則民風何由返  
正

國賦何由足額耶臣愚以爲應當割設小縣以分治之  
又秦州僻處海濱週圍六百餘里頗稱魚米之鄉庶  
而且富因之事務繁劇一牧不能兼顧則刑名錢穀  
之事未免坐此失彼民情容易爲姦臣愚以爲亦應  
割設小縣以分治之又山陽縣介於淮黃兩河之間  
東西三百餘里南北一百餘里前經黃水淤墊之後  
海口逾遠寬廣幾至七百餘里遼濶非常一令不能



兼顧淤墊膏腴盡被隱占無計清查臣愚以爲亦應  
割設小縣以分治之又海州地方亦屬寬廣乃明季  
殘破之後地土拋荒甚多且與沐陽安東清河桃源  
宿遷接壤所有各州縣沮洳湖蕩盡爲黃水淤墊膏  
腴亦未清查聽其隱占臣愚以爲應將海沐安清等  
縣之中添設小縣分割而專治之以上在徐州而分  
一縣則呼應自靈旣可以除從前強悍之習更可以  
弭將來意外之萌在泰州山陽而各分一縣則地勻  
而事簡料理當而民不擾在海汰等州縣之中而添

一縣則淤地難欺貧民卽有樂土矣是皆有益於民

生

國計者也倘蒙

皇上特賜舉行查徐州有呂梁一鎮

請卽以呂梁爲徐州之分縣查泰州有海安一鎮

請卽以海安爲泰州之分縣查山陽有廟灣一鎮

請卽以廟灣爲山陽之分縣再查海沐等州縣接壤之間

有碩項湖最大久已淤成良田

□□□□□□□□□□□□此新設碩項一縣田地

□□□□□□其原罪卽准陞科或有新淤以及  
版荒尙未有主者廣招四遠窮民隨力開墾許其五  
年之後方始陞科如是各爲分添施設城池倉庫官  
役俸工不無有費然亦爲數無多將見無窮隱地不  
丈自清可使千萬貧民鑿井耕田含哺鼓腹於

堯天舜日之中實於民生

國計大有裨益也臣曩者備員河上早已留心抵以大  
工未完無暇及此且慮越俎貽譏今臣病已垂危歸  
泉不久所有此案之愚忠不敢隱而不言如果臣言

可採貼黃難盡伏祈

皇上睿鑒全覽

敕部確議施行

111

111

挑築未盡疏

挑中河

題爲

題明挑築未盡事宜仰祈

睿鑒事竊惟鞏固河防之法必須先於黃河北岸縷堤緣

由臣已於

聖心愛民已極等事疏內題奉

俞旨見在欽遵舉行矣臣從慎重籌酌起見是以前疏內  
請將凡有應損益增減之處俱照大修河工案內已行

□□□其事之小者□□□□□□大者隨時

三〇〇〇〇聲明在案今挑築工內未盡事宜應斟酌增減之處所當亟爲

題明者查臣前疏

請自宿遷縣起歷桃清山安等處縷堤之內加挑新河一道卽以挑河之土築成遙堤東各建水壩洩下之水使之順流而下盡歸於海等因在案今臣復加籌酌此河一成則下自清河縣起竟可溯流而上直達宿遷之欄馬河矣更念本年黃河槽內之水較前異常急溜以致一切物料轉運萬艱卽如本年重運糧船

自清河縣運口以至宿遷縣張莊運口計程不過二  
百餘里而牽輓兩月有奇方能進口此皆急溜阻滯  
之明驗也查臣先於謹陳河工善後事宜等事案內  
請於清河縣西仲家莊地方創建雙金門石閘一座以洩  
黃河之異漲今將拽水雙金門閘改爲三丈深之單  
金門大閘一座又於攔馬河之西加挑運河二千餘  
丈築成兩岸堤工直接張家運口并再於遙縷二堤  
之中加挑中河一道上接張莊運口并駱馬湖之清  
水□□桃源清河山陽安東□□於海俾將來重運



糧船既出清口□□□□□□□□行數里卽便由仲  
家莊閘內進入中河自中河歷攔馬河直進張莊運  
口北上則此閘既洩黃漲而又能使各船避黃河之  
險溜行有緯之穩程是大有益於轉漕而各工運料  
亦可不至稽悞誠一舉而三善備焉者其加挑中河  
并攔馬河以上之運河所需增費容臣總於屯田案  
內設處奏用不復更請錢糧此未盡之事宜所當  
題明者一也又臣於善後案內將仲家莊閘下議挑引  
河一萬餘丈用各處歲修夫額夫河兵協力儼挑不

動錢糧等因在案不意康熙二十四年異常大水各處工程莫不危急其歲修夫額夫河兵搶救本處之要工尙屬不敷萬難他調是以此河究未挑挖今臣總於縷堤內挑築工程案內一體募夫挑挖以期速竣不復更調歲額等夫河兵矣所當

題明者二也又海安二州縣境內有舊鹽河之淤塞淺涸者共長二萬餘丈鹽商轉運艱苦情願幫資協挑查此河本不在徵臣原估之內然此河一通則不特

□□□□□□□□□□新河城下之□□□□河道且上

游一□□□□□亦非渺小但河路既長約估挑濬  
之費不下十餘萬兩臣行淮揚道及安東運判查議  
隨據詳稱商人程弘基程長泰等願認協挑銀八萬  
四千兩尙有不敷工費臣亦於屯田案內設處湊用  
是以隨行批允見在興挑矣至各商所認之銀除已  
經解到二萬六千兩外餘據各商請於將來四年之  
內解足臣亦於善後屯田兩案內通融借費儼竣總  
因此舉既屬商民兩利又於河道屯田有裨是以有  
不得不曲計籌酌者所當

題明者三也

□□□□□□□□□□□□□□□□

例

特疏逐一

題明伏乞

皇上睿鑒施行

--	--	--	--	--	--	--	--	--	--	--

靳文襄公奏疏目錄

卷七

治河題藁

中河已竣

霖霖漫漲

高堰二十二萬工程

衛河水勢

歸漕得運

天心之仁愛已極

災異陳言

遵諭敬陳第一疏

脩省宜聖

遵諭敬陳第二疏

乾斷宜勇

遵諭敬陳第三疏

苛駁宜禁

遵諭敬陳第四疏

專差宜減

遵諭敬陳第五疏

酌價免賠

遵諭敬陳第六疏

緩征養民

生財裕餉第一疏

開水田

生財裕餉第二疏

開洋

生財裕餉第三疏

毀銅器

條奏應生應節疏

男治豫編次

孫樹德校正

曾孫光烈  
文烈全校字





靳文襄公奏疏卷七

總督河道提督軍務太子太保兵部尚書兼都察院右副都御史臣靳輔

治河題藁

中河已竣疏

題爲恭報中河已竣重運刻期進口事竊照康熙二十六年臣於

題明挑築未盡事宜等事疏內

請自宿遷桃源清河等處黃河北岸一帶遙縷二堤之中  
加挑中河一道俾將來重運旣出清口卽於黃河截

流徑渡北岸由仲家莊閘進入中河歷攔馬河直達  
北運河則各省重運永得避黃河之險溜而行有緣  
之穩途等因具

題奉有

俞旨立案查前疏內

題估平旺河以下堤工雖並係緊要然較之上流稍緩  
况中河早成可以晚漕速運避險就安臣因併力加  
挑中河晝夜疾僱務令本年重運得以早達

天庾今據監理揚河通判馮佑呈報完工臣又恐初開之

河地勢高窪不同水流淺深不一復令再加挑濬節  
擬該監理呈報已經挑濬深通漕船於三月內可徑  
由仲家莊閘內進中河北上查從前重運糧船自清  
口至張莊運口歷黃河不過二百里而急溜險程每  
遇風浪幾及兩月方得進口今免此險道自茲而後  
各省重運糧艘可早抵通而回空亦永無守凍之虞  
矣但臣前疏估

題遙堤惟以可防救民田爲主原估止高八尺今念運  
道關係重大倘遇伏秋霖漲如二十四年之水則見

築之堤勢不能禦一有疎虞前功盡棄必得再加高一二三四五六尺餘不等比縷堤更高方可保固永久而伏秋之水斷須於本年伏秋之前防禦加帮方爲萬全之策所有加帮工費原

題於屯墾內取息濟工但以前屯麥業經

題明變價還部而目下工程緊要刻不可待臣通融那動飛儼濟工總俟各工全完之日一併彙造清冊送部核銷相應一併

題明伏乞

皇上睿鑒施行

臣等謹將

...

111

111

霖霖漫漲疏

高堰二十一萬工程

題爲霖霖之漫漲非常杜患之綢繆貴蚤謹

請再加善後工程以期永奠下河永拯民生事竊臣惟高  
家堰一帶臨湖堤工爲運河與下河之屏翰臣前疏  
已備陳之矣今安徽按察使臣多弘安條奏稱高堰  
一工不特爲下河屏翰而實有關於黃河之內灌運  
道之通塞等因誠一定不易之論臣知之最確而前  
疏止陳下河情形未曾併及疎忽之愆臣實無以自  
解也茲蒙



皇上將

廷臣議覆微臣前疏并臬臣多弘安條奏之疏一併

敕臣確議臣欽遵之下敢不分別緩急力籌萬全之策

以仰荅

皇上保運安民之至意乎竊查微臣前疏

請將高家堰一帶臨湖堤工約長一萬三千丈估加密排  
椿內下丁頭小埽又於堤裏加築束水堤約長一萬  
二千五百丈又挑浚武家墩以下淤淺工約四千丈  
并楊家廟以下平灘工約長四千丈四共估銀二十

二萬四千三百二十兩等因今臣再四籌維此四工雖原爲下河而請舉今下河暫停似乎當緩但高堰堤工攸關運道民生至重至大上年異漲之際危險非常雖幸獲無恙然臣不敢不仰請

皇上發帑興修以保萬全者也至山寶高江四州縣加高運河堤工約五萬丈并高江兩州縣湖內加挑大河約八千丈二共估銀三十萬八千五百兩內臣於上年因新建減壩之水無路宣洩已動歲修錢糧六十五百餘兩量挑過金灣三閘迤東小河二千餘丈其

餘工程尙需銀三十萬餘兩專爲下河而舉原無關  
於運道今下河暫停理應一併停止者也不至於高堰  
一帶工程尙蒙

皇上允行請

敕部臣速撥錢糧二十二萬四千三百二十兩以便乘此  
青黃不接僱夫易得之際作速發此銀二十二萬餘  
兩亦可於黃河北岸新淤之侍邱蒼頡等湖銅盆龍  
窩等蕩屯墾利息內還項應俟本案所借之五十萬  
兩七年還完之後將此二十二萬餘兩再分爲三年

解還戶部又臬臣多弘安條奏內稱排椿內皆灌碎石等語查貯碎石於排椿之內果可禦浪但止可酌量灌高一二尺若太高則其勢重恐有敬椿之患容臣隨便覓石相機加灌所費錢糧總在二十二萬四千餘兩內銷算又高堰舊石工五千餘丈多年未修被去歲異常風浪擊卸二千二百九十七丈其未卸者亦俱動搖殘缺若今年再被風浪勢必盡卸湖中臣見督山清旰昃同知劉暉購料僱匠普面加修其需用錢糧應於歲修內另疏

題估者也臣謹一併

題明伏乞

皇上睿鑒

敕部議覆施行

衛河水勢疏

歸漕得運

題爲衛河水勢微弱漕船浮送難前謹請

天語申飭輓水歸河立濟重運事竊照重運漕船自進瓜  
儀閘口之後在清河運口以南則賴淮水浮送清河  
運口以北至於阜河則賴黃水浮送阜河迤北至濟  
寧州之南旺則賴汶水之分流南下者浮送南旺迤  
北至臨清州則賴汶水之分流北注者浮送臨清閘  
口以北至天津則賴衛水浮送我

國家數百萬漕糧數千隻運艘惟恃此淮黃汶衛四水

得以早送

天庾今淮黃盡歸故道江南處處深通雖春來雨少汶河水弱而各閘蓄水灌塘不過畧遲時日即可償過惟衛河水勢微緩異常兼之並無閘座不能蓄儲今據濟寧道副使董安國等詳稱三春久旱汶水既少而衛水弱極臨北一帶淺處甚多且閘河無接濟之資一經起閘則建瓴之勢將閘河灌蓄之水頃刻洩盡不特閘內易涸而重運漕船從閘門乘高放下萬分危險請飭河南道府各官速啟五閘之板堵塞旁洩

渠口輓水下濟漕運等因臣查衛水發源於河南衛輝府輝縣之蘇門山其泉頗大更有洹淇等水併流入衛儘足濟漕祇以自衛至臨相隔五百餘里沿途居民往往私洩爲灌田之計是以下注會汶者甚少臣雖嚴行該管道府廳縣各官將所有仁義禮智信五閘之板盡行取起并各洩水渠口盡行堵塞而牢不可破之積習每每陽奉陰違直待時雨頻沛河水大發而後重運方得暢行此歷年皆然也但從前漕艘過淮甚遲及至稽阻臨北乃在五六月之間彼時



入夏已淡去伏不遠雖經暫阻而時雨可期故或阻數日而得水或阻一二十日而得水若本年漕艘賴各督撫臣疾僨嚴催加以漕臣親行驅督過淮極早三月甫半而出清河運口入黃河者將及五千餘隻其過濟寧者已逾三千見今銜尾而北俱阻於濟北臨南一帶若照往年故事必待衛河時水漲發方得浮送北上則臨南濟北之船必得守候兩三月之久是過淮雖早而回空仍復遲悞彼時雖將沿河各官從重處分亦無及矣除臣見在嚴行河北大名兩道

并衛輝大名兩府著令將五閘閘板取起封貯兩岸  
洩水渠口盡行堵塞輓流歸衛以濟重運外但臣遠  
在江南呼應不靈鞭長莫及誠恐沿河官民狃於積  
習陽奉陰違仍前阻水不下貽悞匪輕伏乞

皇上特賜天語敕令直隸河南兩撫臣嚴著該管道府廳  
印等官火速盡啓閘板盡堵渠口務使衛河之水涓  
滴不致芴洩全歸運河以濟漕運如再仍前膜視容  
臣會同撫臣嚴叅重處俟指日漕船盡行北上或將  
來河水盈漕之候聽民照舊分洩以滋灌溉如此則

皇朝通志卷之二十一

無傷於民田而漕運克濟可免阻滯回空之虞矣臣

謹特疏

題請伏乞

皇上睿鑒

敕部迅賜議覆施行

天心之仁愛已極疏

災異陳言

題爲

天心之仁愛已極

王德之修省惟誠臣謹竭悃陳言以備

睿明採擇事臣惟

天人感召之理雖甚微而實著帝王致治之道苟力行則無  
難是故古來朝廷之上禮樂刑政措施偶有未當

上天每殷殷告儆以冀君心之悔悟人主統御寰區荷

上天垂戒之殷於是充其固有之仁動合應行之義守之以

信而凌之以勇法度明紀綱立風行草偃俾無一夫  
之不獲自可駕軼三代比隆唐虞故災異之見實安  
危治亂之機不可不至謹至勉以仰荅極仁極愛之  
天心也我

皇上天縱聰明弘胞與之量一以仁民愛物爲本凡政教  
施令罔不皆然宜乎日就昇平漸臻至治矣乃邊陲  
尙有未寧田畝反增荒蕪小民之供億愈繁而司農  
之仰屋日甚其故何耶良由內外臣工不能體  
皇上堯舜之心共求治理以致上千

天和地震之變譴告非常耳今

皇上特頒

上諭實圖修省將應行應革事宜令部院科道督撫諸臣  
明白條奏直言無隱并令在京三品以上堂官及在  
外督撫提鎮據實自陳毋得浮泛塞責臣跪誦之下  
不勝感激除將臣不職情由另疏白陳外伏念古者  
一國之君以一言之善即可弭災况我

皇上以天下之主當地震之異

上諭屢頒修身之切與求治之勤至於如此將見上旨下

效

皇上一人興起於上內外臣工竭勉於下

君責難於臣臣責難於

君都俞喜起之象聲溢溥天協和於變之風麻傳萬禩臣

雖自分庸劣而躬逢至仁之

王敢不勉竭臣愚敬陳一得以仰佐

皇上被格之化於萬一耶事各有類是用列爲六疏其間

有關軍機者仍行密進臣謹具

題伏乞





UNIVERSITY

...

遵諭敬陳第一疏 修省宜堅

題爲遵諭敬陳修省宜堅永保

至德第一疏事竊惟致治之道力行無難與災異之見爲  
國家治亂安危之機臣首疏已敬陳之矣惟是力行無  
難之道臣不敢不復進其說以備

皇上去亂遠危久安長治之助也夫修身敷政旣在力行  
而尤貴勿替若夫上行下效之風則又捷於枹鼓焉  
我

皇上勵精求治實欲痛除積習使德禮政刑施行各當紀

綱法度煥然一新推

皇上之心同堯舜精一執中之心卽天地覆載萬物之心也臣愚以爲

皇上宜堅持此心永保

聖德一日之內雖有萬幾然兵農禮樂用入行政之事

皇上必親加詳覽與宰執大臣討論得失務期合乎公正

然後見之施行仍令近臣將逐日行過事宜摘敘畧

節彙造一冊

皇上萬幾之暇不時取覽而詳繹之其間或有已行而未

當者不妨隨時酌改左右侍衛之臣必擇小心勤慎  
廉幹儉約之人以供使令設有狎邪佞佻諂佞奢靡  
與善爲鄭衛之音能作奇技淫巧之飾以惑

聖聰者悉屏去之臺省諸臣宜寬其譴責以養其敢言之  
氣邇來風聞旣不得入

告而所

告失實則有降謫之愆是以雖有讜言未敢直達今

皇上切諭諸臣俱令直言無隱則謬諛之風行見賡歌

殿陛矣但失實處分若不稍爲區別則終有疑畏不前

之醜臣請嗣今以後凡諫臣有假公濟私顛倒曲直  
結黨招搖示威求賂者仍行從重處分外其有論  
朝政而切中時弊因風聞而糾劾奇貪雖或至於失實  
并禮樂兵農用人行政諸務在

廟堂原無未協

皇上原非過舉而諫臣堅執已見據理執法極言廷諍骨  
鯁具在廉介可風者俱槩爲優容而免其處分使遠  
近貪婪之吏有所忌憚且

朝廷政治得失諸臣從此皆盡心講究日漸可益經濟

之才以備不次之用也伏候

上裁



遵諭敬陳第二疏

乾斷宜勇

題爲遵諭敬陳

乾斷宜勇以除弊竇第一疏事臣伏讀

皇上續頒

上諭令諸臣洗心滌慮實意爲

國爲民并

御製民生困苦已極等六條備悉臣工不職感召災眚之  
實更

諭以事雖有異而原則同諸臣不職情狀



皇上非不素知但以正在用兵之際每示寬宥等語臣跪讀之下歡忭靡涯伏念

皇上自御極以來無刻不以堯舜之心爲心今因災異警戒而數日之間又復頻頒

上諭其中敬謹憂勤深切備極有

君如此則凡在臣工自莫不洗心滌慮實意爲

國爲民唐虞之治不難再遘於今日此臣所以歡忭靡

涯也其逐條飭禁緣由

廷臣已有定議臣何敢越俎置喙第臣重荷

君恩未由圖報當

皇上力求直言之際臣無知則已既有一得之愚敢不併  
陳備採伏思

皇上恐會推徇私則用非其才官方敝壞是以諄諄戒飭  
然臣愚以爲此等弊竇似易剔除查

國家於在京大小官員在外督撫有六年京察之典於  
在外文職司道以下有三年

大計兩年舉劾之典內外武職有五年軍政之典其間凡  
賢能清正之官俱有事實卷案可考嗣後會推選擇

之時將應推與列官員從前行過事實逐一察核查其所行美蹟之多寡大小而品其賢能廉幹之實每推一錢查取三員備開事實一併呈

覽以備

皇上選用如該管衙門或將美蹟多與大小之官匿不查開反取美蹟少而小之官先行妄列者作何定例從重處分至此後京察等典內而部院堂上官外而督撫等官必將所屬各官之事實才品據實查開尤須於平時漸察而不宜於臨事方查如屬員之中凡有

朝夕孜孜黽勉辦事不好外務牘鮮積滯者勤也斷  
大獄決大疑律例精明議論公確隨到隨行案無留  
牘者才也無鑽營之跡有儉約之風門少投竿之人  
室無私語之客安靜供職而諸務一一不廢者廉也  
刻刻以

國是民瘼爲念不避嫌怨不憚辛勞遇事求當而剖決  
如神吏胥上下之手無所施勢要干求之情莫能達  
行事正直心術光明者才品兼優賢能俱備之品也  
以此進賢用備選拔則賢才愈出而徇私之弊自除

華之集卷之二十一  
三  
矣若夫臣工不職

皇上非不素知但正在用兵每示寬宥仰見我

皇上因寇賊未靖民難未抒而并寬及大小臣工也但其  
間有過失故犯之分似宜仍爲區別查

本朝大清律一書寬嚴各當總不外宥過無大刑故無小  
八字蓋無心而誤蹈者謂之過有意而故犯者謂之  
故其間繫人心風俗良非渺小是以過必宥而故必  
刑也我

皇上敬

天勤民每歲刑名先熟審後秋審復別情實可矜可疑三項  
其慎其詳無非欲明刑弼教刑期無刑也然刑名未  
協不過一人之冤用人失宜實爲一方之害臣愚以  
爲處分官員亦應分別過故凡十連累誤情有可原  
者酌量從寬以勉其後效若明知故犯情罪可惡者  
必照定例處分雖在軍興之際

皇上仍勇於

乾斷不稍姑容如此則貪惡之徒雖欲倖免而伎倆莫施  
將見賢者益勸而不肖者日儆吏風丕變政治平明

三才圖會卷之五

五

大法小廉民生日遂卽有邊隅小寇不久投戈歸命  
無煩更事用兵矣伏候

上裁

遵諭敬陳第三疏

苛駁宜禁

題爲遵諭敬陳苛駁宜禁以杜私派第三疏事臣惟錢糧應銷與否自有一定欸項如原未動用而捏欸報銷與所用本少而開銷甚多希圖侵烹肥己者自是難容

國法若實支實用並無捏欸朦報用少開多之情則斷不宜屢行苛駁以啟科派部費之弊也查邇來各省銷算錢糧科抄到部承議司官雖不乏從公議允之案然偶值一事或執一己之偏見或信部胥之唆使



任意吹求苛駁無已錢糧數目繁瑣頭緒牽雜非精於核算洞悉欸項熟知卷案者萬難得其要領司官專司其事除貓鼠同眠者不必言外其實心奉公之員設或稍欠精詳便爲吏胥朦蔽况堂上官不過總其大槩止據說堂數言安能備知底裏加以從慎重錢糧起見自是一照司議由是而部胥之權重矣部胥之權旣重則經用錢糧之官不得行賄以求之所謂部費也此項部費官無神輸之術勢必問之於民若清廉之官費一斂一民猶不至大困一遇貪劣

不肖之官借此居奇或費一歛二或費一歛三甚至  
歛四歛五歛十均不可定而民困滋甚矣

國家受聚歛之名而部胥得婪賄之實有司多一分之  
費而百姓出數倍之資其害可勝言哉嗟嗟此出資  
之百姓若與

國家無涉又何足論殊不知此百姓者乃

國家之元氣日夕勤耕力織闢地土生貨財出賦稅以  
奉

朝廷者也安可今日剝之明日削之使之不得其所拋田

上通額賦以至上下交困乎臣前任安徽巡撫之時  
知有江安兩藩司積案一件動用錢糧數百萬兩而  
部駁不准開銷暑往寒來歷十餘年而始得清結今  
臣帶管漕務知邳宿等州縣康熙元二三四五六年  
分民欠漕項錢糧三萬餘兩業已屢奉

恩蠲經漕撫兩臣數次

題請蠲豁而部議堅執不允坐以明係官侵之名而嚴  
著追比臣據司道各官痛切呈詳已經具

題請豁在案又部議裁減運軍耗贈銀米一案臣帶管

漕務據各屬屢詳灼知斷不可裁之故是以仍請照  
給昨閱邸抄部議又復不准且稱此項銀米從前原  
無皆係順治六九等年添給之項等語殊不知順治  
六九等年添給此項銀米彼時原非得已祇因旗軍  
費用不敷往往勒索里民兼之盜賣漕糧拖欠甚多  
公私交困是以議加銀米且此所加之銀米皆係里  
民求免勒索是以樂於輸將原非動公家之物以給  
軍也自此銀米一加而軍民兩安

國儲不欠已歷多年今部臣若必欲議裁勢必仍蹈前

轍里民遭勒索之苦漕糧多盜賣之弊豈

國家之益耶况錢糧自有定額其地方官民因時制宜  
另爲調劑之項原在額外惟因恐涉私派之嫌是以  
不得不爲

題明要之原非司農之項也在司農總會計之權止當  
稽其額徵不宜收及額外若將里民自願樂輸求免  
勒索之項而又裁歸司農則里民既已出資而仍遭  
勒索恐亦司農之所不忍聞也諸如此類臣聊舉三  
案其他可知伏乞

皇上嚴飭部臣嗣後一切錢糧如有不肖官員捏款朦銷用少開多部臣察出實情訪知的弊即便據實

題叅將不肖官員置以重典督撫知情者同罪不知情者亦照失察處分若並無朦銷多報情弊則應銷者卽銷應豁者卽豁可裁者裁不可裁者卽止毋再徒爲混駁使在外不肖官員得以藉口部費肆行科斂致傷

國本抑臣更有請者錢糧之難於核算者以尾數太繁也查銀自一分以上方可稱其重輕米自一升以上

方可量其多寡若銀止於釐則難稱米止於合則難  
量矣又或銀至毫絲更至於忽則不過微末之間米  
至於勺抄更至於撮則不過顆粒之間夫銀至於微  
末米至於顆粒數亦可以止矣乃銀之尾數自忽之  
下尚有微纖沙塵埃渺漠逡巡灰等算位米之尾數  
自撮之下尚有圭粟顆粒黍稷禾糠粃粍等算位殊  
屬無益也且不惟無益而尾數太繁適足以滋姦胥  
之駁竇實則甚有損耳總之尾數多則清算難清算  
難方可藏姦逞獘若一日了然人人可核之數則部

胥從何弄權耶臣

請嗣後錢糧尾數算至忽位爲止如一忽之外尙有餘零  
竟作二忽科算米麥尾數算至撮位爲止如二撮之  
外尙有餘零竟作三撮科算餘俱倣此裁無益之算  
位以剔無窮之弊端其於

國計民生實均有裨益也伏候

上裁



--	--	--	--	--	--	--	--	--

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

1111

遵諭敬陳第四疏

專差宜減

題爲遵

諭敬陳專差宜減以免擾累第四疏事臣惟

皇上因在外諸臣於民生疾苦不爲上聞

朝廷詔旨不行下達廢弛驛站侵冒錢糧民隱莫申民冤

無訴於是屢遣在內諸臣訪查察究此

皇上軫念民瘼惟恐一夫不獲其所是以不得不然也但

天使之車塵馬跡一經絡繹於道途則閭閻之蒼首黔黎

未免嗟咨於草野在奉差之臣未常不以

皇上之心爲心未常俱有示威措勒之事并未常盡縱家人跟役等需索地方官也然往來供應雖蓋酒粒粟片肉隻雞盡皆小民膏血况地方官員賢能廉介者少平庸畏事者多一聞

欽差將至惟恐有所駁詰莫不力圖要結以悅之行賄與否姑置弗論而飲食之費已屬不少上司雖戒之曰爾無科民有司亦隨荅曰斷不妄派究竟無神輸之術也更值不肖官員借端多斂則又不堪言矣此等事務臣雖未得確情竝無指實然揆之情勢在所不

免臣愚以爲除軍機重務必須口授

廟謨於兵主確酌商行者自當專差馳驛又在外貪官汚吏督撫不行題叅被科道糾叅或有人告發并督撫扶同犯法肆行貪婪之事亦必須遴選部院能員秉公確審無庸置議外他如整頓驛站料理軍需查勘海疆恤刑督賑諸務似應責成督撫蓋督撫爲封疆大吏身居八座之尊位列三台之次

皇上將數千里地方數千萬百姓託之綏懷撫治乃不夙夜黽勉力報

君恩將此等分內之事闕茸貽悞甚至捏旨侵漁致煩  
皇上左顧右慮另差近臣代理似此不職之督撫雖立置  
重典亦不足惜然天下督撫賢愚不同未必盡皆不  
肖也臣請嗣今以後凡督撫司道不能料理必須差  
員之事自當照舊遴差其督撫司道能行之事俱責  
成督撫司道料理停其另差如有貽悞生弊等情卽  
將該督撫司道立行從重處分以爲大吏溺職之戒  
如此庶地方不至因供應而頻派擾民矣伏候

上裁

遵諭敬陳第五疏

酌價免賠

題爲遵

諭敬陳請酌米豆價值以免包賠第五疏事竊照康熙十

五年間

皇上念軍需浩繁恐在外臣工借端冒開以少報多侵欺  
肥已是以

特遣部員確訪米豆草束價值彼時奉差之員惟以節減  
爲念又徧訪各處而止取一隅極賤之價酌量開報  
部臣止照差員所估准銷以致節年以來小民負賠

累之苦控訴無門除別省情形臣未悉知者不敢具  
論外如山東一省臣閱工往來每據里民以採買豆  
草貽累難支等詞紛紛呈控臣再三細訪并差人密  
訪知濟寧附近一帶康熙十六年十二月內黃黑豆  
每倉石值銀三錢六七八分不等康熙十七年九月  
內每倉石值銀五錢三四分不等十一月內每倉  
石值銀六錢一二分不等本年五月內黑豆每倉石  
值銀四錢八分今八月內每倉石值銀四錢五分前  
五月內黃豆每倉石值銀五錢六分今八月內每倉

石銀五錢二分前五月內穀草每束值銀八釐有奇  
今八月內每束值銀七釐而部定價值每豆一石止  
給銀一錢一分一釐每草一束止給銀一釐三毫計  
官給之價較之民間時值約十分之七有司無點金  
之術不得不責成里民里民實歲歲包賠無怪其哀  
控矣臣等爲督撫者明知里民賠累之苦然有司無  
米之炊竝非私派肥己亦難以加罪於官實無可如  
何之事也查軍興之後里民賠累最苦者莫過於採  
買米豆草束次則解送軍前馬匹也今解馬一事已



蒙

皇上特旨嚴禁不許指勒里民如釋重負莫不感頌  
皇恩歡呼載道矣至採買米豆草束一事民隱迄未上

聞今又蒙

皇上軫念民生病苦令臣等將應行應革事宜明白條奏

直言無隱臣奉此

明綸敢不凜遵人

告惟是民間之疾苦固當上

聞而米豆之價值亦應查確庶無冒銷之弊伏乞

皇上勅下部臣作何定議令各省撫臣將彼處米豆草束  
價值數目按季據實報部如有以賤報貴者一經察  
出立即嚴加處分部臣歲終即將該撫臣按季所報  
價值取其酌中之數而准其開銷總期下不擾民上  
不虧

國如此則里民更免此採辦米豆草束賠累之苦必且  
徧野歡騰永戴

皇仁於生生世世矣伏候

上裁



遵諭敬陳第六疏 緩征養民

題爲遵

諭密陳請緩征海舟師以養殘黎第六疏事竊惟

國家自吳逆悖

恩閩粵繼變以來

王師四出供億煩勞幸賴我

皇上天縱神威

廟堂奇略閩粵後先歸命逆桂隨伏

天誅雖滇蜀之境尚有餘孽未平而釜底遊魂自可尅期

殲滅當此時而出一旅之舟師自是鄭錦可擒海氛  
可奠然臣愚以爲此宜緩而不宜急何也劫掠之難  
民可憫而水陸之形勢當慎也臣聞康熙十三四年  
鄭逆竊踞漳泉一帶迨至十五年間

王師南下逆錦自揣難抗遂將民間貨財衣糧子女玉帛  
凡屬溫飽之家不論丁壯老弱男婦人等盡行劫令  
登舟遷之入海此等百姓不下數十餘萬哀號之聲  
悲慘之狀雖逆錦左右之人亦莫不爲之掩面流涕  
不忍正視此臣得之閩來人士之口傳之如此者也

臣思此等難民入海三載思歸故土必有同心第當  
逆錦大劫民財之後勢尚鷓張且孱弱難民驚魂未  
定水汛未熟兼之逆錦於劫來未久之人防之必密  
而待之必苛難民雖有圖歸之念而斯時莫敢遽發  
若

王師於此際進勦則逆賊必驅難民而前俾其先罹鋒鏑  
難民妻子資財盡在賊處必且徘徊顧戀誠不特不  
卽來歸而反迫爲賊用况大海茫茫風期水汛皆不  
可忽大兵堂堂正正不勤遠略未嫻海外之行逆錦

生長水中習熟漂流誠恐出沒靡定以堂堂正正之師而討漂流靡定之賊譬之責菑擊鼠有勇難施追之急迫逆必更劫難民而他徙矣或再從而躡其後未免過勞師而難得利且設遇風濤之險或有疎虞則失軍實而損

國威攸關良非渺小莫若稍遲進勦則逆錦劫掠之物漸完鴟張之形漸縮難民驚魂既定水汛亦知兼之逆錦與難民相處日久則待之必寬而防之必疎於是  
一人爲倡萬人相隨不招而自至者踵且相接賊

勢日孤將見逆錦舟中左右之人必且盡爲錦之讐  
敵斯時特懸重賞自有擒錦來歸者矣臣故曰宜緩  
而不宜急也臣請

皇上特飭在閩文武諸臣停止征海之師將

禁旅分屯要地并一切綠旗官兵俱令逐日操練晝夜  
嚴緝不許稍有弛懈以防姦宄暗通兵有擾民者立  
置重法兼擇循良守令責之息訟輕刑除徭緩賦俾  
見在之百姓時歡欣於樂利之

光天而陷賊之殘黎每懷思夫故鄉之



化日則不必勞師而海疆計日自莫矣抑臣更有陳者  
臣伏讀

上諭內一條一用兵地方諸王將軍大臣於攻城克敵之  
時不思安民定難以立功名但志在肥己多掠占小民  
子女或借爲通賊每將良民廬舍焚燬子女俘獲財物  
攘取名雖救民於水火實則陷民於水火之中也如此  
有不上干

天和者乎欽此大哉

王言遠邇臣民一聞是

諭當莫不感激無地而繼之以泣者矣夫守成之與創業  
經權原有不同而敵國之與吾民德威自當異用我

太祖高皇帝崛起

盛京

太宗文皇帝纘開

鴻業斯時直省地土尚屬故明是以

王師所到凡有閉關相抗者卽便誅俘此待敵國之道宜  
然也迨

世祖章皇帝定鼎

京師蕩平四海至

皇上御極之年併取雲貴嗣此車書一統向來尚爲敵國  
之姦頑者今則盡屬

朝廷之蒼赤矣創業利於克敵而守成惟在養民敵國之  
姦頑無妨俘戮而

朝廷之蒼赤不可傷殘此一定不易之理也不意康熙十  
二年間逆臣變亂於邊陲姦宄竊發於內地致煩

王師復出然此變亂竊發者乃係不法之逆徒而非耕織  
之百姓也地方守土之文武旣不能預靖姦徒衛此

蒼赤致其淪胥於賊小民之困苦已屬難堪乃領兵之將主又復惟利是圖全不以

國計民生爲念俘殺竝行嗟乎何斯民之遭厄抑至此也如以其不應從賊而俘殺之則民力最弱如暮夜被盜不過數人入室耳然執其主而索之未有不惟欲是從者今迫之以盈千累百之賊兵何敢一言相抗是以任賊驅使無不俯首聽命實勢所必然而情非得已也又民業甚微其賴以謀生者不過此室廬田土若不從賊便當棄業而逃否則死耳棄業而逃

則憑何餽口矧彼時到處有賊逃將安歸死則有祿者之責蚩蚩之氓原無應死之理以不能逃不應死之編民幸獲生於賊退之後以待官兵之衛之而忽坐以從賊之罪而俘殺之不亦冤且慘乎嗟嗟在統兵將領或以兵馬遠來勞苦日久姑從之以示鼓勵殊不知民者

國家之元氣也如欲鼓勵兵丁寧使多費

朝廷金錢以犒之安可大耗

國家元氣以悅之耶且

朝廷平日養兵專爲保此元氣乃賊已去而兵反傷之何  
耶卽如江西一省從前額賦約有二百餘萬乃聞邇  
來僅存十分之三四是司農每歲之失約計一百二  
三十萬自康熙十三年至今通計所失不下六七百  
萬是鼓勵之兵卒尚未掃靖邊氛而

朝廷之額賦先已虧缺如許究竟孰損孰益耶言念及此  
不禁爲我

國家痛恨而深惜之也今此等大害

廷臣業已恪遵

上諭嚴定處分之例臣又何庸置喙但

皇上爲官兵搶掠一事前此曾經嚴飭而統兵將領未見  
凜遵是今日之要不僅在於定例之嚴而端在於行  
法之信臣請

皇上嚴飭各處兵主務令遵例而行再有犯者必照新例  
處分斷不稍恕方克有濟更請

皇上并勅部院通行直省毋論旗下民人凡有收得從前  
難民在家或搶或送或買毋論如何得來之人但有  
難民親屬前來求贖者不計銀之多寡卽與贖回團

聚如有指勒不放者作何從重處分定罪再請

皇上勅令部院科道各官將有廉德幹才堪以撫綏殘赤  
整頓巖疆者不拘資格各舉所知保無過悞授以江  
西陝西湖南閩粵等一切新復地方守令之職著令  
招集遺黎開墾荒土此等守令准以兩年較俸到任  
之日先將見存熟地若干戶口若干報明上司兩年  
之內新增戶口若干新墾田地若干并查舊存之地  
是否無荒舊存之民是否俱在地方是否漸增起色  
元氣果否愈加培護衡其賢才之等第以分別而獎



拔之一等者作何從優超陞二等者作何酌量加陞  
絕無才能而貪劣不肖者作何從重分別降革治罪  
并連坐保薦之人若原有才能而上司掣肘不得行  
其志者許其具文直達部科該部科卽與上

聞毋或抑阻蓋被寇之地更復遭兵殘敝至極惟賴綏懷  
是以必需賢能守令加意整頓而在外臣工設有不  
能撫民而反行恣虐甚至撥餉半歸私橐而軍需仍  
派里民者亦不可定若係在外

題用之員則或狗庇掩飾或貓鼠同眠尤不可定是以

必得從內保薦發往勸之以重賞傲之以嚴罰而又假之以自行達部之權庶可得實心行實政以拯此水火中之子遺也伏候

上裁以上六疏臣於繕畢之次復爲展讀竊直之言不一而足臣自知嗣此以後招尤不小但歷荷

皇上知遇之恩至深至重雖肝腦塗地不足仰報又何敢稍避冒昧稍憚嫌怨以負

皇上求言之切乎是以將一得之愚遵

諭據實陳奏至臣尚有未盡愚悃并生財裕餉等事容臣

閱工赴淮隨時確酌另陳臣謹併

題明伏乞

皇上睿鑒施行

生財裕餉第一疏

開水田

題爲遵

旨敬陳生財裕餉第一疏事臣惟我

國家車書一統薄海內外莫不尊親自唐虞迄今幅員  
之廣無如我

朝爲最夫地方旣如此之大宜乎財賦日增貫朽而粟  
腐矣乃司農猶鯁鯁焉患兵餉之不足此不可解也  
查地方一里有田五頃四十畝地方十里爲方一里  
者百有田五百四十頃地方百里爲方十里者百有

田五萬四千頃地方千里爲方百里者百有田五百四十萬頃依王制所載山陵林麓川澤溝瀆城郭宮室塗巷三分去一計之凡方千里之地實有田三百六十萬頃或其間有種棉花蔬果菱荷藥餌之類以其非係五穀姑再除去四分之一計地九十萬頃外亦實有田二百七十萬頃什一取民古之常制也每田一畝合夏麥秋禾計之至瘠之土亦可收糧一石以什一之制科之每畝徵糧一斗每田一頃應徵賦糧十石二百七十萬頃應徵賦糧二千七百萬石內

以一分徵本色歲可徵糧二百七十萬石以九分徵折色每石牽科折銀四錢而布帛魚鹽之利不與焉直隸十四省之地不下方五六千里然以步可徑直量之不過方四千餘里今姑止作方三千里科算爲方千里者九每歲額賦亦應有糧二千四百三十萬石銀八千七百四十八萬兩此臣準古證今寧從至少科算乃不易之理必得之數而非無稽之臆說也今司農之所必需者大抵兵餉軍需驛站與官役俸工營修祭祀而已蓋兵無餉則無以資飽騰官無俸

則無以養廉德役無工食則無以餬人口効奔走三者不備其弊皆能害齊民傷邦本又軍需爲蕩寇之先資驛站通

國家之氣脈以及營修城郭宮室祭祀

天地神祇均屬必不可少然臣約而計之歲有銀二千萬兩足以餉兵而有餘官役俸薪工食即使多加數倍驛站人夫馬匹亦或量爲加增并一切軍需營造祭祀等項不過再費銀二千萬兩亦云至矣設使

國家每歲所入銀米果有如臣前科之數則每歲卽多

其所出亦不及所入之半庫藏積帑必且充棟盈庭  
尚何不敷之足患哉然各直省見徵額賦較臣前科  
之數不及三分之一自無怪司農之仰屋矣夫天下  
既有實在之地自當有必產之糧既有必產之糧自  
當有應輸之稅今量幅員而計地畝則甚多按全書  
而稽額賦則甚少其故何耶蓋天下有三大弊而世  
莫之察也其弊不起於今而來自故明且故明以前  
久同其弊祇以世遠難稽臣亦不復具論矣何爲三  
大弊一曰水利不修也二曰賦輕而民情也三曰生



者寡而食者衆也考之經書孔子贊大禹曰卑宮室而盡力乎溝洫孟子對滕文公曰民事不可緩也古之聖賢深知民以食爲天故凡論治國平天下之道必以足民爲首務農事爲先資齊用管仲之策而富於山左秦用鄭國之術而強於關中卽漢唐而下亦有開渠溉田者俱能利民益國但惜其不過行之一隅未嘗遍爲經畫是以終多荒土後世不得盡蒙其利耳今我

國家地土之廣古莫與京然荒而不治者所在恒有卽

治矣而類多平陽無蓄洩之資不待奇旱大澇雨暘  
稍不時若其年即便失收以致

國賦日逋而民生日困此水利不修之弊也堯舜取民  
必以什一爲準白圭欲二十取一孟子非之蓋過於  
什一則民力難供不及什一則國用不足也古來天  
下之利全在西北其江南之蘇松常鎮浙江之杭嘉  
湖等府在唐漢以前不過一澤國耳自錢鏐竊據南  
宋偏安民聚而地闢遂爲財賦之藪故明初年見東  
南之賦足以供用於是惟知盡東南之利而不復謀

及西北是以西北之賦日少而民日窮迨及季世盜賊叢生而不可收拾矣我

朝定鼎之後凡故明一切弊政盡皆革除惟生財之道尚未復三代之古雖墾荒闢土之令時下而奉行之有司俱無探源之論是以未有實益今臣奉

命督河奔走於平原曠野之間日擊淮徐鳳陽之地蒿菜多而未黍少是以前於經理河工疏內請將沿河荒地募幫丁墾種以固河防及方將用其荒地而卽有主出認多稱係伊納糧之田臣不解其故於是細爲

訪問始知淮徐鳳陽一帶之民全不用人力於農工而惟望天地之代爲長養其禾麻菽麥多雜藝於蒿蘆之中不事耕耘罔知糞溉甚有并禾麻菽麥亦不樹藝而惟刈草以資生者比比皆然也究厥所由大抵每地一畝其每歲所產之草茂者可得千餘觔稀者可得四五百觔刈草千觔者運至城市值銀五六錢內去運價一半實可得銀二錢有奇刈草四百觔者運至城市值銀二錢內去運價一半實可得銀一錢而每畝額稅不過徵銀一二分不等在小民有地

一畝不費牛種不事耕耘每歲止輸分許之額租而  
可得草價一二錢有奇不等是以相因成俗而廢棄  
國家之土地一至於此此賦輕民情之弊也古來經野  
之制上農夫食九人上次食八人中食七人中次食  
六人下農夫食五人蓋受地有肥瘠之不同故所食  
用多寡之各別大抵一夫終歲勤動受地肥者其所  
獲之粟不過養九人而受地瘠者其所獲之粟亦可  
養五人也臣訪之蘇松嘉湖之民知壯夫一丁止可  
種稻田十二三畝其歲收粒米肥地不過三十餘石

瘠地亦可得二十石以每人每日食米一升科之則  
一十餘石者可食九人而二十石者可食五六人準  
古證今原無異也至農夫五等牽上中下而合算之  
每夫可食七人內除本夫與本夫之母妻女以及本  
夫之耄父幼子約共食其半計可餘一半以食他人  
古者民之類有四曰士農工商而已士能明先王之  
道佐人君治天下農能力作畝畝收粒米以養天下  
工製必需之器物以適天下之用商則通有無聚貨  
財以利天下者也又庶人在官如今胥役之屬爲政

所必不可少者亦得附於四民之末此四民之中力農者居十之七而士工商與庶人之在官者居十之三是以每歲天下之穫除供天下之食用外尚有儲積以備凶年夫天下之治也在於家給人足而其亂也由於凍餒流離若使天下之民果能樂歲有餘而凶年不困孰不欲安享於光天化日之下而願爲寇攘奸宄以自取死囚耶是故欲天下之治必先使天下多力田之人而後可也乃三代而下四民之外更有釋老之流與夫遊民乞匄悉皆不耕而食不織而

衣絕義滅仁病民蠹

國臣竊聞釋老諸書雖旨趣各有不同而其要總欲使人棄捐倫理歸於虛無寂寞之鄉其究至於使天下之人盡爲仙佛斷絕人類而後止嗚呼成仙成佛之說怪誕不經姑置勿論設人類而果有可絕之理何妨任其妄言乎且即使人類必不可絕而聽其怪誕之說不至於殃民蠹國又何妨任其妄言乎殊不知自有天地以來卽有萬物而萬物之中惟人最靈故與天地參而爲三人之有男女猶天地之有陰陽男



女生生不窮之道猶日月運行之有晝夜歲時往來之有寒暑也聖人知其然而又慮其雜亂無章爭鬪靡已也是故爲之君以統之爲之師以教之爲之立三綱之道五倫之理又慮其頑而不變也復爲之明五刑以弼五教夫如是是以天下之民皆知事君當忠事親當孝事夫當順親上死長之道油然而生而四海之大賴以久安長治也今佛老之說欲使天下斷絕人類猶之欲強日月之爲晝不爲夜歲時之爲暑不爲寒其可得乎不惟是也天下如此其大萬民

如此其衆政刑井井尚不克使之有恥且格必待德  
禮兼施始可化民成俗今

朝廷之上方在整齊而草野之間遍爲鼓惑使天下戴君  
之心易爲戴佛事親之力移而事僧信其可以懺悔  
免禍之說而輕於犯法信其可以誦經求福之說而  
濫爲施財至於父兄宗族鄉黨戚友之間雖升斗之  
粟些微之資不肯假借而修祠建廟塑像飯僧則雖  
千百之多揮之如土親疎厚薄顛倒若此而方且自  
喜其操小祝奢洋洋得意不知所操之小者已去而

所祝之奢者必不可來而途窮無告鬱鬱不得志之輩與干犯法律無所逃罪之徒往往竄入其中或談經說法或念咒書符或擊磬敲鐘或遊方托鉢千百成羣悉皆喪其天良以惑此愚夫愚婦究竟姦盜詐偽之事若輩仍無所不爲卽有所謂實在焚修恪守其教者亦正如不肖子弟舍六親而隨匪類不亦大可悲乎至於乞匄一途言之似屬可憫而其弊不可勝言文王發政施仁必先鰥寡孤獨以其無力自食窮而莫告也後世設養濟院以待孤貧亦猶文王遺

意豈知近來乞句大半皆屬壯夫手齋穢毒之物以  
窘良民而總屬之者更有句頭其孤貧口糧俱係句  
頭領出與蠹役分肥不得充實在孤貧之腹且民間  
凡有吉凶慶弔之事必先喚句頭勞以酒食給以銀  
錢否則羣句立聚其門撒潑呼號無所不至而城市  
開張舖面之家羣句亦不時橫索恃其污穢百端無  
狀使人敢怒而不敢吝其所得之銀錢半爲本句醉  
飽街衢而以半奉句頭是以富庶地方之句頭類皆  
各擁厚貲優遊坐食其溫飽氣象反勝於士農工賈

之家而坐而得食相因成俗遂有將良家幼童子女  
暗地拐去或折其肢體或去其耳目畜養長大以接  
續其衣蓋者焉言念及此殊堪痛恨矣他如說書唱  
曲打把勢搬戲法賣假藥請仙扶鸞煉丹禱禳偷雞  
剪綰之徒不可悉數此何爲者耶韓愈曰古之爲民  
者四今之爲民者六農之家一而食粟之家六工之  
家一而用器之家六賈之家一而資焉之家六此正  
指佛老二氏而言也又孰知近世除佛老之外更增  
此無限游惰之民莫不仰給於各地方之良善乎夫

天下之民求其樂歲有餘凶年有備全在力農者之多於土工賈故十人之中科農民七而土工賈三良以農民七人所獲七分之粟除自食其半仍有餘粟三分五釐以售土工賈而土工賈亦止須食其三分尚可餘半分以爲儲積也自佛老之說興不得不於農民七人之中驅一人以爲佛老加以乞匄游惰之民悉皆徒手求食者又去半人而農民七人者僅存五人有奇矣矧佛老之飲食衣服器具資財俱不下於土工賈固已非若農民之儉約而其營造之費等

于王侯則又百倍于士工賈焉夫佛老無神輸鬼運之術也勢不得不又驅農民半人以爲其工賈是十人之中農民僅居其五而士工賈與異端游惰之民以及異端之工賈亦居其五夫向之士工賈三人全賴力農七人之餘粟三分五釐以資食用是以常見有餘今農民七人僅存五人是止餘粟二分五釐矣以二分五釐餘粟養向有之士工賈三人尚恐不足而况益以異端游惰與爲異端工賈者之二人羣起而爭食乎無怪樂歲之不免凍餓而凶年之死亡相

枕籍也此生者寡而食者衆之弊也嗟夫此三弊者  
攸關於民生國計最切最淡安可不亟爲早圖耶圖  
之之道惟在修明水利水利修則遍處皆係沃壤然  
後準什一之制辨土責貢則賦不輕而民不惰更將  
一切異端游惰之民嚴行禁絕不許官民施舍盡令  
改爲良民各各給與地土編入版圖使之自食其力  
而以餘力奉上如是則不出十年民康物阜賦稅繁  
增永免司農仰屋之歎矣至於修明水利之法查臣  
前任安徽巡撫之時口擊鳳陽府屬地方荒蕪曾具



有敬陳溝田之法以期墾荒實効等事一疏備陳行  
溝田之益有五一日水災之小者可不畏也二日旱  
災之小者亦不畏也三日高竇淮城之河患可殺也  
四日裕將來國課於無窮也五日隱占包賠之弊可  
除也并請廣開事例募民開濬溝田等因詳悉陳奏  
蒙

皇上勅部議覆後值軍興孔亟至今尚未舉行然在今日  
而欲求實在生財之道斷宜倣此溝田之法隨地制  
宜酌量更改而亟行之且此法不但可行於江南卽

直隸山陝東豫諸省若俱一律舉行則所以益

國利民者無窮無盡惟是援納事例見已廣開則欲行  
溝田必須另措墾本又臣從前止閱鳳屬而未歷淮  
徐止見地方之情勢而不諳河務之機宜止知水患  
之由於積霖而不知鳳屬兼受黃河之害且更不知  
河害之不特可除而竝可因之以爲大利也今臣自  
受任總河以來朝夕奔馳往來相度淡知江南鳳徐  
淮揚四府州屬逼近黃淮實有無窮之利祇因從前  
未經講求是以不但不能得水之益而反受水之害

卽臣奉

命大修河道亦止僅僅求於避害而未議所以興利然此四府州并山東兗州一府見有無窮之利臣知之已確安敢不力請修舉以爲我

國家久遠足用之謀乎惟是其間經理事宜頭緒繁多且係微臣創建之論若臣不躬自請行則諸臣必且疑而難舉雖臣自知庸劣見在拮据河工尚且日虞隕越何能任此創舉繁難之務然臣身受

皇上浩蕩洪慈淪肌浹髓臣卽肝腦塗地亦不足以仰報

萬一又何敢畏難避勞以負

皇上知遇之隆恩也倘蒙

皇上不以臣爲不肖准臣將江南徐鳳淮揚四府州并山東兗州一府荒瘠地畝會同各該撫臣隨機斟酌盡心經營則先用墾本銀五十萬兩照臣前疏溝田之法量加更改召募無家無業之人計口授食督令墾土挑溝引水滋溉并照大修河工之例多用監理分管等官每分管官一員募夫二百四十名墾田一百二十頃其所收之粟俱歸公家更爲來歲加墾之資

以五年爲率轉展經營五年以後不復計口授食竟將所墾之田給與開墾之人爲業止量其所產每歲科什一之稅交有司徵收除經始第一年不算外約計六年之後可爲

國家歲增賦米三百萬石

國家旣於此五府州地方歲增賦米三百萬石則儘可就近運赴京通二倉將江浙等省遠處漕糧盡行改徵折色充餉其每歲漕造經費等銀亦可酌量節省誠一舉而數善備焉者也至臣之以六年爲請者蓋

臣年將五十目昏髮白精力漸衰犬馬餘生未知盡於何日安敢遠期年歲第此事若行則非六載工夫不能使規模大定臣故不敢不以六年爲請也至此係創舉之事必須分外設官破格用人倘蒙

皇上俞允准行容臣另疏

題請其所需墾本五十萬兩臣不敢請動錢糧查臣先於敬陳經理河工第七疏內請令武生納監已經部覆允行後因奉

旨治河著動用正項錢糧是以此例未開今若仍開此例

約可得墾本一半其不敷一半臣請於第四疏內撥足濟用又六年以內轉展經營之時雖有每歲所收米石然亦必得有銀兩兼用方爲有濟此須將每歲所收之米代江浙等省兌運漕糧而令江浙等省將應徵漕米照時價改折徵銀以濟加墾之用又五府州屬一切地畝除見有水利并膏肥賦重之田俱聽其仍舊毋庸更議開溝止將無主荒地并有主荒地以及有主糧輕瘠地隨便開成溝田之後卽量給開墾之人永遠爲業有主荒地瘠田俟濟成溝田規模

既定之日仍行給還爲業照什一之稅徵納錢糧其  
規模未定之前凡民間應納額賦俱於經理案內代  
爲辦納如此庶人人情願樂趨而功效亦易於速見  
矣至其間更有未盡事宜應俟果奉

俞旨允行之後容臣另疏逐一

題請此生財經常之至計誠足民足

國之本謀也伏候

上裁



--	--	--	--	--	--	--	--	--	--

生財裕餉第二疏

開洋

題爲遵

旨敬陳生財裕餉第二疏事臣惟經國之謀旣以闢土墾  
荒修明水利爲第一要務矣然天下之賴以流通往  
來不絕者惟白銀爲最蓋天下之物無貴賤無小大  
悉皆準其價值於銀雖奇珍異寶莫不皆然是銀操  
世寶之權綦重而不可片時或缺者也但海內之銀  
見存有限而日耗無窮凡貼箔鍍鍍剪折鎔折者不  
可悉數如江浙等省一切村鎮收買絲布紬鹽之行

市以及天下之開張鋪面者合計何止數百萬家些  
小交易用錢稍大則皆銀也其用銀之時或將大塊  
剪碎或將碎塊傾鎔每鎔銀一兩必被火耗二三釐  
又加剪碎之耗凡大行大鋪每日有耗至數錢者次  
則日耗錢許或數分或分許不等今姑牽作每家每  
日耗銀一分竝合天下行鋪止作一百萬家科之計  
每日耗銀一萬兩每歲耗銀三百餘萬兩矣加以直  
隸十四省商民上納地丁雜項關稅鹽課等一切錢  
糧皆有鎔折以及民間鍍器皿鑲螺鈿貼扇花箋紙

與夫鍛折甲撒袋刀環鞍轡等各物每歲所耗又何止數十萬兩合而計之天下歲耗之銀不下四百萬兩而江湖之所沉溺者不計焉雖民間有淘沙之徒掃塵淘洗每每獲得些須亦俱仍歸世用然習其業者多在南方江浙等省而北地甚稀統計不過萬人而止以萬人習淘沙之業養彼萬家計其所獲每歲不過銀一二十萬兩是仍歸世用之數較之實耗之數僅有數十分之一分耳以天下必需之物而計日銷耗不能復來將天下何賴以爲流通不匱之資

耶臣愚以爲凡可使天下增銀爲流通不匱之計者  
洵當併爲興舉也夫銀之爲物產自山中然多生於  
海外日本諸國而直省則間或有之今直省之間有  
者固當開採而海外之產亦宜使之源源而來以足  
天下之用也查開礦採銀一事前此屢經議及而究  
未施行者一格於聚人衆多恐生姦宄二格於先需  
繁費獲利無幾并地方官民恐開採之後部差頻來  
供應無出未免苦累是以類多不願而暗爲阻之耳  
臣竊計有礦之處其開採事宜在附近居民知之必

確合無行令各省督撫查有礦地方令有司擇土著  
有身家而情願開採之人或聽其自行開採或量行  
給資開採有力之家自能措費開採者作何按山地  
之大小寡多而科徵其賦無力之家必需領費以爲  
開採者除徵賦之外仍令納還原領之銀俱責成該  
地方官實心董理定以加級紀錄鼓勵之典并遴府  
佐防弁各一員駐於彼地勤爲稽察而嚴加彈壓焉  
總之銀礦一事不必利多於公家方始議採但於公  
家無損卽應聽民開採使土內之物流入民間以供

不窮之用益民卽所以益

國矣至於海外之銀向有各直省貪利之民往往操紬  
絲藥餌等物爲彼地所必需者乘船而往易銀而歸  
聞故明倭寇猖獗之時雖禁民入海而商舶之往來  
自若卽我

朝定鼎之初商民出洋者亦俱有禁然雖禁不嚴而商  
舶之往來亦自若也後因海逆鄭成功負險抗順更  
於順治十六年突犯江南於是申嚴海禁將沿邊之  
民遷之內地不許片板入海經今二十年矣流通之

銀日銷而壅滯之貨莫售臣屢聞江浙士民之一口謂  
順治初年江浙等處一切絲粟布帛器具各物價值  
湧貴而買者甚多民間資財流通不乏商賈俱獲厚  
利人情莫不安恬近來各物價值頗賤而買者反少  
民情拮据商賈虧折大非二十年前可比等語臣又  
聞江浙士民云伊等隣里宗族戚友順治初年凡十  
家之中富足與平常可以度日者居其七八窮窘者  
居其二三然亦告貸有門覓食有路而不至於大困  
邇來家家窮窘卽有外貌平常似乎可以度日而其



內中空虛俱岌岌然有朝不保夕之勢求其真正富足者百家之中不過一三家而已等語言人人同臣細察輿論實因海禁太嚴財源杜絕有耗無增是以民生窮困至於此極夫邊方寇賊如人偶患風寒其病在表不難立爲治療民生窮困如人氣血虛損其病在裏非亟爲調理不能復元也近蒙

皇上洞悉民隱深念民艱特沛

恩綸許令沿海之民採捕魚蝦又於廟灣等處許駕一二百石小艇往來覓利沿海之民感誦

皇仁莫不歡聲震地自慶更生將見多年積困之殘黎從此漸有起色矣惟是沿邊採捕所得不過魚蝦而日耗之銀不能使之增益臣反覆籌維莫若另爲立法將商人出洋之禁稍爲變通方有大裨於

國計民生也夫海禁之所以久嚴者蓋恐內地姦民潛通海賊將硝磺等項一切犯禁之物私販與之并告以地方虛實使得豕突狼奔擾我百姓耳殊不知逆之在海譬如鼠逞隙中果有人執器坐守而又畜猫以伺之彼何敢輕登几席卽如順治十六年蹇逆鄭

成功聚如許烏合之徒當

國家江南武備未周之候出我不意大犯江寧一帶尚且金陵一戰逆賊敗遁不遑矧今京口等處大兵如雲而逆錦之勢又遠不及成功乎至於沿邊各處亦間有乘舟飄忽往來無定以及猝然登岸剽劫財物者此皆附近島中居民而非大夥逆賊也彼因海禁太嚴所需紬布等物無從購覓不得不爲剽奪之計然此等小寇只須沿邊各地方官兵居民齊心有備卽不至受其荼毒實不在乎嚴禁商人之出洋與否

若更諭以

聖朝王化之寬厚而撫恤招徠之彼且効順恐後盡爲良民矣臣請

皇上睿裁勅部確議行令江南浙江福建廣東等近海各省之督撫將該省向來商賈出洋最便之地調設道鎮各一員道臣稽查收稅鎮臣彈壓防姦凡有商民出洋者必於此地登舟不於此地而另由他處登舟者出洋之商民與放行之官弁俱以違禁論其由此登舟之商民務將籍貫姓名并攜帶某某貨物俱逐

一登簿填記凡有關軍需等物俱不準帶去其可以出洋各貨查照各關權抽分則例責令上納稅課方許開行其徒手之人竝無資本貨物者不許出洋違者仍照例治罪至商船回時凡一切帶來貨物如蘇木胡椒之類亦俱照例一體收稅雖金珠亦然惟白銀一項毋論多寡俱免抽分并令各省稽防之道鎮凡有商船去來俱彼此移會通知設有此省船隻失風悞入彼省疆界者即便詰明籍貫收之登陸臣聞內地紬絲等一切貨物載至日本等處多者獲利三

四倍少者亦有一二倍江浙閩粵四省但得每省每歲有值銀一百萬兩之貨物出洋則四省之民每歲可增貨財七八百萬若慮海逆邀截則海面寬濶異常而商舶之瞭望極遠戒備極密預避極早亦無從守候邀截不致有藉寇兵資盜糧之弊或因閩省見在進勦海逆不便遽爲通商則宜於江浙二省先行通商俟勦除海逆之後再將閩粵二省一律踵行亦可倘果蒙

皇上允行則海內之貨易於求售可免過賤虧商而海外

之銀必且源源而至雖有日耗隨有日增其所以資  
天下流通不匱之用者無盡無休不五年而民困自  
甦不十年而民生大遂閭閻日見殷康倉庫益加盈  
足而所收稅課亦可資兵餉之用此亦生財經常之  
至計利民益

國之要務也伏候

上裁

生財裕餉第三疏

毀銅器

題爲遵

旨敬陳生財裕餉第三疏事臣惟修水利以廣墾田旣可  
增天下之粟開礦山而通遠買兼可裕天下之財固  
爲足民利

國經常之計矣然銀粟之外於民最便者又莫如錢則  
凡可爲錢法之助者亦當亟請併行也臣接准部文  
知五觔以上之銅器竝損人腸胃之銅烟袋俱經奉  
旨嚴禁要在使民間用銅者少則所司易於收買庶有濟



於鼓鑄耳然天下見有無窮之銅可以不費錢糧而  
卽行取用者臣不敢不亟爲陳明也查佛老之徒百  
計設法以誘天下之財莫不懸鐘鼓擊磬盃以爲招  
來之具其鐘之小者重數百觔大者重數千觔甚有  
重至數萬觔者直隸十四省遍處皆有而浙江爲最  
約而計之何止有鐘數萬口有銅數千萬觔耶此皆  
農夫織婦之血汗精神錙銖積累而成者與其置之  
無益之地惑愚夫亂聖化何若盡取鑄錢散於天下  
俾之足

國用而利民生乎然或者曰佛老之說從來甚久三教  
竝興已非一朝一夕矣而一旦盡收其鐘是盡廢其  
教矣無乃不可乎此或人之見云然而臣則有以解  
之也夫聖王宰御萬方欲使天下知所尊親而不爲  
叛亂必以一道同風爲首務故曰書同文良以教之  
不可雜猶之一國之中而共事一君也今天下所賴  
以有君臣父子之義者惟此聖人之教若又任佛老  
之雜亂於其間是猶一國而三公矣將在下之民何  
所適從乎又何怪鬪爭擾亂之靡已乎况天下之人

賴聖人之教得生於綱常倫理之間以有其衣食與  
安富尊榮乃既得其衣食與安富尊榮而旋棄聖人  
倫理之教以崇信異端是何忍心害理之一至此也  
且三代以上從無佛老孟子曰我非堯舜之道不敢  
以陳於王前故齊人莫如我敬王也王珪曰恥君不  
及堯舜臣不如魏徵故人臣事君必以匡君爲堯舜  
始爲敬君之立極今

皇上敬天勤民事事必法堯舜則凡在臣工又安可姑容  
三代以下之惡弊而不請

皇上亟去之乎或者又曰佛氏起於東漢姑置弗論若老子道德一書著於周末卽孔子亦常問禮臣輔何人有何學識而敢於排之豈孔子之問非與此又或人之見云然而臣則又有以解之也夫老聃固周末高年有德之隱君子也彼見王迹掃地五霸疊興悉皆假仁義以自利臣弑其君子弑其父綱常倫理之問息滅殆盡而莫可救藥也是以故爲高論而輕世肆志焉至孔子問禮一節先儒力言其爲附會之說而非實有其事然臣愚以爲其事亦似乎有而非謬捏

也蓋孔子稟溫良恭儉讓之德雖小君南子尚且見之乃適周而知有高年有德之隱君子如老聃者安肯棄而不見然見而問禮則於求教之中寓教之之意此聖人正人之微權也夫老聃乃放棄禮法而以道自名者也孔子如果欲求其奧妙則當問道何乃問禮不問其所好而問其所惡何耶蓋禮爲綱常倫理之經不可一日或廢者也孔子見老聃放言高論恐後世効之蕩而不知所止也於是就而問禮孔子之意以爲禮不可廢故發端以問之問之卽所以教

而正之也彼老聃者既不申明其所尚之道而又不直答孔子所問之禮顧曰去子之驕氣夫孔子就而請問何等謙光乃反曰驕何也蓋老聃深知孔子教之之意而又自執其棄禮之見其意若曰以我之高尚而子顧以微詞求正我乎故曰驕也以聖人正人之微權而老聃早已識破其智有不可及者孔子猶龍之歎不亦宜乎然老聃之書至今在世其言雖駁而不純而得一守雌之說亦皆詔人退讓之義非若近世之書符念咒擊鼓敲鐘假死生禍福之說造俚

華三書之卷之二十一  
鄙不通之詞設網以羅天下之財者比也是近世佛  
老之徒已非佛老之本來面目不過徒爲惑世誣民  
病農蠹

國耳又安可不亟爲正之以輓此頽風使天下知君親  
之義而不致叛亂乎是廢害世之異端而收濟世之  
財用誠無疑議矣臣請

皇上乾斷勅下該部通行直省各督撫除先聖先賢山川  
城社以及名臣之應在祀典者不議外其餘一切佛  
老廟寺庵觀內所有之鐘盡行收取以爲鼓鑄之用

如此則可省買銅之費而立鑄無窮之錢雖一時權  
宜之計而有裨於

國計民生

皇風世教者誠非渺小也伏候

上裁



15711 VERNER LINDQUIST

NR

900

條奏應生應節疏

題爲請

旨事臣惟

國家自軍興以來費用浩繁錢糧不足然

皇上軫念民生不特從不加賦而凡災荒之見告者或賑  
或蠲

洪恩立沛又因河道廢壞江南之民久苦昏墊更不惜動  
用數百萬正項錢糧

命臣大爲修治

皇上惠養元元之深仁厚澤真可爲無所不用其極矣今  
廷臣因加增米豆草束價值與蠲緩賑濟諸務均應議  
准誠恐入不敷出不得不預行籌畫以臣等各督撫  
諸臣身在地方凡應生應節之處知之必悉是以請  
敕臣等將如之何使百姓不致困苦以足

國用有益兵餉令臣等盡心速議陳奏伏念臣以一介  
愚庸安知

國家大計然忠

君之念戴

主之誠則雖頃刻之間未常或離方寸又安敢不竭臣一  
得之愚以備

聖明之採擇耶竊思從來理財之道不過日節日生第古  
今時勢不同自昔言之則生節理應並論由今言之  
則其利專在乎生而不在節矣何也節者減無益可  
省之費之謂也生者取天地自然之利之謂也減無  
益可省之費謂之節則禮樂兵工凡屬必不可省者  
俱不在應節之例取天地自然之利謂之生則尺土  
寸壤凡在覆幬之中爲雨露之所及者皆可使之生

使之長以資民食而足

國用也粵稽春秋之世載在經傳者大小二十四國大國地方千里次者數百里小者數十里雖國有大小之殊而內而君祿卿祿大夫上士中士下士等祿外而朝聘燕享會盟征伐等事悉無虛歲而未常取財於異地卽如滕地截長補短僅方五十里耳而常祿常事之外更有事齊事楚之勞亦皆拮据支吾不聞流離死徙今之滕縣卽古之滕國也見徵額賦寥寥無多考古證今大抵滕地今日之產不及古時十分

之一夫同一滕地也而今昔生財多寡之不同至於如此其故何也蓋古時地褊人稠不得不曲盡人力取天地自然之利以供繁費而今則類多曠土矣夫人力盡則境內隙地必少不能別爲生法惟有力議節用以期有餘曠土多則隨處皆可栽植以圖長養收穫正宜百方生息爲足民足

國之謀臣故曰生節並論者昔之時勢宜然而今則端在乎生而不在節也若夫生之之道又宜有經有權守經而不知權則無以濟見需之費用行權而不知

經則無以起後此之瘡痍必須經權並用庶近之可免司農之仰屋而百姓亦無困厄之咨嗟遠之可裕倉庫之豐盈而兆民更享無窮之樂利誠

國家萬世無疆之休也臣不揣愚昧謬擬生財經權事宜列爲四疏陳奏內一疏有關邊海要務遵例密

奏伏乞

皇上鑒賜全覽

敕部議覆施行

靳文襄公奏疏卷七終

新文襄公奏疏目錄

卷八

治河題藁

恭謝天恩

復任

運米未盡

酌調河員

贛榆等縣

恭報開運

恭報回空

重堤預給夫食



弁員有責

義友竭忠

兩河再造

河工守成

疾病日甚

永辭聖世

附撫皖題藁

減差節省驛站錢糧疏

節省錢糧

男治豫編次

孫樹德校正

曾孫光烈全校字

Table with 10 columns and 11 rows. The table is mostly empty, with some faint markings. The columns are separated by vertical lines, and the rows are separated by horizontal lines.

1 1 1 1 1 1 1 1 1 1

靳文襄公奏疏卷八

總督河道提督軍務太子太保兵部尚書兼都察院右副都御史臣靳輔

治河題藁

恭謝天恩疏

復任

奏爲恭謝

天恩事竊臣前年被劾之時自分萬無生理荷蒙我

皇上排衆論而保臣軀

幸江南而還臣職今者又蒙我

皇上不以臣爲不肖復任總河

聖恩至此臣卽粉身碎骨亦不足仰酬萬一雖赴湯蹈火  
臣亦何辭臣祇恐衰病殘年有幸

皇上使過之澤而愚慙招尤萬一仍觸禍機豈不更負我  
皇上終始保全之恩此臣所以敢哀辭於  
聖聽也復蒙我

皇上命臣可報効幾年則報効幾年又復  
賞臣披領弓箭撒袋臣承

恩之下心之所感口不能言叩首

午門但惟淚落伏念臣十年河上雖切報

主之誠曾無治河之識全賴我

皇上力闢浮議又復不惜帑金由是臣得遵奉

方略畢力河干而以臣爲阻壞河務者不一而足又賴我  
皇上屢加救護臣然後獲有今日之生得承今日復任之  
命是

皇上之熟爛於河者踰於日月之明

皇上之加恩於臣者且出臣於天地之外矣

天恩似海臣報難窮臣惟有益切實心任事之誠以少盡

犬馬荅

主之意臣謹百叩跪

謝以

聞伏乞

睿鑒施行

運米未盡疏

題爲欽奉

上諭事竊臣荷蒙

皇上優旨復任總河犬馬殘年方以隕職是懼乃復蒙

皇上令臣從黃河運漕糧二十萬石至山西蒲州等處備

貯更蒙

上諭黃河上運危險艱難米船倘有疎失免其議處則新

輔亦得盡心効力伏念臣向者奉職無狀幸賴我

皇上格外保全得以至今今蒙我



皇上委任至此設臣有疎失臣受重處臣亦甘心而  
皇上但期即日運到有濟於百姓遂復

天恩寬大示臣於鼓勵臣敢不竭此衰朽益圖勉奮以稍  
答

皇上天地之心也更蒙

上諭凡事以身自任心切爲主事無有不成且先經黑龍  
江駐防兵丁運送米石衆議以爲初創地方不便行惟  
朕獨斷而行今兵已駐運道已開邊境多有裨益此乃  
實據仰見我

皇上廟謨獨運識絕古今所以我

皇上事無不舉舉必有成不但

功德巍峩籠罩百代卽此

嘉言懿訓實足垂教無窮臣雖不才亦願書紳至臣於十  
五日到任江北糧船多已過濟蓋自清河仲家莊閘  
入運北上已行有七百餘里矣若復驅而南還從支  
河口再入黃河亦有五百餘里路途往返反費時日  
而南來糧船兩相交錯必致壅塞兩相耽悞况查江  
北糧船半多滿號黃河行運必須船隻堅固器具周

備方免疎虞若一幫之中復加挑選則挑賸之船仍當北運運弁亦難兩顧臣已移咨漕臣卽於江以南糧船中擇其輕便之幫於清河縣一帶截留令其西運似爲直捷查江以南糧船多帶有剝船黃河開封以上水勢散漫多有淺澁必得一船兩剝亦并移咨漕臣卽於別幫糧船中帶有剝船者借其協濟稍給津貼庶黃河水淺之處可以不致悞運惟是黃河行運水淺旣須提溜水淺又須損輓必得多加夫役然後可以速達臣仰體

皇上救民之意自宜送運早到蒲州如江南山東地方需用夫役臣亦移咨江南山東各督撫臣酌行河南山西地方需用夫役卽遵

旨與河南山西撫臣酌行亦量給其口食則運送可以到而夫役亦不苦累矣至臣桃汛在邇暫赴清江浦料理此運送之事經臣酌量遴委淮徐道劉暉代供指臂俟臣防險諸事一完卽單騎前赴河南一帶躬親督率總之此運送備貯之事皆我

皇上格外之曠典臣受

恩深重但期有便於運丁有濟於百姓以宣布

皇仁之浩大故不敢不實心實力妥酌改撥稍盡犬馬之

報謹將運送未盡事宜一一

題明伏乞

睿鑒敕部議覆施行

酌調河員疏

贛榆等縣

題爲酌調隣邑閒員專管中河堤工以固河防事切照中河堤工綿亘三百餘里界歷宿桃清山安五縣之中亟需專責官以資修防除武弁一項已經徵臣酌調均平見在另疏

題明外有所應設文官如或另爲添設未免又有俸工之費臣今再四籌維惟有就近將贛榆縣縣丞一員裁去改爲分管宿遷縣中河縣丞專管修防中河堤工其所遺事務歸併贛榆縣知縣管理自無貽悞再

將盱眙縣分管山盱湖堤主簿一員裁去改爲分管  
桃源縣中河主簿專管修防中河管河縣丞主簿外  
清河等三縣並無管糧之縣丞主簿又加揚屬之如  
臯一縣鳳屬之五河等八縣廬屬之廬江等五縣皆  
係一令一典並無縣丞主簿故今贛榆沭陽誠可比  
例裁去改隸宿桃清山四縣聽各該管河同知統轄  
以固河防者也抑臣更有

請者所有宿遷中河東奠等減水六壩臣於前任內

請以該縣典史看守今該縣旣已調有縣丞專司修防中

河相應將此六壩一併責成停其典史看守可也又山陽縣雲梯關外南堤工其所遺原管山圩湖堤三十里應令歸併盱眙縣縣丞兼管修防亦無貽悞至安東縣中河堤工已經接任河臣王

題明將沐陽縣主簿帶管在案但以彼縣之官帶管此縣之河將來必致諉誤且安東見有長樂司巡檢一員儘可就近兼管無事他求應將該巡檢改爲該縣分管中河巡檢專管修防中河堤工卽將沐陽縣主簿裁去改爲分管清河山陽兩縣中河主簿專管修



防中河堤工其所遺事務歸併沭陽縣知縣管理亦無貽悞蓋以贛沭兩縣地僻而小不必多設閒員卽如淮屬除南岸堤工臣於前任內亦曾

請調大使一員專司分管修防今查大使係未入流職太卑微且無巡緝之責不足彈壓地方今臣擬將本縣廟灣司巡檢調赴大套分管修防雲梯關外南岸堤工仍將大套大使調赴廟灣管理巡檢事務庶寫遠之堤工可收彈壓之效而於內地之官守亦無曠廢之虞也理合一併聲明臣謹具

題伏乞

皇上睿鑒敕部議覆施行

臣等謹將



恭報開運疏

題爲恭報西運糧船起行日期事竊臣惟我

皇上念切秦地此瘼

諭將漕糧二十萬石

命臣運至蒲州以爲備貯至計蒙

皇上不以臣爲不肖委令運送臣益當固竭愚誠不累軍  
民必期速到庶足上慰

皇上加惠元元之至意臣昨到濟已將改撥江南糧船情  
由并將剝船之津貼繹夫之口食一一

題明矣嗣臣來到清江寓署准漕臣董訥移到漕船臣  
驗得內有江北之船不如江南糧船之堅固方足在  
黃河之內輓溜長行因隨覆吞漕臣重加改撥江淮  
等衛船三百八十四隻共計糧二十萬石惟是僱夫  
之事若咨商江南督撫諸臣則往返之間多費日時  
且責之州縣又恐不肖官吏擾派累民而剝船一項  
臣與漕臣面相商酌漕臣以北運亦須剝船以濟淺  
沮若截借西行誠恐抵通有悞不若暫借他項錢糧  
給與各幫弁丁俟其自僱剝船仍於應給行月之內

分限三年扣還清項臣念西運之事固屬緊要而早  
達

天庾更爲重務若各幫弁丁自僱剝船則亦可并僱緯夫  
不但輓拽有資而且不致累民於是計其僱船募夫  
之費每船實需銀八十兩但照將來行月扣還之數  
目今只可借給六十兩矣每船尙缺銀二十兩內漕  
臣先已每船捐給銀六兩共銀二千餘兩臣今捐銀  
二千兩委運之淮徐道劉聰又淮揚道劉殿邦各捐  
銀一千兩統而計之每船尙未足八十兩之數如果

不敷必須補湊之時俟臣前詣河南再當斟酌惟是借給六十兩之項據查淮庫錢糧無項可借適屯田收穫籽粒變價銀二萬餘兩現貯淮安府庫臣因與漕臣會商借給漕臣酌議三年之內自應扣項清還臣復宣布

皇仁各船弁丁無不踴躍而臣目前親勘緊要險工尙宜料理此西運之事須得能員佐臣指臂代臣督押先行臣前疏已將淮徐道劉暉上達

天聽矣隨據劉暉呈稱船多路曠人役繁雜必須多遴幹

員分頭協理方於運送不悞復詳候補知州馮大奇  
候補知縣佟毓秀梁柱張道溥昔年押運屯麥之効  
用守備劉景候推守備張彪等到臣見其年力精  
壯足共驅策卽委其分頭僱運協募夫船以期漕船  
速到臣賦性愚昧料事不能周詳直至臨事始能因  
時斟酌然又不敢迴護已往之言致悞

國家之事故今日西運事務有與原

題相合者有與原

題未甚相合者總祈



皇上天地之大寬臣淺陋至於可以運至何處或需倉房  
暫貯然後轉運其轉運之時或需車輛或需騾頭以  
及口袋必需之具容臣將河工諸務料理就緒卽星  
程前往河南一帶再與豫晉撫臣另疏

題報外茲據淮徐道劉暉呈報西運糧船於本月初三  
起行日期前來理合

題報恭慰

睿懷伏乞

皇上睿鑒施行

恭報回空疏

題爲恭報西運漕船頭次回空并前後剝運情形仰祈  
睿鑒事該臣等看得奉

旨西運漕糧二十萬石原計截留太平等九幫船二百八  
十四隻前此由淮以溯於河而自歸德以上河道險  
阻情形較甚於徐州以下之黃河者艱難之狀莫可  
名言臣等與淮徐道劉暉等仰體

皇上賑濟秦民之聖心各矢竭蹶圖維以期無負

聖明委任至意於是集思廣益無不以爲惟有多僱剝船

盡將幫船剝輕自可利於疾僂而俾所剝之民船隨剝隨運亦可速於抵津此臣等之本志也已於本年

六月初六日

題明在案滿擬從此一剝再剝而三剝爲率不過兩月便可報竣豈期六月初六以後旋爲伏水漲發長有五六尺不等夫黃河上自三門而下建瓴之勢如同奔馬伏水不過五六尺而隨路之急溜遄流奔騰澎湃晝夜如斯不特剝船無風一觸便溺卽九幫原船當浩瀚無涯之際非攔淺而船傷卽頂溜而舟損

若夫原在平穩之所或方乘風急行之時忽遇俗之所謂神水神澗頃刻漂沒者則又不在擱淺頂溜之內也節據押催委官以及沿途文武幫弁等員紛紛呈報臣等不禁寢食靡寧心膽俱裂然相機催饋設法救護以及鼓勵之事羽檄頻仍無有虛日無如限於人力之無可施終不能副臣等仰體

皇上期於速到之意臣等就事論勢從前伏汛由歸德以至開封漂沒損壞者旣已若是其纍纍今自開封以至滎澤尙有一百八十餘里險阻又甚於開封以下

之情形秋汛在邇若必令原船俱至榮澤而後起盡回空將必幫船盡行破壞米多漂沒而後已也船糧兩重臣等固當速運以到孟津尤應慎重以全

國帑敢不曲計兩全之善策耶隨與淮徐道劉昺面商確酌通查妥議去後今據該道身經目擊斟酌時宜詳稱前後僱過大小剝船一千一百餘隻起剝過漕米一十五萬一千二百石零其九幫原船自到榮澤四十一隻以及隨地傷損器具不全起空各船蔡茂春等共計二百一十餘隻皆令回空外尙存原運漕

米歸併完固幫船停泊祥符境內候剝起運孟津者  
止四萬八千七百石零并從前漂沒之幫船七隻剝  
船七隻等因詳報前來臣等覆核無異但據豫省經  
收委員開封府知府蘇佳嗣等日報至七月三十日  
止共計起運過七萬三千七百餘石則尙有一半未  
到之剝船見在沿途祇以河道自滎澤以至孟津二  
百餘里急溜尤甚而且南岸壁立陡峻非常北岸則  
一片大灘沮洳陷溺以是並無繚路非東風則剝船  
不能寸進見在沿途以及歸併候剝之米倘得東風

華三事之要者  
時作下難月餘俱到第恐秋氣漸深西風日厲以致  
阻滯有難臆度也至從前漂沒幫剝船糧臣等見在  
設法捐補俟於事竣疏內

題報并見在尙有歸併空船隨時遣發歸次修艙以濟  
新運外理合一併

題明伏乞

皇上睿鑒施行

重堤預給夫食疏

題爲遠方之民應募河工工停欠帑情實事確久蒙

聖明洞鑒部臣格於成例屢駁屢追仰籲

天恩始終特賜豁免以免再瀆

人聽事該臣等看得從前河工原無修治全河之事間有  
興舉無不勒之州縣派募里民在司事諸臣固得坐  
享安逸而凡所派之州縣用一費十民不勝其苦累  
矣恭遇我

皇上神聖文武聰明睿智以河工關係



國家大事力排

廷議而出之

乾斷不惜數百萬金獨任臣輔修治全河於時臣輔自分  
智慮短淺不勝惶悚但具有愚忠敢不仰體

皇上愛民以治河而又可因河以累民耶且勒募之里民  
老弱不齊緩急難恃用以濟小工而且不足似臣輔  
奉

命兩河竝舉日需人夫十餘萬若循派募之舊章將必半  
壁號呼矣然且不特民苦於累而大工亦將貽悞無

成臣輔於時幾經籌慮乃易派募而爲僱募定賞罰  
示勸懲遴委能員分頭四出廣

朝廷愛民德意多方鼓勵設法招徠十年之中始得大工  
告成而民不擾惟是所募之夫遠近不一大率皆江  
南淮徐廬鳳之屬山東東兗等府之屬河南開歸等  
府之屬甚至有直隸之大名等處之人聞風而來樂  
於趨事然皆各有父母妻子則安家有費奔走道途  
則食宿有費力作器具則置辦有費是每夫一名受  
僱之始卽預給銀數兩不等以資其諸費而後始得

到工到工之後仍復按工支給彼夫也者恃其筋力之強健奮其畚鍤截長補短築成千百土方然後照題定每方給銀若干之數扣除找給期於銀工相抵而後已此臣輔十年中與舉大工募民應役預給錢糧之原委也獨是重堤一工奉

旨興築臣輔亦期力圖早竣飛飭各監理責令分管各員鼓舞義民照大工之例齎銀星往江北東豫等處分頭僱募每名預給數兩不等因而如期畢集者一萬餘人正在按工支給興築甚力之時奉

旨停工各夫無不驚惶失業四散求食而去所有預給數兩之處無憑扣追隨經接任河臣王新命查明

題請豁免部覆不准奉

旨這築堤用過預給等項錢糧著該督再行逐一明白詳察具題到日再議具奏欽此是預給一項情實事確久在

皇上洞鑒之中矣臣輔於時待罪在家恭讀

上諭早已額首爲此數萬窮夫感

聖明浩蕩之恩之無涯涘也復經接任河臣王新命遵

旨遂一明白詳察疏稱當日監理等官領帑召募數萬人夫皆係覓食窮民若不預給銀兩則此輩父母妻子憑何贍養又豈能枵腹遠赴江南且工作之器具棲止之棚蓆等項憑何措辦此夫之不得不行預支官之不得不行預給乃從來興工之舊例非自重堤之創始支給也後忽奉

旨停工數萬窮民夥聚淮城各員捐措解散之不服違敢問其預給銀兩應請

皇恩一併准銷等因具

題部覆堅執一切工程俱係按工給發工價並無預給之例仍令在原經管各官追取報部等因在案今臣等復查得從前報銷工程冊內原無預給工價之名部駁自是有因但從前亦無半途停止之工凡有預給工完扣除是以在工有預給之實而冊報無預給之名惟重堤一工忽然中止無憑扣除遂有預給之名而

請豁免也部臣身不在河固不知其原委不得不有此駁臣等既在事中若復因循部議將欲追之當日預領

之夫則早已鳥驚獸散矣按籍而求能保無株連滋蔓致悖

皇上愛養黎元之

聖心乎是追之原籍不可也將欲追之當日經給之員則各員奉公募夫照例預給不能逆料其工之不終而早爲之規避且閒散么膺貧寒徹骨安能李代桃僵勢必仍責之各夫之原籍徒滋擾累是追之各員無益也臣等伏觀我

皇上溥博如天

賜蠲

賜賑之恩無歲不下霑

恩被

澤之感無人不然而所當仰請

皇上垂念興工之際惟恐其夫之不來而預給在先停工  
之後惟恐其去之不速而無憑扣追事既出於意料  
之外勢乃處於無可如何之中

特沛天恩准予豁免則臣等亦且同此數萬貧民共邀  
浩蕩之鴻慈矣除原任守備陳杰核減土方銀一百兩零



已於康熙三十年十一月內繳完河庫訖王大成購  
交椿木細數另冊送部查核外所有重堤案內預給  
夫食銀兩始末情由臣等據實瀝陳貼黃難盡伏祈  
皇上俯將臣等看語特賜

睿鑒全完

敕部確議施行

弁員並有河工之責疏

題爲弁員並有河工之責

請照文官

題補之例以收實效永保隄防事竊惟河上文武等官各有河工專責必須熟習諳練之員然後知水土之性盡防守之方而保河道於久安也欽惟我

皇上聖明天縱功德巍巍其於河道機宜實見他人所不能見言他人所不能言又蒙

俞旨

特准管河文官坐名

題補憶臣遵行之後收其指臂之效者亦復不少惟是武員尙無定例臣前在任時有臣坐名

題補而部覆議准者如徐屬河營守備華成名是也有臣坐名

題補而部議不准者如揚屬河營守備李良相等是也臣維治河大概不外築堤束水而防河之要不外防險保堤使河道旣治之後防險有人保堤有人則自不致於冲漫奪河矣臣查自古以來未嘗不爲防險

保堤之計額設河夫然皆隸於州縣有名無實並無專官督其力作又復一年之內到工無幾夫水土之役成之甚難守亦不易以不素習之河夫而又加以一年無幾之力作則防險保堤不過虛應故事雖欲河道之長治而不旋修旋壞又安可得乎臣遵

皇上方畧更有監於已往之弊特條陳於

皇上之前請裁河夫而爲河兵復

請設八營之守備千把以督率之俱蒙我

皇上一一准行臣前在任時故得轉飭守備千把督令河

兵遇險則糾集搶救下埽簽椿平時則栽柳砍柳巡  
堤以及駕船運料凡遇灘洞鼠穴水溝浪窩之類有  
卽修填不使稍有滲漏再每五日令各弁員將督率  
河兵分工力作之事俱一一開寫呈報臣衙門以考  
其弁兵之勤惰此所以藉

皇上之威靈而險工堤工得以保護不壞自臣去任之後  
河營員弁部選日多而諳練之弁遂復日少臣去冬  
同戶部侍郎臣博濟等勘閱工程之時因將河上事  
宜問及弁員有茫然不能登答者甚至問及河上之

地名路程之遠近俱不能對因今日弁員中已諳河  
務者少而不諳河務者多若更遲數年則陞遷老死  
熟諳河務之人盡去而防險保堤更不能再收力作  
之效矣伏祈

皇上俯念河工關係重大文武員弁均有專責文官既准  
以熟諳河務之人坐名

題補則弁員並當照文官之例亦准以熟諳河務之人  
坐名

題補則文武齊驅弁兵效命其於防險保堤實大有裨

益也伏乞

睿裁勅部議覆施行

義友竭忠疏

奏爲義友竭忠

王事盡瘁捐軀微臣生死難安仰籲

聖慈推恩分卹以慰幽魂以勵草野愚忠事切臣一介寒

微歷蒙

皇上天恩拔擢於康熙十年由學士陞授安徽巡撫大凡  
外官自州縣以上有刑名錢穀之責者必以禮聘士  
協同料理名曰幕賓臣於是時留心訪求未得其人  
適有浙江錢塘縣儒士陳潢者遊學京師偶與臣遇



臣見其狀貌魁梧器宇凝重止語默咸秉以禮臣  
遂聘以同行并令教臣子焉然臣亦未之奇也徐而  
察其學問似非章句揆其言論悉具性情臣亦未之  
信也乃自抵皖署後臣與之寢食惟俱朝夕討論講  
求政事始知其識明敏而深厚其才肆應而曲當臣  
不禁愛之重之矣臣撫皖六年適當軍興之際陳潢  
之裨益實多然此六年之中猶爲臣一人之私藉而  
非有所宣力於

國家也迨康熙十六年三月臣復蒙

皇上天恩陞任總河當兩河敝壞之後前此覆轍頻仍聞者心驚見者胆落無不以畏途視之臣雖報効有心而設施無術亦豈能無憂惶悚懼之念陳潢卽毅然告臣曰遺大投艱豈得無懼但能實心力行則天下無不可爲之事正可藉此以報

君恩卽潢草茅下士素有志於當世之務而未獲進身無由建白今亦正可相佐以報

朝廷以畢素志臣於是一聞潢語瞿然自驚隨應之曰子能助我宣力

王事以報

君恩我亦何敢再萌身家之慮哉於是矢志同心黽勉協力出則隨臣荒度經營入則偕臣料理文告凡所以算土方核浮冒科料物圖節省之處纖悉無遺漏如是不避寒暑無分晝夜與大工爲始終者十年有如一曰故臣得以時遵

聖畧竭蹶從事俾兩河復歸故道潢與有力焉但臣蒙

皇上命臣治河臣復以禮聘潢與之同事是潢之盡心於臣猶臣之盡心於

皇上乃臣職友誼之所當然耳臣亦何敢將陳潢妄瀆  
天聽特是大工之內如開河築堤募夫辦料設法催攢釐  
姦剔弊鼓舞人才不避勞怨不畏強梁臣力之所能  
爲臣心之所能盡者陳潢不過助臣盡瘁而已原無  
足異若夫發前人心思之所未及開微臣智慮之所  
不能者則有五大功焉如下河七州縣從前被滄  
人但知高家堰冲淩三十四口因而不能堵塞清水  
潭之故而不知前人尙留翟家壩未堵三十餘里與  
成河九道之處以致滔滔下注不舍晝夜清水潭遂

成澤國清口內灌無休而下河遂成巨浸被災十分  
矣潢乃建議盡行築堤塞河以敵清口之黃且創設  
減水壩逐漸宣洩以保高堰之堤工始得減下河十  
分之災爲二三也二如清水潭旋築旋洩末次勘估  
需帑金五十餘萬潢乃建議棄其舊口移築堤工於  
湖內改爲永安河節省帑金四十餘萬乃得永免潰  
凌而保安瀾也三如前此甘羅城運口逼近黃河河  
水內灌淤墊山清高寶之河道每年冬底必大起民  
夫挑挖以濟新運不無勞民傷財潢乃建議改進太

平壩以避黃水內灌卽或黃強淮弱之年間有內灌  
黃退旋卽冲刷仍舊永不淤墊迄今十有餘載免民  
夫挑挖之勞歲省民財數萬金也四如康熙十七年  
冬駱馬湖運口已經淤斷新運無由北達危急非常  
潢乃建議劄挑阜河二十餘里地皆沮洳陷溺應期  
而成且復挑支河三十里以避黃水再無淤墊之患  
使通漕直達

天庾也五如

聖心愛民一案原

題不過欲洩減壩之水以利民田潢乃建議創挑中河  
以避黃河一百八十里逆流之險卹軍利漕自歷代  
行運以來所未有之事也當其興舉以上各工之時  
無論寅僚不分老幼無不以爲必不能成且有涕泣  
以求臣之停止者惟潢信之確而臣任之力得蒙

皇上乾斷允臣興舉且荷

皇上如天之福百川効靈俱已成功爲

國家永遠之利實潢之聰明卓見以成之者臣實不敢  
昧心掠之歸己以欺

皇上以欺

天也臣知潢之才感潢之心念潢之功情不得已當

聖駕甲子南巡之時蒙

天語問臣以有無得人臣卽以陳潢姓名對

上嗣因

皇上聖慈必欲使下河無一夫之不獲

命臣子治豫問臣以有無別治之法潢乃籌之晝夜議添

重堤一策仍輓減壩所洩之水以出黃河臣因試驗

有素是以據實具



題以此策出之陳潢蒙

皇上不次之恩授以僉事道銜贊理河務潢感激方將益竭其才力圖報効不意因此議論紛起部議革去職銜而潢亦隨病入膏肓矣後蒙

聖明洞鑒察潢無他

特恩寬宥而潢又隨物故矣今臣復蒙

皇上天恩復任總河豈不以臣向者曾効犬馬之勞耶但向者帮臣以効犬馬之勞者乃陳潢也是臣與潢乃同事一體之人臣幸而生遂得再受

皇恩瀆不幸而死臣何忍負之使潢尙在臣猶願以百口保

題潢於

皇上之前以備驅使必有可觀潢誠不幸而死臣若避嫌  
隱忍是臣生爲負友之人念臣衰病日甚旦夕難保  
若不及早陳情一時風燭死爲負友之鬼逢潢地下  
何以相見乎臣今不揣冒昧將臣友潢始末與潢竭  
忠

王事各緣由據實直陳仰祈

皇朝通志卷之三十三  
三十一  
皇上察臣情詞憐潢勞績

特沛天恩准復陳潢僉事道銜以光泉壤不獨潢之幽魂  
矢報銜環而微臣仰荷

推恩及潢亦且死得瞑目將見天下草野未達之士當必  
有所觀感興起而益奮其他日報効之心矣臣謹具  
奏貼黃難盡伏祈

皇上睿鑒全覽憐憫施行臣不勝激切悚惶待  
命之至伏候

勅旨

兩河再造疏

題爲兩河已蒙

聖功再造臣等敬陳全體情形謬抒善後一得之愚仰佐  
國家永遠平成之業事竊惟黃河源自崑崙西來萬里  
乃氣化之經絡爲地理之血脉前人之說詳矣惟是  
挾沙而行性不由於地中自禹鑿龍門之後榮澤而  
下全在人力之維持經云陂以障之者是也否則潰  
敗凌裂爲害滋大此成敗相因古今所以一轍也然  
當未敗之日與夫旣敗之時固非人力不足爲功而

爲功之後如果熟識全體之情形度其輕重緩急而再預爲之備則自可以制非常之變而不難非然者則一旦意外之來未免坐失機宜而倉卒莫爲之所矣按自康熙十六年以前河道敝壞已極淮揚千里民罹昏墊之災

國賦因之虧損且將有阻運之虞矣荷蒙

皇上聖心乾斷淩意修治旣不以臣輔爲不才力排衆議而耑任之又不惜數百萬之金錢銳意興舉而大治之故臣輔得以時遵

聖畧勉竭駑駘忘其身家以圖報効自康熙二十二年蕭  
家渡閉合龍門二瀆安流之後每年伏秋因有減水  
壩逐漸宣洩歷今十載河身已自深寬將來惟有愈  
深愈刷足以容納暴漲而無虞此皆

皇上洪福齊天百靈効順所致所謂已成已治者是也臣  
等何庸再爲置喙哉乃前者臣輔恭聆

聖諭云全河已固設或險工一有疎虞前功盡棄矣大哉  
王言河道守成盡此

聖諭數語凡爲河臣者苟能於各險工加之意焉則有備

無患是保全之上策也獨是臣輔在河十有餘年其中甘苦知之最確久已仰體

皇上神功遠運精益求精之心因而推廣險工不可疎虞之

聖諭窮源溯流以爲今日全體情形之內欲得百世無敝之術須加意外之防則高堰再當籌畫萬全以資捍禦中河再宜加帮遙堤以固金湯也蓋以黃河自河南滎澤縣起以至江南之清河縣止兩岸各有一千餘里臣等常設一必不然之慮遙爲制變之計論之

如南岸險工之在開封者若有疎虞其水乃入淮河  
若夫歸德以下與宿遷以上若有疎虞其水乃會入  
睢水并桃源清河之間若有疎虞之水總皆歸入洪  
澤湖以侵高堰使高堰能自保固以敵其疎虞之橫  
則凡南岸冲决之水仍由清口而出止於民田受淹  
而於運道無礙且所疎虞之决口易於堵塞而無持  
久糜料之虞倘高堰一有不固則黃水仍舊內灌山  
清高寶二百里之運河其爲淤墊無疑矣故臣等以  
爲高堰之尙應籌畫萬全也再查北岸險工之在河



南者若有疎虞其水乃由張秋以入運河再由天津以入海險工之在山東者設有疎虞其水乃由濟寧魚臺豐沛之間入運河總歸駱馬湖以入黃中二河亦止於民田受淹而於運道無礙若險工之在宿遷以下清河以上者設有疎虞則黃中二河之水建瓴北瀉勢必奪河則宿桃清一百八十里之運道必然淤墊無疑矣此南北兩岸千百餘里上下緩急輕重之情形如此然此第就險工設有疎虞而言也若再以伏秋長水情形論之如本年黃水長至八尺清水

長至六尺皆未出漕卽或加長數尺以至丈餘有減水壩可恃總不足以爲慮康熙二十四年之成驗可見也特是天時氣化不齊旱潦難定倘遇異常大水之年宿遷以下則漆山東諸水清口以下則漆淮河之水一時清黃二水交漲設或再遇如康熙十九年與二十四年長至二丈之外則必勢若滔天奔騰洶湧雖有減水壩而一時宣洩不及誠恐中河難以支持不能保無漫溢冲決之患故臣等以爲中河之尙宜講求也其講求之法在中河則須加築重堤一道

再開夾河一道以作重門之障並於西寧橋添建石  
閘兩座以備意外宣洩更於堤工之上每二十里設  
立涵洞一區以溉民田則北岸自是萬萬無虞矣在  
高堰亦須加築前此停止重堤以作外藩以防意外  
則南岸亦在萬萬無虞矣但此兩岸重堤需帑一百  
二十餘萬爲費甚大臣等俱所不敢議及惟查高堰  
向開運料小河一道卽以河土築成堤工見高八尺  
臣等以爲應將此見在小堤加築寬至三丈高至二  
丈餘尺不啻事半而功倍亦足以制非常之變也再

查中河見在亦有河溝一道因之挑浚淤通俾成河道再令分洩暴雨歸併平旺河以入海卽以挑河之土將見在遙堤加高二三四尺不等再於仲家莊陶家莊兩閘左右各添一閘以利宣洩是洩處旣多於今而所障又高於昔則自足以禦狂暴而合而計之則南北兩岸凡遇照常伏秋自有減壩宣洩倘值異常大水亦藉重門鞏固而爲有備無患永保安瀾矣但所費亦需帑金六十餘萬也此河道全體情形窮源溯流之論其情其理久在

皇上神明洞見之中且臣輔已經病入膏肓僅餘一息不能効力矣祇以犬馬之誠惟恐旦夕殞命所有愚忠不能

上達是誠辜負

皇上起復臣輔之意死不瞑目故臣等謹先具疏預爲

題明抑臣等更有請者宿遷縣張莊運口乃北運河之水接入中河并通黃河之咽喉也臣輔前挑中河之時曾議此處設閘以司啟閉蓋欲使山東之水大則開閘分流入黃以保中河小則閉閘令入中河以濟

糧運旋因臣輔解任廢閣不行歷今五載不舍晝夜  
雖於糧運無悞然實未爲萬全誠恐一年東水微弱  
則彼流入黃河中河之運道淺澁可虞矣臣等愚見  
以爲將此運口竟行堵塞另於駱馬湖之東中河之  
南仍建石閘一座倘值東水大長之時則開以洩之  
東水消落之日則閉以蓄之平時更可藉以運料以  
資修防庶於中河運道萬無他虞矣理合一併具

題伏乞

聖裁貼黃難盡并祈

皇上睿鑒全覽施行

河工守成疏

題爲謹陳河工守成緊要事宜仰祈

睿鑒採擇

特賜天語申飭以固河防事竊惟人情莫不急見在而怠  
緩圖所有黃河險工亦知竭力堵禦以備非常此外  
大畧疎忽視之者多矣殊不知水性汜濫全藉堤工  
堅固以保安瀾欲求堅固堤工莫如興築之時夯硤  
得法尤莫重於旣成之後隨時修補蓋以風雨淋漓  
人畜蹂躪以及鼠穴獾洞種種殘毀之端無時不有



久之漸成卑薄不堪捍禦矣諺云千仞之堤潰於蟻  
穴從前皆蹈此弊而莫之省也故臣輔前於敬陳經  
理河工事宜第七疏內請設河營兵弁專令修防更  
念工長兵少不足於用原擬工成之後各有淤地露  
出可以添設幫丁俾其協力供役等因在案今查添  
設幫丁必須撥給地畝以資養贍勢必徹底丈量又  
起爭端應將幫丁停止不議外但每丁一名派管堤  
工五六七八九十丈不等各有採柳運料防守險工  
打樁下埽挑挖引河等項之役不能時時在汛修補

殘毀將來亦豈能免卑薄之虞哉臣輔早已計及於此今乃酌爲以堤護堤之法通飭文武官弁凡堤面寬二丈者止留八尺爲行路其餘一丈二尺盡行密栽細草更於坦坡之下平地去處沿坦坡俱栽卧柳各寬十丈以防水長油刷并禁人畜蹂躪久之自足以固外藩以避風雨淋漓人畜蹂躪之患則每兵一名自足修補穉洞鼠穴并行路之殘缺而有餘矣又凡黃河兩岸之堤去河里數不等大畧臨河之岸高而近堤之地低蓋以河水出漕之時沙先停於近河

之岸而清水後至堤根故也及漲消水落堤根之水無處宣洩積爲澁溝自二三尺以致五六尺不等每風起浪騰堤根日被汕刷今宜於積水上流量挖一溝引黃直灌積水處所使其停沙於此低窪俟黃水消落之後再於下流亦量挖一溝另引清水從此而去自然日漸淤平見在靈璧縣張韓二堡之堤坐受此病常被汕刷當與一切低窪急行設法淤平者也其堤裏一面或係澁坑或係舊日淩口積水爲潭澁至一二三四丈不等每當伏秋水發黃河水面大約

高於堤裏之地數尺以至丈餘不等是故設或衝决  
便有建瓴難遏之勢而每年加幫防險取土亦艱臣  
輔前任內相度情形曾將邳州董家堂桃源縣龍窩  
二處險工不拘埽臺上下建設涵洞引黃灌注復於  
月堤亦建涵洞使清水流在月堤之外堤裏窪地不  
久淤成平陸幾與黃河水面相平不但堤根牢固而  
每年取土亦易此從前之明驗也臣輔復任以來凡  
係險工可設涵洞者已經飭行興建以後宜倣此行  
之實於險工大有裨益至邳州舊城迤西週圍約有

百里地勢卑窪四面皆高以致所淹之水竝無去路  
遂成澤國前

皇上南巡之時曾於此處乘舟今臣等竊以爲此亦可借  
黃以淤灌之也臣輔在任時徐州長樊大壩險工堤  
裏卑窪甚寬涵洞之外不足淤灌遂於掃臺下首掘  
開丈許之口引黃內灌迨伏秋一過自然掛口仍將  
握口之處堵塞不數月已將窪地淤高二三尺矣今  
邳州亦宜照此已驗之法行之其清水亦可引至運  
河而去或慮掘堤可虞不妨擇其適中之地建設小

閘一座以便酌量內灌更爲萬全不數年後將見澤國變爲沃壤矣以上數條俱於河工深裨益極應舉行以爲善後之策但行之非難實心力行之爲難且掘堤進水淤墊低窪之區其事甚易其効甚大而人多不知情形往往畏避不肯舉行臣輔有志於此而未之逮今伏枕呻吟之際每爲念之不置誠恐旦夕殞命此情無由

上達則已行之密栽柳草與未全行之涵洞不及行之邳州灌淤等事所當預爲

題明仰請

天語申飭以爲善後之一助也臣等謹疏具

題貼黃難盡伏乞

皇上睿鑒全覽

敕部議覆施行

疾病日甚疏

奏爲微臣疾病日甚見有重任在身未敢遽請乞休仰

懇

聖慈遣發臣子到豫一視微臣生死銜

恩事切念微臣犬馬殘年疾病已久荷蒙

皇上復起用臣臣不敢以疾病力辭者臣誠感激

天恩妄思報効於萬一耳乃

辭之後力疾馳驅半載之中諸病畢集如頭痛若劈耳  
疼若撞與夫痰嗽無休閒且咳血盈碗寒熱又作痔



瘡并疊以及胃脹脾泄等症非此卽彼旋止旋復然更番爲崇猶可勉強支持於職事毫無所闕不意自七月二十六日起以迄於今晝夜發熱不止頭項胸背俱痛嗽則引動痔痛等症兼而受之非昔之旋爲卽止彼此更番之說矣每日止食薄粥三碗參藥二盞以致形枯如柴精神大減夫河工何等重大臣病已入膏肓豈容尸素其間爲之貽悞祇以秋汛未過尚須隨機策應兼蒙

皇上特委督運西糧亦未報完臣心何安而敢遽請乞休

除一面仍加勉強與協理河務府丞臣徐廷璽公同料理職事外但似此奄奄一息如能照舊病不再增或可挨至來春則微臣尚有赴

闕謝恩之日如果諸症不減再有所增勢必日甚一日溝壑之期近矣不揣冒昧仰懇

皇上俯念微臣風燭之言赦其狂瞽

恩准遣發臣子兵部員外郎靳治豫來到榮澤少敘父子之情則微臣生有餘榮死無遺念矣爲此謹具

奏

聞伏祈

磨鑿施行

遺奏

奏爲微臣從此永辭

聖世自慚辜負

天恩伏枕哀鳴仰祈

睿鑒事竊念微臣至愚至陋才則等於中人而硜拙之性

實切忠

君愛國之念無論從前過叨

殊恩異寵

恩德難酬卽臣本年衰病糾纏重荷

華公奏疏卷一  
三  
睿慈垂卹兩遣臣子治豫南來省視是誠曠古

恩榮臣何人斯得蒙

皇上天高地厚之恩至於此極也私心感激自謂一死不  
足以報

高厚於是竭力醫藥計圖痊可少効涓埃無如病入膏肓  
百醫罔効黃泉咫尺戀

主依依惟有教臣長子治豫以率他子若孫勉事

聖君捐軀報

國以繼微臣犬馬之志而已至臣閱歷河干十有餘載

前歲甲子

聖駕南巡蒙

恩面賜

宸章之頃

諭臣須著河防一書臣於時跪聆

天語不勝踴躍祇以大工未竣不遑著述茲臣復拜水土  
之

命已將一載業經通前徹後草成大略須俟數月之後方  
得成帙進呈

御覽已囑臣子治豫至期恭

進矣抑臣更有

請者臣於水土之役爲時最久稔知河工非人莫治然欲  
得人以爲河工之助經臣驅策多年著有成驗者莫  
如江南山清盱眙同知馮佑淮徐道僉事劉暉二人  
允稱長才肆應而雄幹明敏熟諳河工無出其右者  
也又山東濟寧道佟國聘河南管河道周銓元與夫  
前在河工今經陞任之福建福州府知府石之欽江  
南池州府知府李燦原任湖廣寶慶府知府劉光業

數人者皆係熟諳河務久著勤勞居心謹飭之員若夫微臣自從撫皖以來則更知有山東臬司喻成龍一人蓋以成龍初爲江南建德知縣曾著賢吏之名今歷任臬司彌勵清操是亦方面中之卓卓者以上若而人臣雖不知其後此有無變節與否第卽其從前見在而論之則馮佑劉暉等不特可爲河工之臂指而尤稱肆應長才足備驅使夫以人臣事

君之義臣聞之熟矣旣知之深臣亦何敢隱忍不言以負皇上求才若渴之



聖心乎又臣前此逢世無術以致負謫招尤因而奉

命勘河之原任尚書熊一瀟原任給事達啟納趙吉士等

皆被指摘而去情殊可矜昨臣既蒙

皇上力排羣議而起復則熊一瀟等事同一體其無辜受

累自在

聖慈洞鑒之中亦當仰請

皇上如天之仁一體矜卹者也痛臣蒙

恩入地戴

德九原死而有知銜結永無窮期特是臨終冒昧陳情語

無倫次除委同知馮佑將

勅印并

王命旗牌書吏文卷等項送交協理河務府丞臣徐廷璽  
收明外貼黃難盡伏祈

皇上睿鑒全覽施行臣一靈不昧不勝惶悚嗚咽之至謹  
具

奏

聞

1998

1998

靳文襄公奏疏

撫皖題藁附

減差節省驛站錢糧疏

題爲敬陳減差節費之法以裕軍需以甦驛困事臣惟  
軍餉爲今日之急需然必節省有法而後能上下均  
利也驛站爲

國家之血脉尤必調理得宜而後可始終無弊也臣謬膺  
巡撫之寄極知司農仰屋之艱是以凡可變通無不  
力求節省如宣樓等船可以歸埠省費者已經臣酌

議具

題矣至於驛站錢糧臣屢准部咨酌量裁減先曾勒令  
藩司驛道於必不可裁之中將鞍廐等款曲爲量裁  
咨明兵部續准部覆以不裁差遞等夫又行駁出今  
各州縣紛紛詳顛難裁情由臣雖屢行飭駁然大抵  
再三勉裁連鞍廐各款不過萬金而止至於驛站全  
局臣復將錢糧差使通盤打算則卽此萬金又誠有  
斷斷難裁者蓋臣屬驛站昔年止供江西廣東二省  
差使所答應者惟平南王及兩廣督臣廣東提臣江

廣兩撫臣數鎮臣之差而已今則平南親王之差十倍於昔而又添江西督臣廣西撫臣安徽九江江西三提臣以及安親王簡親王各將軍都統等差至於安塘員役之飛馳與部差之絡繹又難悉數今日應付之繁實數十倍於昔矣計臣屬驛站錢糧自康熙九年核裁之後止存二十四萬餘兩及康熙十三年一時軍興差繁馬少臣同查驛郎中舒淑布等調劑衝僻再三斟酌量增銀二萬有奇以視原額所增不及十分之一夫以添數十倍之差而僅加十不及一

之費其爲不敷顯然易知也卽如部咨所開以楚豫  
二省驛站見在核減謂臣屬亦當照減等語此在部  
議揣度雖是而其實有不然者蓋楚省見在用兵豫  
省實當孔道所增各兵主王貝勒將軍都統等差固  
自不少但二省向有雲貴廣西等省之差近因逆寇  
阻塞雲貴差俱暫停而廣西又歸中路是楚豫二省  
之差所增雖多所減亦不少也惟臣等中路舊有之  
差分毫不減而新增之差則數十倍於前是以衝驛  
所倒之馬每每於額設之外有多倒至一二倍不等

者且種種賠累皆在不貲而並無款項開銷拮据之  
狀萬分難支臣故曰卽見在議裁之鞍廐等款亦實  
實難以裁減也臣因思欲興利必先除害欲議節費  
之法不如先清糜費之由今日驛站所以不支之故  
固困於差使之繁多而尤困於跑差員役之狼籍查  
騷擾驛遞雖屢經奉

旨嚴行禁飭但今日勘合火牌率皆內部大差及藩王將  
軍督撫提鎮之員役彼挾其聲勢動稱緊急軍機以  
州縣驛卑小之官壓以軍需機務之勢誰敢有執法



華文選公案正卷一  
力爭者近據衝驛州縣各官紛紛赴皖向臣面訴大  
差橫索支應難堪之苦臣卽詰其何不當時據實通  
報以憑題叅乃於事後口說有何益處據各官覆稱  
大差之來其暴如雷其速如電卑職等親自馳迎竭  
力供應尙且無端辱詈動以違悞軍務報部正法爲  
辭百般刁措彼時事在頃刻不容轉身職等何暇具  
文况多騎橫索之事皆係伊等私情並無檔案憑據  
留與職等若一經申報勢必隨奉院臺嚴駁卽或院  
臺憫念驛困據詳

上聞在大部亦未必據一面之詞卽將伊等處分勢必彼此俱行駁查一經駁查伊等惟有混賴豈肯自吐真情是呈報題叅徒多一件事務徒見得職等不善供應故惟有剜肉補瘡吞聲飲泣等語臣復詰云馬匹在爾等廐內銀錢在爾等庫中爾等執法不與彼何能強取而去揆此則明係爾等違例濫給於人何尤又據各官覆稱職等豈肯甘心濫給但伊等所奉之差何等重大如與彼爭執勢必稽遲時日是伊等未受騷擾驛遞之處分而職等先干遲悞軍機之死罪

華之... 卷之...  
職等雖至愚豈不圖保功名性命總之近日擾驛之  
差比比皆然差愈急則勒索愈多差愈大則聲勢愈  
橫職等如欲申報則不勝其報院臺如欲題叅亦不  
勝其叅且伊等雖萬分騷擾而毫無實據落職等之  
手則申報題叅總歸無濟等語臣聽其言詞句句皆  
實因查上年二月內有部發前往廣東後補叅將張  
霖等多騎驛馬勒索銀兩經臣據實入

告及部議請

勅兩廣督臣金光祖確查而張霖等悉皆不認致兩廣督

臣以未得驛官對質咨臣確查張霖等多騎驛馬勒取惜馬銀兩交收確據臣雖檄行驛傳道訊取驛丞馬夫口供移覆然騷擾之人當時遠去不留痕跡今欲求其確據將從何來是臣雖極欲遵例執法亦果屬無益豈惟臣不能執法卽部臣亦無可如何也夫霖等不過赴廣候補之官而如此橫索則凡奉內藩王各差人員地方官無可奈何之情更可見矣夫大差擾驛在有司督撫以及部臣旣俱無可如何則以有限之錢糧而供無窮之勒索將見驛站之倒廢

可立而待從此遲悞軍機勢所必至矣臣言念及此不禁憂思如焚於是再三籌畫得一減差救時之策敢爲我

皇上一一陳之減差者減內外火牌勘合之專差也查中樞政考開載凡王公將軍督撫提鎮巡鹽御史諸臣每歲各給火牌五張至五十張多寡不等是以諸臣一切章奏皆得專差乘傳徑達

輦下此固從來定例然當議節錢糧求甦驛困之際又宜酌量變通在諸臣止期章奏速達何必逐次專差臣

請嗣今以後凡應給王公將軍督撫提鎮御史諸臣火牌查照原額之數每十張減去八張止給二張以備諸臣必需專差齎進如題叅貪官巨愆

大計軍政薦舉奏銷錢糧冊籍等項之用蓋臣曾聞昔時有一巡按御史題叅大貪巨惡因機事不密被其伏黨中途將奏疏刼去雖今法令森嚴諒無此等之事然諸臣一切章奏若盡歸驛遞代傳恐姦徒賄通齎馳人役私開竊看亦不可定若仍量給火牌則人皆知緊要事件必定專差而不一槩發遞自可絕其姦

狡窺伺之念且隣省設有緊要軍機一時急欲打探亦得火牌方可前往故必須量留十分之二至於諸臣一切章奏除遇要務則專差齎馳遇緊急軍機則交安塘筆帖式飛送外其餘平常事務照例三件以上裹包封固編定號數填該衙門傳牌一紙交給附郭州縣令其轉發各驛逐遞傳齎凡到一驛立將本包傳牌交付明白仍取前驛某衙門某號本包傳牌到驛年月日時收管一紙呈繳該管州縣官轉報查考更責成經過地方巡撫督令府州縣官并安塘承

差一體編號不時稽查毋令沉滯遺失如有遲悞卽  
便嚴加究處再令在京各直省提塘於彰義門外設  
立人役如遇伊經管衙門傳牌本包一到立即接受  
送至該提塘家拆封照例將本章咨文分頭投送各  
衙門如此則在外諸臣之差可減十分之四蓋填用  
火牌十張一往一回實騎驛馬二十次今若減去八  
張令各驛代送有往無回實省八次再加仍給火牌  
二張往回四次而計之實共止騎馬十二次臣故曰  
可減十分之四也至於從京出外之差除



皇上因機密重務特遣專員者無庸議外其餘事件不妨斟酌緩急凡可從簡者亦應量減專差他如發解兵餉砲位等項往往撥章京披甲等數十員名以及百餘員名不等隨行押護在部臣雖從慎重軍需起見然沿途自有文武官兵何必動煩禁旅臣請嗣今以後此等大差止須差官一員隨帶跟役數名押解前往部臣仍先期由安塘飛咨沿途督撫提鎮令其預備官兵護送其官兵應多應少俱聽部臣酌定臣等沿途督撫准到部文立即飛行附近道府副將叅遊

等文武各官令其照數選撥弁兵文官仍親帶快役人等緊隨押護送出該管境汛交明前途文武官方回本處如此則由內出外之差或亦可減十分之三  
四至於安塘一項見設筆帖式一員撥什庫二名并督撫差承二名輪遞軍機捷如飛電此從古未有之良法允稱盡善但督撫差承人等既能一體飛馳從無貽悞則撥什庫二名似可撤去蓋伊等爲

國家傳遞機務晝夜勤勞自是可憫然久離鄉土不無室家之思往往有置買婦女人口者此亦人情之常

難以禁止惟是若輩口糧有限而養此餘人逐絲逐  
粒無非出於驛站項下臣請嗣今以後每塘撥督撫  
承差四名輪流飛遞仍留筆帖式一員令其稽查督  
率其撥什庫二名俱行卽撤如此則安塘仍舊軍機  
不致遲悞且可無濫費之弊若夫跑差員役狼籍之  
由總因於勘合火牌之外多帶餘人以致多騎馬匹  
或將部給火牌勘合竟行收藏不與各驛驗看或雖  
與各驛驗看而不照勘合火牌所填數目討馬勒要  
多騎橫行索詐在沿途驛站惟附近

京師者不畏強橫若愈遠則愈弱不敢與抗矣此雖非一日之弊而近來則又更甚臣因思勘合火牌之設原爲撥給驛馬之符乃伊等敢於多騎橫索者蓋以驛官卑微易於凌虐耳臣念驛官雖微而該驛印信亦係

朝廷欽給者也嗣後請令部臣將勘合火牌紙張稍爲加寬多餘空白之處責令各差員役凡過某驛必須該驛官於勘合火牌空白之處填明馬數人數鈐蓋驛印至伊等呈繳勘合火牌之時如無某驛印記者卽

以擾驛議處如是則各差稍有顧忌卽或多騎亦在情理之內不至十分強橫矣又伊等應騎馬匹并隨帶跟役俱填勘合火牌之內部臣寧於勘合火牌內量情增馬一二匹跟役一二名使之寬然有餘便於遵照不必扣定數目反致伊等不敷乘坐格外多索仍責成地方督撫諸臣行令各驛如有不照勘合火牌多索馬匹多帶餘人者立時飛星密報該督撫卽便出其不意親往盤詰查明在勘合火牌內者放令前行其多餘之人俱留下解部嚴究如此則多騎驛

馬橫索騷擾之弊自可少杜矣如蒙

皇上允行則內外差使俱減其各驛供應之費約可省十分之四費既省十分之四則各驛見在額設錢糧亦可裁十分之四臣屬見在額設站銀二十六萬有奇以十分之四科之每歲可省十萬餘兩其直隸各省錢糧多寡臣不能知然卽據臣屬江南半省之地節省此數則合各直省而計之每歲所節省者不下一百餘萬矣於以充軍餉而足

國用爲利豈淺鮮哉如此則見裁各驛之馬而猶勝於

增馬見減各驛之銀而實勝於加銀衝地之驛永無  
倒廢之虞衝地之官可免喪亡之患

國家既有裕餉之益而官民又復交受其利誠一舉而  
數善備焉者也或者曰

朝廷設立王公將軍督撫提鎮巡鹽御史令其掌守封疆  
料理庶務其所差員役例得給與火牌今何一旦議  
減如許恐一己之見如此而衆論未必爲便臣以爲  
不然查臣衙門向來額給火牌四十五張近又加增  
五張臣有七旬之父弱冠之子并弟姪輩俱在

京師臣豈不欲照舊專差往來通問因公及私以圖自便然人臣之職當以益

國爲主臣何敢求一己之便利而妨

國家之大計乎在諸臣諒俱有同心矣總之節費裕餉實爲今日至要之著但與其裁難裁之項必致貽悞軍機何如節應節之財兼可永甦驛困誠有利無害臣是以敢於力

請也再照酌省驛站錢糧事一案理應依限題覆但臣既有減差節費之



請應俟部臣議覆此疏之後如蒙

俞允容臣將臣屬驛站錢糧除裁去十分之四外其餘存  
留若干通盤打算酌量衝僻通融撥給使各驛均勻  
無偏枯之歎一併另疏

題給可也相應

題明緣係因兵餉不敷議裁錢糧事理臣謹密疏陳

奏貼黃難盡伏乞

皇上睿鑒全覽

勅部議覆施行

節省錢糧疏

題爲敬陳減差節費之法以裕軍需以甦驛困事竊臣  
將所屬驛遞按照地方衝僻確酌道里遠近通盤核  
算逐驛逐遞斟酌裁減檄行驛道覆核去後隨據該  
道僉事尙崇善詳稱該本道捧閱憲頒文冊內開列  
州縣驛遞孰衝孰僻里道遠近分別四等因驛定馬  
因驛定糧與夫水驛調劑仰見憲臺籌餉盛心至公  
至明備極苦心矣但憲檄內有令查有無損益之處  
卽速妥議聲明以憑酌奪等因故奉文惟謹細繹詳

慎不敢草率呈覆是以有寬限之請也今經謹慎詳  
審再四思維隨又將冊內開列逐驛細核所定夫馬  
馬價夫工草料廩糧槽鋤鞍屨藥材燈油等銀以及  
差夫分別并定大差額外僱募等項以各驛獸醫總  
編槽鋤等項之內裁各驛禁卒而徒犯責之夫頭兼  
管裁塘報馬快而緊急塘報公文併令馬夫輪流傳  
送裁抄牌傳差而差使經臨之時卽令馬夫傳旗知  
會酌權通變無不允協至懷寧縣馬厰蘆課銀兩向  
動站銀完納相沿已久今憲議令該縣於本厰設法

收取花利完納俾各驛無有異同在該縣自難推諉也若夫桐城縣完納馬田丁地銀兩向日夫多稻少無餘稻可以完納故亦動站銀完納今額夫旣裁允應改將每歲餘稻變價完納者也又舖兵工食等項別屬俱不取給於站銀而獨寧屬編給已蒙憲臺裁省畫一矣本道切見分別衝僻四等驛驛皆得其宜此衝僻之別不容議者也衝驛差繁不能限定十分裁四僻驛差稀不能守定十分裁四故馬因驛定而僻驛夫馬馬價夫工等銀視衝驛遞減此又夫馬馬

價夫工等銀之不容議者也至差夫一項向來多寡不均今則衝僻俱有定額又定有大差經臨照例僱募另行請銷并水夫亦做旱驛之例各該夫頭及全裁雷港一驛又裁米豆等船歸埠以省工食修艙之費惟是雷港驛既裁則東流應差之船不無道遠又荷憲籌政撥貴池二船以協東流接濟至安池等屬解給各項站船水手工食修艙等費今各船除發歸各埠者編款已裁其收入水驛并見存船隻既已無多則工食等項誠如憲檄應卽於本驛支給無庸另

解悉皆斟酌得宜變通盡善者也本道何能復贊一  
辭除奉憲冊抄分檄十府州一體遵照外理合繕  
造清冊詳覆等因呈詳到臣據此該臣看得驛站之  
設所以重

皇華而速機務事誠巨也但地方有衝僻之不同故額編  
錢糧有多寡之不等查臣屬地方衝僻有歷來相沿  
無異者亦有昔僻今衝昔衝今僻者必須因時制宜  
斟酌緩急而通融均撥始可免偏枯之歎矧今加意  
核裁則址存備支錢糧已屬甚少若不以前之衝

僻妥酌而槩照向日之額編議減則必大支之弊矣是以臣前疏

題明容臣將原編新加驛站錢糧二十六萬減四分之外通融撥給等因聲明在案也

疏已蒙

皇上俯採芻蕘

敕部覆允行臣造冊具

題臣謹通盤合算斟酌時宜將所屬六十州僻分爲四等以夾溝睢陽大店固鎮王莊

定遠張橋護城店埠金斗派河三溝梅心呂亭陶冲  
青口小池楓香滁陽大柳池河懷寧練潭二十五驛  
遞爲第一極衝東流建德貴池青陽南陵并腰站公  
館蕪湖當塗八遞爲次衝歙縣休寧婺源祈門黟縣  
績溪涇縣旌德太平石埭高井鎮巢百善泗州盱眙  
天長全椒和州含山十九州縣驛遞爲稍衝內婺源  
二邑向來原未設馬但接壤江右浙江二省目今鄰  
寇逼近邊報軍情必須馬匹馳遞近年皆撥別邑之  
馬協濟勉支今各屬之馬俱已裁減不能再爲撥協



應將婺祁二邑照歙休等縣之例一體各設馬五匹  
以飛馳他如寧屬之宣寧二邑太屬之繁邑廬屬  
之無六二州及廬英霍三邑鳳屬之壽潁亳三州及  
懷五虹霍蒙潁太七邑滁屬之來邑并廣德建平二  
十一州縣則俱為僻遞內有廬屬英霍二縣尤為最  
僻向來止設班驢六八頭不等今查英霍二縣處萬  
山之中逼鄰楚豫山險之境伏莽良多誠恐一時姦  
宄竊發如上年逆犯羅寰伯等之事必須飛馬馳報  
方能擒勦非驢頭可能迅速故亦照最僻州縣之例

各改設馬二匹其銅陵一縣向雖設馬然縣治在於江濱嗣後應止於水驛應付夫船其額設之馬相應全裁至於各驛遞每馬一匹所有飼馬草料馬夫工食及槽鋤鍋桶棚廠柴薪燈油與治馬之藥材獸醫以及鞍屨鞦轡鞵皮條又有買補倒馬之價與供應過往勘合火牌差使廩糧皆屬斷斷必需之欸查草料一項各驛遞有每馬日給八九分者有日給一錢者內日給一錢者十居七八而日給八九分者十居二三今從節省錢糧起見其日給八分者既能供

差無悞則他驛又何必照舊多給嗣此以後相應將各驛遞馬匹每日槩給草料銀八分又馬夫工食一項每名日給三四分不等今擬極衝驛遞內日給四分者俱照舊支給四分有日給三分而又以捐置馬田租稻加給者亦俱率循舊章其次衝稍衝與僻遞原給三分者照給三分內有原給四分者改爲日給三分又有日給三分而又加給馬田租稻者改爲日給二分租稻仍行加給若夫按馬設夫之處大抵俱屬十馬八夫間有十馬七夫者今旣減專差將各省

齋奏火牌俱改爲傳牌令馬夫傳遞則極衝各驛必須一馬一夫方可輪齊庶各夫自走自差自惜自馬可無指勒需索推諉貽誤之弊其次衝驛遞則仍照舊例十馬八夫至於稍衝驛遞改爲十馬六夫僻遞改爲二馬一夫可也又馬價一項臣屬驛遞例係按年編銀一十五兩以爲買補之用雖徽寧廣三屬內有不編馬價者然遇馬匹倒斃之時總於額編站銀內通融動支買補歷年奏銷在案今旣徹底釐清白應計用編設欸銀但當此節省錢糧之際難以一例

編價臣細加酌核除極衝次衝驛遞全編馬價尙有不敷之虞俱照舊每馬一匹編價銀一十五兩無庸更議外其餘稍衝并僻遞俱可量爲遞減今酌將稍衝驛遞每年止編馬價七兩五錢二年方准報倒買補僻遞馬價每年編銀五兩三年方准報倒買補如有未及年限而倒斃者俱著各該州縣自行購賠不得動用額設馬價又廩糧一項各州縣驛遞額編有一處數百兩者有一處數十兩者亦有原無編款總於額銀內動用者向係參差不等今內外之差俱減

則此欵亦應大爲節省臣擬按馬編設廩糧極衝驛  
遞每馬一匹每年設廩糧銀三兩次衝驛遞每馬一  
匹每年設廩糧銀一兩五錢其稍衝并僻遞經過勘  
合火牌差使稀少卽偶有應付亦屬無多俱可不必  
另編廩糧也又槽鏹鍋桶棚廠柴薪燈油藥材獸醫  
鞍屨鞦轡鞵鏡皮條等項則無論衝僻乃有馬必需  
之項舊例每馬一匹編銀數兩至十餘兩不等亦有  
竟不編設而總於額銀內通融動用者殊爲偏枯不  
勻之極今臣再三酌核加意減省每馬一匹槩編銀

三兩使衝僻畫一無多寡偏枯之莫可方差夫一項  
供應勘合火牌軍需餉鞘乃係必需之款查各州縣  
驛遞額設之夫少者一二十名多者一二百名多寡  
不一甚是不均每遇大差經臨額夫仍不足應付往  
往額外僱募臣再四思維額設各夫亦有供差之役  
亦有坐食之日若照舊全留則非節省之法若盡行  
全裁則如解餉解砲等大差一時驟到動輒需夫數  
百名彼時額夫既裁而僱募小民又復畏避不前則  
勢必遲悞軍務所關不小今各按衝僻量設夫頭極

衝驛遞每驛設夫二十名至三十名不等次衝各遞  
各設夫十名至十五名不等稍衝驛遞各設夫八名  
俱仍照舊責成各該州縣官綜理供應僻遞之夫俱  
行全裁凡用夫無多之差俱令額設夫頭供役荅應  
如遇解餉解跑等大差經臨額夫不足應付則責成  
各夫頭分頭僱募其額外僱夫既無額編欸銀可用  
應另動正項給發照例於年終報部開銷如此則無  
差之時坐食者少大差驟到應募有人錢糧既不糜  
費而軍務亦可不悞矣其夫頭工食向例日給三四



五分不等今酌改爲槩給三分內有向給三分又給馬田租稻一升者今減爲日給二分仍照馬夫之例每月加給馬田租稻一石以資餬口合而計之總不出三分之數也至於臣屬水路八驛濱臨大江供應江楚各省水路往來差使俱屬最衝惟是望江縣雷港一驛地處江北坳區離江三十餘里向來一切差使從江南東流縣水驛應付之後必須遶過江北灣泊而赴雷港討取夫船更換前往至江西彭澤縣交替緊急差使每爲濡滯查自東流以抵彭澤止九十

里較之其餘各驛道里相去俱不甚遠自東流應付儘可直達彭澤何必多由雷港反致滯遲所有雷港一驛錢糧應竟全裁充餉至於水驛之夫每驛向設五十七名不等今除雷港驛全裁外其餘俱照旱驛設夫之法減爲二三十名不等如遇大差經臨額夫不足應付亦令水驛夫頭分頭僱募但今正當調遣官兵之際不時需用船隻添僱繹夫甚多實與旱驛不同其額外募夫之費卽於所設支關銀兩內動用可也又各驛應差站船原共四十九隻大小不等

但尋常差使用小船之時居多而用大船之時少除  
裁雷港驛差船二隻外其貴銅東三縣櫓荻二驛米  
豆大船共五隻相應一併裁去俱照宣樓船隻歸準  
之例聽其裝載客貨以資餬口遇有大兵大差之時  
預行提集照例給發差銀一體裝送則既省工食修  
船之費而公差亦可無悞矣又安徽寧池太廣六府  
州馬夫差夫工食不敷各屬向有捐置馬田租稻歷  
年支給報銷在案今馬夫差夫既俱裁減則每年約  
有餘稻三千餘石亦應於年終報部充餉者也又各

驛見設馬三千匹今共裁馬一千七十三匹卽就近  
交給各驛遞收養以備補倒馬缺額在於本年站銀  
內照額編馬價每匹十五兩之數計算扣出站銀一  
萬六千九十五兩又驢十四頭每頭酌變銀二兩共  
變銀二十八兩一併聽部撥充餉再查安屬練潭一  
驛見係懷寧縣縣丞兼理然該縣丞有催糧之責不  
便久令兼攝應請以所裁雷港驛驛丞古必達改爲  
練潭驛驛丞以專職守廬屬之店埠驛係調高井驛  
驛丞管理鳳屬之定遠驛係調百善驛驛丞管理以

上三驛應請各給印記庶於該驛錢糧事務有所憑  
信而勘牌過臨可以遵例印蓋至廬屬之鎮高等驛  
鳳屬之百善驛泗盱天壽毫以及全和含等各州縣  
向來亦係衝途因自十三年江廣軍機緊差往來如  
織安廬鳳三府屬大路各驛馬匹不敷應付是以臣  
於欽奉

上諭事案內會同查驛部員將以上各州縣驛遞之馬調  
撥大半協濟大路各衝驛故大差經過鎮高等驛者  
有將原騎大路衝驛之馬越過數站苦累不堪况先

已撥協衝驛今又裁減以上各州縣鎮高等驛遞萬  
難荅應大差矣然鎮高等驛非南北必由之路凡內  
外差遣人員儘可不必遶道經由嗣後前赴江廣之  
差必由安廬鳳三府屬大路衝驛前往則有馬有夫  
自無貽悞或由鳳屬前至江寧省城者則由滁陽大  
柳池河等驛而往均有夫馬應付此外稍衝并僻地  
各州縣雖各留設馬五匹二匹不等不過僅備邊報  
軍情及本地意外緊急機務之用並無應差夫馬倘  
差遣人員迂道經由不特該地方官無術應付且恐

華文書局影印  
貽悞緊差所關非小應請

勅下部臣嗣後差出人員必令務由前項有馬驛路而行  
不得遠道以致有悞要務合而計之臣屬原額新加  
夫馬水驛錢糧通共二十六萬四千三百三十八兩  
零但差使繁多是以各屬紛紛呈詳莫不以賠累難  
支身家性命爲憂涕泣哀籲然軍興孔亟之時臣又  
屢准裁減驛站錢糧之部咨不得不曲體司農仰屋  
之意先於欽奉

上諭事案內將鞍廐等款核裁咨部去後續又准部文裁

減臣再三核酌大抵竭力勉裁連鞍廐等款不過裁至萬金而止既無補於司農又大損於驛遞是以反覆籌維將驛遞艱苦實情

題明并陳減差節費之法且云如蒙

皇上允行則內外差使俱減止就臣屬而論見在額設站銀二十六萬有奇可減十分之四計裁銀十萬餘兩等因已經廷臣議覆奉有依議之

旨欽遵在案今臣實裁站銀十二萬九千二百四十三兩零止留站銀十三萬五千九十五兩零除欽奉



上諭事案內裁過銀七千七百三十兩零已於奏銷十四  
年驛站錢糧冊內開明今此案內每歲實裁銀十二  
萬一千五百十三兩零又裁租稻三千餘石又裁馬  
驢變價銀一萬六千一百二十三兩較臣原

題裁減十分之四計之除馬驢變價銀兩外計每歲多  
裁站銀二萬三千五百餘兩租稻三千餘石此乃臣  
念需餉浩繁故於難裁難減之中逐一勘酌凡可勉  
強節省俱經竭力裁減稍資軍需是以所裁銀兩有  
逾於前疏之數也相應一併密疏

題明除冊送部外緣係節省錢糧并定驛站衝僻以爲  
永遠章程事理貼黃難盡所有微臣看語伏乞

皇上睿鑒全覽

勅部議覆施行

